






A26

v66



John Carter Brown.





HISTORIA DE ABIPONIBUS

EQUESTRI, BELLICOSAQUE
PARAQUARIÆ
NATIONE

LOCUPLETATA

COPIOSIS BARBARARUM GENTIUM, URBUM,
FLUMINUM, FERARUM, AMPHIBIORUM, INSECTORUM, SER-
PENTUM PRÆCIPUORUM, PISCUM, AVIUM, ARBORUM
PLANTARUM, ALIARUMQUE EIUSDEM PROVINCIÆ
PROPRIETATUM OBSERVATIONIBUS,

AUTHORE
MARTINO DOBRIZHOFFER

PRESBYTERO, ET PER ANNOS DUO DE
VIGINTI PARAQUARIÆ MISSIONARIO.

PARS SECUNDA.



VIENNÆ,
TYPIS JOSEPHI NOB. DE KURZBEK
CÆS. REG. AUL. TYPOG. ET BIBLIOP.

ANNO 1784.

JOHN C. BROWN

SPICE



HISTORIA DE ABIPONIBUS.

CAPUT I.

De Abiponum territorio, origine,
& variis nominibus.

Bellicosa Abiponum natio in Chaco Provincia,
araquariæ omnis umbilico, confidet, rectius di-
m, vagatur; Haud illis equidem certæ sedes, nec
ii limites, nisi quos vicinorum metus fixerit. Hic
absit, seu ab Austro ad Boream, seu a solis

ortu ad occasum latissime quaquaversum, longissime-
 que excurrunt, prout vel hostis invadendi opportunitas,
 vel evadendi necessitas iter svaserit. Boreale litus
 fluminis, quod jam magnum, jam rubrum Hispani,
 Indi Inatè vocant, natale Abiponibus solum
 extitisse superiori seculo, ex libris, tabulisque co-
 ævis, liquet. Inde jam belli, quod Hispani saltens-
 es ineunte hoc seculo Chaco intulerant, declinan-
 di, jam Australibus Hispanorum Colonis inferen-
 di gratia Austrum versus demigrarunt denique,
 Valle, quam Calchaquies, equestris item natio, o-
 lim tenere, occupata. Hoc territorium, quod ad
 ducentas prope leucàs patet, Hispanis nec quidquam
 repugnantibus insident etiamnum, ac suum putant.
 Cæterum quibus olim e terris in has Paraquariæ
 oras delati sint Abiponum majores, nullus est vel
 conjecturæ locus. Illos trajectis aquis ingentibus,
 asinò vectos huc quondam adventasse, nobis edixe-
 rat Ychamenraiquin Princeps Abiponum in Sancti
 Hieronymi oppido Caziquius, pro Delphica tripode,
 pro nationis tabulario apud suos habitus, se-
 que id ab antiquioribus accepisse, affirmavit præte-
 rea. Verum primis ultima non cohærent, ut adeo
 inter fabulas rejiciendum. Neque, quod quidem
 sciam, usquam præsto sunt literarum monumenta,
 e quibus verisimile quid de hoc exculpas. At ve-
 ro hæc de Abiponum in Paraquariam adventu con-
 troversia ad cæteros perinde Americanos pertinet,
 centies excussa, vix unquam, nî fallor, dirimenda.
 De hoc equidem argumento Solorzaus Hispanus
 undecim, si rite memini, sententias recenset, rejicit-
 que singulas. Conjecturas alias adfert noster Gumilla in
 historia sua de fluvio Orinoco illustrato, alias alii.
 Quidquid dicas, erit, quod jure opponatur, & quod
 opponentibus respondeas, ægre invenies. Sæpius mihi in
 men-

mentem venit cogitare : Americanos ex ultimo Europæ septentrione olim ortos Cœli mitioris desiderio in illos terrarum tractus, quos hodie Americam dicimus, paulatim irrepsisse, alicubi forsan cum Europæ finibus conjunctos, tenui certe freto disjunctos, quod vel lintribus, vel quocunque cymbarum genere, vel natatu transmiserint. Morum, rituumque, queis Lappones, & novæ zemblæ coloni uti dicuntur, imitationem quamdam in Abiponibus non obscure deprehendimus, ut alibi opportunius adnotabo. Hos barbaros inñata quadam propensione acus magneticæ instar ad septentrionem, ceu ad patrium quondam solum inclinare semper observavimus; Casu enim sinistro fors irritati: *Abeo septentrionem versus Mahaik quer ereëgem*, voce minitabunda fere exclamant. Quamvis ejusmodi cominatione illud duntaxat significare mihi videbantur: Redituros se ad Borealia illa Paraquariæ loca, ubi illorum gentiles barbari extra Hispanorum obedientiam, extra Christianorum disciplinam arbitrato suo vivunt etiamnum.

Verum concedamus id gravissimorum authorum opinioni: Americanos ex septentrionali Europa oriundos esse, cur, amabo, Indi ex utroque parente Americano prognati barba carent omnes, qua tamen Boreales Europæ populi abundant? Aeri, climati, Cœli regioni cave id tribuas; Etsi enim plantas aliquas ex Europa in Americam translatas celeriter, insigniterque degenerare videamus, experimur tamen Hispanos, Lusitanos, Germanos, Gallos in Europa egregie barbatos in nulla Americæ parte imberbes evadere, eorum item filios, nepotesque barba Europæam originem luculentissime testari. Nostra ipsorum id experientia didicimus, quibus post viginti

annos in Paraquaria actos nunquam barba, sæpe tonfor, ac novacula defuit, forficulis diu, frequenterque supplenda. Si quem Indum mediocriter barbatum conspexeris, illius vel patrem, vel avum Europæum fuisse, quamvis mater Americana fuerit, nil dubita. Rarissimi enim pili, qui Indis utrinque Americanis lanuginis instar circa mentum hic, illic aliquando pullulat, barbæ nomine videntur indigni.

Paraquaria quidem Africæ propinquior. Ecquis tamen ex hac in illam demigrasse incolas dixerit? Secus enim Paraquarios perinde, ut Afri sunt passim, atri, certe fusci, plumbeive coloris esse oporteret. Angli, Hispani, Iustitiani, queis Africanorum mancipiorum seu mercatus, seu famulatus est familiarior, nōrunt plane ex utroque parente Afro, ubi ubi terrarum, nigram procreari sobolem, cum tamen in Paraquaria proles ex Indo, Indaque natæ coloris sint Candiduli, quem ætate procedente sol ardentior, fumusque ex foco, quem diu noctuque suis alunt in tuguriis, tantillum obscurat. His accedit: Americanos non crispis, laneisque, ut Afri, Crinibus esse, sed planissimis, licet semper nigerrimis. Sed absint hæc omnia, ingens Oceani, qui Africam ab Americæ Australis litoribus longissime separatur, latitudo tractum reddit difficilem, & liceat mihi dicere, prope incredibilem illo scilicet ævo, quo acu magnetica destituti nautæ vix extra litoris conspectum navigare ausi. Turbinis violenti procella ad Americæ ripas ejectos Afros dices? Verum qua, quæso, via feræ nocentiores eo eluctata sunt? Istud enimvero novis arduam quæstionem intricat difficultatibus. Paraquariæ litoribus Bonæ spei promontorium objicitur, cujus incolæ Hottentotti moribus

ribus barbaris aliquam Indorum Paraquariensium imaginem exprimunt, corporis tamen conformatione, ritibus, lingua penitissime differunt; Id quod libellus me docuit a Germano scriptus, qui in illo Bonæ spei promontorio diutius quondam fuerat commoratus. Erunt forsitan complures, qui Asiam Americanorum matrem, & nexu aliquo, quem nemo adhucdum detexerit, cum America colligatam majori jure contendant? Per me licet. Neque, si Americanos ad unum omnes ex luna delapsos affirmaveris, repugnabo, quin expertus Indorum instantiam, animorum volubilitatem, mutabilitatemque, lunæ propriam, pedibus, manibusque in tuam irem sententiam, ni sapientum omnium cachinnos jure reformidarem. Ex incredibili linguarum varietate, quæ apud innumeras Americæ nationes vigent, nullus de illarum origine est conjecturæ locus. Ne rude quidem lineamentum Europæ, Africanæ, Asiaticæve linguæ per universam tam diverso ore loquentem Americam usquam deprehendas. Hæc mea, hæc aliorum, quibuscum rem contuli, est sententia. Verum de Americanorum origine copiosius disserere, hand mei est instituti. Consuile, si lubet alios, quibus propositum erat hoc argumentum pertractare. Quo tamen plures legeris, plus dubitabis. Illud certissimum, hac in quæstione, quot capita, totidem sententias esse.

Posteriores tamen animos ne despondeant. Spes equidem affulget amplissima, adfore aliquando tempus, quo Americæ, cum aliqua noti orbis parte connexio, certe propinquitas major notescat, si modo Angli, Russique suas ad maris, terræque angulos omnes explorandos navigationes prosequantur porro, quæ nostra ætate ab illis sumptibus, periculis-

culisque maximis susceptæ optato quidem successu, non omni tamen fructu caruerunt. Quamvis enim sagacissimi hi marium speculatores ex septentrione ulterius semper progressi gentes, insulasque novas (quarum celebrior othaita) fretaque veteribus ignota detexerint, vicinaque Americæ, Asiæque litora eminus videre sibi visi sint, haud tamen illa sunt assecuti unquam. Idem prope illis, quod Moyfi olim, fatum, cui altissimo ex monte Nebo Palæstina diuturno itinere quæsitæ a Deo ostensa quidem est eminus, ejus tamen ingressus neutiquam concessus. Catharina secunda Russorum augusta hodie Imperatrix, victoriis, belli, pacisque studiis clarissima uti quidquid ad imperii sui splendorem, ad rei militaris, navalisque perfectionem, ad literarum, artiumque nobilissimarum augmentum facere videtur, sibi cordi sumpsit maximopere, sic nullis perpercit sumptibus, ut ignoti Oceani recessus, vicinaque Europæ Boreali Americæ, Asiæque litora tandem detegerentur. Id negotium navarchis dexterrimis datum. Behring, & Tschirikow Capitanei duabus cum navibus in ochotz constructis ex Kamtschatka portu Austrum versus excurrerunt. Post varios casus, naviumque, ut res poscebant, flexus terras conspexerant eminus, quas Americanas esse, & observatis ad nauticæ regulas omnibus gradus pauculos abesse putarunt a Californiæ litoribus septentrionem inter, & occasum (Nord-west) sitis. Insulas adhuc ignoratas, gentes Americanis Borealibus perquam similes deprehenderunt præterea. Videbantur sibi votorum metam attigisse. Verum ante victoriam triumphum cecinere. Nam Capitaneus Krenizin anno 1768. idem negotium, idemque iter binis cum navibus aggressus easdem quidem, aliasque novas insulas vidit, sed artificii omni-

omnibus nequidquam usus nusquam videre potuit illas terras, quas illius antecessores Behring, & Tschirikow vidisse sibi videbantur, ac pro Americæ continente habuerunt. Delusos fuisse illorum oculos Krenizin ajebat, dum insulas arduis montium jugis insignes Americæ terram firmam putarunt, eodemque prorsus loco, ubi Americanum territorium illi perperam sibi finxerant, quaquaversus mare longe, lateque patens a se esse reperiunt. Verum qui erroris, credulitatisque nimis arguebantur antecessores in successorem suum Krenizin culpam omnem terræ illius non conspectæ retorserunt causantes: Illum nimis septentrionem versus navigasse; si enim Austrum versus proram flexisset plusculum, haud dubie, quæ ipsi viderant, ab illo spectanda fuisse, affirmarunt. In re tam obscura quis sententiam ferat? Ego quidem, si aberrarunt forsitan, utrosque excusandos, puto. In mari tam procelloso, sub Cælo densis nubibus sæpe obducto sol in ipso meridiei puncto plures interdum dies observari haud potest, neque alia ratione, quo demum in situ versentur, resciri. Nebulæ in longius quandoque tempus productæ obstant oculis, & rerum etiam vicinissimarum eripiunt conspectum. Expertus hæc scribo. Lusitani nautæ e mali supremi fastigio detexerant Maderam insulam, quam nos pro nubecula habuimus. E contrario per Mediterraneum in Italiam renavigantes cum Norvegis nubem putavimus Minoricam Balearem insulam. Adeo Cæli obscuritate navigantium oculi non raro falluntur.

Ex repetitis, licet non nihil discordibus Russorum observationibus arguant plerique omnes, ex Europa septentrionali ad Americam, Asiamque tran-

situm per mare patere navigantibus, illasque orbis
 partes intervallo haud maximo a se sejungi. Quid
 si igitur Tartari, gens vaga, per varias litori vici-
 nas insulas, ceu per scalas totidem, ex alia ad
 aliam, ac denique in Americam paulatim irrepere?
 Id fieri potuisse sibi persuadeant alii; Ego, ut id
 factum esse credam, a me impetrare haud possum.
 Si enim Navarchi nauticæ scientissimi, acu magne-
 tica, navibus firmis, nautis idoneis, aliisque ad per-
 rumpenda maris, ac Cœli tumultuantis obstacula
 præfidijs liberaliter instructi, eandem viam tentatis
 frustra omnibus toties remensi scopum necdum
 assecuti sunt suum, ecquis demum existimet, bar-
 baros stupidos, navicularia arte vix leviter tinctos,
 acus magneticæ usu, necessariis ad observandum in
 meridie solem instrumentis destitutos, navigiolis im-
 becillis, vel ex arbore cavatis, vel ex arborum cor-
 tice, ferarumve pelle concinnatis per pelagi pro-
 cellosi longiores tractus ad ignota Americæ litora
 eluctatos fuisse? Nisi constet, hæc tenui solum
 freto ab Europa, Asiave separari, quod felicissimus
 illorum marium scrutator Cook Anglus dicitur asse-
 ruisse. Hic enim cum duabus navibus, quibus Re-
 solution, & Discovery nomen, e California iter
 prosequens Russorum in mappis errores detexit,
 queis iterum, iterumque deceptus, gravissimeque,
 dum iis fidem adhibuit, periclitatus est, ut Angli
 scribant. Navigatione septentrionem versus juxta
 continuam litorum Americanorum seriem produ-
 cta, tot meditationum, indagationumque finem,
 fines scilicet, extremos Asiæ, Americæque detexit,
 quas freto sat angusto a se dividi observavit, in
 quo septentrionem versus tantillum progressus ad-
 vertit mare minus profundum. In quo gradu lon-
 gitudinis, latitudinisque hos Asiæ, Americæque fines
 Cook

Cook deprehenderit, necdum, quod sciam, ab Anglis vulgatum est. observato tamen navium cursu, quem sagax hic navarchus tenuit, fors citra erroris periculum licet nobis conjicere: Has Asiæ, Americæque extremitates intra gradum sexagesimum quintum, & septimum latitudinis, & in ducentesimo circiter gradu longitudinis a meridiano primo in Greenwich collocato sitas esse, quam longitudinem, latitudinemque terræ Nitada, seu Americæ D. Maty stachtan olim designavit. Verum ab hoc multum discrepat mappa geographica Russorum imperii ab Engel in lucem edita; Hic enim Americæ extremitatem Austro, occasuique multo propius admovet. Hæc dubia, controversiæque dissipabuntur, spero, ut primum Angli vulgaverint ipsas ephemerides navigationis ultimæ præclarissimi Cook, qui nisi barbarorum furentium telis succubuisset, tot marium prius, ac tempestatum victor, plurimum lucis in re tam obscura nobis superstes affudisset. Avidissime expectamus, quid demum nunciaturi sint Russi, qui paucos ante menses ad speculanda illa maria, resumendumque controversiæ examen excurrerunt. Planius ista, uberiusque pertractat Clarissimus Robertson.

Ex Europa septentrionali ad occasum vergente (Nordwest) in Americam transitum quoque navigantibus patere, nemo dubitat. Anno 830. Norvegi detexerunt Groenlandiam, & coloniis istic constitutis reviserunt frequenter. Angli quoque, Sueci, Dani &c. ad extremas illas septentrionis oras delati, sed jam maris glacie (quæ Joanne Miinkens Navarcho Dano teste, alicubi trecentos, quin trecentos sexaginta pedes alta est) jam barbarorum obluquantium ferocia ulterius progredi prohibebantur. Qui superiore seculo Groenlandiam lustrarunt, asserunt,

runt, illius litora Borealia, qua occasum respiciunt (Nord-west) angusto duntaxat freto ab America separari, & maris sinum, ad quem illud fretum navigantes ducit, probabiliter cum America connecti, Groenlandos cum Americanis commercium habere, barbaros Americanos, quos Esquimaux vocitant, a Groenlandis corporum conformatione, vestitu, lingua, vivendi ratione vix differre. Hæc Cranzius in sua de Groenlandis historia. Quæ quidem omnia si ut verisimilia, sic vera, certaqué forent, nullus porro de Americanorum origine dubitandi locus superesset. Cum tanta sit per immensam Americam nationum varietas, cumque istarum singulæ formæ, lingua, moribus, ritibus, vestibusque insigniter differant, veri semper mihi similis visum est, non eandem omnibus Americanis originem, patriamque olim exstitisse. cum Americanis populis sat diu versatus rideo, spernoque illos scriptores, qui affirmant: Eum, qui unum Americanum viderit, vidisse omnes; Indum Indo, ut ovum ovo, omnino simillimum esse. Verum de hoc argumento, quod multorum fatigat curiositatem, fusius, & prope invitus disserui; Neque enim mei est instituti.

Quamvis igitur, unde Abipones mei olim venerint, asseveranter tibi affirmare non ausim, dicam tamen, ubi nostra ætate versentur. Ingens terræ portio, quæ a septentrionibus Austrum versus flumine grandi Inatæ, & Sanctæ fidei territoriis, ab oriente ad occidentem jam Paraquayi fluvii solius, jam cum Parana conjuncti litoribus, & Jacobopolitana regione clauditur, stativa Abiponibus præbet varia in contubernia distributis. Agriculturæ, fixique ac stabilis domicilii impatientes ultro, citroque comëant idem

identidem. Jam aquationis, cibariorumque opportunitas, jam, dum propinquum sibi hostem suspicantur, securitas perpetuæ migrationis adfert necessitatem. Illos, qui latrunculorum ludum probe callent, imitantur, Abipones, latronum dexterrimi; Strage Hispanorum coloniis Australibus illata Boream versus longissime recedunt. Assumptionis urbe septentrionali cædibus, latrociniiisque vexata ad Austrum celerrime properant. Si Quaraniorum oppida, si Correntinam urbem infestis petierê armis, ad latibula, quæ occidentem versus norunt, suis se cum familiis recipiunt. Si denique Jacobopolitanum, si cordubensem agrum invasere, inter paludes, insulas, arundineta, quæ Parana passim offert, se, suosque contubernales abdunt sagaciter. Quo enim remotiores, magisque occulti, eo certius oculis, manibusque ulticibus Hispanorum se subducunt, qui viarum vel ignoratione, vel asperitate impediti acceptas a Barbaris injurias vindicare, ut ut velint, minime possunt. Lacus interdum, palusve interjecta, quam Abipones lusitando transmittunt, Hispanos equites insequentes ad reditum cogit.

Univerſa Abiponum regio pagum, quin ne turgurium quidem unum ſtabile quamvis non habeat, vix tamen locus ſuppetit ullus, aliquo qui nomine non eſſet inſignitus, quod vel eventui memorabili, vel cuiſiam vicinæ illius proprietati originem debet ſuam, uti Hebræis quondam erat familiare. Juvat hic celebriora quædam loca adnotare: ſic Netagſanac Lpátage, nidus avium, quæ ciconiis hujatibus perſimiles hoc loco prægrandi in arbore quot annis nidificant. Liquinſánala crux, quæ iſtic olim ab Hiſpanis fixa. Nihírenac Leénereſ quie ſpecus tigris-

gridis. Paët latet ubera confrica. Atopèhènia
lauaté Porcorum aquatiliū diverforium. Lareca
caëpa Arbores altæ. Lalegiacavalca Reculæ albæ.
Grando immanis magnitudinis hoc quondam loco
delapsa bestiarum tantam multitudinem mactaverat,
ut omnis latè campus cadaverum siccis ossibus al-
besceret. Pluribus aliis locis fluvii, a quibus aluun-
tur, nomen præbuere. Notiores sunt: Evò'ayè
Parana, vel Paraquayus fluvius. Latè flumen gran-
de, vel rubrum. Ychimaye Hispanis Rey, Rex.
Neboquelatèl mater palmarum, Hispanis Malabrigo.
Narahagem Inespin. Lachaoquè nâuè, ycalc,
ycham &c. Rio negro, Verde, Salado &c. flu-
men nigrum, viride, salsum &c. Omitto minoris
notæ amnes, qui sine numero, haud tamen sine
nomine.

Dixi, Abipones seculo superiore, ad fluminis
magni Inatè ripas habitasse, subindeque, dum sal-
tenses, aliæque e Tucumanis conflatæ copiæ majori
armorum, quam victoriarum strepitu Chacum in-
vaserant, ad Australes Paraquariæ plagas descendisse.
Año tamen labentis seculi sexagesimo multæ Abipo-
num familiæ rebus jam tranquillis ad Magni flumi-
nis ripas partim, partim ad remotiora trans flumen
loca Borealia recesserunt, Hispanorum Australium
metu, quibus repetitis assultibus multum damni de-
dere. Quid quod & Colonia postrema Abiponum,
cui a Rosario nomen inditum, a me condita, ac
per bieñium procurata Boream versus a flumine gran-
di decem prope leucas aberat, qua quidem in sta-
tione barbaros Tobas, qui Nataquebit se se vocant,
paulo ante contubernia habuisse sua, nobis consta-
bat. De hac colonia alius erit differendi locus.

De Nationis, quæ historiæ meæ argumentum, nomine dicenda per transeñam paucula. Abipones a Mocobiis, Tobis, & Yapitalakis vocantur Calla-gaik; A' Quaycuriis Comidi; A' Vilelis Luc-uanit, quod homines ad Austrum habitantes significat. Ab Hispanis olim Callegaès, vel frontones dicebantur ob largam frontem, cum sineipitis comas ad trium digitorum latitudinem evellant, per quam affectatam calvitiam frons extenditur. Erit fortasse etymologus ridiculus aliquis, qui putidam eruditionem affectans vocabulum *Abipon* a Græco *ἵππος*, equus, & A privativo absurdè deriveret, ut, quemadmodum homines literarum, vel religionis Divinæ expertes amulos, atheos dicimus, ita Abipones, quasi Ahi-pones homines sine equis appellemus. Quo quidem quid absurdius, veritative magis repugnans dici potest? Etsi enim, ut Americani cæteri, ante Europæorum adventum equos ne de nomine quidem nôrint, hac tamen ætate nullam esse existimo per omnem Americam nationem, quæ equis abundet magis, quam Abipones. Illorum in coloniis novi non paucos quadringentorum, quin & plurium equorum possessores. Neque id mirum cuiquam. In illis terrarum tractibus versantur, ubi infinita equorum sylvestrium agmina per immensam planitiem oberrant, qui nemine mortalium repugnante nullo negotio capiuntur, brevissimo temporis intervallo perdomantur, ac citra omnes sumptus ab altrice natura conservantur; Campus equidem aquam illis, pabulum, stabulumque ministrat semper. Non desit Abiponi industria, equi, quotquot voluerit, nunquam deerunt. Bello ardente, una sæpe incursione ter, quaterve mille equos Hispanorum e prædiis quondam rapuere.

CAPUT II.

De nativo Americanorum colore.

Pictores Europæi hominem fusci coloris, distortis, sinisque naribus, minacibus oculis, vasto abdomine, a capite ad calcem nudum, ac hirsutum, Fauno, quam homini omnia similiorem, verbo monstrum hominis phætra, arcu, hasta, vel clava armati, plumis verficuloribus coronati dum penicillo expriment, videntur sibi Indi Americani germanam imaginem egregie, feliciterque perfecisse. Et vero antequam Americam viderem, tales mihi Americanos ipse meo in cerebro depinxi; sed oculi meum me deducere errorem. Pictores, quæ fidem adhibui, Americanæ gentis Calumniatores palam dixi, ac poetarum more fabulantes; Hi res sibi objectas verbis pingere, illi penicillo fingere impune solent. Plurimarum nationum Indis innumeris a me cominus spectatis illa formæ vitia, quæ passim Americanis affinguntur, nusquam deprehendi. Si verbis diffidis, oculis, quæso, crede meis. Americanorum nemo æthiopum more niger est, nemo candidissimi, ut Germanorum, Anglorum, Gallorum plurimi, est coloris; Multi tamen multis Hispanis, lusitanis, Italis candidiores. Id mihi exploratissimum. Vultu sunt Americani albicante, quæ tamen albitudo apud nationes aliquas ad triticium, apud alias ad obscuriorem propius accedit colorem. Quod discrimen jam a Cœli, sub quo degunt, regione, jam a vitæ, quam profitentur, rationibus, jam a cibariis, quæ aluntur, diversitate nasci, expe-

experimur. Si enim, ovidio teste, *fuscantur corpora campo*, Indos, qui solis æstibus patente in campo, torrentur quotidie, fusci coloris plus habere oportet, quam alios, qui sylvis nativis immerfi sub umbra per omnem ætatem latent æterna, ut nec solem videre unquam possint, neque a sole videri. Sylvicolas ejusmodi vidi quamplurimos vultu tam candido, tam Venusto, ut haberi pro Europæis possent, Europæa si veste ornarentur. Fœminæ præ maribus semper albiores, quia & rarius extra tectum prodeunt, & si quando iter equo faciant, inæto huic sexui pulchritudinis studio formæ magis invigilant suæ, quæ ne solis ardore labefactetur, umbellam e struthionum plumis longioribus contextam vultui prætendunt suo.

Mirabar sæpe, barbaros Aucas, Puelches, seu Patagones, aliosque Magallanicæ terræ habitatores Australi, qui in Paragnaria frigus afflat, polo viciniore, Chilensibus alpihus tanta nive rigidis confines vultu esse magis fusco, quam Abipones, Mocobii, Tobæ, aliique populi, qui decem circiter gradibus septentrioni, qui istic calidus, propriores in Chaco habitant, atque adeo caloribus plus vexantur. Quis nescit, Anglos, Gallos, Svecos, Danos, Belgas, Germanos frigidior sub Cœlo natos Hispanis, Lusitanis, Italis sub Cœlo magis æstuoso degentibus vultu plerumque candidiore esse? Cur igitur Indi Australes Paraquariæ frigidioris incolæ minus candent, quam Abipones septentrioni propriores, ubi auram hauriunt ardentiorē? Physicis id discutendum lubens permitto. Quid si alimenta varia ad coloris varietatem conferant aliquid? Australibus illis barbaris caro struthionum, equorumque, quibus abundat campus, pro cibo est præcipuo, & fere

unico. Hæc forsitan ad fuscandam eorum cutem facit non nihil? Nam Groenlandos, æternas licet inter nives, ac glaciem sepultos coloris tamen esse non candidi, sed ex fusco, & flavo mixti, referunt historici, illudque balænarum adipi tribuunt; Hunc enim & vorant, & potant, semperque cupediis adnumerant. Quid si dicamus, ut solis æstu præservido, sic rigidissima urentis frigoris aura corporum albitudinem labefactari? Quod si ita, cur, amabo, non mediocriter albescent insulæ ignis (terra del fuego) incolæ in 55. latitudinis gradu, ultimis Americæ Australis finibus, poloque antarctico tam propingui, ubi Januario mense istic æstivo advenas Europæos frigore periisse, scribunt, menseque Martio, qui autumnus pars, montes nivibus obrui, geluque atrocissimum passim sævire, memorant. Id quod nautæ Hispani, a quibus in Europam sum translatus, amplissime confirmarunt. Nam, dum paulo ante in insula Maloina, seu Malvina, seu ut alii loquuntur, Macloviana, insulæ ignis vicina, aliquamdiu versabantur, nullum faciebant finem immania illa, quæ istis tolerarunt, frigora prædicandi. In ipso portu navim oppletam quotidie nivibus, congelatisque prope corporibus suas adeo obriguisset manus, ut, ni Cremati vini haustu identidem incaluisse, nauticis functionibus se fuisse impares, dictitabant. Nationes hæ Australes quidni novam nobis injiciant suspicionem, illas ex Africa suam olim traxisse originem, colorem illum suum obscuriorem, Afris hæreditarium, Americæ intulisse. Hæc si cui arriserit opinio, dispiciat iterum iterumque, qua demum ratione immensum pelagus, quod Africam a Paraquaria dividit, sine magneticæ acus usu transmiserint.

De barbaris Magallanicæ oræ incolis cum injecta sit mentio, juvat hoc loco opinionem refellere, quæ de Patagonibus multorum in animis dudum inveteravit. Hos Gigantes, & Polyphemi Cyclopi fors progeniem scripsere plures, plurimi credunt etiamnum. Verum, crede mihi, falluntur hi, fallunt illi. In commentariis de itinere architalassi Batavi Olivier Von Nord, qui anno 1598. continuata per triennium navigatione quatuor cum navibus orbem totum circumvectus, fretum Magallanicum quoque trajecit, Patagones decem, vel undecim pedes alti dicuntur. Angli, qui Byron duce idemfretum anno 1764. transmiserant, octo pedes altitudinis iisdem tribuerunt. Boni viri videntur illos barbaros vel microscopio contemplati, vel alia decempeda usi. Nam anno 1766. Capitanei Wallis, & Carteret mensi sunt Patagones, & solum sex pedes, vel sex pedes & sex circiter pollices illos altitudinis habuisse affirmarunt. Anno 1767. Clarissimus Bougainville eos denuo mensus est, & eandem, quam Wallis, proceritatem in illis deprehendit. Pater Thomas Falconer Anglus, Philosophus, Medicus, meus in Paraquaria socius, annos complures Magallanicæ regionis Apostolus ridet Europæorum opinionem, Patagones gigantibus adnumerantium, testaturque Caziquium terræ illius facile principem Kangapol, qui Patagones inter omnes proceritate maxime eminuit, septem circiter pedes altum sibi visum fuisse. Quid si & hujus oculi fallerentur? Meum jam testis pariter oculati testimonium accipe. Recens ex Europa appulsus in urbe Boni aeris numerosum vidi istorum barbarorum agmen. Nullum equidem illorum mensus, sed pluribus per interpretem collocutus sum. Fateor, plerosque omnes proceritate esse eximia, haud tamen tanta, ut

gigantum nomen mereantur; Quod si enim Patagones gigantibus accenseamus, Indos omnes equestres Paraquariæ: Abipones, Mocobies, linguas, seu oaécacalòt, Mbayas &c. gigantes dicamus, necesse erit; Horum plerique enim corporis proceritate Patagonibus haud cedunt, licet istos vastioris corporis, vultus magis fusci, formæque minus venustæ non diffitear. Europæis in exercitiis equites, peditesque innumeros, in urbibus passim, quin & rusticorum in tuguriis quam plurimos videmus quotidie Patagonibus neutiquam inferiores. Hæc fabula de gigantibus Patagonum corporibus ex inventis illo in litore ossibus, quæ gigantum fuisse putabantur, seu nata, seu confirmata est. Fuit equidem illorum, qui Magallanicum seculo superiore æquor lustraverant, quispiam, qui in portu desiderato (el puerto deseado) ossa humana sexdecim pedes longa se vidisse, asseruit. Hispani ad speculandas illas oras a Rege Catholico, ut supra retuli, anno 1745. missi tria istic barbarorum cadavera invenerunt, in quibus nec moles, nec longitudo corporum insolita observabatur. Pater Thomas Falconer, cujus proxime memini, refert: se quoque in ripis Carcaranal, seu fluvii tertii, qui mox Paranz miscetur, vidisse Gigantum ossa varia, coxendices, costas immanes, craniorum fragmenta, dentes molares in radice tres digitos diametri habentes. Ejusmodi ossa è Paraquayi, & Paranz litoribus frequenter crui, alii asserunt. Quin & Inca Garcilassus de la Vega, Peruviani imperii Livius, idem de Peruvio scribit, testaturque, apud Indos Peruvianos opinionem a majoribus suis acceptam persistere: Gigantes terrarum suarum olim incolæ in pœnam Sodomitici sceleris a Vindice Deo extin-

extinctos fuisse. Ast noveris, historicum hunc ejusmodi esse, ut in illius verba tutò jurari non semper possit; frequenterque vetularum arbitraria commenta pro majorum documentis obtrudi in historiis. Verum concedamus, ejusmodi ossa ubi ubi reperta, quæ forsan balænarum, aliarumque bestiarum grandium erant, gigantum fuisse, hoc argumento quis evincet, illius terræ, ubi inventæ eorum reliquæ, habitatores gigantes fuisse? Poterant enim hæc ossa aliunde allata fluviorum alluvione in mare, ex hoc in remotissimas oras devolvi. In montium altissimorum visceribus sane elephantum ossa, anchoræ, navigiorum prægrandium frustra detecta sæpius legimus, quæ per subterrancos meatus haud dubie è mari olim advecta. Lege Kircheri mundum subterraneum, lege alios hoc super argumento. De Gigantum ossibus crede, quidquid lubuerit, dummodo me suatore, Patagones pro Gigantibus definas habere.

C A P U T III.

De forma Abiponum, corporisque conformatione.

Abipones forma sunt plerumque liberali, facie concinna, iisdemque, quibus Europæi, oris lineamenti, colorem si excipias, qui, ut prius memoravi, in adultioribus haud equidem est omnino

candidus, ab æthiopum tamen, & ex his mixtorum nigrore abest longissime; Albedo enim illa naturalis, cum qua in lucem prodire infantes dixi, procedente ætate partim solis æstu, partim fumo aliquantulum obscuratur. Siquidem vitam prope omnem per campos soli pervios equitando exigunt, & si tantisper in tentorio conquiescant suo, quod idem illis pro cubili, triclinio, ac culina est, diu, noctuque ignem humi foveant, cujus calore, ac fumo nigrescant non nihil, necesse est. Auster frigidiusculus quoties aspirat, ignem lecto admovent, vel reti pensili, in quo cubant, subjiciunt, atque adeo, ut pernæ suillæ e camino pendentes, sensim infumantur. Abiponum fœminæ campo obequitantes adversus solis ardores umbella vultum tuentur suum; Hinc viris plerumque candidiores. Hi, quia formidari ab hostibus, non amari, terrere, non allicere obvios volunt, dum a sole liberalius tosti, cicatricibus magis turpati sunt, tum enimvero sibi pulchriores videntur.

Abiponibus plerisque omnibus oculos nigros, sed aliquantulum minutiores esse, adverti; sed his ocellis acutius vident, quam nos grandioribus. Res enim jam mole sua pusillas, jam admodum remotas clarissime distinguunt, quæ oculos Europæi vel fugiebant, vel latebant, quamvis cætera perspicacissimos. In nostris sæpe itineribus bestiam longo terrarum interjectu distitam currere observavimus, quin tamen, qualis esset, nostrum quispiam vel divinaret. Abipon bestiam hanc equum, mulum, nigri, candidi, glauci coloris esse, nil hæsitans edixit. Dictum veritati consentaneum comperimus semper, rei eminens conspectæ propinquiore. Campo forte inambulabat Pater Josephus Brigniel meus in Sancti
Hic.

Hieronymi oppido tum socius, corporis sane perquam pusilli. Abipon procerus alto insidens equo pulicem eius in facie hærentem detexit, eumque ex equo defiliens manu cepitillico exclamans: *Harai Pay! nezeguink loapârâr.* En tuum mi Pater pulicem! Ex pulice oculorum perspicaciam disce. Apiculas minutissimi corpusculi per prata, pratorumque flores sursum, deorsum volitantes observant hi barbari, easque mellis legendi desiderio ad earum in sylvis alvearia sequuntur. Ad grandem oculorum mentis grandium perspicacitatem probandam hæc sufficiant, etsi adferre possem complura. Naturæ beneficio vident, quæ nos microscopii, tubique optici ope vix assequimur.

Cæterum, si quæ alia Americæ natio, decora gaudet membrorum conformatione Abipones. Nasum, ut plerisque in Æthiopibus spectamus, sinum, compressum, aduncum, frontem versus repandum, iusto pinquiorem vix memini me in illorum quopiam deprehendisse. Frequentior illis est aquilinus, cum decore longiusculus, & acutus. Trecentæ corporum deformitates, pravitatesque, apud Europæos frequentissimæ, istic peregrinæ sunt, ac ne de nomine quidem notæ. Abiponem gibbo, struma, labro leporino, abdomine monstroso, cruribus divaricatis, distortis pedibus deformem, blæsum, qui literas R. vel S. Balbutiendo enuntiet, nusquam videris. Dentes candidos ostentant, & per omnem vitam fere innoxios tumulto inferunt plerique plerosque. Equos pigmæos interdum gignit Paraquaria; Abiponem pigmæum nunquam, quin ne alterius quidem nationis Indum. Tot inter Indorum millia nullum detexi, id certe mihi exploratissimum. Abipones plerique omnes ea sunt proceritate, ut si

corporis altitudini animorum excellitas responderet, Austriacos inter pyrobolarios possent militare. In quatuor Abiponum coloniis, neque plures numerarunt, versatus septennium tres novi duntaxat, qui præter nationis morem exigui fuere corporis, sed iidem animositate, militari ingenio, factis grandibus apud suos perinde, ac Hispanos maximi nominis. Primus horum Debayakaikin Caziquiorum Abiponensium facile princeps, ob stature exiguitatem ab Hispanis El *Petizo* parvus appellatus, sed toti late provinciæ olim formidabilis. Frequens mihi de hoc recurret sermo. Kevachichi alter, plurimarum palmarum Dux. Tertius Hamihegemkin impiger ad belli labores, intrepidus, astutus. Dum nostra ob repentinum hostis numerosi adventum trepidabat colonia, incolis tum venatione occupatis prope vacua, hic genii bellicosi, & callidi ingenii dedit documenta, hostibus tum astu, tum audacia in fugam præcipitem actis. Ne mireris tantos animos tantillis homunculis fuisse. Ubi minus corporis, plus sæpe spirituum est. Audi Statium I. Thebaidos: *Major in exiguo regnavit corpore virtus.* Audi Claudianum de bello Getico Alanam gentem bellicosissimam laudibus profecutum: *Cui natura breves animis ingentibus artus finxerat, immanique oculos infecerat ira.* Minutissimo grano piperis quid mordacius? Scorpii, serpentes alii parvuli vix spithamam longi præ vastissimis anguibus sæpe nocentiores in America. Alexander Macedonum, Attila Hunnorum duces ambo parvi corpore, militari animositate maximi fuere. Verum ignosce, quæso quod parvis in rebus exemplis utar tam grandibus! Haud equidem ignoro, Alexandrum, Attilamque cum barbaris Debaya kaikin, Kebachichi, Hamihegemkin in comparisonem venire neutiquam posse; Nam hi Hispanorum Para-

qua

quariensium mastiges pagos vastarunt, & prædia;
 Illi mundi flagella, bellicque fulmina urbes munitas,
 & provincias sub jugum misere.

Barba, quod alias dixeram, carent Abipones,
 mentumque glabrum gerunt reliquorum, qui qui-
 dem ex utroque parente Americano orti, Indorum
 more. Si quem Indum barbatulum videris, alteru-
 trum illius parentum, certe avum Europææ originis
 fuisse, nil dubita. Cur Americani omnes imberbes
 sint, hæc quæstio nodus gordius est, quem, qui
 solvere adnitebantur, novis difficultatibus implica-
 runt. Quod quidem naturæ arcanum qui detexerit,
 erit mihi magnus Apollo. Haud inficior, America-
 norum in mento lanuginis aliquid interdum suc-
 crescere eo fere modo, quo arenosis, sterilibusque
 in agris hinc illinc tritici culmus spectatur. Verum
 & teneram hanc lanuginem, quam nemo barbam
 dixerit, sibi minime tolerandam putant, quin, ut
 funditus cum radice evertatur, iterum, iterumque
 curant. Audi insolitam tonsionis methodum. Ve-
 tula tonsoris officio fungitur. Humi ad focum con-
 sidens tonstricula Abiponis jacentis caput gremio
 complectitur suo. Vultum tondendi cinere calente
 affatim conspergit, perfricatque liberaliter, id quod
 smigmati supplet vices. Mox volsella, seu forcipu-
 la cornea, quæ elastica vi pollet, pilos singulos
 evellit diligenter. Quod negotium citra doloris
 sensum peragi, barbari affirmant, atque ut dictis
 fidem haberem, illorum aliquis applicata mento
 meo forcipula convincere me amice voluit de verita-
 te. Infausti tonsoris manibus vix, ac ne vix qui-
 dem me poteram extricare. Nam credere malui,
 quam gemere. Naviculæ usus neque universalis Eu-
 ropæ, neque antiquissimus fuit. Forficulis refecare,

candenti carbone cremare, vossella evellere barbam solebant veterum non nulli. Hinc & Varrone teste l. 2. de re rustica c. II. Lanæ vulsuram in ovibus, quam tonsuram antiquiorem esse; Post Romanam conditam anno quadringentesimo quinquagesimo quarto tonsores (virosum) primum ex Sicilia in italiam venisse a P. Ticinio Mena adductos, ait. Id refero, ne mireris Paraquarienses barbaros etiamnum vossellam præ navacula malle.

Dolorem, qui vetulæ manu per forcipulam infertur, silentio concoquunt Abipones, ut faciem glabram, lævemque habeant; scabram enim, hirsutamque averfantur. Hinc neuter sexus pilos, quæ oculi a natura muniantur, tolerat; Nam & palpebras, & supercilia sibi evelli jubent identidem. Hæc oculorum nuditas, quamvis incredibiliter turpet faciem vel elegantissimam, præcipuum ab illis putatur elegantiz, pulchritudinisque adjumentum. Europæos, quorum oculi denso horrent supercilio, explodunt, aspernantur, struthionumque, quibus scilicet luculentiora sunt supercilia, germanos fratres appellant. Per adjacentes pilos obtundi oculorum aciem, atque obumbrari, somniant. Hinc quoties mel per silvas conquisturi excurrunt, vacuisque domum redeunt manibus, excusatio illis in promptu est: succrevisse sibi ajunt supercilia, ciliave, atque ideo apes volantes, alveariorum indices, haud potuisse a se discerni. Ridiculus nobis profecto Abiponum oculos pilis nudantium ritus, sed antiquorum exemplo confirmatus. Si enim Herodoto fides in Euterpe, sacrificuli Isidis in Ægypto caput, supercilia, palpebras, corpus universum radere consueverunt, idque, ne quis forte pilus alicubi succrescat, tertio quoque die ab illis repetitum fuit. Ad quos
Ægy-

Ægypti Sacerdotes alludens Martialis: Exurpa, mihi crede, pilos de corpore toto, cecinit. Eudoxum Geometram supercilia, ciliaque sibi abrasisse, Laertius refert, confirmatque Synesius in calvitii encomio. Quid quod lex data Hebræis ore divino: Levita radant omnes pilos carnis suæ. Numerorum 8. C. E quibus conjice, pilos vultu exterminandi consuetudinem, quæ apud Abipones, Mocobios, Tobas, Quaicurus, aliosque equestres Paraquariæ populos viget, antiquitatem sapere. A' pilis ad capillos transeamus.

Crinibus omnes densis, corvoque nigrioribus pollent Abipones. Communis hic capillitii color universis, quas vidi, per Paraquariam nationibus. Albicomus, vel rufus in lucem si ederetur fortis, monstri instar illis foret, vix homines inter tolerandus. Pro nationum, temporum, statuumque varietate varia est capillorum structura. Abipones Sylvestres, coloniis necdum adscripti, comam sibi raserant, & relicto per capitis ambitum crinium circulo monachorum ritu tondebantur, quem apud barbaros sylvicolas in Mbaèberà, apud aliosquoque populos observavi. Fœminæ tamen nationis Mbayæ reliquo capite attonso Crines aliquos servant intactos, qui, ut crista in casside militari, a fronte ad verticem assurgunt. Tonsois cultris, forficibusque cum fere careant barbari, conchâ ad lapidem exacutâ, vel piscis palometæ mandibula cum in finem utuntur. Plerique Abipones coloniarum nostrarum inquilini crines promissos in funem colligunt, ac Europæorum militum more contorquent. Idem eorum mulieribus mos hoc tamen discrimine, quod hæc illud capillorum volumen fasciola alba Gossypina circumligunt, uti hujates nigra involvere consueverunt. Quoties templum adeundum, quoties recepto
more

more de vita functis lamentandum, crines solvunt, sparguntque per humeros. E contrario Indi Quarani, quamdiu religionis expertes sylvis immorabantur, Comam promittere; Nunc nostra sacra amplexi variis in coloniis, illam Sacerdotum more decurant. Quaranicæ tamen mulieres, cælibes perinde, ac conjugatæ iisdem in oppidis crinibus promissis, quos in funem cogunt, albaque e Gossypio fascia circumdant, domi, forisque utuntur; Quamvis ad sacras in templo functiones passis fluentibusque per tergum capillis religiose accedunt. Hispani quoque ruricolæ ligatis militari more crinibus templi limen attingunt, solutis ingrediuntur. Persuadent sibi enimvero Americani omnes, hoc observantiæ genus esse reverentiæ significationem, divinis quæ ædibus debeatur. Erubescant illi Europæi, qui capite non solum superstitiose calamistrato, cincinnorum fimbriis ornato, sed & mille crepundiis onerato audent templis pedem inferre.

Mane somno defunctæ Abiponenses fœminæ humi sedentes maritorum sibi assidentium capillos concinnant, torquent, ligantque. Fasciculus setarum ex apro, vel urfi formicarii cauda illis pro pectine, pro calamistro est. Comam natura crispam apud Indos rarissime invenias, arte crispatam nunquam. Tardissime, & non nisi decrepiti incanescunt; calveſcunt paucissimi. Illud memoratu, risuque dignum, quod Abipones, Mocobii, Tobæ &c. nullo sexus, vel ætatis discrimine crines a fronte ad verticem usque evellant ea ratione, ut calvitium tres fere digitos latum in eorum scincipite videatur, quod illi *Nalemira* dicunt, nationisque suæ nobilissimum, & quodammodo religiosum insigne arbitrantur. Nam &

recens natis infantulis Præstig atoris, præstigiatrixque manu (Hi enim veteratores & medicorum & Sacerdotum officio apud illos funguntur) coma sincipitis refecatur: Quæ cerimonia parentibus tantum cordi est, quantum Hebræis masculorum circumcisio, baptismusque Christianis, videturque mihi ab antiquissimis Peruvianis in hos Paraquariæ barbaros manasse; Illis equidem Solenne fuit prolibus bimulis comas primas rescindere acuto filice, cultrum supplente. Id a consanguineis cognationis ordine sibi succedentibus peractum, eodemque prorsus tempore sic initiato infanti nomen inditum fuit. Hunc attondendi sincipitis morem extra Americam quoque gentibus aliis antiquissimum fuisse, ne crines in prælio obsessent, ex Plutarcho patet, qui in Theseo hæc habet: *Verum cum pugnacissimi essent Germani, & cominus certare cum hoste præcipue didicissent -- igitur ne ex crinibus occasionem adversariis se invadendi præberent, eos tondebant.* Quamquam Francos illum criminum apicem in fronte sparsisse legimus, ut præliantes viderentur hosti terribiliores.

Id præterea in more positum apud Abipones, ut viduæ, non sine multo fœminarum planctu, viro-
rumque compotatione, caput radatur, & cucullo, qui e cannabinis Caraquatâ filis cinerei, atrique coloris est, tegatur, quem abicere nefas prius, quam ad novas denique nuptias pervenerit. Viduo multas inter ceremonias coma decurtatur, illiusque capiti galericulus retiformis illigatur, qui non, nisi, postquam rursus crines adoleverint, dimittendus. Ad luctum de Caziquio mortuo contestandum viri omnes Cæsariem rescindunt suam. Apud Quaranos Christianos pœna probrosissima, & ignominia plena putatur, si quam malæ frugis fœminam capillorum spolia-

spoliatione multaverint. En! quot Crinium vicissitudines, quantæ metamorphoses apud barbaros! Verum nullus sim, si non plures apud cultissimos Europæos videantur quotidie. Quot capita, totidem capillorum formas, & singulis bienniis novas inventiones videmus, ridemusque. Maximum, quin unicuique quorundam negotium capillus, de quibus cum seneca ausis dicere: *Quis est istorum, qui non malit rempublicam turbari, quam comam suam? Hos tu otiosos vocas inter pestinem, speculumque occupatos? Nemo illorum, qui non comprior esse malit, quam honestior.* L. de brevitate vitæ c. II. Formam, quam liberalis natura indidit Abiponibus, exposui. Jam, quibus eam modis corrumpant, restat dicendum.

C A P U T IV.

De avertis, communibusque formæ corruptelis.

Pulchritudinis cura barbarorum etiam mentibus innata. Ast hunc in finem mediis utuntur, quibus pulchritudo omnis profligatur. Abipones profecto ornare se dum volunt, se turpant, frædantque maximopere. Puellas, puellosque elegantes passim inter illos videas, apta figura membrorum, coloris, sermonisque ea suavitate præditos, quam multi invideant Europæi. Verum hæc illorum venustas fluxa est, ac ut in floribus, exique ævi, dum enim adolescunt,

mar-

marcescunt. Nativæ equidem illorum elegantia stigmatibus, aliisque, quos referre aggredior, trecentis modis aboletur. Europæorum quam multi pulchri esse desinunt, dum exterorum avidi imitatores peregrinos, semperque novos comendi corporis modos venantur. Abipones formam depravant suam, visuque terribiles esse incipiunt, quia antiqui moris tenacissimi, & avitis majorum suorum sanctionibus ad amentiam usque devoti. Illorum enim exemplo vultum notis variis insigniunt suum, quarum aliæ utrique sexui communes, sceminis propriæ. Spina acuta carni insculpuntur, inspersoque vulnere recenti cinere nigrescunt, ac fiunt perennes. Crucis figuram fronti impressam, duas lineolas ad oculi utriusque angulum, aures versus protensas, quatuor præterea lineas transversas, ac craticulæ instar cancellatas supra nasi radicem inter supercilia pro insignibus velut gentilitiis vultu circumferunt omnes, & per illa a nationibus cæteris internoscuntur. Hos figurarum ductus spinis exarant vetulæ non soli cuti, sed vivæ carni impactis, quos cinis, ut dixeram, vulneribus cruore manantibus inspersus nigros reddit, nullo, aut modo aut tempore unquam delendos. Hæ quid figuræ denotent, quid portentant, nescio, nesciuntque ipsi, qui his signantur, Abipones. A' majoribus se suis hunc accepisse ritum, id solum nōrunt, & illis satis est. Plurimæ Americanorum nationes vocabulo, quo crux significetur, penitus carent. Hinc dum Christianis sacris initiati crucis se signo muniunt, latino nomine *Crux*, vel Hispanico *Cruz* utuntur, quod tamen alii aliter corrumpunt. Indi Peruviani lingua Quichua dicunt: *Cruspa*. Quaranii: *Cruzû*. Chiquiti: *Curuzis*. Zamucui, & qui eadem lingua loquuntur, Ygaroñi, Kaipotades, Karaoi, Tunachi, Ymonii &c.: *Curuzirè*.

Lu-

Lules, Ilistines, Vilelæ Cruz Hispanorum more rite enuntiant. Plures tamen Paraquariæ populi vocabulo sibi proprio crucem significare nōrunt. Hanc vocant Abipones: *Likinrānala* Mocobii *Latizenrānas* Tobæ: *Lorisdagūnadac*. Mataquayi, seu ychibachi: *Lekakilūs* - Mbayæ: *Nikenāga*.

Non solum vidi crucem Abiponum singulorum frontibus insculptam sed & Cruces nigras rubris multorum e lana vestibis intextas. Id mirandum sane vel hoc ex capite, quod Christi religionem nondum edocti hoc præstiterint, cum nec significationem, nec merita Sanctæ Crucis perspexerint. Fors ex Hispanis Abiponum, vel ex Abiponibus Hispanorum olim Captivis Crucis venerationem aliquam, vel virtutem cunctis saluberrimam didicere. Quid si dicamus, hanc Crucis apud Abipones expressionem Hispanorum in Americam adventu longe antiquiorem? Illud certum, Crucem ex splendido marmore, quod alii jaspidem cristallinum vocant, sculptam apud Incas Peruvianos Reges magno in pretio, & fors etiam veneratione quondam fuisse. Longitudine tres ulnæ partes, latitudine tres digitos, totidem crassitudine æquabat. Omnes anguli fuere pares, splendorisque eximii. Insigni artificio, crux illa constat, sed a quo artifice, quotempore elaborata, unde allata sit, passim ignorabatur. In palatio regio urbis Cusco, & in loco sacro, quem Huaca appellarunt, servata est semper, ab Hispanis dein Peruvii expugnatoribus, quibus crux pretiosa cum Regiis thesauris in prædam cesserat, ad eundem urbis templum princeps translata. Mihi verisimillimum videtur, crucis seu notitiam, seu æstimationem ex Peruvio in vicinam Paraquariam, ut ritus alii, illatam fuisse, dum Indorum Peruvianorum quam

experimur. Si enim, ovidio teste, *fuscantur corpora campo*, Indos, qui solis æstibus patente in campo, torrentur quotidie, fusci coloris plus habere oportet, quam alios, qui sylvis nativis immerfi sub umbra per omnem ætatem latent æterna, ut nec solem videre unquam possint, neque a sole videri. Sylvicolas ejusmodi vidi quamplurimos vultu tam candido, tam Venusto, ut haberi pro Europæis possent, Europæa si veste ornarentur. Fœminæ præ maribus semper albiore, quia & rarius extra tectum prodeunt, & si quando iter equo faciant, inæto huic sexui pulchritudinis studio formæ magis invigilant suæ, quæ ne solis ardore labefactetur, umbellam e struthionum plumis longioribus contextam vultui prætendunt suo.

Mirabar sæpe, barbaros Aucas, Puelches, seu Patagones, aliosque Magallanicæ terræ habitatores Australi, qui in Paraquaria frigus afflat, polo viciniore, Chilensibus alpibus tanta nive rigidis confines vultu esse magis fusco, quam Abipones, Mocobii, Tobæ, aliique populi, qui decem circiter gradibus septentrioni, qui istic calidus, propriores in Chaco habitant, atque adeo caloribus plus vexantur. Quis nescit, Anglos, Gallos, Svecos, Danos, Belgas, Germanos frigidior sub Cœlo natos Hispanis, Lusitanis, Italis sub Cœlo magis æstuoso degentibus vultu plerumque candidiore esse? Cur igitur Indi Australes Paraquariæ frigidioris incolæ minus candent, quam Abipones septentrioni propriores, ubi auram hauriunt ardentiorē? Physicis id discutendum lubens permitto. Quid si alimenta varia ad coloris varietatem conferant aliquid? Australibus illis barbaris caro struthionum, equorumque, quibus abundat campus, pro cibo est præcipuo, & fere

unico. Hæc forsitan ad fuscandam eorum cutem facit non nihil? Nam Groenlandos, æternas licet inter nives, ac glaciem sepultos coloris tamen esse non candidi, sed ex fusco, & flavo mixti, referunt historici, illudque balenarum adipi tribuunt; Hunc enim & vorant, & potant, semperque cupidulis adnumerant. Quid si dicamus, ut solis æstu præservido, sic rigidissima urens frigoris aura corporum albitudinem labefactari? Quod si ita, cur, amabo, non mediocriter albescent insulæ ignis (terra del fuego) incolæ in 55. latitudinis gradu, ultimis Americæ Australis finibus, poloque antarctico tam propingui, ubi Januario mense istic æstivo advenas Europæos frigore periisse, scribunt, menseque Martio, qui autumnus pars, montes nivibus obrui, geluque atrocissimum passim sævire, memorant. Id quod nautæ Hispani, a quibus in Europam sum translatus, amplissime confirmarunt. Nam, dum paulo ante in insula Maloina, seu Malvina, seu ut alii loquuntur, Macloviana, insulæ ignis vicina, aliquamdiu versabantur, nullum faciebant finem immania illa, quæ istic tolerarunt, frigora prædicandi. In ipso portu navim oppletam quotidie nivibus, congelatisque prope corporibus suas adeo obriguisset manus, ut, ni Cremati vini haustu identidem incaluisse, nauticis functionibus se fuisse impares, dictitabant. Nationes hæc Australes quidni novam nobis injiciant suspicionem, illas ex Africa suam olim traxisse originem, colorem illum suum obscuriorem, Afris hæreditarium, Americæ intulisse. Hæc si cui arriserit opinio, dispiciat iterum iterumque, qua demum ratione immensum pelagus, quod Africam a Paraquaria dividit, sine magneticæ acus usu transmiserint.

De barbaris Magallanicæ oræ incolis cum injecta sit mentio, juvat hoc loco opinionem refellere, quæ de Patagonibus multorum in animis dudum inveteravit. Hos Gigantes, & Polyphemi Cyclopis fors progeniem scripsere plures, plurimi credunt etiamnum. Verum, crede mihi, falluntur hi, fallunt illi. In commentariis de itinere architalassi Batavi Olivier Von Nord, qui anno 1598. continuata per triennium navigatione quatuor cum navibus orbem totum circumvectus, fretum Magallanicum quoque trajecit, Patagones decem, vel undecim pedes alti dicuntur. Angli, qui Byron duce idemfretum anno 1764. transierant, octo pedes altitudinis iisdem tribuerunt. Boni viri videntur illos barbaros vel microscopio contemplati, vel alia decempeda usi. Nam anno 1766. Capitanei Wallis, & Carteret mensi sunt Patagones, & solum sex pedes, vel sex pedes & sex circiter pollices illos altitudinis habuisse affirmarunt. Anno 1767. Clarissimus Bougainville eos denuo mensus est, & eandem, quam Wallis, proceritatem in illis deprehendit. Pater Thomas Falconer Anglus, Philosophus, Medicus, meus in Paraquaria socius, annos complures Magallanicæ regionis Apostolus ridet Europæorum opinionem, Patagones gigantibus adnumerantium, testaturque Caziquium terræ illius facile principem Kangapol, qui Patagones inter omnes proceritate maxime eminuit, septem circiter pedes altum sibi visum fuisse. Quid si & hujus oculi fallabantur? Meum jam testis pariter oculati testimonium accipe. Recens ex Europa appulsus in urbe Boni aeris numerosum vidi istorum barbarorum agmen. Nullum equidem illorum mensus, sed pluribus per interpretem collocutus sum. Fareor, plerosque omnes proceritate esse eximia, haud tamen tanta, ut

gigantum nomen mereantur; Quod si enim Patagones gigantibus accenseamus, Indos omnes equestres Paraquariæ: Abipones, Mocobies, linguas, seu oaécacaiòt, Mbayas &c. gigantes dicamus, necesse erit; Horum plerique enim corporis proceritate Patagonibus haud cedunt, licet istos vastioris corporis, vultus magis fusci, formæque minus venustæ non diffitear. Europæis in exercitiis equites, peditesque innumeros, in urbibus passim, quin & rusticorum in tuguriis quam plurimos videmus quotidie Patagonibus neutiquam inferiores. Hæc fabula de giganteis Patagonum corporibus ex inventis illo in litore ossibus, quæ gigantum fuisse putabantur, seu nata, seu confirmata est. Fuit equidem illorum, qui Magallanicum seculo superiore æquor lustraverant, quispiam, qui in portu desiderato (el puerto deseado) ossa humana sexdecim pedes longa se vidisse, asseruit. Hispani ad speculandas illas oras a Rege Catholico, ut supra retuli, anno 1745. missi tria istic barbarorum cadavera invenerunt, in quibus nec moles, nec longitudo corporum insolita observabatur. Pater Thomas Falconer, cujus proxime memini, refert: se quoque in ripis Carcaranal, seu fluvii tertii, qui mox Paranzæ miscetur, vidisse Gigantum ossa varia, coxendices, costas immanes, craniorum fragmenta, dentes molares in radice tres digitos diametri habentes. Ejusmodi ossa è Paraquay, & Paranzæ litibus frequenter erui, alii asserunt. Quin & Inca Garcilassus de la Vega, Peruviani imperii Livius, idem de Peruvio scribit, testaturque, apud Indos Peruvianos opinionem a majoribus suis acceptam persistere: Gigantes terrarum suarum olim incolæ in pœnam Sodomitici sceleris a Vindice Deo extin-

extinctos fuisse. Ast noveris, historicum hunc ejusmodi esse, ut in illius verba tutò jurari non semper possit; frequenterque vetularum arbitraria commenta pro majorum documentis obtrudi in historiis. Verum concedamus, ejusmodi ossa ubi ubi reperta, quæ forsan balænarum, aliarumque bestiarum grandium erant, gigantum fuisse, hoc argumento quis evincet, illius terræ, ubi inventæ eorum reliquæ, habitatores gigantes fuisse? Poterant enim hæc ossa aliunde allata fluviorum alluvione in mare, ex hoc in remotissimas oras devolvi. In montium altissimorum visceribus sane elephantum ossa, anchoræ, navigiorum prægrandium frustra detecta sæpius legimus, quæ per subterrancos meatus haud dubie è mari olim advecta. Lege Kircheri mundum subterraneum, lege alios hoc super argumento. De Gigantum ossibus crede, quidquid lubuerit, dummodo me suasore, Patagones pro Gigantibus desinas habere.

C A P U T III.

De forma Abiponum, corporisque conformatione.

Abipones forma sunt plerumque liberali, facie concinna, iisdemque, quibus Europæi, oris lineamentis, colorem si excipias, qui, ut prius memoravi, in adultioribus haud equidem est omnino

candidus, ab æthiopum tamen, & ex his mixtorum nigrore abest longissime; Albitudo enim illa naturalis, cum qua in lucem prodire infantes dixi, procedente ætate partim solis æstu, partim fumo aliquantulum obscuratur. Siquidem vitam prope omnem per campos soli pervios equitando exigunt, & si tantisper in tentorio conquiescant suo, quod idem illis pro cubili, triclinio, ac culina est, diu, noctuque ignem humi foveat, ejus calore, ac fumo nigrescant non nihil, necesse est. Auster frigidiusculus quoties aspirat; ignem lecto admovent, vel reti pensili, in quo cubant, subjiciunt, atque adeo, ut pernæ suillæ e camino pendentes, sensum infumantur. Abiponum fœminæ campo obequitan-tes adversus solis ardores umbella vultum tuentur suum; Hinc viris plerumque candidiores. Hi, quia formidari ab hostibus, non amari, terrere, non allicere obvios volunt, dum a sole liberalius tosti, cicatricibus magis turpati sunt, tum enimvero sibi pulchriores videntur.

Abiponibus plerisque omnibus oculos nigros, sed aliquantulum minutiores esse, adverti; sed his ocellis acutius vident, quam nos grandioribus. Res enim jam mole sua pusillas, jam admodum remotas clarissime distinguunt, quæ oculos Europæi vel fugiebant, vel latebant, quamvis cætera perspicacissimos. In nostris sæpe itineribus bestiam longo terrarum interjectu distitam currere observavimus, quin tamen, qualis esset, nostrum quispiam vel divinaret. Abipon bestiam hanc equum, mulum, nigri, candidi, glauci coloris esse, nil hæsitans edixit. Dictum veritati consentaneum comperimus semper, rei eminens conspectæ propinquiore. Campo forte inambulabat Pater Josephus Brigniel meus in Sancti
Hic.

Hieronymi oppido tum socius, corporis sane perquam pusilli. Abipon procerus alto insidens equo pulicem eius in facie hærentem detexit, eumque ex equo desiliens manu cepitillico exclamans: *Harai Pay! neregink loapârât.* En tuum mi Pater pulicem! Ex pulice oculorum perspicaciam disce. Apiculas minutissimi corpusculi per prata, pratorumque flores sursum, deorsum volitantes observant hi barbari, easque mellis legendi desiderio ad earum in sylvis alvearia sequuntur. Ad grandem oculorum minus grandium perspicacitatem probandam hæc sufficiant, etsi adferre possem complura. Naturæ beneficio vident, quæ nos microscopii, tubique optici ope vix assequimur.

Cæterum, si quæ alia Americæ natio, decora gaudent membrorum conformatione Abipones. Nasum, ut plerisque in Æthiopibus spectamus, sinum, compressum, aduncum, frontem versus repandum, iusto pinquiores vix memini me in illorum quopiam deprehendisse. Frequentior illis est aquilinus, cum decore longiusculus, & acutus. Trecentæ corporum deformitates, pravitatesque, apud Europæos frequentissimæ, istic peregrinæ sunt, ac ne de nomine quidem notæ. Abiponem gibbo, struma, labro leporino, abdomine monstroso, cruribus divaricatis, distortis pedibus deformem, blæsum, qui literas R. vel S. Balbutiendo enuntiet, nusquam videris. Dentes candidos ostentant, & per omnem vitam fere innoxios tumultu inferunt plerique plerosque. Equos pigmæos interdum gignit Paraquaria; Abiponem pigmæum nunquam, quin ne alterius quidem nationis Indum. Tot inter Indorum millia nullum detexi, id certe mihi exploratissimum. Abipones plerique omnes ea sunt proceritate, ut si

corporis altitudini animorum excelsitas responderet, Austriacos inter pyrobolarios possent militare. In quatuor Abiponum coloniis, neque plures numerarunt, versatus septennium tres novi duntaxat, qui præter nationis morem exigui fuere corporis, sed iidem animositate, militari ingenio, factis grandibus apud suos perinde, ac Hispanos maximi nominis. Primus horum Debayakaikin Caziquiorum Abiponensium facile princeps, ob staturæ exiguitatem ab Hispanis El *Petizo* parvus appellatus, sed toti late provinciæ olim formidabilis. Frequens mihi de hoc recurret sermo. Kevachichi alter, plurimarum palmarum Dux. Tertius Hamihagemkin impiger ad belli labores, intrepidus, astutus. Dum nostra ob repentinum hostis numerosi adventum trepidabat colonia, incolis tum venatione occupatis prope vacua, hic genii bellicosi, & callidi ingenii dedit documenta, hostibus tum astu, tum audacia in fugam præcipitem actis. Ne mireris tantos animos tantillis homunculis fuisse. Ubi minus corporis, plus sæpe spirituum est. Audi statium I. Thebaidos: *Major in exiguo regnavit corpore virtus.* Audi Claudianum de bello Getico Alanam gentem bellicosissimam laudibus prosecutum: *Cui natura breves animis ingentibus artus finxerat, immanique oculos infecerat ira.* Minutissimo grano piperis quid mordacius? Scorpii, serpentes alii parvuli vix spithamam longi præ vastissimis anguibus sæpe nocentiores in America. Alexander Macedonum, Attila Hunnorum duces ambo parvi corpore, militari animositate maximi fuere. Verum ignosce, quæso quod parvis in rebus exemplis utar tam grandibus! Haud equidem ignoro, Alexandrum, Attilamque cum barbaris Debaya kaikin, Kebachichi, Hamihagemkin in comparisonem venire neutiquam posse; Nam hi Hispanorum Para-

qua-

quariensium mastiges pagos vastarunt, & prædia;
 Illi mundi flagella, bellicque fulmina urbes munitas,
 & provincias sub jugum misere.

Barba, quod alias dixeram, carent Abipones, mentumque glabrum gerunt reliquorum, qui quidem ex utroque parente Americano orti, Indorum more. Si quem Indum barbatulum videris, alterutrum illius parentum, certe avum Europææ originis fuisse, nil dubita. Cur Americani omnes imberbes sint, hæc quæstio nodus gordius est, quem, qui solvere adnitebantur, novis difficultatibus implicarunt. Quod quidem naturæ arcanum qui detexerit, erit mihi magnus Apollo. Haud inficior, Americanorum in mento lanuginis aliquid interdum succrescere eo fere modo, quo arenosis, sterilibusque in agris hinc illinc tritici culmus spectatur. Verum & teneram hanc lanuginem, quam nemo barbam dixerit, sibi minime tolerandam putant, quin, ut funditus cum radice evertatur, iterum, iterumque eurant. Audi insolitam tonstrinx methodum. Vetula tonforis officio fungitur. Humi ad focum confidens tonstricula Abiponis jacentis caput gremio complectitur suo. Vultum tondendi cinere calente affatim conspergit, perfricatque liberaliter, id quod smigmatis supplet vices. Mox volsella, seu forcipula cornea, quæ elastica vi pollet, pilos singulos evellit diligenter. Quod negotium citra doloris sensum peragi, barbari affirmant, atque ut dictis fidem haberem, illorum aliquis applicata mento meo forcipula convincere me amice voluit de veritate. Infausti tonforis manibus vix, ac ne vix quidem me poteram extricare. Nam credere malui, quam gemere. Navaculæ usus neque universalis Europæ, neque antiquissimus fuit. Forficulis rescare,

caudenti carbone cremare, vossella evellere barbam solebant veterum non nulli. Hinc & Varrone teste l. 2. de re rustica c. 11. Lanæ vulsuram in ovibus, quam consuram antiquiorem esse; Post Romanam conditam anno quadringentesimo quinquagesimo quarto tonsores (virorum) primum ex Sicilia in italiam venisse a P. Ticinio Mena adductos, ait. Id refero, ne mireris Paraquarienses barbaros etiamnum vossellam præ navacula malle.

Dolorem, qui vetulæ manu per forcipulam infertur, silentio concoquunt Abipones, ut faciem glabram, lævemque habeant; scabram enim, hirsutamque averfantur. Hinc neuter sexus pilos, quæis oculi a natura muniuntur, tolerat; Nam & palpebras, & supercilia sibi evelli jubent identidem. Hæc oculorum nuditas, quamvis incredibiliter turpet faciem vel elegantissimam, præcipuum ab illis putatur elegantix, pulchritudinisque adjumentum. Europæos, quorum oculi denso horrent supercilio, explodunt, aspernantur, struthionumque, quibus scilicet luculentiora sunt supercilia, germanos fratres appellant. Per adjacentes pilos obtundi oculorum aciem, atque obumbrari, somniant. Hinc quoties mel per silvas conquisturi excurrunt, vacuisque domum redeunt manibus, excusatio illis in promptu est: succrevisse sibi ajunt supercilia, ciliave, atque ideo apes volantes, alveariorum indices, haud potuisse a se discerni. Ridiculus nobis profecto Abiponum oculos pilis nudantium ritus, sed antiquorum exemplo confirmatus. Si enim Herodoto fides in Euterpe, sacrificuli Isidis in Ægypto caput, supercilia, palpebras, corpus universum radere consueverunt, idque, ne quis forte pilus alicubi succrescat, tertio quoque die ab illis repetitum fuit. Ad quos
Ægy-

Ægypti Sacerdotes alludens Martialis: *Extirpa, mihi crede, pilos de corpore toto, cecinit. Eudoxum Geometram supercilia, ciliaque sibi abrasisse, Laertius refert, confirmatque Synesius in calvitii encomio. Quid quod lex data Hebræis ore divino: Levitæ radant omnes pilos carnis suæ. Numerorum 8. C. E quibus conice, pilos vultu exterminandi consuetudinem, quæ apud Abipones, Mocobios, Tobas, Quaicurur, aliosque equestres Paraquariæ populos viget, antiquitatem sapere. A' pilis ad capillos transeamus.*

Crinibus omnes densis, corvoque nigrioribus pollent Abipones. Communis hic capillitii color universis, quas vidi, per Paraquariam nationibus. Albicomus, vel rufus in lucem si ederetur foetus, monstri instar illis foret, vix homines inter tolerandus. Pro nationum, temporum, statuumque varietate varia est capillorum structura. Abipones Sylvestres, coloniis necdum adscripti, comam sibi raserant, & relicto per capitis ambitum crinium circulo monachorum ritu tondebantur, quem apud barbaros sylvicolas in Mbaèberà, apud aliosquoque populos observavi. Fœminæ tamen nationis Mbayæ reliquo capite attonso Crines aliquos servant intactos, qui, ut crista in casside militari, a fronte ad verticem assurgunt. Tonsoriiis cultris, forficibusque cum fere careant barbari, conchâ ad lapidem exacutâ, vel piscis palometæ mandibula eum in finem utuntur. Plerique Abipones coloniarum nostrarum inquilini crines promissos in funem colligunt, ac Europæorum militum more contorquent. Idem eorum mulieribus mos hoc tamen discrimine, quod hæc illud capillorum volumen fasciola alba Gossypina circumligent, uti hujates nigra involvere consueverunt. Quoties templum adeundum, quoties recepto more

more de vita functis lamentandum, crines solvunt, sparguntque per humeros. E contrario Indi Quarani, quamdiu religionis expertes sylvis immorabantur, Comam promittere; Nunc, nostra sacra amplexi variis in coloniis, illam Sacerdotum more decurant. Quaranicæ tamen mulieres, cælibes perinde, ac conjugatæ iisdem in oppidis crinibus promissis, quos in funem cogunt, albaque e Gossypio fascia circumdant, domi, forisque utuntur; Quamvis ad sacras in templo functiones passis, fluentibusque per tergum capillis religiose accedunt. Hispani quoque rusticolæ ligatis militari more crinibus templi limen attingunt, solutis ingrediuntur. Persuadent sibi enimvero Americani omnes, hoc observantiæ genus esse reverentiæ significationem, divinis quæ ædibus debeat. Erubescant illi Europæi, qui capite non solum superstitiose calamistrato, cincinnorum fimbriis ornato, sed & mille crepundiis onerato audent templis pedem inferre.

Mane somno defunctæ Abiponenses fœminæ humi sedentes maritorum sibi assidentium capillos concinnant, torquent, ligantque. Fasciculus setarum ex apro, vel urfi formicarii cauda illis pro pectine, pro calamistro est. Comam natura crispam apud Indos rarissime invenias, arte crispatam nunquam. Tardissime, & non nisi decrepiti incanescunt; calveſcunt paucissimi. Illud memoratu, risuque dignum, quod Abipones, Mocobii, Tobæ &c. nullo sexus, vel ætatis discrimine crines a fronte ad verticem usque evellant ea ratione, ut calvitium tres fere digitos latum in eorum scincipite videatur, quod illi *Naleimra* dicunt, nationisquæ suæ nobilissimum, & quodammodo religiosum insigne arbitrantur. Nam &

re-

recens natis infantulis Præstig atoris, præstigiatrixque manu (Hi enim veteratores & medicorum & Sacerdotum officio apud illos funguntur) coma sincipitis refecatur: Quæ cerimonia parentibus tantum cordi est, quantum Hebræis masculorum circumcisio, baptismusque Christianis, videturque mihi ab antiquissimis Peruvianis in hos Paraquariæ barbaros manasse; Illis equidem Solenne fuit prolibus bimulis comas primas rescindere acuto filice, cultrum supplente. Id a consanguineis cognationis ordine sibi succedentibus peractum, eodemque prorsus tempore sic initiato infanti nomen inditum fuit. Hunc attondendi sincipitis morem extra Americam quoque gentibus aliis antiquissimum fuisse, ne crines in prælio obessent, ex Plutarcho patet, qui in Theseo hæc habet: *Verum cum pugnacissimi essent Germani, & cominus certare cum hoste præcipue didicissent --- igitur ne ex crinibus occasionem adversariis se invadendi præberent, eos tondebant.* Quamquam Francos illum crimium apicem in fronte sparsisse legimus, ut præliantes viderentur hosti terribiliores.

Id præterea in more positum apud Abipones, ut viduæ, non sine multo fæminarum planctu, viro-
rumque computatione, caput radatur, & cucullo, qui e cannabinis Caraguatâ filis cinerei, atrique coloris est, tegatur, quem abicere nefas prius, quam ad novas denique nuptias pervenerit. Viduo multas inter ceremonias coma decurtatur, illiusque capiti galericulus retiformis illigatur, qui non, nisi, postquam rursus crines adoleverint, dimittendus. Ad luctum de Caziquio mortuo contestandum viri omnes Cæsariem rescindunt suam. Apud Quaranos Christianos pœna probrosissima, & ignominix plena putatur, si quam malæ frugis fœminam capillorum spolia-

spoliatione multaverint. En! quot Crinium vicissitudines, quantæ metamorphoses apud barbaros! Verum nullus sum, si non plures apud cultissimos Europæos videantur quotidie. Quot capita, totidem capillorum formas, & singulis bienniis novas inventiones videmus, ridemusque. Maximum, quin unicuique quorundam negotium capillus, de quibus cum seneca ausis dicere: *Quis est istorum, qui non malit rempublicam turbari, quam comam suam? Hos tu otiosos vocas inter pectinem, speculumque occupatos? Nemo illorum, qui non comptior esse malit, quam honestior.* L. de brevitate vitæ c. 11. Formam, quam liberalis natura indidit Abiponibus, exposui. Jam, quibus eam modis corrumpant, restat dicendum.

C A P U T IV.

De avertis, communibusque formæ corruptelis.

Pulchritudinis cura barbarorum etiam mentibus innata. Ast hunc in finem mediis utuntur, quibus pulchritudo omnis profligatur. Abipones profecto ornare se dum volunt, se turpant, fædantque maxime. Puellas, puellosque elegantes passim inter illos videas, apta figura membrorum, coloris, sermonisque ea suavitate præditos, quam multi invideant Europæi. Verum hæc illorum venustas fluxa est, ac ut in floribus, exiui ævi, dum enim adolefcunt,

mar-

Abiporum



Feminarum

Varia

etatis

Virorum



Effigies





Europæi. Verum hæc illorum ventitas Nuxa est,
ac ut in floribus, exique ævi, dum enim adolefcunt,
mar-

marcescunt. Nativa equidem illorum elegantia stigmatibus, aliisque, quos referre aggredior, trecentis modis aboletur. Europæorum quam multi pulchri esse desinunt, dum exterorum avidi imitatores peregrinos, semperque novos comendi corporis modos venantur. Abipones formam depravant suam, visuque terribiles esse incipiunt, quia antiqui moris tenacissimi, & avitis majorum suorum sanctionibus ad amentiam usque devoti. Illorum enim exemplo vultum notis variis insigniunt suum, quarum aliæ utrique sexui communes, scæminis propriæ. Spina acuta carni insculpuntur, inspersoque vulneri recenti cinere nigrescunt, ac fiunt perennes. Crucis figuram fronti impressam, duas lineolas ad oculi utriusque angulum, aures versus protensas, quatuor præterea lineas transversas, ac craticulæ instar cancellatas supra nasi radicem inter supercilia pro insignibus velut gentilitiis vultu circumferunt omnes, & per illa a nationibus cæteris internoscuntur. Hos figurarum ductus spinis exarant vetulæ non soli cuti, sed vivæ carni impactis, quos cinis, ut dixeram, vulneribus cruore manantibus inspersus nigros reddit, nullo, aut modo aut tempore unquam delendos. Hæ quid figuræ denotent, quid portendant, nescio, nesciuntque ipsi, qui his signantur, Abipones. A' majoribus se suis hunc accepisse ritum, id solum norunt, & illis satis est. Plurimæ Americanorum nationes vocabulo, quo crux significetur, penitus carent. Hinc dum Christianis sacris initiati crucis se signo muniunt, latino nomine *Crux*, vel Hispanico *Cruz* utuntur, quod tamen alii aliter corrumpunt. Indi Peruviani lingua Quichua dicunt: *Cruspa*. Quaranii: *Cruzû*. Chiquiti: *Curuzis*. Zamuci, & qui eadem lingua loquuntur, Ygaroñi, Kaipotades, Karaoi, Tunachi, Ymonii &c.: *Curuzirê*.



Lules, Isistines, Vilelæ Cruz Hispanorum more rite enuntiant. Plures tamen Paraquariæ populi vocabulo sibi proprio crucem significare nōrunt. Hanc. vocant Abipones: *Likinrānala* Mocobii *Latizenrānra* Tobæ: *Lotisdagānadac*. Mataquayi, seu ychibachi: *Lekakilūs* - Mbayæ: *Nikenāga*.

Non solum vidi crucem Abiponum singulorum frontibus insculptam sed & Cruces nigras rubris multorum e lana vestibus intextas. Id mirandum sane vel hoc ex capite, quod Christi religionem nondum edocti hoc præstiterint, cum nec significationem, nec merita Sanctæ Crucis perspexerint. Fors ex Hispanis Abiponum, vel ex Abiponibus Hispanorum olim Captivis Crucis venerationem aliquam, vel virtutem cunctis saluberrimam didicere. Quid si dicamus, hanc Crucis apud Abipones expressionem Hispanorum in Americam adventu longe antiquiorem? Illud certum, Crucem ex splendido marmore, quod alii jaspidem cristallinum vocant, sculptam apud Incas Peruvianos Reges magno in pretio, & fors etiam veneratione quondam fuisse. Longitudine tres ulnæ partes, latitudine tres digitos, totidem crassitudine æquabat. Omnes anguli fuere pares, splendorisque eximii. Insigni artificio crux illa constat, sed a quo artifice, quotempore elaborata, unde allata sit, passim ignorabatur. In palatio regio urbis Cusco, & in loco sacro, quem Huaca appellarunt, servata est semper, ab Hispanis dein' Peruvii expugnatoribus, quibus crux pretiosa cum Regiis thesauris in prædam cesserat, ad ejusdem urbis templum princeps translata. Mihi verisimillimum videtur, crucis seu notitiam, seu æstimationem ex Peruvio in vicinam Paraquariam, ut ritus alii, illatam fuisse, dum Indorum Peruvianorum quam

quam plurimi Hispanorum metu in illam provinciam commigrârunt, opportune mihi in mentem venit illius, quod Nicephorus l. 18. c. 20. refert: Turcas a Cosroe Persarum Rege missos Constantinopolim, qui crucem frontibus suis inustam ostentabant. Rogati, eccur signum, quod non colerent, fronte gestarent? respondere: Edoctos se a Christianis crucis insigne ad pestem arcendam valere, dictique veritatem luculenter expertos se fuisse. Pia hæc crucis stigmata ex Christianorum institutione frontibus Turcarum impressa etiam Paulus Diaconus memorat, & Cardinali Baronio teste ad annum quingentesimum nonagesimum primum sacra, hæc industria Turcæ tunc a peste immunes exstiterè. Jacobitz, Jacobi Syri hæretici sectatores circumferebant signum crucis frontibus candente ferro inustum, ut refert Joachimus Abbas in appendice nationum Christianarum. Dictum S. Joannis Baptistæ: *Ipse vos Baptizabit in Spiritu Sancto, & igni.* Matthæi 3, c. v. II. perperam intellectum a Jacobitis illorum hæresi ansam dederat; Nam crucis figura ignito ferro frontibus catechumenorum inusta apud eos pro baptismo fuit. Tranquillis Ecclesiæ temporibus dum Christiani veteres Christi religionem impune profitebantur, Christi nomen manibus inussere suis, ut sancius testatur. Quid, quod & Afri Alarues, etsi religionis Christianæ ignari crucem brachio impressam gesserunt. Eandem brachiis inustam suis plerique nartarum Hispanorum, Lusitanorumque, quod ipse spectavi toties, habent eum in finem, ne a Mauris in captivitatem abducti Christianos se esse possent inficiari. Ast quo fine barbari Abipones & frontibus, & sæpe vestibus crucis figuram impresserint, ultro fateor me ignorare.


Stigmatibus, quæ utrique sexui communia apud Abipones, haud contentæ feminæ & vultum, & pectus, & brachia atris lineamentorum diversissimorum imaginibus compuncta gerunt adeo, ut tapetis Turcici similitudinem referre videantur. Quo magis patritia fuerit quæque inter suos, ac spectabilior, eo plus figuris abundat. At vero multo sanguine eimitur barbarus iste ornatus, gemitibus constat multis. Audi tragœdiam, & si flere non lubeat puellarum cruciatum, ride nationis insanos ritus. Adolescentula ut primum naturæ indicio nubilis declaratur, recepto jam more signari iubetur. In vetulæ humi sedentis gremio caput reclinat suum. Ut pingatur, pungitur. Spinæ pro penicillo: cinis cruori mistus pro colore est. Dilaniatur, ut gentiliū suorum more ornetur. Aculeis spinarum in carnem alte immersis artifex, sed crudelis vetula, alios aliis, figurarum, linearumque ductus describit, tota mox ut facies sanguine diffluat. Quod si doloris impatiens vel ingemiscat misera puella, vel tergiversantis instar caput subtrahat, probris, satyris, vituperiis pessime onerabitur. Apage istam ignaviam, furens exclamabit anus, næ tu nostri generis labes es, ac monstrum, cui spinæ titillatio tantilla intolerabilis! An nescis, eorum te sanguine prognatam, qui vulnera in votis habent, atque adeo in lucris numerant? Tui te pudeat imbellis muliercula! Gossypio mollior videris. Cælebs moriêre, nil dubita. Tam impudenter meticulosam, exquisitam demum nostrorum heroum suo dignam conjugio existimabit? Quod si quieta mihi morem gesseris, ipsa te pulchritudine reddam pulchriorem - - His vociferationibus perterrita juvencula, nî sociarum fabula fieri, nî explodi palam omnium ore malit, nec hilcere audet porro, doloris acutissimi sensum silen.

lento premit, fronte serena, compressis metu conviti-
orum labiis tolerat aculeorum laniatum, qui quidem non uno absolvitur die. Nam hodie spinis compuncta faciei pars una domum remittitur, ad partem faciei alteram, ad pectus, ac brachia compungenda cras, perendie, ac sæpius revocanda. Interea dum finis imponatur laborioso operi, per dies non paucos paterno sub tentorio clausa circumvallatur coriis bubulis, aura frigidior ne obsit. Carne, piseibus, aliis, nescio, quibus dapibus religiose interdicta vescitur pomulis quibusdam, quæ Kakiè, Roayamì, Nanaprahete dicta dumetis innascuntur. Hæc licet aliis non raro febris tertianæ origo ad sanguinem tamen refrigerandum conducunt.

Hac tum plurium dierum inedia, tum cruoris quotidiana effusione exangnes pallescunt adolescentulæ. Mentum non punctulis, ut aliæ partes, sed lineis rectis uno spinæ ductu exaratur, ac finditur. Quæ quidem lineæ ejusmodi sunt, characteres musici illis inscribi ut possent. Spinæ quæcunque venenatum quid habere videntur; Hinc dira earum impressione oculi, genæ, labia horrendum in modum intumescunt, illitisque faucibus cuti cineribus nigrorem tristem imbibunt, ut stygiarum furiarum quampiam videre tibi videaris, dum puellam ex crudeli illa Vetulæ officina prodeuntem cernis, adeo jam sui dissimilem, ut vel invitus exclames: o quantum Niobe Niobe distabat ab illa. Illius aspectu ad miserationem ipsi sæpe moventur barbari parentes, quin tamen de abolendo immàni hoc ritu cogitent unquam; opinantur equidem, per hanc spinarum laniationem filias suas ornari simul, simul ad ferendos subinde partûs dolores erudiri, præpararique. Ut detestandam semper putavi vetularum in cruciandis

C 2

puel-



puellis favitiem, ita habilitatem illarum in istis pingendis suspexi. Nam figuras alias atque alias mira lineamentorum proportionem, punctorum varietate, adductuum utraque in maxilla æqualitate exprimunt curatissime, quin tamen alio præter spinas variz magnitudinis utantur instrumento. Quot fœminas Abiponenses videris, totidem figurarum variationes earum in vultibus deprehendes. Quæ maxime picta, plurimumque compuncta aculeis, hanc noveris esse patritiam, ac nobilissimo loco natam. Illam vel captivam, vel plebeji generis esse nil dubitaveris, quæ ternas duntaxat, quaternasve vultu lineolas nigras circumfert. Apud Thraces quoque nobilis fœminæ insigne fuisse faciem stigmatibus compunctam, refert Herodotus l. 5. aitque, Ignobiles pura facie fuisse, & nullis notis impressis insignitâ. Idem Dio Prusæus in oratione 14. confirmat: Christiana postquam disciplina Abiponum in coloniis radices fixit, eliminata nobis suavoribus ferali hac consuetudine eam fœminæ retinent formam, quam unicuique natura impressit. Dolendum sane, mirandumque, quod Europææ a cunabulis Christianæ fuci, ac pigmentorum abusu ridiculas se reddant iis, quibus stident placere. Dum pinguntur equidem, venustatis nativæ jacturam faciunt perinde, ac Americæ, dum spinis compunguntur. Color sanguine diffusus, non fuco adscitus laudem feret, oculisque probabitur spectatoris.



CAPUT V.

De labiis, ac auribus barbarorum
perforatis.

Præter hæc vultus stigmata aliis quoque utuntur ad se se, ut quidem putant, ornandos, re tamen ipsa ad formæ humanæ extinctionem; Artubus enim suis jam mutilatis, jam pertusis ab hominis ad bestię figuram videntur abiisse. Abiponibus, ut plerisque omnibus per Americam Indis, solene fuit quondam vel ferro ignito, vel arundine acuta labium inferius terebrare. Parato sic foramini arundinem alii, alii tubulum ex osse, vitro, gummi, vel flavo ære, quod ab Hispanis acceperere, conflatum rostri instar insertum circumferunt. Solis maribus, vix dum etiam septentrionibus, is ornatus permittitur, nunquam foeminis. Apud Abipones recentiores mos hic exolevit dudum, viget tamen nostra adhuc ætate inter Quaraniōs sylvicolas, inter Mbayas, Quanas, Payaguas &c. Ob immanem labii appendicem ab Abiponibus *Petegmek* dictos. Hi elegantissimi, ornatissimique sibi videntur, dum fistulam æneam, quæ calami scriptorii diametrum æquat, longitudine spithamam excedit, e labio ad pectus protensam non sine ostentatione gestant. Verum hoc pulchritudinis imaginariæ instrumento Europæis advenis formidabiles se reddunt; Nam vasta proceritate tumidi, coloribus e succo variis totum corpus picti, crinibus colore, qui sanguini sumillimus, purpureo tinctis, ala ingentis vulturis uni auricularum

affixa, globulorum vitreorum fascibus per collum, per brachia, genua, & suras relucens, tabacæ fumum ex prælonga arundine haurientes foro inambulant, omni ex parte terribiles visu formæ.

Quod labii pertusi hiatui inseritur, cujuscunque demum sit materiæ, *Tembetà* vocant Quaranii, & quamdiu religionis expertes nemora pervagantur, adhibent ad unum omnes; Ast hunc labii appendicem abjiciunt ad Romana sacra in coloniis traducti, labii foramine, quippe quod nec lateribus, cæmentoque claudi, neque ulla arte coalescere unquam potest, solo remanente, per quod, dum colloquuntur, saliva ubertim profluit aliquando, & in enunciandis rite vocibus tantillum impediuntur. Indi plebeji omnes, quos in sylvis Mbæ bera detexi, & adolescentes, & adulti arundine tenui, curtaque pro *Tembetâ* utebantur; Trium Caziquiorum vero illud ex guñi, seu resina aurei coloris fuit. Vitreum esse, primo aspectu jurâssem. Sole plusculum exæstuate guñi illud nobile ex arbore Abati timbay copiosissime emanat, & in subjectos tembetâ, crucis, globuli, alteriusve, quam expressam eupiunt, figuræ modulos effunditur sensim: Aura, accedente lapidis instar induratur, nullo humore liquandum: vitri tamen instar pellucidum manet. Ni enim hæc resina arboris Abatitimbay insigni duritie polleret, tembetâ ex illa constans barbarorum labio diebus integris inserta, ac salivæ semper innatans mollesceret denique, & dissolveretur. Dolui sæpe hoc guñi pretiosissimum ex America non afferri, artificibus Europæis vario usui futurum.

Neque putes unicum esse apud Barbaros labii terebrandi modum. Anthropophagi enim, quos Hispani Caribes, Quaranii Abaporú dicunt, venandis, devorandisque hominibus per sylvas occupati inferius labium non pertundunt, sed ad oris longitudinem scindunt adeo, ut vulnere in cicatricem coeunte duplici bucca instructi videantur. Sparsi per nemora oberrant, a nostris hominibus non sine periculo ad religionem persuadendam sæpe, sed frustra conquesti. Caro humana ab Indis Brasiliæ, Paraquariæque prope omnibus cupedias inter quondam numerabatur. Multi illorum Christianæ disciplinæ nostris in oppidis dudum assuefacti, quamcunque seu bubulam, seu ferinam carnem præ humana sibi insigniter fastidiosam, insipidamque videri, hujus desiderio ardere se, fatebantur interdum. Mocobios. Tobàsque adhuc barbaros fame urgente, aliæ si desint dapes, humanis etiamnum carnibus vesci, novimus. Istorum centuriæ aliquot Abiponum in conceptionis oppido Caziquium Principem Alaikin in campis remotioribus cum suorum turma rusticantem, compotantemque sub diluculum per insidias oppressere. Pugnatum est acriter aliquamdiu. Abiponibus sauciis fuga dilapsis Alaikin cum sex comitumibus in acie cæsus, assatus subinde, devoratusque a famelicis victoribus fuit, qui opiparo hoc epulo egregie refectioni, ovantesque abiire. Puer quoque Abipon duodecims, ad mensam nobis famulari solitus, ab iisdem barbari tunc jugulatus, & vitulinæ carnis instar absumptus mensæ cupedias auxit bellariorum loco. Vetulam tamen Abiponensem multis vulneribus ibidem trucidatam in campo reliquerunt intactam, quod illius caro jam durior, nullique proin usui esset *Cachérgajé Lpabé Chigát eya, ran la ybôt*, ut Mocobiorum quidam, pugnae,

mensæque illius particeps, biennio post mihi multa hac super re sciscitanti reposuerat. Hæc occasione anthropophagorum, qui labium exterorum more non terebrant, sed ad buccæ mensuram secare consueverunt. Jam de aurium ornatu, vel rectius, cruciati pauca.

Inaurium usus ut antiquissimus, sic apud nationes varias varius, apud Americanos plerumque ridiculus, sæpeque incredibilis est. Missis reliquis, quæ hoc de argumento in mentem veniunt, de Abiponibus meis duntaxat dissero. Auriculæ pueris æquè, ac puellis teneris perforantur. Virorum plerisque nullus inaurium est usus; seniores tamen nonnulli cornu bubuli, ligni, ossis frustulum, fila laneæ varii coloris, nodulum e cornu fictum auribus perforatis infigunt. Conjugatarum mulierum vix ulla inauribus caret. Illarum figuram accipe. Folium palmæ prælongum duos digitos latum in spiram convolvunt (uti ligularum sericearum volumen esse solet) quæ peripheriam majoris hostiæ, qua in sacrificio utimur, aliquando excedit. Auriculæ pertusæ foramini lignellum majus semper majusque intruditur. Quæ industria annis procedentibus illa auriculæ cutis adeo extenditur sensim, amplificaturque foramen, ut illam ex palmæ folio spiram, quanta quanta est, arctissime circumplectatur, & ad humeros prope defluat. Ipsum palmæ folium inspiram convolutum vi elastica, qua pollet, auriculæ foramen magis indies, magisque dilatat. Exaggeratam, cavè, putes hanc spiræ magnitudinem, auriculæque capacitatem. Hisce, quibus ad scribendum utor, oculis, vidi quotidie innumerabiles fœminas monstrosa hac inauri oneratas, quin & viros aliarum nationum permultos, Nam & barbarissimi Oaëkalot, & Tobæ, alii-

alique extra Paraquariam Americani populi iisdem
 prorsus, quibus Abiponenses scēminz, inauribus su-
 perbiunt. Ferdinandus sextus Rex Catholicus histo-
 riam fluminis urinoco a nostro Patre Gumilla scri-
 ptam avidissime legerat. Incidit forte in libri pa-
 ginam, ubi refert, barbaros quosdam pro locandis
 inauribus tanta auricularum foramina habere, ut
 globus eburneus, quo in tabula (vulgo Billard)
 tudiculis luditur, comode per illa transmitti possit.
 Tunc enimvero subridens Monarcha: videtur mihi
 vir bonus poetam, non historicum agere aliquando,
 exclamavit. In has voces erupit Rex non de histo-
 rici fide, reiue veritate hzsitans, sed novitate tan-
 tarum inaurium attonitus Indorum stultitiam demir-
 ans. Matritensium tamen aliqui hoc Regis dictum
 cuipiam ex Paraquaria advenz ogganniebant, amice
 illi insinuantes, fabulam interdum pro historia ab
 Americanis vendi Europz. Verum de rei, quam
 Rex prope incredibilem duxit, veritate certissimus
 Paraquariensis reposuit: Patrem Gumilla verum, sed
 parum scripsisse de imani inaurium-mole; Auricu-
 larum foramina multo ampliora varias apud Paraqua-
 riz nationes se vidisse. Nosque omnes, quotquot
 inter barbaros illius provinciæ versati sumus, idem
 vidimus quotidie, & verissimum uno ore testamur.
 Æthiopes ex insula Madagassar in Paraquariam ad-
 ductos inauribus nihilominoribus uti, ipsius in valle
 calamuchita spectavi. Quaranicæ mulieres annulos
 ex ære, qui tres aliquando digitos diametri habent,
 non auricularum foramini inclusos, sed ex illo pen-
 dentes gestant Europæorum ritu.

Inaurium multiplicem usum, ut multa alia,
 Paraquarii didicisse videntur ex vicino, & Australi
 Americæ dominante Peruvio. Illius Rex clarissimus,

legislaturque Inca Manco capac in benevolentia significationem subjectis sibi populis facultatem olim impertit, exemplo suo aures perforandi suas ita tamen, ut aurium foramina altero tanto minora essent, quam illa, quibus ipse uteretur. Pro provinciarum varietate varias singulis populis in aures a signavit: Hi perforatis auribus infigebant ligni particulam; Illi fasciculum lanae albae, qui mole sua pollicem non excederet; Isti juncum; Alii arboris corticem. Tribus nationibus auricularum foramina solito ampliora indulta. Quot quot stirpis erant Regiae, pro inauribus annulos latissime patentes adhibere, qui ex longa fascia suspensi ad pectus porrigebantur. Paraquarii Peruvianorum olim imitatores progredientibus seculis varias demum, alias aliis magis ridiculas inaurium formas excogitarunt, quarum nullam Europaeus sine risu spectaverit. Haec aures terebrandi consuetudo, ut divinis e literis patet, mundo prope Coava, nationibusque prope universis communis erat, quamvis diversa apud plerosque inaurium figura, significatioque. Indis orientalibus, Persis, Atheniensibus nobilitatis insigne fuit auris perforata, cui jam aurum, jam gemma, jam ebur ab opulentioribus appendebatur, ut Arrianus de gestis Alexandri adnotavit.

Cum Abipones superciliis, ciliisque nudent oculos, labia, auresque pertundant, faciem spinarum aculeis compungant, totque figuris insigniant, barbae lanuginem e mento evellant, comaeque ingentem portionem e sincipite, vehementer mirabar saepius, quod nasum intactum, illasumque conseruent, cujus cartilagineum Afri, Peruviani, Mexicanique olim perforarunt, monileque aliquod foramini inseruere. Patre Josepho Acosta Authore L. 7. Histor. C. 17. Tikorik Mexicanorum Rex Smaragdum insignem e naribus terebra-

rebratis pendentem ostentabat. Brasili jam a prima ætate non labium inferius modo, sed & alias faciei partes perforant, illarumque hiatibus lapillos vulgares prælongos inserunt, tetro sane, ut Massejus notter L. 2. Histor. Indic. ait, spectaculo! opus tessellatum, vel Mosaicum dixeris Brasilorum vultus. Sed his liberaliores fuere Parthi in se deformandis, qui ornatus gratia omnes prope corporis artus perforarunt, illisque lapillos, grana pretiosa inseruerant Tertulliano teste L. 1. de cultu Fœmin. C. 10. Si Diodoro siculo L. 4. C. 1. fides, etiam fœminæ Æthiopum ad Arabiæ fines labia terebrata pro vultus ornamento habuerunt. Ex his liquet non solos Americæ barbaros stigmatum variorum usu desipuisse. Diversissimi tamen diversis populis erant horum stigmatum fines, ac significationes. Apud Thraces, teste Herodoto L. 5. apud Dacos, & Sarmatas juxta Plinium L. 22. nobiles his stigmatibus designabantur interdum: sæpe alias servi, ut pecoribus Domini sui nomen inuritur. Quandoque Æthiopum frontibus, qui e fuga retracti, vel ingenio suo fugaces putantur, Hispani heri primam nominis sui literam candenti ferro imprimi curant. Vegetius L. 2. C. 5. *Victuris in cute punctis milites scriptos*, ait. Quod de militiæ tyronibus belli imperatoris nomine notatis intelligendum putat Justus Lipsius L. 1. de Milit. C. ultimo. Apud Hebræos idololatriam olim denotabant stigmata. Hinc 3. Reg. 18. V. 28. de Baalis sacrificulis: *Incidebant se juxta ritum suum cultris, & lanceolis, donec perfunderentur sanguine*. Ethnici equidem, dum sacra faciebant Magnæ matri, Bellonæ, Dianæ, corpus dilaniabant, perfodiebantque suum modis, instrumentisque variis, impresso jam fronti, jam volæ manus, jam cervici stigmate. Id quod C. 19. levitici interdicitur Judæis; *Neque figuras aliquas, aut stigmata facietis vobis.*

Sæpe tamen alias notæ corporibus impressæ gentis originem, patriamque prodidere. Affermat Herodotus L. 4. Lybies, ut e Trojanis ortos se probarent, quædam stigmata corpori inurebant suo, ex quo infertur, apud Troes eiusmodi stigmatum consuetudinem olim viguisse. Britanni quoque veteres tota corpora pungebant, expungebantque figuris variis, Cæruleo colore imbutis, ut Julius Cæsar L. 5. de bello Gallico, & Herodianus L. 3. meminerunt. Quod Martiali argumentum præbuit epigrammatis 54. L. 2. Claudia cæruleis cum sit Ruffina Britannis edita, cur latæ pectora plebis habet? Abiponibus certe illas vultus picturas, punctiunculasque eum maxime in finem familiares esse, ab aliis ut nationibus se dignoscerent, majorumque suorum institutis conformarent. Aliam ex illis causam exculpimus nunquam.

C A P U T VI.

De Abiponum firmitate, ac vivacitate.

Ridendi profecto, qui America nec eminus conspecta, Americanos promiscue omnes viribus uti parum firmis, corpore imbecillo, valetudine tenui esse, audacter magis, quam vere scripserunt. Id generatim affirmari haud potest. Pro cæli, regionis, victus, occupationumque varietate variat corporum habitudo. Robustiores utique experimur Europæos, qui saluberrimos Styriæ montuose aeres hauriunt, quam qui palustri Bannatus in planitie tertiana flavescent.

Afri-

Africana mancipia navibus adveſta Ulyſſiponenſi in foro pecorum inſtar venialia proſtabant ſæpe, me iſtic agente. Singulorum patriam expiſcantur emptores, non niſi robuſtiſſimos ſibi peroptantes. Ex Angola, ex congo, ex promontorio viridi, & maxime ex Madagaſcar inſula oriundi certatim, avidiſſimeque deliguntur, quippe qui fidæ plerumque valetudinis, ſolertiæ majoris. Afros in regione, quam Luſitani la coſta de la mina appellant, natos vix eſt, qui emat; Debiles fere ſunt, ſegnes, & laboris impatientes, quia æquatori viciniſſimi, ubi ventus aut nullus, aut brevis, aura tepida, imbres frequentes. Hac certe in vicina ad Paraquariam navigantes malaciâ continua detenti, cœli æſtu prope aſſi, calidiſque imbribus quotidie aſperſi ternas prorsus hebdomades hæſimus. Cui mirum ſit, ſub hoc cœli languſcentis ſitu corpora item lanquida imbecillaque procreari, licet in aliis paſſim Africæ oris robuſtos, ſtrenuosque populos reperiri noverimus. Ex hoc prona eſt ad longe, lateque patentem Americam, & ejus incolas conjectura. Illius provinciæ, quin ſingula provinciarum loca ut maximo terrarum intervallo a ſe diſtant, ſic aeris, alimentorum, habitationum proprietatibus diſcrepant maximopere; Ex quibus alia, atque alia incolarum habitudo conſequitur ita, ut hic debiliores, iſtic robuſtiſſimos deprehendas.

De Americanis aliis alii, per me, ſcribant, quibus, & quidquid viſum fuerit. Nil repugnabo. De Paraquarienſibus confidenter affirmo, nationes equeſtres, quas in chaco vidimus, pedeftribus formæ concinnitatè, corporum proceritate, virium robore, ſanitate, vivacitateque ut plurimum præſtare. Abipones ſane corpore pollent lacertoſo, robuſto, agili & cœli injuriarum telerantiſſimo. Obefum, vaſtaque
ab-

abdominis mole gravem vix usquam reperias. Quotidiana equitatione, venatu, ludicris, feriisque certaminibus identidem occupati raro pinguescunt, quia simiorum more semper inquieti. Optimo humorum temperamento, fidaque idcirco valetudine gaudent, quam Europæorum plurimi inviderent. Pleraque morborum genera, quæ Europam seu cruciant, seu exhauriunt, ne de nomine quidem nōrunt. Podagra, hydrops, epilepsia, icterus, calculus, hernia &c. peregrina illis vocabula, & monstrorum instar. Caput nudum soli æstuanti objiciunt diebus integris, quin tamen de capitis molestia conquerentem ullum audias. Jurares illos sensus expertes, ex ære, vel marmore conflatos, cum tamen vel ista solis æstu incalescant. Siti per aridas solitudines diu ardentes aquas palustres, falsas, lutulentas, putres, amaras, quasquas demum deprehenderint, plenis hauriunt faucibus citra noxam. Carnem bubulam, cervinam, tigrinam, duram, semiaffam, struthionum seu ova seu carnes, varia arborum poma immatura liberaliter in se ingurgitant, neque tamen stomachi languorem, aut alvi difficultates sentiunt. Cœlo sæpe pluvio, aere perfrigido vasta flumina nando transmittunt citra viscerum, vesicæque perturbationem, quæ Europæis natantibus molesta sæpe, sæpe, stranguria accedente, periculosa. Ephippiis duro è corio confutis insident producto in multas hebdomades itinere, quin tamen usque fessitando vel extimam cuticulam offendant. Ad fulciendos pedes stapede nullo, equis fere succussatoribus utuntur, post equitationem tamen horis pluribus non interruptam nullum corporis exagitati, fatigatique indicium in ullo horum observabis. Gelido strati in cespite, non raro, dum subitus ingravescit imber, aquis prope innatantes noctem agunt, quid tamen rei

Colica sit, quid arthritis, omnino ignorant. Utriusque periculum subeunt Hispani, aquis pluviis diutius madefacti; Hæ cuti illapsæ, nescio, quam pestem toti afflant corpori in America, sæpe animi defectionem, syncopen, aliquando pustulas, ulceraque producunt. Vidi frequenter Hispanos milites in templo exanimis similes corruisse, quia per viam ab imbre pertinacius conspersi. Abipones inter diurnas toties pluvias sub dio dies, noctesque complures perstant incolumes, quia semper pedes nudi; calceatis equidem plus quam nudatis pedibus officit humor ex pluvia contractus, qui, cum, unde expiret, exitum non inveniat, introrsum serpens ossa, nervosque penetrat, ac reliquum pessime afficit corpus. Ad hanc perniciem cavendam solenne fuit nobis equo iter facientibus, pluvia invalescente pedes calceis, tibialibusque nudare protinus. Verum in scyllam sæpe incidimus, vitantes Charybdim. Timendum erat equidem, ne equo cespitante pes nudus ligneo stapedi allidatur, offendaturque. Sed audi reliqua, quæ ad Abiponum firmitatem probandam, faciunt.

Si quæ forte spina plantæ pedis infigatur, illamque confractam nec digitis assequi, neque evelle-
re queant, portiunculam carnis, cui spina inhæret, ipsam serena fronte cultro excindunt. Hostem, vel remotiora speculaturi loca utroque pede equi dorso insunt. Arbores, nubibus minantes, conscendunt, illarum in ramo quieti confident, ex abditis illic alveariis mel exempturi, nullo unquam vertiginis aut sensu aut periculo. Ad colonias nostras translati, securis, aratrique tractatione, cui scilicet nunquam in-
sueverant, defatigati dum a viribus defici, dum sudore diffuere, ac æstuarè corpus advertunt suum: Sanguis mihi irascitur jam *la Yivichigni Yauigra*, ex-
cla-

clamant. Ad hunc placandum in promptu illis est remedium: cultrum in furam altissime demergunt, profluentemque inde cruorem lætis spectant oculis aliquandiu, eumque applicata vulnere gleba sistunt denique, ac se jam revixisse, bene sibi esse, voce hilari fatentur: *là rioamcarà*. Jam bene valeo. Adeo in fundendo, quasivero alienus esset, sanguine prodigi, ac fere nimii sunt non valetudinis duntaxat, sed & gloriæ desiderio. Nam publicis in compotationibus spinarum fasciculo, vel acutis Crocodilorum e dorso officulis pectus, brachia, linguam, & — sed pudet dicere, crudeliter compungunt multa cum sanguinis effusione. Idque certatim factitant, ut fortitudinis famam adipiscantur, ut sanguinis, dum cum hostibus res est, fundendi metum per spontanea vulnera desperant, ut cutem densis cicatricibus obductam telis reddant impenetrabiliorem. Septennes pueri, parentum imitatores, spinis perinde in sua sæviunt brachiola, cicatricesque ostentant copiosas, magnanimitatis scilicet ætate majoris documenta, ac belli, ad quod a teneris educantur, præludia. Ritus hic semet vulnerandi utut barbarus in barbaris tamen, qui militiam profitentur, vix non probandus. Nam, ut vegetius rei militaris apud Romanos magister C. 10. folio mihi 66. scripserat: *Qui ante longum tempus, aut omnino nunquam videre homines vulnerari, vel occidi, cum primum aspexerint, perhorrescunt, & pavore confusi de fuga magis, quam de conflictu incipiunt cogitare.*

Non nullos macie confectos, de tabe, hecticave suspectissimos filiquæ Græcæ esu, potuque quotidiano vidimus convaluisse. Morbo interdum atrociore correpti, periculosissime sauciati parabili plerumque remedio brevissime confanescunt, & sæpe nullo, canum instar. Multos eorum vario telorum genere perfos-

sos trajecto latere, ossibus, costisque fractis ægre
 spiritum ducentes, sanguini multis e vulneribus ma-
 nanti immersos exhorui, spirantia mortis simulacra.
 Paucis post hebdomadibus eosdem incolumes equo
 procurrentes jam, vel compotantes dum forte vide-
 rem, quidni eorum sanationem corporum firmitati
 tribuendam putarem, cum medicis illorum, medica-
 mentisque futilibus neutiquam possem. Variolas, mor-
 billosque unicam prope, qua America exhauritur, ac
 calamitosissimam esse pestem quis ignorat? Corripi-
 untur ea Abipones, ut cæteri Indi, at paucissimi ex-
 tinguuntur, quamvis eo morbo laborantes negligenti-
 us certe, quam reliquæ nationes, sibi caveant. San-
 guinis nempe, ac humorum temperies melior saniem
 nec tantam in illis, neque tam exitialem progignit.
 De variolis alio loco plura. Plumbeis vulnerati glo-
 bis, quin eos e corpore evelli sinant suo, annos
 plurimos vivunt, valentque; Plumbum seu brachio,
 seu pedi impune inhærens, ceu firmitatis suæ monu-
 mentum nobis ostentarunt sæpius, manibusque tan-
 gendum nostris obtulere. Quod quidem novitatis
 nihil, admirationisque adfert medicis. Testatur enim
 Bartholomæus Maggius in dissertatione de Vulneribus,
 plumbum alterius in corpore per triginta annos sine
 dolore detentum se vidisse. Horstius medicus fami-
 liariter novit virum nobilem, qui ultra quadraginta
 annos sine notabili incommodo globulum plumbe-
 um in talo circumferebat. Illud memorabilius, glo-
 bum sclopetarium, nisi cor feriat, vel caput, raro
 lethalem esse Abiponibus; Quin illorum Caziqui-
 us præclarus Kaapetrai-kin glandem ejusmodi fronti suæ
 ab Hispano impactam citra discrimen excepit, pro-
 vectissima jam ætate ab insensis sibi Mocobiis iter fa-
 ciens per insidias oppressus, cum sex commilitonibus
 suis hasta trucidatus, devoratusque est, me in con-

ceptionis oppido id temporis agente. Hæc mecum reputans mirabar sæpe, ignivornas Europæorum fistulas tantopere a barbaris formidari, rarissime illis lethales. Sed nimirum ut pueri ignes fatuos, etsi innoxios, metuunt; Sic Indi plus nitrati pulveris crepitum, quam plumbi jactum expavescunt, quem casum toties, & aeri duntaxat timendum experiuntur. Militum enim Paraquariorum bombardæ nubibus simillimæ mihi videbantur, e quibus tempestate coorta fulgura plurima, lethifera fulmina paucissima excutiuntur. Hæc, quæ memoravi, ad Europæos de Abiponum robore convincendos, ni fallor, aliquantum valebunt. Neque enim mihi unquam probabitur illorum opinio, qui Americanis stupidum, hebetiorem obtusioioremque corporum ad percipienda incommoda sensum tribuere. Enimvero persentiscunt Abipones elementorum impressiones, telorum injurias, ortos inde dolores, sed illorum sensu non fatiscunt, non opprimuntur, ut plerique alii, seu quia sanguinis, humorumque temperatione meliori, majori nervorum, artuumque robore gaudent, seu quia a pueris assueti ejusmodi incommodis dudum obduxere callum, seu quia militaris gloriæ appetentissimi negant sibi dolere quiddam, etsi dolore afficiantur aliquando. Jam reliqua, e quibus Abiponum vigor, vivacitasque incredibilis elucescat, argumenta perstringamus.

Illos raro calvescere, incanescere sero, superius memini. Provecissima ætate vix denique consenscunt, plantarum quarundam more, semper virides, vegetique. Summis laudibus, atque adeo admiratione prosecutus est Cicero libro de senectute Masinissam Regem Mauritanix nonaginta annos natum, qui, cum ingressus iter pedibus sit, in equum omnino non ascendit: Cum equo, ex equo non descendit. Nullo inbre, nullo
fri

frigore adducitur, ut capite operto sit. — — Exequitur omnia Regis officia, & munera &c. Quot Abipones decrepitos, totidem Masinissas, & Masinissa vegetiores tolerantioresque suspiceret Romanus orator. Suis vix fidem haberet oculis, dum videret senes prope seculares duodennis adolescentuli instar sine stapedum adminiculo in equum ferocem uno impetu assilire: Cælo ardentissimo illi insidere horis, quin & diebus continuis; Mellis legendi gratia cælas arbores scandere: sub Jove jam frigido, jam pluvio iter prosequi, humi cubare, hostibus in acie obluetari, nullos, quos seu venatus, seu militia offert, labores recusare: Oculorum acie incredibili, auditu promptissimo pollere, dentibus integerrimis abundare: Solum annorum numero, non alia re a florentissimæ ætatis viro distinguere. Quæ quidem omnia, quamvis per omnem Europam rarissima, quid si Europæorum fide majora? Sine admiratione spectavi quotidie Abiponum in Colonia, quæ senes juvenibus, præter ætatem, omnia similes copiosos numerabant. Si quis octogenarius vivere destinat, ceu in ætatis flore extinctus deploratur. Fæminæ viros plerumque vivendo superant; quia bello non absumentur; quia suapte natura, humidiores cum sint, vivaciore esse solent. Centenarias vetulas, seculo majores tot Abiponum in solo invenias, ut illas admirari quidem, vix tamen numerare queas. Eandem firmitatem corporum, vivacitatemque pedestribus Paraquariæ nationibus non ausim asserere. Quarani, Lules, Ysistines, Vilelæ, alique Indi pedites Europæorum more morbos, senectutemque & sentiunt, & corporis habitu produnt suam. Illorum vita, ut Europæis passim usuvenit, jam brevior, jam productior. Paucos illorum seculares deprehendas, vel seculo propinquos. Operæ pretium fuerit, fontes, & quibus Abiponum vigor tantus profuatur, indagare.

CAPUT VII.

Cur Abipones tam vegeti, & vivaces?

Vivida, vivaciaque corpora & parentibus debent suis Abipones, & Sibi. Profecto vigor juventæ per temperantiam conservatus in cæteram ætatem, atque adeo in ipsam sobolem derivatur. A morbidis enim languentibusque morbidos liberos procreari, experientia docet. Abipones toto, quo adolefcunt, tempore laticiviam nesciunt, & licet indolis sint feruidæ, nullo libidinum genere labefiunt. Confabulationibus, ludis, facetiis indulgent, ast verecundiæ intra limites semper. Ipso, quo inter illos versabar, septennio nihil a me visum esse, auditum nihil, quod petulantiam, obscænitatemve oleret, asseveranter affirmo. Instinctu quodam naturali, sibi proprio, pudoris profanandi modos, occasionesque perhorrescunt pueri, puellæque: Has cum illis sen clam, seu palam confabulantes nusquam videas, nunquam in foro otiosas. Matribus domestico labore occupatis sociam navare operam, in deliciis habent. Armorum, eorumque exercitatione quotidiana adolefcetes maxime capiuntur: In horum singulos bellissime convenit Horatianum illud: *Imberbis juvenis, tandem custode relicto, gaudet equis, canibusque, & aprici gramine campi.*

Aliarum nationum Indi brevioris sæpe, gracilis, & imbecilli sunt corporis. Multi eorum, antequam viri, marcescunt: Alii necdum senes misere consenscunt,

ſcunt, aut præcoci fato extinguuntur ante tempus. Causam quæris? dicam, quod ſentio. Multi miſeri, quia miſeris parentibus prognati: Alii, quia laboris onere oppreſſi, indumento, cibo, habitatione parcifſime inſtructi: Complures alii, quia a prima adoleſcentia in voluptates obſcenas effuſi laſciviendo vigorem naturalem exhauſere. *Libidinoſa etenim, & intemperans adoleſcentia effœrum corpus tradit ſenectuti*, ut Cicero Lib. de Senect. aſſerit. Quam multis cheu præmatura morte ſublatis epitaphii loco illud ovidii faſt. I. quadraret: *Nequiritia eſt, quæ te non ſinit eſſe ſenem*. Neptiæ a juvenculis nimium acceleratæ non raro in cauſa ſunt, cur Indos reliquos Abiponibus vel infirmiores, vel minus vegetos, minus vivaces experiamur; Hi equidem, niſi anno trigeſimo quam vigeſimo propiores de conjugio vix cogitant: Raro ſceminas quatuor luſtra nondum emenſas ducunt. Quod ſane ut ad conſervandum robur, ſic ad vitam producendam, ſobolemque robuſtiorẽ procreandam plurimum conferre, Philoſophi, medicique affirmant. Cur germani veteres tam vegeti, tam proceri, tam longi plerumque ævi? Tacitum de his differentem audi: *Sera venus, eoque inexhauſta pubertas; Nec virgines feſtinantur. Eadem juvena, ſimilis proceritas; Patres, validæque miſcentur, ac robora parentum liberi referunt*. Nil dubitandum a teneris parentibus prolem edi non robuſtiſſimam; Et cum corporis habitum animi affectio conſequatur, ut Galenus prolixè docet, mirum haud eſt, tales fœtus eſſe quoque ſenſu tenues, ac mente imbecillos. Bellicoſa hæc noſtra ætas cum homines & multos, & proceritate inſignes ſuis pro legionibus peroptet, præmaturas juvenum nuptias cohibere ſtudeat. Audiatur hoc ſuper argumento Ariſtoteles L. 7. politicorum C. 16. *Eſt adoleſcentum conjunctio* (verba illius ad apicem recito) *improba ad ſilio-*

liorum procreationem. In cunctis enim animalibus juveniles partus imperfecti sunt, & femina crebrius, quam mares & parva corporis forma gignuntur. Quocirca necesse est hoc idem in hominibus provenire. Hujus autem conjectura fuerit, quod in quibuscunque civitatibus consuetudo est adolescentes mares, puellasque conjugari, in eisdem inuilia, ac pusilla hominum corpora existunt. In partu quoque laborant magis puella, ac pereunt plures. — Masculorum corpora crescere impediuntur, si adhuc &c. &c. Hanc Philosophi sententiam mire probarunt Ægydius Romanus, & Albertus Magnus, rationibusque solidis stabilierunt. Proh! quoties parentes genere illustres, summoque loco nati, dum liberorum connubia nimium accelerant stirpis suæ perpetuandæ studio, hanc subito extinctam, seque sine filiis, ac nepotibus lamentantur. Si qua in re, in conjugandis filiis festinandum est lente parentibus, habita ætatis, viriumque ratione. Quod quidem consilium Abiponum, Germanorumque veterum exemplis prorsus conforme, de quibus Cæsar L. 6. de bello Gallico: *Ab parvulis labori, ac duritiæ student. Qui diutissime impuberes permanserunt, maximam inter suos ferunt laudem. Hoc alii staturam, alii vires, nervosque confirmari putant. Infra annum vero vigesimum femina nuptiam habuisse, in turpissimis habent rebus.* A priscis illis, quos Cæsar laudat Germanis quam alii sunt germani hodie! Sed aliud, quo Abiponum firmitati, proceritatique consulitur, præsidium videamus.

Matres suo, non alieno ubere proles lactant suas, idque nutricis officium in tertium fere annum prosequuntur. Quo quidem temporis intervallo a maritis abstinere eas omnino, ajunt. Id quod certe ad roborandos fœtus magnopere, si medicis fides, conducit. Nam Galenus L. 1. de Sanitate tuenda: *Ad-*

moneo, inquit, quæ lactant proles, ut ab omni impuritate abstineant; Hac enim lac noxium efficitur &c. sanguis equidem melior (in prægnantibus) abie ad nutriendum fœtum; Hinc in uberibus lac modicum, & noxium remanet. Infantes, qui a gravida lactantur, a Plinio dicuntur colorati, a coagulato scilicet, & spongioso lacte pasti, destructique. Ad hæc confirmanda valet, quod Cinna Catullus in Libro de 20. consulibus refert: Cajum Fabricium virum cætera præstantem cum morbis insolitis per omnem vitam conflictatum esse vel ea de causa, quod a matre jam prægnante per quatuor menses fuerit lactatus. Quod discrimen a suâ ut averteret filiola, illius nutricem vestalium in ædibus per triennium custodiendam dedit. Hæc, pluraque, quæ huc faciunt, alia adfert Petrus Justinelli in suo de educatione prolium commentario.

Ipsa quoque educatio multum habet momenti ut ad formandos mores, sic ad corpora Abiporum induranda. Nam, quod Quintilianus L. 1. instituit. scripserat, mollis illa educatio, quam indulgentiam vocamus, nervos omnes & mentis, & corporis frangit. Dicti veritas nostris quotidie observatur oculis. Videmus equidem homines delicias inter, cupediasque suaviter educatos languere, molestiisque levissimis frangi: Rustico in mapali adultos laborum, belli, cœlique cujuseunque asperitatum tolerantissimos usque vigere, & valere. Abiporum educationem delicatam nemo dixerit. Vix natæ proles gelido, si ad manum sit, flumine abluuntur. Cunas, plumas, pulvillos, fascias, oscula, crepundia plane nesciunt. Levi ex lutræ pellibus lacinia tectæ, ubi fors tulerit, cubant modo, modo nefrendulorum more solum perrepant. Quoties equo faciendum iter matri, prolem in mantica, aprugnis e pellibus confuta, atque ex

D 4

ephi-



ephippiis pendente una cum catulis, ollis, cucurbitis &c. collocat. Sæpe alias maritus lactentem filiolum matris e brachiis raptum equo imponit suo, oculisque liquida voluptate plenissimis equitantem spectat. Balnei gratia flumen pernatans mater parvulum pectori appressum suo manu tenet altera, altera ceu remo utitur. Majuscula si sit proles, flumini injicitur, ut natare discat, dum ambulare incipit. Puellios vix ab uberibus remotos raro sine sagittis, & arcu in forum prodeuntes videas. Aviculas, muscas, omne animalculorum genus insectantur. Solenne illis, ac volupe in scopum designatum collineare, quod militiæ præludium dixeris. Equo turmatim procurrunt quotidie, & cursus velocitate certant. Quæ omnia ad corporum integritatem, augmentumque incredibiliter conferre quis dubitet? Superfederent utinam Europææ matres violentis naturæ artificijs, blandimentisque, quibus ad infantulorum cultum abutuntur. Moderarentur utinam fascias, ac linteola, queis tenera prolium corpuscula ceu vinculis coercent, ac veluti carcere claudunt, næ! pauciores loripedes, varos divaricatis cruribus, compernes, gibbo onustos, pumiliones, imbecillos, morbidosque Europa nostra numeraret.

Abipones veste non corpori adstricta, sed laxa, & ad talos usque defluente utuntur, quæ corpus tegat, non oneret, neque premat, quæ adversus aeris injurias illud tueatur, quin tamen corporis expirationi obstat, vel sanguinis circuitum moretur. Quod utique Europæis contingere necesse est, qui vestibus sæpe oppressi & collum, & pedes, & manus, & latera jam arctis indumentis, jam tot fibulis, tot cingulis, tot fascijs ornatus gratia constringunt, ipsumque adeo caput, ut plaustrum, adscititiis crinibus, tre-

centis crepundiis, appendicibusque oneratum quoti-
die circumferunt, certo valetudinis detrimento. Sa-
pientes tot ad Orientem populi, quin & prisci ger-
mani fere amplum, laxumque indumenti genus sapi-
enter maluerunt. Quid si illis vel propterea & cor-
pora ampliora, & laxiora vitæ spatia obtigere? Qui
incolumitati consultum suæ cupit, ut aliis in rebus,
sic in vestitu illud curandum sibi putet: *Ne quid ni-*
mis. Tenuitatem tamen vestium nimiam perinde
valetudini perniciosam, arbitramur. Aere variante
variant amictum prudentiores, ut nautæ vela. Ipsi
Abipones barbari textis e lana vestibus contenti alias,
ut primum Auster gelidior aspiraverit, pallium quod-
dam e lutræ pelliculis scite compositum arripiunt sine
ætatis, sexusve discrimine omnes. Pellicea hæc vestis
pallii, quo sacerdotes ad cantandas in templo vespere-
ras utimur, aliquam refert similitudinem, & ab illis
nichigerit vocatur à *nichibegè*, quod lutram significat.

Galénus libro de sanitate tuenda libere, vereque
asseruit: *Maximum esse malum ad sanitatis custodiam quie-*
tem nimiam corporis, ac maximum bonum moderatam, &
justam morionem esse. Huic consonat Celsus L. I. C. I.
Ignavia corpus bebezat, labor firmat; Illa præmaturam
senectam: Iste longam adolescentiam reddit. Hinc veteri-
bus Romanis quotidiano prope in usu palæstra, discus,
saltus, luctatio, cursus, equitatio, pugilatus, pilæ lu-
dus, natatio, venatio &c. fuere. Nil porro mireris,
Abipones athleticè valere, ac Macrobiorum instar mul-
tum vivere. Continuo in motu versantur. Equita-
tio, venatio, natatus illis quotidianus. Bellum, quod
vel feris, vel hostibus inferunt, creberrimæ excursio-
nis est causa. Flumina nando superare, arbores mel-
lis gratia scandere, hastas, arcus, sagittas cultello ela-
borare, funes e corio texere, ephippia concinnare

frequens, & quod pedes, manusve fatiget, illis negotium. Quod si ab his vacationem sibi indulgeant, cursu certant equites, præmio proposito, quod, qui metam attigerit primus, victori cedit. Sæpe ipsi, quibus currunt, equi victoriæ præmium designantur. Familiarissimus item Abiponibus, quo pedites utuntur, Ludus alter. Illius instrumentum est lignum tres palmos longum, affabre baculi instar rotundatum. Illius extremitates crassiores, medium gracilius est: Ab illis Yüele, vel Hepiginsancatè, ab Hispanis macána dicitur, & Hungarorum Pusagan aliquomodo refert. Hoc lignum ad metam jactant nisu maximo ita, ut per intervalla terræ illidatur identidem, identidem in altum subsiliat eo fere modo, quo pueri hujates lapillos per fluvii superficiem vibrare solent. Quinquageni sæpe, sæpe centeni longo consistunt ordine, singulique, mutatis, vicibus, lignum jaciunt suum. Qui longius qui rectius jecerit, præmium, laudemque refert. Hoc ludo, quem a pueris in plures continuant horas, & oblectantur, & fatigantur incredibili corporis utilitate. Ejusdem ligni, quod ludi modo, modo belli instrumentum, ad hostium, ferarumque quassanda corpora frequens ac formidabilis usus est plerisque barbaris. Ignavi, osecitantesque nolunt cochleæ vitam vivere Abipones; Hinc neque aliorum more, qui otio torpent, culcitris, mensæ, tabulæ lusoriæ semper affixi, quique rarissime ad forum, vel campum prorepunt, cito, misereque computrescunt. Abiponenfes feminæ, etiam virorum ludis, certaminibusque equestribus interdiciuntur, rei domesticæ procuratione dies, noctesque distentæ vix respirandi, conquiescendique tantisper habent opportunitatem. Hinc masculus ille matrum vigor ad producenda foetuum gigantea prope

corpora, hinc robur, vitæque diuturnitas tanta. Ex medicorum namque sententia, corporis exercitatio ac motus frequentior innatum calorem fovet, plethoram arceat, succos superfluos expellit, ac dissipat, artus agiliores reddit, promptioresque sensus, pulmonum spiramina promovet, nervos corroborat, corporis poros, & meatus per sudorem aperit, digerit alimenta, ac digesta excernit, corpus animumque convalescere facit. Aquas sine motu videmus putrescere. Aer sine ventorum impulsu, ingravescit. Eufis in vagina diu feriatas rubigine obducitur. Vestes diuturno situ squalent. Desidia, otioque cutis meatus in hominibus obstruuntur, humorum fluxiones invalescunt, morbi articulares, epilepsia, apoplexia, languor stomachi, cibi, atque ipsius adeo vitæ fastidium nascuntur. Has, quas medici desidibus minari solent, calamitates ignorant Abipones, quia desidiam, otiosamque quietem ignorant, nisi eam defatigati restaurandis viribus necessariam arbitrentur.

Victus quoque, cui hi assveverant, ratione illorum incredibiliter firmari corpora, vitamque ultra solitos limites produci, nunquam dubitavi. Quod Tacitus de veteribus Germanis scripsit, de illis scriptum puta. *Cibi simplices, agrestia poma, recens fera, aut lac concretum sine apparatu, sine blandimentis expellunt famem.* Carne quidem bubula, vel ferina plerumque assa, raro elixa vescuntur, ut fors tule-rit. campus si venantibus feras neget, aqua suppedabit esurientibus præter varii generis pisces, lutras, anates, porcos fluviatiles &c. Ex aere quoque aves non spernendi saporis, ex sylva diversas seu humi, seu in arboribus sponte natas, fruges famis remedia, accipiunt. Desint hæc omnia, sub terra, vel

vel aqua latentes radices pro esca passim adhibent. Piscium, præstantissimorum licet, esum sola illis necessitas persvadet. Carnem tigrinam, teterrimi quamvis odoris, tanti faciunt, ut siquis tigridem necaverit, illam in minutas portiones dissectam cum fociis partiatur, ne vel unus contubernalium suavissimo hoc, ut illi putant, gulæ irritamento careat. Vetus est medicorum querimonia, novis ciborum condimentis novo ex orbe allatis novos quoque morbos in Europam fuisse inVectos, ut cocos plus obesse mortalium valetudini putent, quam pharmacopœi omnes prodesse unquam possint. Hæc in Abipones querela non cadit; Nam condimenta omnia nesciunt, dape simplici vescuntur. Acetum, uti & ipsi Hispani Americani, pessime averfantur. Salem, caprarum more, sitientissime appetunt, sed rarissime adhibent, quia sale, salinisque carent suis in terris. Hanc ut supplerent penuriam, fruticem ab Hispanis Vidriera dictum cremare solent, ejusque cineres, falsuginis aliquid habentes salis loco carnibus, tabacæque foliis, quæ vetularum saliva prius subacta mandunt, aspergere consueverunt. Verum cum hoc frutice, cujus cineres salis dixi supplementum, multa Abiponum contubernia careant, insulsis plerumque dapibus utuntur. Salis usum moderatum humanis corporibus esse saluberrimum, nemo negaverit, quippe qui noxios depascitur humores, arcetque putredinem; Salis tamen abusu crebriore oculorum obtundi aciem, succos meliores exhauriri, ac mordaces tum sanguini, tum cuti infectos progenerari, atque adeo urinarios meatus sæpe offendi, affirmant medici. Experti sumus in Paraquaria, equos, mulos, boves, ovesque in illis solum pascuis pinguescere, ubi nitri, vel falsuginis aliquid gramini admixtum; Hoc si absit, strigosa

evadunt pecora, & brevissime emaciantur. Sale conspersæ carnes perdurant, sed quo liberalius salitæ, eo citius putent, ac putrescunt, humore scilicet, in quem sal resolvitur, calori conjuncto putredinem accelerante. Si carnes bubulæ solo aere, si pisces solo ad ignem remotum fumo durentur, nulla salis vel mica accedente, ad menses plurimos citra noxam durabunt. Id meo mihi experimento certissimum, quin & barbaris omnibus. Dum e Paraguarum in Europam renavigavimus, commeatus noster tum carne salita, tum solo aere siccata potissimum definiebatur. Hæc, quia salis expertus post quadrimestrem navigationem ad portum Gaditanum usque semper incolumis mansit, & boni saporis. Illa mox putrefacta, & vel a famelicis nautis in mare abjecta. Audi jam, quid ex his inferam. Abipones, licet sale rarius, parciusque utantur, cum bene tamen valeant, vivantque per diu prope omnes, quidni suspicari liceat, salis abstinentiam plus ad corporum robur conservandum facere, quam illius, maxime si nimius sit, usum.

Dietam, cibi, potusque moderatricem tardæ senectutis, firmæ valetudinis, vitæque productioris fontem esse, pleno ore clamant medicorum, philosophorumque principes. His concors poeta Britannus: si quis tarde cupit esse senex, cibo, ut medicina, modico utatur, ait. Abipones validos, proceros, vegetos, diuque superstites dixi iterum, iterumque, diætæ studiosos quis dicat? Bibunt, edunt, quando, quoties, quantum lubet. Haud definita illis prandii, Cænxque tempora. Prudent, si cibus præsto sit, dum evigilant. Horis omnibus ut esuriunt, ita comedunt; Modo dapes non desint, fames aderit semper. Quanto voraverint plus, tanto cele-



celerius esurire illos diceres. Idque certissimum apud illos valetudinis integerrimæ seu indicium, seu remedium vulgo putatur. Oblatum sibi cibum si quis respuat, vel quia dudum satur, vel quavis alia de causa, mox ægrotus a circumstantibus proclamatur. *La oachin, Chic rquenne.* Jam ægrotat, jam non comedit, cum gemitu ajunt omnes, eumque moribundum vix non declarant. Voraces sunt Abipones, & ut Americani cæteri Carnibus se farciunt egregie, sed nullo valetudinis detrimento. Illorum stomachus equidem ut multi cibi, sic longæ inediæ patientissimus nec comestatione liberaliori, nec diuturna esurie labefactatur. Plurium mensium itinera nullo instructi commeatu suscipiunt. Nulla sæpe per viam alimenti congrui copia vel, quia nulla venationis opportunitas, vel quia hostis per insidias opprimendi consilio diu, noctuque iter præcipitant, vel quia hostem terga prementem fugientes ad tutiora festinant loca. Vacuo etiam aliquamdiu ventre, latrante quamvis stomacho incolumes semper, hilaresque famem confabulatione tranquillunt. Comoti animi indicium nullam, nullam seu querimoniam, seu corporis jejuni ægrimoniam in illis deprehendas. Sed mox inediam toleratam solita voracitate pensare nōrunt, viresque restaurare. Cibi; potusque temperantiam longævitatatis matrem, helluationem morborum, mortisque præproperæ radicem esse, haud nego; Novi equidem Sanctos solitudinum cultores complures quotidiana inter jejunia vitam ultra seculi unius spatium produxisse, fors & ulterius victuros, si liberalius corpus aluissent suum. Hos Christi heroes tamen parco, inopique victu senectutem tantam consecutos vix miror, quod semper cælibes, eidem semper loco affixi, motus, defatigationisque durioris expertes plerumque

que conquieverint. Neque Abiponum tantam vivacitatem tanta cum voracitate conjunctam demiror. Hi equidem mariti omnes, cursu, venatu, natatu, equitatione, militari labore propemodum quotidiano lassī ad vires recreandas obsonium amplius & poscunt, & facillime digerunt. Deslueret enimvero illorum vigor, vasta illorum corpora marcescerent, ni cibo copioso, ut flores affusa frigida, identidem recrearentur. A' me impetrare nunquam sane potui, ut credam, morbos plures intemperantia, quam inopia ciborum accersiri. Ut lampadem oleo deficiente sēpius, non superfluo extingui videmus; Ita mihi persuasum, multo pauciores edacitate, quam inedia quotidie necari. Medici diætæ acerrimi defensores mihi utique repugnabunt; Ast vespillones, Abiponesque ad unum omnes in meam ibunt sententiam, scio. Quid, quod & Cornelius Bontekoe Batavus artis medicæ Francosurti ad Viadrum quondam magister suis in commentariis pertinacissime contendit: cibi parsimoniam magis, quam immoderationem humanis corporibus obesse, viamque certius ad tumulum sternere. Eiusdem prorsus sententiæ fuit Franciscus Bacon de Verulamio, qui in historia vitæ & mortis folio 80. ait: *Longæviores reperti sunt sæpenumero Edaces, & Epulones, denique qui liberaliore mensa usi sunt.* Aqua non semper dulcissima, nunquam fontana, semper fluvialis, vel palustris, atque adeo plerumque tepida, vel calida, rarissime frigida Abiponibus fitis levandæ quotidianum est remedium, quidsi & valetudinis eximie instrumentum? fluviatilem, pluvialemque aquam enimvero medici fontanæ præferunt, quippe leviozem, & particulis noxiis minus prægnantem. Frigidam sinenses per omnem ætatem ne primoribus quidem labris delibant unquam. Nivem, glaciale-

cialemque aquam multarum ægritudinum fontem plerique putant. Sed hoc ad medicos. Nives, glaciem, fontes, e quibus aquæ scaturiant, cellas subterraneas pro refrigeranda potione nusquam deprehendas Abiponum in territorio. Vinum quoque ex uvis expressum, vel arte Chymica e fructibus crematum, dum vivunt, omnino ignorant. Sed quamvis promactanda siti præter aquam nil adhibent, pro celebrando tamen prolis nobilioris natali, cognatorum funere, consilio bellico, vel victoria, temetum hauriunt uno in loco collecti, quod vel ex melle, vel e filiquis Græcis affusa aqua paratum, ac coalescens ebrietatem adfert quidem, sed moderate potum incredibiles corpori præstat utilitates. Nam & filiquas Græcas, & mel Sylvestre ad vitam prorogandam, roborandamque valetudinem plurimum valere, passim affirmant. Mel, quasi mortales immortales redderet, nectar divinum appellatur a Plinio. Illius seu esu, seu potu moderato summam senectutem assecuti scribuntur Pythagoras, Antiochus medicus, Democritus, Thelephus Grammaticus, Pollio Romanus: Hic seculum vivendo excesserat. Rogatus ab Augusto Cæsare, quo demum subsidio ætatem tam provec̃tam attigisset: *Melle intus, foris oleo*, respondit. Vindobouenses ephemerides anno 1770. 14. Februarii nunciarunt: In Smoleniz Hungariæ loco Comitum Christophori Erdödi iuribus obnoxio Franciscum Wascho quatuor, supra centum annos natum obiisse. Ad extremum usque diem & memoria, & tantis viribus pollebat, ut solus rhedam lignis onustam traxerit. Vegetam, illius Senectutem crebro mellis usui cumprimis tribuerunt, quem in finem semper apes dicitur aluisse. Abipones mel, quo sylvæ omnes abundant, jam bibere solent perfrequenter, quid si inde tantus illorum

rum vigor, ætas tanta? Sed utrumque etiam filiquarum Græcarum usui ex parte debent, quas tum siccas mandere, tum ex aquæ permixtione nativi caloris fermento vinescentes liberaliter potare consueverunt. Utrolibet modo dulcedinis sunt eximæ, & luculentæ virtutis; Prostratas enim vires restaurant, corpus insigniter saginant, purgant pectus, recreantque, vi diuretica, qua pollent, vesicam celerrime, ac copiose exonerant, plures ægritudinum radices evellunt, calculo validissime obstant, doloresque nephriticos Europæorum mirifice leniunt. Illud experti de hac virtute me fecere certiores. Equos robustiores, sanioresque haud habet ampla Paraquaria, quam qui in Sancti Jacobi de storea territorio nascuntur, ubi filiquis Græcis, quæ istis copiosissimæ, per sylvas sparsi pascuntur potissimum, solideque pinguescunt. Verum noveris, filiquas Græcas, quæ in Paraquaria nascuntur, mole, & virtute plurimum differre ab illis, quæ seu ex Africa, seu ex Hispania afferuntur, & in Germania passum venales prostant, quamvis & istæ magnum in re medica locum habeant sæpe.

His adde: Abipones singulis prope diebus, nisi rigidior aura absterreantur, in obvio lacu, vel flumine lavari. Balneum certe apud antiquos maximi fuit usus, & eximæ semper utilitatis. Dum enim undâ sordes absterguntur, cutis meatus patefiunt, & pronior, commodiorque redditur exspiratio corporis, non mediocri valetudinis levamento. Equi, mulique Paraquarienses, uberrimo licet pabulo fruuntur, macie, scabieque tabescent, nisi flumen, locumve, ubi abluendi se opportunitas adsit, propinquum habeant. Pulveres enim cuti insidentes pinguedinem impediunt; Hinc ad illos excutiendos equi



Europæi frigili perfricantur diligenter. Sunt, qui venæ sectioni balneum frigidum præferant; Nam per hoc sanguis refrigeratur duntaxat, per illam exhauritur. Magna igitur ex parte balneorum quotidiano usui debere Abipones, dixerim, quod fere hospites, diutissime superstites se se videant ad invidiam plurimorum. Hanc opinionem firmat Història vitæ, & mortis authore Francisco Bacone de Verulamio, qui asserit: *Lavatio corporis in frigida bona ad longitudinem vitæ; Usus balnearum tepidorum malus.* Folio mihi 131. Ejusdem ex sententia: *Vivaciores fere sunt, qui sub dio vivunt, quam qui sub tecto.* Abipones maximam ætatis partem in campo exigunt, atque adeo purum, sincerumque cœli patentis aerem, corporibus saluberrimum haurire solent. Etsi aliquando sub storeis, tentorii in morem expansis, vel in fixis tuguriis habitent, nunquam ita se claudi patiuntur, ut non aliqua ex parte aeri aditus pateat. Nec vivere solum sub dio, sed & sepeliri cupiunt. Incredibile, quantum a sepulchris, quæ in templo fiunt, abhorreant.

Medicorum sane, ac pharmacopœorum est ea suggerere, quæ ad vitam tuendam, ad retardandam mortem, ad morbos, doloresque profligandos facere videntur. Cum Abipones artem medicam doctis, pharmacopolisque omnino destitutos vivere perdiu, bellissimeque valere videamus, parum abest, quin medicorum, pharmacopolarumque absentiam inter causas connumerem, cur isti barbari vitæ diuturnitate, corporum firmitate plerosque Europæos superent, apud quos ut multi medici, multus pharmacorum usus, sic multi ægroti, pauci capulares senes. Laertio teste L. 4. cap. 6. Arcefilaus id dudum dictitabat: Quemadmodum ubi multæ leges, ibi plurimum vitio-

tiorum: Ita quoque, ubi multi sunt medici, ibi etiam sunt multi morbi. Abiponum medici, de quibus plurima dicam alias, veteratores sunt, & jumentis rudiores, neque unquam medicorum splendido nomine dignandi, quippe non ad ægros curandos, sed præstigiis, fraudibusque circumveniendos nati. Missionarii nostri, qui chiquitorum in coloniis versabantur, cæteros omnes Paraquariæ socios vivendo superarunt, extremam plerique senectutem assecuti, quamvis ad multa terrarum spatia nulla istic vel umbra medici suppeteret, ac ipsa regio annuis alluvionibus obnoxia à cæli, aerisque salubritate commendari minime posset. Provincialis tamen suorum incolumitati consulturus de mittendo ad illas chiquitorum colonias fratre laico chyrurgo cogitaverat, qui Patribus, si qui forte in morbum inciderent, opem medendo ferret. Verum missionarii benevolum hoc Provincialis propositum una omnes voce sibi periculosum affirmabant veriti scilicet, ne cum medico morbi quoque suas irreperent in terras, & florentissimæ adhuc valetudinis jacturam artificiosi medicaminis usu ipsi facerent subinde. Hinc sibi, naturæque relictæ ætatem quam longissime extenderunt suam, Abiponum more & vegeti, & medicorum expertes. Verum quæ hæcenus memoravi, externa sunt vigoris, vivacitatisque fomenta.

Ex animi tranquillitate incolumitatem corporis plurimum pendere, extra controversiam est. Hinc Salernitani medici, dum Roberto Normanniæ Duci, sceptrique Britannici hæredi sanitatis remedia suggerunt: *Curas tolle graveis* primo mox loco ajunt. Turbabuntur enimvero cerebri functiones, stomachus elanquescet, cibo deficiente deficient magis, magisque vires, succi meliores evertentur, si mens turbu-

lentis affectionibus, solitudine, amore, timore, ira, mœstitia opprimatur. Sanum erit corpus, si ab animo sano habitetur. Jam nemo Abipones longioris ævi, vigoris optimi esse, mirabitur. Pacato fere sunt animo. Vivunt præteritorum immemores, præsentium parum curiosi, de futuris rarissime anxii. Timent periculum, sed, quia ejus gravitatem haud assequuntur, plerumque spernunt, cum illi vel superando, vel evadendo se pares existiment semper. Numerosus hostis propediem adfuturus dum nunciatur, interdum fuga sibi consulunt tempestive, alias expectato assultu mulsum, illud suum strenuitatis remedium, timorisque sepulchrum hilares inter cantus hauriunt certatim. Mordaces curæ de augenda re domestica, de indumento, vel alimento apud illos vix locum habent. Neminem mortalium tanti faciunt, ut illum amore, vel desiderio depereant, & quod Europæis toties evenit, prope ad insaniam redigantur. Affectionibus quibuscunque nec diu, neque vehementer inhzrent. Hac animi tranquillitate corpus demulcent suum, vitæque ad ultimam usque senectutem producunt. Non nego, ipsum etiam, sub quo degunt, cœlum neque frigoribus rigidum, neque solis ardore nimio exæstuanis Valetudinis firmamentum esse, sed non unicum; Nam & Hispani, & Indi alii, eadem aeris temperie fruuntur licet, non perinde ut Abipones vigent, durantque. Europæi si hanc Abiponibus invident vitæ diuturnitatem, illorum vitæ rationes, quâ licet, imitentur. Affectionum vehementium rejectione tranquillent animum. Commotiunculas corporis otio, ac sessitationi, aquam vino, laboribus quietem interponant. Ciborum, vestiumque luxum moderentur. Dapibus obviis non per artem corruptis ad tollendam, non ad irritandam famem medice, medicis vero medicinisque modice utan-

utantur. Et, in quo plurimum est ad servandum vigorem momenti, voluptates, certissimam corporum pestem, tantum horreant, quantum viridem sibi senectutem peroptant. Quod cum multis parum cordi sit, tot adolescentes, pomorum instar, putridos jam videmus, antequam maturos, quia: Venena dulci sub melle latere, immemores.

C A P U T VIII.

De Abiponum religione.

Nulla gens est neque tam immanis, neque tam fera, quæ non, etiamsi ignoret, qualem Deum habere deceat, tamen habendum sciat ait Cicero L. I. de legibus. Omnibus innatum est, & in animo quasi insculptum, esse Deos. Idem 2. de natura Deorum affirmat. Eandem sententiam aliis, aliisque verbis 1. Tusculan. Quæst. & 1. de responsis aruspicum repetit. *Hæc est summa delicti, nolle recognoscere (Deum) quem ignorare non possit.* Tertullianus in apologetico contra gentes scripsit. Deum per longius tempus citra culpam ignorari posse ab homine rationis compote, uno ore negant Theologi. Hanc sententiam ego acerrime tuebar, dum Theologicum quadriennium, quod Græcii Styrorum cæpi, in Cordubensi Tucumanorum universitate absolvi. Sed enim quantum obstupui, dum inde ad Abiponum coloniam translatus in omni istorum barbarorum lingua, cæterum minime sterili,

vocem penitus desiderari intellexerant, qua Deus, vel Divinitas quoquo demum modo significaretur. Ad illos religione imbuendos, ex Hispanico mutuari oportebat Dei nomen. Hinc Catechismo inferere nobis visum: *Dios*, etiam *caogario*. Deus, rerum effector; Etymon enim *καὶ οὐκ* facere significat.

Peñafiel noster Theologus Indos non paucos existisse testatur, qui, num per omnem vitam de Deo cogitaverint aliquando rogati: *Nunquam omnino*, respondere. Lusitani, Hispanique ad Americæ litora primum appulsi vix aliquod Divinæ cognitionis vestigium apud Brasilos, aliosque barbaros se detexisse, affirmarunt. Idem de Groenlandis antiquioribus scribitur. Ut adeo non temere arbitratus sit ille apud Ciceronem I. de natura Deorum: *Dari gentes sic immanitate efferatas, apud quas nulla sit Deorum suspicio*. Quid quod & Paulus ipse I. ad Thessalonicenses 4. c. scribit: *Sicut & gentes, quæ ignorant Deum*. Quamvis idem Apostolus ad Romanos cap. I. asserat, hanc Dei ignorationem nequitiam culpa vacare, neque excusari posse: *Ita ut sint inexcusabiles*, quippe qui ex rerum creaturarum aspectu in Dei creatoris cognitionem possint venire. Quod si quis tamen excusationi locus esse videretur cuiuspiam, diceret forsitan, Americanos barbaros ad omnia, quæ non videntur, tardos, hebetes, ac obtusi esse ingenii. Ratiocinatio molesta illis, & fere peregrina. Nil mirum adeo, illos ex rerum terrestrium, cœlestiumque contemplatione neque earum architectum Deum, neque cœleste quidpiam suspicari. Argumento sit, quod referam. Iter faciens cum quatuordecim Abiponibus in fluminis argentei alto litore sub dio, ut istic moris, ad focum confidebam noctu. Cœlum undique sudum astris scintillantibus oculos pascere nostros.

Caziquium Ychoalay Abiponum, quos quidem novi, omnium sagacissimum, belloque clarissimum, alloqui placuit. Viden' hanc Cœli majestatem, ajebam, magnificam hanc Stellarum seriem, ordinemque? Fortuitum quid, quis, quæso, istud existimet? Plaustrum, ut tute nosti, nisi boves regantur a quopiam, evertitur. Cymba, ni gubernetur, vel a via aberrat, vel fatiscit. Ecquis adeo delirus, tantas cœli pulchritudines casu exstirrisse, hos orbium cœlestium cursus, ac vicissitudines sine mentis sapientissimæ consilio gubernari ut credat? Quis istorum author, moderatorque tibi videtur? Quid, amabo, de his opinati sunt majores vestri? Pater mi, prompte, ingenueque respondit Ychoalay, avi, atavique nostri terram duntaxat circum spectare solebant, num gramen, num aquam pro equis campus offerat, solliciti. Quid in cœlo agatur, quis syderum architectus, rectorque sit, de hoc nil omnino angebantur. Hæc ille. Et vero rem ita esse, vix dubito. Observavi identidem, Abipones, dum rem objectam oculis primo aspectu non capiunt, scrutandi molestiam pertæsos mox dicere: *orqueenâm?* Quid tandem erit hoc? Familiare illud Quaraniis: *Mbaenipo?* idem significat. Interdum caperata fronte, dum res captum videtur transcendere, iidem subjungunt. *Tupá ciquaâ. Deus novit, quid sit.* Cum Indorum in cerebro tam curta rationis supellex, tantaque in ratiocinando delidia, quid mirum, illos rem aliam ex alia inferre jam nescire, jam nolle. Ne quis supremi Numinis ignorationem Barbaris quibusdam Americanis perperam affingi existimet, Apostolicam Bullam hoc loco recitare juvat, quam Pius V. e divi Dominici cœtu & scientia, & sanctitate Clarissimus Pontifex anno 1568. die 29. Aprilis edidit. Illius verba accipe: *Innumerabiles fructus, quos benedicente Domino Christiano orbi societas Je-*

su, viros literarum, præcipue sacrarum scientia, religione, vita exemplari, morumque sanctimonia conspicuos, multorumque religiosissimos Præceptores, ac verbi Divini, etiam apud longinquas, & Barbaras illas nationes, quæ (Nota bene) Deum penitus non noverant, optimos Prædicatores, & interpretes producendo, felicissime hætenus attulit, & adhuc feliciter studiis asferre non desistit, animo sæpius revolventes nostro — Societatem præfatam Nobis, & Apostolicæ Sedi apprime charam singulari, Paternoque amore prosequimur &c.

Fidem superat, quam atris coloribus pinxerint Americanorum stupiditatem Europæi, qui illorum provincias primi attigerunt. Eos vix hominibus adnumerandos, belluarum instar habendos putaverunt. Ut teste Cyriaco Morelli in fastis novi orbis Gomara in historia Indiarum capite 217. refert. Frater Thomas Ortiz, subinde Episcopus sanctæ Marthæ, literis ad aulam Matritensem datis ait: Americanos esse jumentorum instar stolidos, hebetes, fatuos, dementes, ad perdiscenda religionis capita prorsus inhabiles, humani ingenii, judicii que expertes. Pudet infanda scelerum genera, quorum eos accusat, hoc loco commemorare. Suis porro literis ut fidem conciliaret, eas his claudit verbis: Quotquot cum Americanis egimus, tales eos esse sumus experti. Hispanorum alii nonnulli Americanos tam stupidos affirmarunt, ut eos, adultos licet, ceu infantes rationis nondum compotes sacro baptismini fonte expiandos: Confessionis sacramentalis onere eximendos: A sacramentorum reliquorum usu arcendos voluerint. Pauli tertii summi Pontificis oraculo opus fuit, quo Americani veri homines, fidei catholicæ, & sacramentorum capaces anno 1537. secunda Junii palam declarabantur, Bartholomæo casaus, seu de las casas, chian-

penſi poſt epiſcopo Indorum cauſam agente, qui quidem, quod Europæorum in Indos crudelitates nimium exaggeraſſe vidatur nonnullis, male audit apud Hiſpanos. Idem Pontifex Paulus tertius decrevit, ne Indis negaretur Euchariftia. Ita Torquemada L. 16. Monarchiæ Indiæ c. 20. Decretum Pontificium incipit: *Veritas ipſa*, extatque apud Haroldum. Hoc nil obſtante in Peruvio Indi adulti, jam baptizati, iidemque peccata legitime confeſſi neque ſemel ſingulis annis, neque vero mortis urgente discrimine communicantur. Ut Acoſta libro 6. de procuranda Indorum ſalute c. 8. & ſequentibus loquitur. Neque, ut Euchariftia Indis impertiretur, per trium conciliorum Limæ celebratorum adhortationes, comminationeſque impetratum eſt. Id quod patet ex querimoniis, decretisque ſynodorum Limanæ, Platenſis, Arequipenſis, Pazenſis, & Paraquarienſis, quæ ſeculo ſequenti habitæ fuerunt. Semper enim Paroſchi, qui Euchariftiam negabant, Indorum ſtupiditatem, ignorantiam, inveterata flagitia cauſabantur. Verum ſynodus Pazenſis anno 1638. habita hanc Indorum ignorantiam Paſtorum ſocordiæ tribuendam putavit, quorum ſedula inſtitutione e nativis ingenii tenebris, flagitiorumque cœno miſeri utique emerſuri credebantur.

Annorum duodeviginti, quos tum Quaraniis, tum Abiponibus impendi, experimento doctus idem prorſus ſentio. Nam ipſe novi barbaros barbariſſimos, in ſylvis natos, ab ineunte ætate ſuperſtitio-nibus, rapinis, cædibus aſſvefactos, brutorum inſtar bardos, hebetesque, qui tamen ad noſtras colonias traducti quotidiana inſtitutione, veteranorumque exemplo legis divinæ & ſcientiſſimi, & tenaciſſimi evaſerunt denique. Neque miror. Elephanti, canes, equi, feræ aliæ cicurantur equidem, & ſi magiſtros



stros idoneos nanciscantur, quas non artes condiscunt? Adamantes nonnisi artificis impigra manu politi splendescunt. Truncus in Mercurium Praxitelis opera transformatur. Tardo sint, ac hebetiore ingenio Americani, solertia magistrorum imbecillitatem discipulorum suppleant ad omnem humanitatem, pietatemque, quin ad omne artium genus felicissime formantur. Quantum disciplina acuat ingenium Indorum, ad quanta illorum se extendat capus, oculis videre tuis si cupias, Quaraniorum tibi adeunda sunt oppida. In horum singulis deprehendes indos in musicorum instrumentorum & fabricatione, & tractatione dexterrimos, pictores, sculptores, arcularios, cujuscunque metalli fabros, textores, architectos, scribas eximios, alios, qui horologia, campanas, fimbrias aureas, & quid non? ad omnem artis regulam norunt construere. Quin fuere non pauci, qui libros, majoris etiam molis, non patria solum, sed & latina lingua typis excuderunt, quos, characterum scilicet notas, ipsi quoque ex ære fuderant. Norunt & calamo libros tanta arte describere, ut typographi opera esse jurent vel oculatissimi Europæi. Indorum artificia, quæ Quaraniorum in oppidis seu videre, seu audire, obstupuerunt Episcopi, Gubernatores, cæteri quicunque hospites. Si hæ artes in aliis passim oppidis, ac Americæ provinciis ignorantur, id non Indorum stupiditati, sed magistrorum, a quibus erudirentur, penuriæ tribuendum. Quaraniis missionarii nostri Itali, Belgæ, Germani jam musices, jam cæterarum artium magistri obtigerunt, Indos supra expectationem dociliores non experti modo, sed & incredibiter sæpe admirati. Illud tamen nobis exploratum: facilius, citiusque comprehendi ab Indis ea, quæ vident, quam quæ audiunt, uti

uti & reliqui mortalium per oculos promptius, quam per aures erudiuntur. Si quid seu pingendum, seu sculpendum imperas quaranio, exemplar, sive typum rei faciendæ illius propone oculis, hunc insigniter exprimet imitando, rem affabre, eleganterque factam obtinebis. Desit exemplar, sibi relinquatur Indus, nil nisi ineptias, artisque abortum ab illo expecta, quamvis omni verborum contentione tuam illi mentem copiosissime exposueris. Neque memoriæ fidelitatem in Americanis desiderari putes, velim. Consuetudo vetus Quaranicis in oppidis obtinuit, ut sermonem sacrum a sacerdote e pulpito dictum jam oppidi prætor Indus, jam alius e primoribus magistratus coram populo in foro, vel domus nostræ area repetat. Id plerique omnes, nulla prope sententia omissa, fidelissime præstant. Symphoniam, quam defixis in characteres musicos oculis bis, terve seu voce, seu fidibus, seu organo expresserunt, mox memoriæ impressam habent adeo, ut illo musico folio, si a vento raperetur, porro non indigeant. E quibus memoriæ fidelitas, tenacitasque jure arguitur. Hæc visum est memorare, ut videas Americanis hand tantas esse ingenii angustias, quantas scriptores plurimi illis perperam affinxerunt. Non tamen diffiteor, alias aliis nationibus esse sagaciores, idque in Paraquaria a me observatum, nationes Indorum equestres pedestribus ut corporis, sic mentis vigore antecellere. Perspicacitatis sane documenta dederunt Abipones, dum bello multis abhinc annis continuato militari toties astu Hispanos, quantumvis sagaces, jam eluserunt, jam per insidias non sine multa strage oppresserunt. De quo alius erit dicendi locus. Verum quo luculentius produnt ingenio se valere ad expeditiones militares tutò, prospereque suscipiendas, eo minus illis ignoscenda videtur tanta Dei igno-
ratio,

ratio, ut ne nomen quidem illius noverint, cum ad pleraque alia significanda vocabulis abundant. Ex his inferet Theologus, Abiponum cogitandi facultatem non tam arctis circumscribi limitibus, ut ex conditis, quæ sub aspectum cadunt, rebus universorum conditorem, Rectoremque Deum cognoscere, certe suspicari non possint. *Quis est tam vecors*, ait Cicero in Aruspicum responsis, *qui aut quum suspexit in Cælum, Deos esse non sentiat?* Quaraniorem, ut ut ferocissima olim, natio Numen supremum novit, ac nativa lingua *Tupâ* appellat. Hoc vocabulum e duabus particulis componitur: *Tâ* enim admirantis. *Pâ* interrogantis vox est. Cælo tonante metu perculsi: *Tupâ* exclamare solebant. Ut adeo ex tonitu fragore, fulminisque miris virtutibus Numinis potentiam summam, Majestatemque revereri cæperint, videanturque Papinii non probandam sententiam aliquomodo confirmasse: *Primus in orbe Deos fecit timor*. Ipsi quoque Romani Jovem suum optimum, maximum Tonantem dixere.

Ab ingenio mentisque vigore commendandos videri dixeram Abipones. Verum laudationis me pudet præproperæ. Palinodiam cano. Mentis impotes, deliros, insanientes illos pronuncio. En amentitæ argumentum! Deum nesciunt, Deique nomen. Malum dæmonem, quem Ahaïaigichi, vel Queevèt dicunt, avum suum, Grozperikie, svavissime appellant. Hunc & suum, & Hispanorum avum profitentur, hoc tamen discrimine, quod istis vestes splendidas, aurum, argentumque, sibi vero magnanimitatem hæreditatis nomine concesserit; Se se enim præ quovis Hispano intrepidus magis, magisque strenuos arbitrantur. Sciscitari ex illis tibi si lubeat: Quidnam ille avus olim fuerit, cujus conditionis?

Id se nescire planissime fatebuntur. Si interrogationibus porro instes, avum hunc suum Indum sui similem quondam extitisse, ajunt. Adeo sicca, absurdaque est illorum theologia. Colunt, quem ignorant, Atheniensibus forte similes, qui Ignoto Deo aram posuere. Ut Abipones se se dæmonis nepotes, sic prisce Galli se se dæmonis filios jactarunt. Audi Julium Cæsarem de bello Gallico Libro 6. id affirmantem: *Galli se omnes ab Dite patre progenitos prædicant: Idque a Druidibus proditum dicunt.* Latini Ditem Plutonem inferorum Deum appellarunt. Plejades, septem stellis compositas, avi sui imaginem Abipones putant. Hæc dum Americæ meridionalis in Cælo aliquot per menses spectabiles non sunt, avum suum ægrotare credunt, & moriturum quot annis pessime timent. Ast quam primum dictæ Stellæ Majo mense rursus spectandas se præbuerint, avum suum reducem, ac e morbo, ut putant, re-creatum festivis clamoribus, læto tibiærum cornuumque militarium clangore consalutant, valetudinem recuperatam illi gratulantur. *Quemen naachic læenc! layâm nanichi enà? Ta Yegâm! Layâmini* Quantas tibi gratias debemus! Tandem huc rediisti? Hem feliciter convaluisti! Ejusmodi, quibus lætitiæ produnt, stultitiæque suam, vocibus acrem implent. Postridie ad mel conquirendum excurrunt omnes, è quo potio paretur. Hæc in promptu ut fuerit, in publicam hilaritatis contestationem magni sunt undique concursus, sole occumbente. Abipones conjugati tigridum in pellibus humi confidentes potando, circumstantes fœminæ ululanti voce cantando, reliqua cælibum turma cachinnaudo, plaudendoque noctem transigunt, tædis hinc atque illinc per forum collucens. Præstigiatrix aliqua, cerimoniarum festi moderatrix, per intervalla choreas agit; Cucurbitam, quæ crepitaenulo.

loco, seminibus frugum duriusculis fortam ad numeros masticos manu circumagit simul, simul eidem terræ puncto insilens dextrorsum pede altero, altero sinistrorsum subilit, sine ulla motuum variatione. Absurdissimum hoc lymphaticæ mulieris tripudium horrificus lituorum, buccinarumque militarium stridor identidem excipit, cui circumfusi spectatores, admota labiis manu vociferantes, applaudunt. Nihil tamen hæc inter, quod lasciviam, petulantiamve oleat, usquam observaveris. Viri a fœminis, a pueris puellæ decenter sejunguntur. Has gestientis populi ineptias functionem avo suo convalescenti sacram putant. Superstitiosa hæc soteria non nisi multo cum labore, apud Abipones Nakaigetergehes maxime, a nobis exterminata fuere. Saltatrix illa, festi ridiculi antistita, ad benevolentix singularis testificationem virorum aliquot furas cucurbita sua perfricat, illisque velocitatem in hostibus, ferisque cursu assequendis avi sui nomine pollicetur. Sub idem tempus ab eadem non sine multis ritibus novi præstigiatores, præstigiatricesque, quotquot huic officio pares judicaverit, inaugurantur. De pestilentissimo hoc hominum genere jam uberius agendum.



C A P U T IX.

De Abiponum Magis, re tamen ipsa
præstigatoribus, Veteratoribusque.

Ridicula præstigatorum fæx, etsi tota è fraudibus,
fallaciisque confuta, ac compacta sit, tantundem au-
thoritatis, venerationisque apud Abipones obtinet,
quantum apud Persas Magi, apud Assyrios Chaldæi,
apud Græcos Philosophi, apud Hebræos Prophetæ,
apud Indos, qui ad Orientem degunt, Brachmanes,
apud Italos Hetrusci Aruspices, apud Gallos veteres
Druydes habuisse olim leguntur. Nulla, si rite me-
mini, per Paraquariam natio detecta est, quæ Præ-
stigatoribus careat suis, quos latini magos, vel ma-
leficos, Hispani Hechizeros, germani Zauberer, vel
Hexenmeister, Quaranii Indi aba payè, Payaquæ Pay',
Abipones vero eodem prorsus, quo diabolum, no-
mine Keebèt, seu artifices diabolicos appellant, quippe
quos mira & humanis viribus majora patrandi virtutem
ab avo suo, malo dæmone accepisse, opinantur. Hi
versipelles, cujus demum cunque sexus sint, artibus
suis se & scire omnia, & facere posse, affirmant. Barbar-
orum nemo est, qui non credat, in præstigatorum suo-
rum arbitrio esse: Morbum, mortemque aliis inferre:
Ægritudinibus quibuscunque mederi: futura, remotaque
prælagire: Nimbos, grandinem, tempestatesque accer-
sere

sere: Vita functorum umbras evocare, ac de occultis consilere: Tigris formam induere: omne serpentum genus impune manibus versare &c. Quas quidem habilitates non arte comparatas, sed a dæmone, avo illo suo, quibusdam duntaxat ultro concessas, somniant. Qui tamen ad hoc præstigatorum munus aspirant, dicuntur annosæ salici in Lacum quendam propendenti insidere, continuata per dies aliquot cibi omnis abstinencia, dum denique res futuras animo prævidere incipiant. Ab idoneis id quidem authoribus accepi; sed mihi semper verissimum est visum, hos nebulones ex diuturna inedia cerebri imbecillitatem, vertiginem, ac deliramenti genus quoddam contrahere, ut adeo supra reliquum vulgus sapere sibi videantur, seque pro magis vendant. Sibi primum, mox aliis imponunt. Re enim nulla à cæteris differunt, nisi quod ad fallendos quoscunque concinnandis fraudibus excellent. Et vero laboriosum neutiquam est, rudibus, credulisque barbaris fucum facere, qui, quidquid novum, quidquid sibi antea nusquam visum, inter prodigia numerant, magicisque artibus tribuunt confestim. Forte rosas rubra e carbaso ad ornandum templum concinnaveram. Laborantem me avide spectabant Indi, & naturæ imitationem admirati: Vel Pater hic magnus est, vel e matre saga natus, exclamabant. Laicus noster Europæus Indis stupentibus, nescio, quid scitissime, celerrimeque tornavit è ligno, mox magorum primipilus omnium ore celebrabatur, cum in illum diem nec torni machinam, nec toreuma aliquod viderint unquam. Si pyrotechnica artificia, si optica, si anthlez pneumaticæ experimenta, si alia, quæ apud Europæos obvia, quotidianaque, cernerent, rei novitate attoniti hæc quidni artis magicæ absolutissima documenta, iurarent. Ad hoc confirmandum

valet, a Brasilis magos suos *Payè*, virtutem miracula patranda *Caraylà* vocari, quod subinde nomen Europæis advenis indiderunt, quod ab illis arte facta viderent, quæ sibi prius ignota naturæ vires superasse videbantur. Hinc & Quaranii, quorum lingua Brasilæ admodum affinis, Hispanos, & Europæos quosvis Caray' etiamnum appellant.

Hæc rudis plebeculæ simplicitate in rem suam abuti egregie norunt versipelles, qui dæmonis, avi sui, vicarios, ac interpretes, futuri præscios, mystagogos, morborum jam architectos, jam, ut lubuerit, domitores, necromanticos, elementorum omnium dominatores palam se jactant, ac, quidquid in mentem venerit, male credulis nullo negotio persuadent. Mille illis decipiendi artes in promptu sunt. Ex advena barbaro clam forte intellexerant, hostes ad contubernium suum invadendum propinquare: Hanc notitiam, velut ab avo suo sibi patefactam venditant contubernalibus, & jam magnus Apollo audiunt. Sic quæ vel conjectura, vel clandestino aliorum monitu, vel propria indagazione explorata habuerint, futura cum fastu prædicunt, & ceu spiritu magico afflati arrectis passim auribus percipiuntur. Si facta vaticinio non responderint, excusationes, quibus auctoritatem suam sartam, tectamque porro habeant, nunquam desunt. Concubia interdum nocte sibilo, vel fistula, hostem imminere, repente nunciant. Expergefæcti omnes, de præstigiatoris fide, ac præsaigatione nil ancipites viri ad arma convolant. In loca tutiora cum prolihus se se recipiunt feminae; Horas, quin noctes sæpe integras dum hæc timendo mortem, illi mortes aggressoribus minitando trepide absumunt, hostium nemo, ne musca quidem, usquam comparet. Sed ne vaticiniorum fides, ne vatium auctoritas detrimen-

tum dein' patiatur, dæmonis, avi sui, ope hostilem assultum fuisse impeditum, subridentes affirmant. sæpe alias hostium phalanx inopinato irruit, quin tamen tot præstigiatorum vel unicus aggressionis periculum aut præsensisset, aut prælagisset. Opportune mihi in mentem venit eventus ridiculi: Nocte appetente ad me accurrit Abipon adolescentulus, frenum ferreum, securim, & nescio, quas præterea reculas, domus scilicet suæ thesauros, adfert, meis in ædibus custodiendas; causam rogatus: Hostes noctu adfuturos, respondet, asseritque, matrem suam, præstigiatricem nempe in paucis eximiam, id præscire, quæ, quoties hostis propinquus est, brachium sibi sinistrum pungi identidem, & vellicari quodammodo, affirmat. Ohe, reposui, pulicem id moribus tribuas, velim, puer optime. Nam & mea id novi experientia. Diu, noctuque & brachium dextrum mihi, & sinistrum, & quæ non alia, a pulicibus insolenter pungi sentio, compungique; Id si hostium foret indicium, nulla nobis dies, nox nulla sine velitationibus abiret. Sed frustra hæc. Nam percrebescens de vetulæ prælagio rumor oppidum omne turbavit, noctem omnem. Nullum tamen, ut sæpissime alias, hostium seu vestigium, seu indicium.

Abipones jam prædarum, jam gloriæ desiderio ut in alios identidem bellum machinantur, sic aliorum adversus se machinationes nunquam non suspicantur. Quo ardentius securitati consultum suæ volunt, eo facilius, futili plerumque ex causa, sibi pericula alia ex aliis somniare consueverunt. Levis rumusculus, visi eminus fumi, ignota per vias vestigia, intempestivus canum latratus de instante cervicibus suis hoste suspensiones iugerit maxime, dum
edita

edita exteros inter strage vindictam metuunt. Ad tranquillandos, instruendosque animos negotium datur præstigiaticibus, ut, ecquid timendum sibi jam, ecquid porro agendum sit, avum dæmonem de more consulant. Sub noctis primordium ampliori in tentorio congregatur vetularum chorus. Hujus moderatrix & rugis & canis spectabilior tympana duo ingentia, quatuor sonorum intervallo, quod *διὰ τέσσαρον* vocant, a se discrepantia pulsat identidem, dumque mugitum hæc edunt auditu terribilem, illa rauco gutture lamentantis ritu, nescio, quæ carmina deblaterat. Circumstantes fœminæ sparsis per humeros capillis, nudato vestibus pectore, cucurbitas, illa sua crepitacula, manibus exagitant, & ululanti voce sibi notas decantant nœnias, quas pedum subsilientium motus continuus, & brachiorum jactatio comitatur semper. Sed infernalem hanc musicam auribus intolerabiliorem reddunt aliæ tympanistriz, quæ ollas, damularum, seu dorcadum pelliculis obductas, acutissimeque sonantes bacillo pertinacissime quatiunt. Incondita hæc, ac tumultuosa vociferatio ad terrendum potius, fugandumque, quam ad accersendum, consulendumque dæmonem aptior videri posset. Hæc inter nox abit. Albescente Cœlo ad hoc vetularum tentorium, eeu ad oraculum Delphicum concurritur undique. Munuscula a singulis singulis dantur cantatricibus. Quæ sint avi sui effata, avidissime interrogant universi. Vetularum responsa fere ambigua sunt, sensusque adeo ancipitis, ut, quidquid demum evenerit, verum prædixisse videantur. Interdum eadem nocte per diversas fœminas diversis in tentoriis consultitur dæmon. Diluculo his pertinaciter, hostem adfuturum, asseverantibus, illis idem mordicus negantibus, opinionum pugna has inter mulierculas, oraculorum inter-

pretes, in rixam fere cruentam desinit: A' verbis ad verbera transiit: Pugnis, dentibus, unguibus non raro controversia finitur. Interdum dum acrior est futura præsciendi lubido, vel major illos urgeat periculi impendentis evidentia, præstigatorum quispiam jubetur, mortui umbram ad vitam revocare, e qua, sibi quæ fata insent, resciscere liceat confestim. Ad necromantæ tentorium confluit promiscua omnis ætatis, sexusque multitudo. Præstigator bubula sub pelle, quæ siparii loco sit, delitescit. Deblateratis jam lugubri, jam imperioso murmuræ arbitrariis carminibus animam istius, illiusve (quam scilicet populus evocari voluit) coram adesse, pronunciat denique. Hanc de futuris eventibus iterum, iterumque interrogat, & mutata subito voce sibi met, quod ad rem facere videtur, respondet. Nemo est auditorum, qui de umbræ præsentia, vel de dictorum veritate dubitare aufit. Abiponum aliquis, clari apud suos generis, bonæque mentis multa verborum contentione mihi asseveraverat, se suis spectasse oculis animam Indæ, cujus maritus superstes Acaloſaikin nostro tum versabatur in oppido. Assensum a me ut extorqueret, animulæ illius imaginem vivis, sed ridiculis coloribus expressit. Hispani quoque complures, qui a pueris ætatem omnem Abipones inter Captivi consumpsere, persuasissimum sibi habent, inanes præstigatorum vocatu necromantico spectabiles fieri, ad interrogatiunculas respondere, nihilque fallaciæ hoc in negotio intervenire. Verum quis, amabo, prudentior stolidis his testibus fidem habeat, queis ut falli, sic fallere quotidianum.

Ex hoc tamen manes evocandi barbarorum more id conficitur, illos animorum immortalitatem credere, quod ex aliis quoque illorum tum ritibus, tum sermonibus collegimus. Mortuorum siquidem tumulto ollam, vestem, arina, equos sudibus infixos apponere solent providi, ne quid eorum, quæ ad quotidianos vitæ usus pertinent, iis desiderari patiantur. Anates parvulos, qui ab Abiponibus Ruili dicuntur, noctuque tristi cum sibilo turmatim circumvolitant, vita functorum animas putant, ac meheleskachie manes, spiritus, spectra appellant. In S. Hieronymi colonia prædii curator Hispanus Raphael de los Rios per barbaros repente affilientes suo in tugurio crudeliter trucidatus est, me istic commorante. Aliquot post mensibus adest Abipon Catechumenus, &: Num Hispani omnes, dum è vita exceßerint, mox Cælo recipiantur, avidè interrogat; Hanc felicitatem illis duntaxat obtingere, qui vitam pia morte clausierint, dum socius meus respondisset. Planissime tibi assentior, reponit Abipon; Hispanus enim ille Raphael hic nuper interemptus nondum Cælum conscendisse videtur; Noctibus enim prope singulis illum Campo obequitare, ac mœstum quid sibilare, nostri homines referunt. Quod licet vel commentum, vel imaginariam aurium impressionem autumaverim, argui tamen inde potest, ab his barbaris animas a morte superstites existimari, quamvis, quo deveniant, qua fortuna utantur, omnino ignorent. Aliis quoque Paraquariæ populis eadem insidet de animarum immortalitate opinio. Patagones certe, cæterique, qui Magallanicum solum habitant, sibi persuadent, hominum vita functorum perinde, ac struthionum animas iisdem in tentoriis sub terra commorari. Hæc a præstigiatoribus ad animorum immortalitatem di-

gressio mihi ignoscenda; Namque ad Abiponum religionem, de qua hoc loco agimus, pertinet maxime.

Ex his, quæ de Præstigiatoribus attuli, quis non intelligit, eorum scientiam, artesque omnes astutia, dolis, fraudibusque definiri, illos tamen fide, obedientiaque promptissima, dum vivunt, prosequuntur, vita functos ceu divinos homines incredibiliter venerantur Barbari. Illorum ossa, & quidquid exuviarum est, suis in migrationibus, ceu sacrapignora honorifice circumferunt. Quoties meteorum igneum (quod in America, Cælo etiam sudo, diu, noctuque perfrequens est) micare, & bellici tormenti instar terque, quaterque tonare advertunt Abipones, præstigiatorum suorum aliquem uspiam obiisse, credunt, putantque stolidi hoc Cæli fulgore, ac tonitru illius funeri parentari. Si quo bellatum, venatumve equites excurrant, horum veteratorum aliquem itineris socium sibi adsciscunt, e cuius ore, consiliisque pendere solent, quippe quem rerum omnium, quæ ad expeditionis felicitatem conducant, conscium, præsciumque opinantur; Hic locum, hic tempus, hic modum, quo feras, hostemve invadere oporteat, eos edocet. Hic, si pugna instet, suorum aciem circumequitans palmæ ramo aerem verberat, & torvo vultu, minacibus oculis, gesticulatione mimica hostibus male precatur. Quam ærimoniam ad victoriæ securitatem plurimum habere momenti, credunt. In officii sui remunerationem memorabilior illi spoliis portio fere adjudicatur. Veteratores istos ut equis præstantissimis, sic domestica suppellectili præ reliquis affluere, observavi, quin id unquam mirarer. Extorquent a credulo popello, quantum cupiunt. Qui iis repulsam dare ausit, ne-

mo

mo unus est. Coluntur equidem ab omnibus multum, sed plus timentur. Nefas putant illorum vel sententiæ contradicere, vel desideriis, imperiisve refragari, vindictæ metu. Præstigiatorum quis acerbo sit in alium animo, hunc ad suas accersit ædes, & sine cunctatione obtemperantem videt. Præsentī imaginariam forte culpam, vel injuriam vocē gravi exprobrat, & avi sui nomine mulctandam, edicit. Pectus, scapulasque vestibus nudare jubetur, & mox mandibula piscis (Palometa ab Hispanis dicitur), acutissima perfricatur undique, ac dilaniatur. Miser etsi sanguine diffluat, nec hiscere audet, & quod vivo sibi abire licuerit, in beneficiis numerat.

Sæpe alias dum isti stupidorum mastiges infensum sibi quempiam, vel injurium existimant, in tigridem transformandos se illico, contubernales a se discerpendos ad unum omnes, comminantur. Vix tigridis rugitum imitari incipiunt, incredibili cum trepidatione diffugiunt, qua qua licet, vicini. Eminus tamen fectas auscultant voces. Nec mora: Maculas tigrinas eheu! toto jam corpore incipit referre! En ungues illi jam succrescunt, metu attonitæ exclamant mulieres, etsi versipellem suo in tugurio latentem videre haud possunt; Sed enim lymphaticus ille pavor earum oculis res objicit, quæ nunquam extirere. Timent ridenda, qui jure timenda sæpe riserant. Hæc præstigiatorum terricula ut aspernarentur, ab illis impetrari vix demum potuit. Vos, ajebam, veras tigrides quotidie in campo citra metum jugulatis, occur, amabo, fictam, imaginariam tigridem in oppido muliebriter expavescitis? subridentes respondent: Vos Patres res nostras haud capitis. Tigrides in campo, quia videntur, neutiquam

metuimus, sed mactamus. Artificiales tigrides timeamus, quia nec videri a nobis queunt, proin' nec occidi. Quodsi, redargui futilem excusationem, artificialis tigris, quam veteratores vestri mentiuntur ad vos terrendos, videri non potest, qua, quæso, ratione nōstis, illi maculas tigrinas, unguesque jam succrescere? Sed actum agitur, dum cum illis ratiocinamur, quibus pro, quin præ omni ratione voluntas pertinax, qua majorum suorum opinionibus inhærent. Tempestas atrocior, fulminibus, immani grandine, nimbo effuso, turbine procelloso gravis terris incumbat, tempestatem a præstigiatorum aliquo concitatam, grandinem, turbinem, alluvionem ex præcipiti imbre coortam illius artificia esse, uno omnes ore affirmant, acerrima tamen plerumque, & ipsa tempestate sævior contentio illos inter exoriri solet, dum hic illum, ille hunc tempestatis, alluvionisque architectum fuisse vociferatur. Audi eventum, cujus citra risum nequeo meminisse. Januario mense noctu imber maximo impetu e Cælo effusus, ac e vicino colle præcipitans S. Hieronymi coloniam prope submerferat. Aquarum vis ingens portâ, e corio fuit, ruptâ, raptâque in meum irruens tugurium me dormiente, cum exitus illico non pateret, ad quinque circiter palmos accrevit. Strepitu expergefactus demissis e lecto brachiis probolide usus aquæ altitudinem identidem exploravi, & ni perforatus alluvione paries viam undis aperuisset, enatandum mihi fuerat, vel pereundum. Eadem Abiponum, qui in decliviori solo habitabant, fors, tuguriis omnibus inundatis. Sed en! vulgatur undique rumor postridie, præstigiaticem, nescio, a quibus irritatam tantæ procellæ effectricem contubernales omnes alluvione submergere voluisse quidem, sed præstigiatoris alterius artibus repulsas nubes, coercitum

rum imbrem, oppidumque servatum fuisse. Verum, ut apud Europæos, quot capita, tot sententiæ. Horrenda illa pluvia campos propinquos non attigit, ubi Pariekaikin illa ætate Præstigiatorum Abiponensium facile princeps cum aliis post diutinam Cœli siccitatem aquam sibi avide peroptantibus tunc degebat; Hic velut ex tripode declaravit; Patrem Josephum Brigniel, socium meum, imbris illius authorem fuisse in oppidi sui emolumentum, ubi cum ipse, Pariekaikin, versari nollet, ultionis impulsu ea arte nubes flexisse, ut ne una quidem tanti imbris gutta ad stationem pertingeret suam. Hunc equidem Patrem, quod ægrotantibus feliciter, prompteque mederetur, præstigiatoribus adnumerare, nil dubitarunt. Ubi de morbis, medicis, ac medicinis Abiponum agemus, audies, quibus modis circumveniant ægros hi præstigiatores, ad necandos dolos, quam ad dolores avertendos habiliores.

Præstigiatoribus Americanis familiare cum malo dæmone commercium, colloquiumque frequens esse, id non modo rudes barbari sibi persvadent, sed & scriptorum non nulli Europæ persvadere conabantur. Ego quidem longa illarum gentium transactione doctus id ut crederem, induci nunquam potui. Nil illos scire, nil omnino posse, quod naturales, humanasque excedat vires, mihi semper indubitatum. Hac confusus opinione ut, si quam posset, noxam mihi inferrent, eos amice sæpius provocavi; sæpius amicitiae significationibus, blanditiis, omni officiorum, beneficiorumque genere certatim profecti sumus, ad meliorem frugem, religionemque amplectendam animos demum ut adjicerent. Illorum enim ad exemplum sensim se componerent plerique omnes. Verum æthiopem lavi-



mus. Nam hi bipedum nequissimi, ne authoritatis, qua apud populum valent, officiique quæstuosi iacturam facerent, nullum non movebant lapidem, dolis pepercerunt nullis, ut suos a templi aditu, a sacerdotum institutionibus, a sacro baptismi lavacro arceant, absterreantque; Ni morem gesserint, mille illis mortes, certam perniciem, nationis universæ exitium quotidie minitabantur. Nec mirum hoc, neque novum. In America ubique gentium religionis sanctæ magistri præstigiatores superstitionum avitarum antistites Christianæ legis scopulos, optatorumque progressuum turbatores fuere experti. Cum his quantum, superi boni! certaminum, negotiique fuit Patri Antonio Ruiz de Montoya Quaranicæ gentis Apostolo clarissimo! Tum denique istorum barbarorum infinitatem ad Christiana sacra, coloniasque traduxit, dum præstigatorum superstitionum authoritatem compressit, & mortuorum ossa, quæ summis colebantur passim honoribus, inspectante populo palam cremari iussit. His holophantis, & sycophantis (liceat mihi cum Plauto loqui) nondum eliminatis, everfisque actum agitur apud Barbaros. Expertus ipse id affirmo. Divi Joachimi oppidum ex bis mille Quaraniis ytatinquis neophytis conflatum non religionis solum laude florebat, sed & pietatis sinceræ fructus edebat jam tum uberrimos. Verum ut sæpe anguis in herba, lolium in agro latet cæterum lætissimo, Indus decrepitis istis præstigatoris munere clanculum fungebatur, & a mulierculis quibusdam ceu divinum quid se se adorari passus est, dum illarum vel medicum, vel fatidicum egit, & obscæna patravit. Hæc ab oppidi Caziquio principe, Ignatio Paranderi, viro probissimo detecta mihi ut sunt, sine cunctatione pestilentem senem, clam frustra admonitum, palam objurgandum, mor-

boque veteri acrius remedium adhibendum putavi. Populi optimatum manipulo stipatus illius ædes accedo. Enimvero tanto in negotio fulmineam Tullii linguam, qua in catilinam olim intonuit, imitatus: Quousque tandem, dixi, Christianum mentieris infelix vetule, & nefandis artibus, spurcis moribus contubernalium labefactare integritatem audebis? Annos prope viginti in Christi Schola versatus a Christianis legibus alienissima barbarorum ritu moliri haud times? Enimvero tigridis cognomen (yaguaretè, quod tigridem significat, vocabatur) moribus exprimis etiamnum, dum JESU Christi oviculas fallaciis, obscœnitatibusque dilanias tuis. Ultima te senectus ad vitæ perduxit metam. Quam tragica te mors eheu, nî resipiscas, quam funesta sors mortuum te manet! Pudet me tui senex bone, sed perinde miseret! Hic, quem in Cruce tui amore extinctum vides (servatoris imaginem exhibui) simulatorem te ad stygias voragines præcipitem aget vindex. Esto, quod appares, vel appare, quod es. Ad divinæ legis normam tandem componere. Quodsi barbaræ superstitiones tam altis in animo tuo radicibus fixæ hærent, evelli porro ut nequeant, ad barbarorum sylvas, ad ferarum, ubi primam lucem aspexisti, latibula redi ocyus, ne cæteros, qui Deo se, ac probitati dedidere, contubernales, exemplo tuo corrumpas. Age, priorum te pœniteat tandem, si sapias, & flagitiorum maculas pœnitentia, innocentiaque morum aboleas dein. Amice monenti mihi ni morem gesseris, pessime tibi consules profecto. Haud equidem impunitus abibis imposterum. superstitiosum quid, obscœnumve iteratum a te, vel tentatum ut primum intellexero, noveris, me jubente, universo populo plaudente per forum, plateasque te circumducendum, & fimo bubulo a puerorum

rum turba obruendum. Id certum mihi, fixumque, stercoreæ tuæ divinitati, quam tibi arrogare dementer ausus, adorarique passus es, tale thus, ac thymiana debetur. Hac comminatione pestilens filicernium non percussus modo, sed &, ni fallor, correctum reliqui, bonis omnibus orationis meæ severitatem mire probantibus. Nihil posthac seu querelarum adversus illum, seu suspicionum fuit, vigili licet oculo, aureque attenta exploraverim omnia. Duplici hæc sine commemoranda putavi, primum, ut præstigiatorum faciem religionis obicem præcipuum, ac bonorum pestem esse in America, perspicias; Dein ut videas, a missionariis barbarorum doctoribus non conaiveri, si quid a religionis puritate alienum in illis deprehenderint, dummodo sine majori illorum pernicie, ac rei Christianæ detrimento interdici possit, & eliminari. Ferenda sunt, quæ emendari prudenter haud possunt. In moribus, erroribusque ferocium barbarorum corrigendis lente festinandum est, Evangelici patris familias exemplo, qui lolia ex agro evellenda noluit metuens, ne cum illis triticum tenerum una evelleretur. Franges vitrum, si importune id flectere volueris. Qui ira præcipites, vel pietatis intempestivo desiderio exæstuant barbaros in religione novitios acriter perstrinxerint, & rem, & spem omnem evertent.

Cum præstigiatores non fatidicorum modo, medicorumque, sed et superstitionis magistrorum munere fungantur, fidem superat, quam absurdis opinionibus inbuant rudes Abiponum animos. Paucas e multis juvat adnotare. Immortales se fore autumant Abipones, neminemque suorum usquam moriturum, si Hispani, si præstigiatores America exularent; vel enim maleficis horum artibus, vel illo-

rum

rum ignem vomentibus fistulis mortem cujuscunque, aliis licet a causis ortam, tribuere consueverunt. Vulneribus perfossus, contractis ossibus, viribus extrema senectute exhaustis occumbat illorum quispiam, vulnera, corporis imbecillitatem illi mortem accelerasse, negabunt omnes: cujusnam præstigiatoris artibus, & quam denique ob causam necatus fuerit, diligenter indagabunt. Cum suorum plurimos ultra seculum vitam produxisse, meminerint, semper se victuros, somniant, si præstigiatores, si Hispani, sola scilicet, & solita mortis instrumenta, semper abessent. De solis, lunæque eclipsi quantum delirant Americani! Illa perdurante miserabiles Abiponum ejulatus undique personant. *Tayreâ* o paupercule! soli, lunæque indolentes identidem exclamant. Obscuratum enim planetam omnino extinguendum semper timent. Hinc & nobis: obsecra, Pater mi, aiebant, rerum Creatorem, hoc Cœli lumen nobis adeo necessarium interire ne patiatur. Rifu digniores dixerim Indos Chiquitos, qui a canibus, queis aerem scatere putant, solem, lunamque misere dilaniari dicunt, dum illis deficientibus obtendi tenebras vident. Solis, lunæque ruborem sanguinem & canum morsibus ortum interpretantur. Hinc, ut charos sibi planetas in aereos molossos tuerentur, sagittarum grandinem eclipseos tempore in Cœlum vociferantes ejaculantur. Verum, ecquis credat, Indios Peruvianos, aliis politiores, tantum discipuisse, ut putarent, solem obscuratum sibi irasci, vultumque a se avertere, quod criminum quorundam rei viderentur, atque hoc nomine eclipsim calamitatum, queis multarentur subinde omnes, indicium censuerunt. Lunam caligantem ægrotare dixerant, semper veriti, ne quando moreretur, ejusque cadavere vasto in terras delapso incolæ omnes opprimeren-

merentur. Lumine recuperato illam convaluisse, a Pachacamac, mundi servatore, consanatum, opinantur; quo mors illi interdicta, ne ejus decidentis ponere contractus orbis interiret. Alia aliis Americanis fuere de eclipsi deliramenta. Cometam Abipones Neyac, Quaranii yacitatà tatatibae stellam fumantem appellant. Quod enim nos Cometæ crines, barbas, caudam dicimus, illi pro fumo habent. Hoc sidus barbaris omnibus formidabile est, quippe quod Calamitatum seu prodromus, seu instrumentum vulgo putatur. Peruviani, a Cometis Regum suorum mortem, provinciarum, regnorumque exitium prænunciari, existimant semper. Montezuma Mexicanorum Monarcha Cometam igneæ pyramidis instar a media nocte ad ortum solis usque spectabilem frequenter intuitus sibi, suisque pessime timuit, haud multo post a Cortesio Hispanorum duce subjugum missus, interemptusque. Ignoscendum sane Americanorum inscitiz, cum antiqui sapientes plerique omnes male de Cometis senserint. Quis nescit Lucani versus l. 1.

Ignota obscuræ viderunt sidera noctes,
Ardentemque polum flammis, Cœloque volantes
Obliquas per inane faces, crinemque Timendi
Sideris, & terris minitantem regna Cometen.

Consentit lucano Virgilius 1. Georgic. Nec
diri toties arserit Cometa. Et utrique Tullius Cicero
2. de natura Deorum: Tum facibus visis Cœlestibus,
rum stellis his, quas Græci cometas, nostri cincinnatas
vocant, quæ nuper bello Octaviano magnarum fuerunt ca-
lami-

lamitarum prænuucia. Idem alio loco : *fatalem semper*
Reipublica Romana Cometen, dicit. Consona & pro-
 fanorum, & sacrorum scriptorum testimonia passim
 videas, Sed caveas, quæso, hac nostra ætate Come-
 tas reformidare, ni ab universo Philosophorum exer-
 citu rideri velis. Quid quod & clarissimus Roma-
 no in Collegio Rhetorices quondam magister Vin-
 centius Quinisius noster, dum tertio calendas De-
 cembris anno 1618. Cometa Romæ se spectandum
 præbuit, autoritate, experientia, rationibusque pa-
 lam, valideque probaverit : Cometas indicium esse
 felicitatis futuræ ; Non, ut vulgus putat, calamita-
 tis. Oratio exstat in allocutionibus Gymnasticis hujus
 authoris Antverpiensi in Typographeo 1633. rursus
 editis. Ego quidem fateor, me nec vulgo timenti,
 nec Quinisio speranti assentiri, sed quod Vindobo-
 nensi in universitate anno 1742. doctus, ac publice
 tuitus sum, opinari : Cometas nec prospera, nec si-
 nistra portendere. Sed quorsum a cometis me abri-
 pi passus sum? In viam ad Abiponum superstitiones
 redeamus. Hi aliam præterea stellam, cujus nomen
 haud memini, portentosam, sibi timendam, exitia-
 lemque, arbitrantur. Ajunt equidem, illos annos,
 quibus hoc fidus visum est, nationi suæ cruentos
 fere, ac ærumnarum plenissimos fluxisse. Turbini
 pulveres in gyrum circumagenti mulieres cineris
 portionem immodicam celerrime objiciunt, ut illo
 ceu esca saturatus aliorum deflectat. Quod si enim
 vorticoso illo cum impetu quampiam in domum
 irreperit turbo, domesticorum alicui confestim mo-
 riendum esse sibi persuadent. In favo mellis, quem
 e sylvis domum attulerant, si apes vivas invenerint,
 extra domus succ. Limina necandas esse, ajunt. Si
 enim intra domum interimantur apes, mel porro a
 se nusquam reperiendum credunt, Sed apage
 ani-

aniles has Americanorum superstitiones. Infinitum, si referreim singulas. Ecquis succenseat rudibus barbaris, dum & nostrates plebeji non rursus tantum, sed cultis quoque in urbibus quam absurdas, tam ridiculas animo foveant opiniones, & veluti sapientum scita pertinacissime observant. Christophori Märlingen iustus extat liber, quo varias variarum gentium superstitiones ad lectoris fastidium complexus est. Vetularum, nutricularumque opera errores puerorum mentibus inferuntur, hi cum adolescentibus adolescunt, consenescent cum senibus, & non nisi cum morientibus plerumque emoriuntur. Odorem scilicet, quo imbuta est testa recens, diutissime servat. Laborant Abipones tot superstitionibus, quia abundant tot superstitionum magistris præstigiatoribus. Ea tempestate, qua apud illos egi, maxime clauerunt: Hanetrân. Nahagalkin. Oaikin. Kaëperlahachin. Pazanoirin. Kaachî. Kepakainkin. Laamamin'. Horum omnium alpha, & qui toto vertice eminebat, Pariekaikin vaticiniorum, curationumque gloria spectatissimus. Vultus erat præcandidi, & qui singularem modestiam, comitatemque præseferebat. Globulorum, qui in arboribus nascuntur, nigricantium fascies, ut Indi Christiani Marianum Rosarium, e collo suspensos fere habuit, ornatus omnis, quo reliqui gaudent, semper contemptor, sed fallaciarum machinator diligens, ad fucum faciendum promptissimus. Præstigiaticum faminarum plane greges sunt, culicesque Ægypti numero excedunt, ut adeo nec nominari possint, neque numerari. His maximopere cordi est, omnium animis, auribusque avi sui mali dæmonis venerationem identidem inculcare. De hac jam differendum.

CAPUT X.

Conjecturæ, cur Abipones malum dæmonem pro Avo suo, Plejadasque pro illius imagine habeant.

Ab Abiponibus malum Dæmonem pro Avo suo haberi, dum legis, ride per me, illorum ineptias, miserare illorum amentiam, & admirare; sed si sapias, Cave, ne quid nimis. Impudentius equidem delirarunt tot gentes & Divinis, & humanis legibus, artibusque perpolitæ. Si sacras, si profanas historias vel primoribus labris delibasti, fateberis sane, vix uspiam extare aliquid, cui divini honores non fuissent delati aliquando. Baal, Beelphegor, Beelzebub, Moloch, Dagon, Chamos, Astaroth &c. Superi boni! quam monstrosa nomina! Hebræorum tamen variis in locis, temporibusque olim Numina. Ægyptiis præter canem, felem, accipitrem, & quem Nilus educaverat, Crocodilum, etiam in hortis Numina nascebantur cepæ, porri, & allia; Afris Cœlum; Persis aqua, ignis, & venti; Libyis sol ac luna; Thebanis oves, & mustelæ; Babyloniis Memphis, Cetus; Mendesiis capra. Thessalis Ciconiæ; Syrophanicibus columbæ Deorum instar fuerunt. Suum citius Xerxes Rex, quam Deorum, Dearumque, quæ vetus Roma famulabatur, exercitum numeraveris. Perlege, si sine risu potes, Romanorum Græcorumque mythologiam, næ illam vel delirantium,

Pars II. G vel

vel somniantium esse partum, judicabis. Qui enim sanæ mentis est, Iovem, Saturnum, Martem &c. tot flagitiis infames vana esse sine Numine nomina, & solo nomine Numina dicet, quin cum Regio vate dæmonia pronuntiabit: *Omnes Dii gentium dæmonia*. Quod veterator stygius nostris Parentibus in paradiso sponndit: *Eritis sicut Dii*, id profecto priscis Græciæ, Romæque heroibus, ac Principibus non paucis obtigerat, quibus, solo interdum scelere claris, apotheosis, aræ, columnæ, divini honores post obitum decreti. Ecquis demum exprimat idolorum seu numerum, seu figuras, quibus Africa, Asia, America thus adolevit, templa condidit? In Insula Cei-lano simii dentem, ceu rem divinam divino cultu religiosissime prosequuntur incolæ, ad quam venerandam a quingentis facile leucis supplicantium ritu turmatim confluunt quot annis. Dracones, flumina, rupes, arbores, & quid non? Numinum instar alibi a Barbaris flexo poplite coluntur. Ast quis miretur, bestias à bestiis, stipites à stupidis coli? In admirationem me rapit, Antonino Pio imperatore, Pio primo Romano Pontifice circa annum centesimum quinquagesimum à servatore nato hæreticos exstitisse, qui, præter alios errores, Cain fratricidam; Judam Iscariotem sacrilegum; Chore, Dathan, & Abiron Israelitas in seditionis pœnam terra dehiscente absorptos, quin & nefandos Sodomæ incolas colendos sibi, venerandosque putarunt, à Tertulliano acerrime mulctati, uti Petrus Annatus Libro 7. apparatus sui ad theologiam refert. Tantæ tot populorum cultiorum insanix, ineptiæque indignationem nostram, admirationemque ita exhauriant oportet, ut Abiponibus barbaris, feras inter educatis, literarum omnino expertibus mitius succenseamus, dum malum dæmonem Avi sui nomine dignantur, quin tamen illi vel nomen, vel

vel cultum tribuant divinum. Septennio, quod istos apud Barbaros consumpsi, nil ejusmodi unquam deprehendi. Si quid forte clanculum nobis insciis, absentibusque egere, quod Theologus damnaret, id illos non religiosa in dæmonem propensione, sed ejus metu duntaxat a præstigiatoribus suis avitarum Cerimoniarum defensoribus compulsos egisse, atque adeo stupiditatis potius, quam sacrilegæ impietatis arguendos, opinor.

Ne quis putet, nostrorum aliquem connivisse illis in rebus, quæ ad dæmonis cultum pertinere viderentur, referam, quod in divi Hieronymi oppido, prima Abiponum Colonia paulo ante condita evenerat. Incolæ prope omnes equis velocibus vicinum in agrum forte excurrerunt. Josephus Brigniel Missionarius excursionis finem anxie sciscitatus ex eorum, qui domi remanserant, quopiam intellexit denique: Dæmonis, avi sui, domum (Groaperikie Leëriki) ex palmârum ramis, frondibusque in campo hodie struendam; Hunc esse itineris scopum. Superstitiosam populi functionem indignatus Pater, illiusque, qua liceret, impediendæ cupidissimus equum propere conscendit. Indo frugis melioris duce locum attigit, ubi tugurium extemporale, circumfusumque huic populum conspicabatur eminus. Barbari inopinatè Patris adventu perculsi: Huic ne casæ propinquaret, eum obtestabantur, monebantque impense, ni avi sui dæmonis, qui sub illa latitaret, unquibus misere discerpi malit. Præstigiatoris Haanetrain, qui in tugurio latens jam rugitu tigridem imitabatur, jam, mutata identidem voce, avi sui, cujus personam sustinuit, nomine responsa dabat, locutionem agnovit Pater, circumstantibusque superstitionem impiam, stolidam credulitatem incredibili cum audacia exprobravit.

vit, fructu pari. Neque enim posthac, quod quidem sciam, de domo dæmonis quidquam auditum.

Ut Abipones, sic illis confines Mocobii, Tobæ, Yapitalakæ, Quaikurui, alique equestres in Chaco populi dæmonis Nepotes se jactant, superstitionis haud minus, quam dementiæ focii. Ast quantum ab his discrepant Australes Barbari equites, Magallanicum qui per solum vagantur! omnes dæmonem norunt, & Balichù appellunt. Credunt, dæmonum turbam esse innumeram. Illorum principem *El El*; Plebejos dæmones *Quezubù* vocare consueverunt. Omne tamen dæmonum genus mortalibus infensum, infestumque, ac mali cujuscunque originem putant, metuunt, execrantur. Puelches, Picunches, Moluches ne nomen quidem Dei noscunt. Hi, quos ultimo posui loco, quidquid boni seu possident, seu sibi optant, soli in acceptis ferunt, à sole poscunt. Sacerdoti nostro monenti: Deum, ut rerum cæterarum, sic solis conditorem præ sole utique colendum esse, reposuerunt: Nos equidem in hanc usque diem nil majus, nil melius sole, agnovimus. Patagones Deum *soychù* vocant, rem scilicet, quæ videri nequeat, quæ omni veneratione digna sit, & extra mundum versetur; Hinc vitam functos *soychubèt* dicunt, homines scilicet, qui cum Deo sunt, & extra mundum degunt. Duo rerum principia cum Gnosticis, & Manichæis videntur somnare, cum Deum bonorum, dæmonem malorum authorem dicant. Hunc licet neutiquam colant, maximopere tamen reformidant. Ægrotantem quemvis a malo dæmone credunt infideri; Hinc illorum medici tympanum, piæti dæmonum figuris horridum, semper circumferunt, omnique virium contentione ægrotantium ad lectulos pulsant ad exturbandum ægri e corpore dæmonem, morbi authorem. Chilenses
bar-

barbari ignorant & nomen, & cultum Dei. Credunt aereum spiritum quemdam, quem Pillan appellant, cui, hostes ut suos profliget, supplicare, & pocula inter pro victoria obtenta gratias agere consueverunt. *Pillan* illis etiam tonitru significat. Illum, Cœlo tonante, maxime colunt. Dæmonem, Alveè ab illis dictum, ceu boni cujuscunque obicem, & raptorem toto pectore execrantur. Hinc, cum vitam rerum omnium sibi optimam reputent, si quis suorum moriatur, eum a dæmonè raptum ajunt. Brasili, Quaraniique dæmonem *Ànà*, vel *Añanga* vocant, ac mille nocendi artibus insignem incredibiliter metuere solent. Peruviani veteres eundem *Cupay* nuncuparunt, & modis omnibus, veluti calamitatum omnium architectum, averfabantur adeo, ut, antequam ejus nomen pronunciarent, in contemptus testificationem expuere consueverint. In virginia Barbari malum dæmonem *Okè* vocant, adorantque. Numerosæ, finitimæque Barbarorum nationes cum dæmonem metuendum sibi, semperque aspernandum existimaverint, haud capio, qua demum ratione ducti Abipones eundem dulci, honorificoque *Avi* nomine prosequantur. Verum noveris, ratione, argumentisque haud opus esse, ut vel absurdissima sibi persuadeant, dubia pro certis, falsa pro verissimis habeant barbari. Præstigatoris astuti commentum, somnium anus rancidæ arrectis audiant auribus, satis est, superque, ut dæmonem avum suum esse, & si quid aliud absurdus, citra tergiversationem jurent. Trecentæ superstitiones a majoribus ad posteros derivantur, quibus ea animi firmitate rudes inhærent Americani, qua nos Christianæ legis sanctionibus ab Apostolis ad nos transmissis.

Cur Plejadas dæmonis avi sui imaginem putent, excutiendum restat. Hoc quoque in argumento præ-



ter conjecturas nihil mea depromam ex penu ; Neque enim certi quidpiam seu ex Abiponibus, seu ex America historicis licuit extorquere. Septem hæ Stellæ Plejades in capite tauri a latinis Vergiliæ, veris nunciæ, imbrium indices dicuntur. *Navira quas Hjaðes Grajus ab imbre vocat.* Ovidius 5. fastorum. Septem Lycurgi filia: Electra, Halcione, Celæno, Merope, Asterope, Taygete, & Maja, quod Bacchum in Naxo insula educarint, a Jove inter sidera relata, Plejadesque vocatae sunt, ut quidem Poetis fabulari lubuit. Quid si, lubuit non nemini divinare, Abipones, compositionum amantissimi septem has stellas, quia olim Bacchi altrices, sibi vel hoc nomine colendas putarunt? Sed festiva hæc cogitatio confabulationi, quam historiae opportunior. Ejusdem ponderis est alia Hispani cujusdam conjectura. Plejadas, mihi ajebat, Hispani *las Cabrillas* — Capellas vocamus. Cum dæmon caprina forma cornutus, hirsutusque a pictoribus exprimi soleat, Abipones has Capellas, seu Plejadas, dæmonis avi sui imaginem sibi venerandas existimaverint. Placuit mihi hominis facetia, risu, non assensu digna. Illud attentione dignum, quod, cum a gentibus variis jam solem, jam lunam, jam stellas varias divinis coli honoribus noverimus, de Plejadum cultu ne unum quidem apicem in sacris codicibusprehendamus. Nisi forte quis dixerit, Plejadibus honores divinos exhibitos fuisse ab illis gentibus, de quibus Libri Deuteronomii cap. 17. v. 3. dicitur: — *Ut vadant, & serviant Diis alienis, & adorent eos, solem & lunam, & omnem militiam cæli* — Divus Hieronymus equidem *militiæ Cæli* nomine omnia Cæli astra significari, adeoque & Plejadas, arbitratur. Astarthæ, planetæ nimirum veneri, sidoniorum Deæ, a Salomone per scæminas jam corrupto templum fuisse conditum, sacra memorat historia.

Penſatis diu, multumque omnibus illud mihi verifiſimillimum videtur: A Peruvianis antiquioribus, meridionalis Americæ maxima ex parte dominis, ac magiſtris ad Paraquariæ barbaros & cognitionem, & qualemcumque Plejadum cultum fluxiſſe. Illi etenim, etſi Deum rerum omnium Satorem, conſervatoremque: Pa-cha camac dictum, qui, ut hæc iis vox ſonat, vitam mundo tribuit, venerabantur, nihilominus mare, rupes, arbores, &, quod rei caput eſt, Plejadas adorariſſe dicuntur, quas ſua id temporis lingua *Colca* nominarunt. Illorum dein dominator, & ut Numa Pompilius Rex agreſtium tunc Romanorum, legiſlator ſummus Ynca Manco capac antiquis ſuperſtitionibus novas ſubſtituit. Solem illuſtriſſimum illud cœli ſidus, terræque beneficentiſſimum Divinis porro honoribus afficiendum decrevit. In Peruvii tunc metropoli Regia Chufco templum ſolis, ſi quod uſpiam terrarum, magnificum ſane conſtrui fecerat, cujus parietes laminis aureis veſtiti, columnis aureis ornati, ab imo ad ſummum; In medio vaſtiſſima ſolis radios undique diffundentis imago ex auro puro puto ficta ſplendoris majeſtate omnium oculos perculit, animosque implevit. Huic ſoli duntaxat & veneratio divina, & ſacrificia præſtabantur, quamvis Lunæ quoque, quam ſolis conjugem, & ſtellis quibusdam, quas lunæ ancillas dixerant, aras argenteas, cultumque, ſed divino inferiorem indulſerint. Hæc inter ſidera inſigni loco, honoreque præcipuo dignas Plejadas exiſtimarunt, an ob ſitus mirabilis conformationem, an ob eximium ſplendorem, neſcio. Nam & ore divino *micantes ſtellæ Plejades* apud Jobum cap. 38. præ cæteris celebrantur. Poſtquam Hiſpani, everſo Yncarum imperio, Peruvii dominatum armis obtinuerunt, formidabili eorum ſervituti ſe ut ſubducerent, Peruvianos, quaquà licuit, dilapſos, credibile eſt, non paucos in finitimam Tucumaniam,

indeque securitatis gratia in vicinas per Chacum solitudines commigrasse, barbarisque incolis præter alias superstitiones Plejadum quoque observationem religionem inspirasse. Fingamus, hoc demum advenarum ductu Abipones in Plejadum cognitionem venisse. Verum objicies: Cum Abipones ne nomen quidem Dei lingua nativa exprimere norint; Cum dæmonem avi sui nomine reverenter consalutent, eccur, amabo, ex Peruvianis Dei nomen, ac reverentiam, eccur dæmonis odium, contemptumque non didicere? Illi certe in Deum Pachacamac, qui vitam mundo dat, tanta ferebantur reverentia, ut vel ejus nomen, nisi gravissimis de causis, pronunciare, religioni sibi duxerint; Quoties illud proferendum, id cum luculentissima honoris significatione præstiterunt; Namque attollebant humeros, vultu terram versus depresso, clausis oculis, palma manus dextræ dextra in scapula pie collocata, oscula repetita in aerem vibrarunt, ut summam adversus Deum observantiam testarentur. Malum dæmonem *Cupay* e contrario, ut paulo ante meminimus, contemptui habuerunt. Hanc Dei venerationem, inquires, hunc dæmonis despectum cur non afflarunt Abiponibus Peruviani advenæ, si Plejadum observationem invexerunt? Sed nempe vitium promptius, quam virtutes ex aliis condiscuntur, uti facilius per morbos inficiuntur sani, quam morbo infecti per sanos curentur. Quod si pertinaciter neget, Plejadum cognitionem ex Peruvio allatam, nil disceptabo, quid tamen vetat opinari, eam ex vicina Brasilia in Paraguariam olim irrepsisse. Tapuiyæ enim, ferox, numerosaque quondam natio Brasiliæ, imprimis venerabantur Plejadum ortum, stellasque illas Numinis instar canendo, & choreas agendo coluerunt, quod totidem prope verbis Jacobus Rabbi, qui annos aliquot his barbaris convixerat, testatur. Nulla cum præsto sint

sint monumenta, e quibus certi aliquid hac super re, exploratique erui posset, visum est, conjecturas, opinionones, verisimilitudinesque in medium afferre, ut de dæmone Abiponum infami avo, Plejadibusque illius imagine aliquid dixisse videamur.

C A P U T X I.

De Nationis Abiponicæ divisione, paucitate, ejusque causa præcipua.

Politicam apud Barbaros expectare idem prorsus tibi videbitur, ac in scirpo nodum, ex pumice aquam quærere. Abipones, gens libertatis avitæ tenax, jugi omnis impatiens, arbitrato vixere suo. Quod libuit, licuit. Adeo sola illis voluntas semper pro lege fuit. Id equidem haud ausim inficiari. Nihilominus, uti apes, formicæ, ac quodvis belluarum genus quædam speciei suæ propria naturali observant instinctu, sic ferissimi quamvis Indi consvetudines quasdam, nationis suæ scita, quæ a majoribus acceperere, pertinaciter retinent etiamnum, ac veluti pro legibus habent suis. De Abiponum rationibus politicis, oeconomicis, militaribus, de illorum moribus, ac magistratibus mihi porro agendum. Expeditior jam curret calamus, quia scribenda, quæ oculis patent, non meditandæ conjecturæ de Barbarorum superstitionibus, quarum seu radices, seu causæ illorum in animis delitescunt, quin

sæpe probabile quid ex iis possit exculpi, ruditate mentis linguæ usum impediente.

Tres in classes universa Abiponum natio tribuitur: In Riika e, qui in campis longe, lateque patentibus morantur; In Nakaigetergehè, qui sylvarum amant latibula; In Jaaukanigas denique, qui singularis quondam fuere natio, propriaque utebantur lingua. Seculo proxime lapso ab Hispanis, quæis stragem illaturi excurrerant, in itinere per insidias oppressi, ac propemodum internecione deleti sunt. Pauci a clade superstitēs, cæsorū liberi, ac conjuges viduæ vicinis se se Abiponibus adjungere eo successu, ut ambæ nationes mutuis inter se connubiis in unam coaluerint denique, veteri Jaaukanigarum lingua penitus extincta. Eadem his Abiponum tribubus vitæ, morumque ratio, lingua, si pauca excipias vocabula, eadem prorsus. Mira inter illos concordia animorum, armorumque stabilis societas, quamdiu illis contra Hispanum res fuit, in quem, ceu communem, ut putant, hostem innato feruntur odio, ac unitis viribus ejus servitutem pertinaciter declinant. Cæterum licet sanguinis, amicitiaque vinculo colligati injuriæ quantulacunque impatientes belli occasionem avidè arripiunt, mutuisque se cladibus atterunt frequenter. Fraternas istorum acies, continuataque per annos plures vario cum successu bella tempore narrabo suo.

Abipones aliqui polygamia, sed uxorum repudiatione frequentius, ut cæteri per Americam Barbari, utuntur. Neque tamen numerosi sunt. Universa natio quinque circiter capitum millibus definitur. Velitationibus jam intestinis, jam bellicis in externos hostes excursionibus, jam mortifera morbillorum, variolarumque contagione, jam matrum, quis non perhor-

horrescat? in proles suas crudelitate ad tantam redacti sunt paucitatem. Sævitiæ muliebris causam accipe. Ad triennium fere lac præbere solent prolibus matres. Nihil illis interea cum maritis commercii conjugalis. Hi moras lactatus diutini tandem pertæsi aliam sibi sæpe adsciscunt conjugem. Repudiationis igitur metu foetus necant suos mox a partu foeminae; Aliquando illos nec partu expectato violentis expellunt artibus; Ne lactandi molestiis impeditæ inutiles se maritis, ac infensas reddant, tantum audent in sobolem. Viduæ, marito superstite, fieri timent; Tigride esse crudeliores, non erubescunt. Æthiopissam novi Abiponis captivam, lacertosam foeminam, quæ barbaris matribus in evellendo ex utero embryone operam sæpe navasse strenuam dicebatur. Herum illius Abiponem sacro jam fonte expiatum, mentisque optimæ virum hac de re commonuimus. Captivæ suæ facinus ultro fassus est, negavit tamen illud olim pro flagitio a se fuisse habitum, quippe majorum suorum consuetudine comprobatur. Postquam divinis id, humanisque legibus adversari e nobis intellexerat, ne semel quidem id a se toleratum affirmavit, nunquam porro tolerandum, sponddit, Matres foemineis prolibus præ masculis parcunt lubentius, frequentiusque, idque lucri futuri expectatione; Filiis enim adultis sponsam emere oportebit. Filias nobiles, quovis demum pretio, sponso vendere licebit.

E quibus prona est conjectura, Abiponum nationi foeminas, quam viros, numerosiores suppetere, tum quia proles foemineæ rarius a matribus trucidantur, tum quia velitationibus, quæ viros exhauriunt, non intersunt foeminae, tum quia natura maribus sunt vivaciores. Uni virorum centuriæ cohors mulierum respondet.

det. In curtissimo sæpe contubernio masculini generis confertissimam vetularum seclarium, omnisque ætatis fœminarum turbam deprehendes. Hallucinantur scriptorum complures, qui Americanorum hodiernam paucitatem Hispanorum sævitiam pleno ore interpretari ausi sunt, cum rectius matrum infanticidarum crudelitatem accusassent. Nos certe, qui Abipones inter consenuimus, illam bonæ frugis mulierem pronunciavimus, quæ binos, ternosve filios educaverit. Verum adeo paucas ejusmodi matres Abiponum natio universa numerat, uni ut annulo earum nomina possint inscribi. Debayakaikin princeps Caziquius quaternos filios, totidem Kain' Jaaukaniga habuit, sed singulos diversa e matre prognatos. Novi alias, quæ, ut passim vulgabatur, quot liberos perpererunt, totidem trucidarunt, nemine eadem aut impediante, aut vindicante. Adeo scelera, dum communia sunt, impunita fere abeunt, quasi vero recepta passim consuetudo illorum vel malitiam aboleret, vel impietatem excusaret. Mortem prolis teneræ morbo extinctæ sinceris lacrymis, diuturnis planctibus prosequuntur matres; Proles vixdum in lucem editas, diuque victuras eadem serena fronte jam terræ allidunt, jam modis aliis interimunt. Tantam matrum in liberos exanimis pietatem cum tanta in vivos crudelitate conjungi posse vix credibile Europæis est, sed nobis certum, indubitatumque. Postquam tamen nostra institutione legis divinæ reverentia Abiponum mentibus insita fuit, enim vero inveterat amatrum barbaries sensim deferuit; Illarum manus jam non filiorum sanguine cruentas, sed brachia charis pignoribus onusta illorum genitores Abipones lætis oculis mirabantur. En! religionis, quæ ut cælo, sic terris incolas suppeditat, fructum, triumphumque eximium. Namque uxorum mul-

multitudine, ac repudiatione, infantium nefaria cæde, abortuumque spontaneorum libertate per christianam disciplinam demum sublatis Abiponum natio paucos intra annos incredibili hominum utriusque sexus accessione locupletatam se plaudens circumspexit. Quo religiosius morem gesserint Divinis legibus Europæi, eo maiorem populi frequentiam suis provinciis succrescere experientur seu colendis agris, & artibus, seu hostibus arcendis profuturi. Libidinibus enim, furiosis simulatibus, ebriositate, cæterisque, quæ religio vetat, flagitiis numerosam sobolem partim impediti, partim extingui, nemo sanæ mentis unquam dubitavit.

C A P U T XII.

De Abiponum magistratibus, Capitaneis, Caziquiis &c. deque Regiminis forma.

Qui suprema cum potestate universæ nationi dominetur, Principem haud agnoscunt Abipones. In turmas se se dividunt; Singulis unus præest, quem Hispani Capitaneum, seu Caziquium, Peruviani Curaca, Quaranii Aba rubichà, Abipones Nelaſeyſât, vel capitâ appellant. Hæc vox *Capitân* magnificum quid Americanorum in auribus sonat. Honorificentissimo se putant titulo uti, dum vel Deum, vel Hispaniarum Regem *Capitân Larênc*, *Capitân Quazû*, magnum Capitâ-

pitaneum vocant. Quo quidem Capitanei vocabulo non supremam duntaxat potestatem, dignitatemque eminentissimam, sed & quamcunque nobilitatem designari volunt. Rancidæ interdum anus, vili lacerna squallentes, & solis rugis opulentæ, ne plebejo ortæ genere nobis viderentur, non sine fastu dicere solebant: *Aym Capitâ* sum Capitanea, sum nobilis. Obstupui, dum barbari densissimas inter sylvas Mbaëverâ sepulti, omnisque cum Hispana gente consortiî expertes Caziquios suos Capitâ Roÿ, Capitâ Tupânchichu, Capitâ Veraripotschiritû compellarunt, neglecto nativæ linguæ vocabulo *Aba rubicha*. Adeo Capitanei nomen apud quosvis barbaros civitate donatum, ac honorificum. Obvium habeat Abiponum aliquis Hispanum elegantiore toga nitentem, proletarius quamvis sit, nullaque seu nobilitate, seu dignitate insignis, nihil hæsitans Capitaneum illum dicet illico. Licet in Europa habitus non faciat monachum, in America tamen vestis nobilior nobilem facit, Abiponum saltem iudicio. Quidquod & infimæ plebis Hispani, qui ruri degunt in Paraquaria, Capitanei titulum ardentissime ambiunt, depereuntque; Hoc si illos vocabulo non consalutes identidem, torvis aspicere oculis, officii genus quodcunque, aquæ guttam vel sitientissimus nequidquam ab illis expectaveris. Eiusdem tituli stulta ambitione ceu peste afflatus dixeris Quaranos christianos, Biennio, trienniove Regiis in castris strenuam operam postquam navarunt, belli molestias, accepta vulnera egregie sibi compensata judicant, dummodo expeditione militari absoluta nomen, baculumque Capitanei a Regio Gubernatore sibi collatum in Coloniam referant suam. Rusticis, fabrilibusve laboribus occupati licet, licet nudis semper pedibus incedentes, Capitanei baculum non sine ostentatione manu circumferunt quotidie, seque

mag-

magnifice circumspiciunt. Ligneum hoc Capitanei insigne, dum ad tumulum efferuntur, e feretro suspendere consueverunt. Moribundus quidam sacro oleo jam jam ungendus, ocreas militares calcaribus horrendas indutus, Capitanei baculum manu gestans Sacerdotis nostri adventum, quin & mortem propinquam, quasi illam territurus, præstolabatur. Insolentem moriturientis apparatus demirantibus domesticis: Capitaneum sic mori decet, graviter, severeque respondit. Tanta apud Americanos vocabuli *Capitaneus* significatio, æstimatio tanta. Vox *Cazique* nomen synonymum est, ex Indiis, quæ Orientem respiciunt, allatum, ubi Mahometanorum antistitem significat, uti Petrus Massejus noster in Historiis Indicis passim meminit.

Apud Quaranos, Christiana sacra variis in Colonis dudum amplexos, Caziqui & nomen, & officium hæreditarium est etiamnum, veteri illorum, dum in sylvis degerent, more nil mutato. Caziquio Patri vita functo citra controversiam natu major filius sufficitur, cujuscunque demum aut genii, aut ingenii fuerit. Apud Abipones pariter major filiorum Patri succedit hac tamen conditione: Si is homo frugi, si bellæ, bellicosæque indolis, si ad præfecturam idoneus videatur. Quod si enim ignavus, si asper, si absurdis moribus sit, illo rejecto alium pro arbitrato designant successorem, quamvis nullo sanguinis vinculo cum priori junctum. Id factum vidi sæpius. In pugna occubuit Ychamensaikin Colonia S. Hieronymi princeps Caziquius. Illi Abipones illius nepotem Raachik substituere, non filium Kiemkè, quem scilicet, etsi adultum, in re militari strenuum, sagacem ingenio, manuque promptissimum, mendacem distabant, ac vel hoc nomine aversebantur, quasi vero illo-

illorum plerique omnes omnibus cretensibus non es-
 sent mendaciores. Debayakaykin' Abiponenses inter
 Caziquios tum ob asseclarum multitudinem, tum ob
 facinorum celebritatem facile præcipuus in velitatione
 trucidatus filios quatuor reliquit superstites, variis,
 ut dixi, e matribus ortos. Nemo illorum populo
 probatus est. Alii Revachigi, alii Oaherkaikin, ambos
 plebejos genere, sed factis illustres, sibi duces dele-
 gerunt. Ex quo liquet, Caziquii dignitatem jure qui-
 dem sanguinis apud Abipones hæreditariam esse, sed
 propria simul successoris virtute. ac populi suffragiis
 obtineri. Hunc Abiponum barbarorum morem quis
 Europæus barbarum dicat, cultissimis olim gentibus
 communem. Nam *optimum quemque*, ut Tacitus L.
 Histor. scribit, *electio invenit*. Quamvis, ut dicam,
 quod sentio, electus ab Abiponibus Caziquius non
 habet, quod sibi plaudat, neque neglectus, quod
 plangat, vel invidet; Neque enim hic rei alicujus
 jacturam, nec ille emolumentum inde sentit. Cazi-
 quii nomen apud Abipones strepitat equidem, sed
 oneris plus, quam honoris, multum sæpe periculi, ni-
 hil omnino quæstus adfert. Et si, ut tritum sonat
 proverbium, præstet lepusculi caput, quam leonis
 caudam esse, miror tamen, inveniri unum aliquem,
 qui Abiponum caput esse, ambiat. Caziquium enim
 suum nec ut dominum reverentur, neque tributo,
 obsequiisve quod solenne aliis nationibus, veneran-
 tur. Haud illi judicis, rerum arbitri, reorumve vin-
 dicis jura tribuunt. Temulenti a temulentis non ra-
 ro trucidantur. Fœminæ à fœminis coorta in rixa sæ-
 pius cruentantur. Per juvenes gloriæ, prædæque avi-
 dos equorum greges Hispanis, quæ pax promissa,
 rapiuntur, quin & illorum cædes clanculum patran-
 tur. Novit hæc Caziquius, neque tamen hircere au-
 det. Quod si ista flagitia, quæ quidem barbari me-
 ritis,

ritis, virtutibus, victoriisque adnumerant, vel verbo asperiori multaverit, proxima in computatione pœnas dabit, ebriorum pugnis tundendus pessime, & ceu Hispanorum amicus, otii, quam suorum amantior convitiis palam onerandus, Ychamenfaikin apud Riiche, Narè apud Jaaucanigas Caziquii principes quoties cheu id senserunt! E computantium cœtu tumentes oculos, colaphis tuber caput, liventes genas, vultumque Iridis instar coloribus distinctum persæpe domum retulere.

Verum etsi Caziquium nec judicem timeant, nec dominum colant Abipones contubernales, Ducem tamen, ac belli gubernatorem sequuntur veluti commilitones, quoties vel offendendus hostis, vel repellendus; Non desunt tamen, qui sequi nolint, cum Caziquius *authoritate suadendi magis, quam jubendi potestate audiat*, quod Cæsar de Germanis olim Principibus asseruit. Ut primum de aggressionis hostilis periculo percrescit fama, Caciquii partes sunt: suorum securitati consulere: Telorum suppellectilem augere; Equos, qui remotioribus in campis pascuntur, in loca tutiora adducere suos jubet. Excubitores noctu, exploratoresque quaquaversum emittit. Vicinorum suppetias, fœdera que procurat. Dum congregiendum cum hoste, equo sublimis præcedit suos, & in fronte aciei, quam instruxerat, persistit de hostium numero, quam de suorum constantia minus angendus. Ut enim volucres, una illarum sclopi ictu prostrata, avolant reliquæ; sic Abipones paucis commilitonum seu mortibus, seu vulneribus perterriti ducem destituunt suum, & qua qua effugii patet locus, perniciousis equis dilabuntur de incolumitate sua, quam de victoria sollicitiores. Verum, ne divæ veritati sin injurius, fatendum est, huic nationi heroes nequiquam

deesse suos. Multi sæpe sociorum inter funera intrepidi perstant; Vulneribus perfolli licet, multoque cruore manantes locum, quem dimicando ceperant, retinent mortui. Jam gloriæ aviditas, jam offeratum vindictæ studium, jam effugii desperatio natura trepidis magnanimitatem inspirat, quam suspiceret Lacedæmon, quam suis in bellatoribus optat Europa.

Cæterum libertatis perinde, ac vagationum amantes sui juris esse, nullo fidelitatis sacramento obstringi volunt Caziquio. Hoc nec veniam rogato, neque invito sua quisque cum familia, quoquo lubet, demigrat, alterique se adjungit Caziquio. Pertæsus secundum ad primi contubernium impune regreditur. Istud & frequentissimum, & nemini mirum, nisi qui ignoret, quam fluxa Indorum fides, quam desultoria in omnibus voluntas. Rumor incertis etiam, vel de veritate suspectis authoribus spargatur: Hostes paucis post diebus adfuturos, satis est. Multi vitæ, quam famæ jacturam magis reformidantes Caziquio terga vertent suo; suis cum familiis recedentes ad nota sibi latibula properabunt. Ne tamen vel desertores, vel meticulosi dicantur, venatum se excurrere, ajunt. Hinc toties novas colonias barbaris aggressoribus plenas, incolis defensoribus prope vacuas soli defendimus sacerdotes, astu plerumque & comminatione, non vi usi. Periculo, aut periculi suspicione discussa ad suos demum redeunt contubernales fugaces illi heroes, quin tamen illis timiditatem objicere liceat, quamvis timorem abitus, securitatem redditus causam fuisse, nemo unus ignorarit.

Si quando in mentem venerit Caziquio excursionem hostilem in externos quosvis suscipere, compositio publica adornanda est. Præsentibus dum jam mel-

melleo illo potu incaluere, invitanti ad bellum Co-
 ziquio promptissime operam addicent suam, festi-
 vas inter vociferationes triumphum ante victoriam
 cantabunt singuli, & (quis credat?) quod inter po-
 cula promissere temulenti, sobrii stato tempore exe-
 quentur perdiliger. Tantum ponderis habet
 gutturis irrigatio ad Barbarorum animos captandos.
 Amore amorem, ut ignem igne, accendi: liberali-
 tate parari amicos, decantata sunt per Europam
 adagia, apud Abipones longo a nobis usu probata.
 Contubernales frequentes, morigeros, sui studiosos
 numerabit Caziquius, a quo repulsam ferat nemo.
 Verba dulcia, amica facies, benevolentiz signifi-
 catio, nisi beneficentia accesserit, parum possunt apud
 hos Barbaros. Quidquid illis seu in mentem,
 seu in buccam venerit, a Caziquio solent postulare,
 sibi que, illum suo obstrigi officio ad explendas om-
 nes omnium petitiones, sibi persuadent. Quod si
 quid iis negaverit, negant illum Capitaneum, ne-
 gant nobilem esse, contumeliosoque Indi sylvestris
 nomine: *Acami Langraic*, impudenter perstringunt.
 Nullum, quo a Gregariis quibusque distingueretur,
 insigne nec in armis, nec in vestitu circumfert Cazi-
 quius, nisi illud dicas, quod veste plerumque usu
 detrita, obsoletaque utatur. Nova enim, ac ele-
 ganti, quæ heri ex conjugis suæ textrina prodiit,
 indutus si compareat in foro, primus, quem obvium
 sibi habuerit, audacter, inclamabit: Da mihi hoc
 indumentum, *zach' cané grihilalgi*. Ni prompte illud
 porrexerit, risui, contemptuique erit omnibus, re-
 rum suarum tenax, ac sordidus audiet passim: *Apa-
 laic' recá'*. Interdum grandius quid petitori dum me
 accesserant, manu humerum meum demulcentes
 voce blanda: Pater mi, ajebant, magnus tu enim-
 vero es Capitaneus! *Pay! Acami Capitá Larenc*. Qua

quidem honorifica compellatione me amice commo-
nitum voluere, a Capitaneo alienum esse suis nega-
re quidpiam. Hinc, cum sæpe res, quas poscunt,
nec mihi in promptu essent, neque fors Amsteloda-
mi in ulla uspiam institorum taberna prostarent,
mox negavi, Capitaneum me esse, repulsam ut æ-
quo animo ferrent, illamque non tenacitati, sed
inopiæ tribuerent meæ. Ast surdo canitur fabula.
Patris excusationem tergiversationem interpretantur,
plenoque illi ore: Quam mendax, quam parcus es!
Quemen oabargek! quemen apalaic non sine utriusque
risu acclamant. Illos Caziquios asseclis abundasse,
expertus sum, qui in prædis agendis impigri, fortu-
natique, qui ab avaritiæ sordibus intacti prolixa libe-
ralitate sua omnia in contubernales effundunt suos.
Ad Kaapetraikin, & Kebachin Caziquios in paucis
celebres magni quondam siebant commilitonum con-
cursus, quia prædandi assiduitate, dexteritateque emi-
nuerunt; Extrema jam senectute decrepiti, excursio-
nibus impares, ac vel ideo inopes non nisi sanguine
propinquos suo in contubernio retinere.

Illud silentio haud prætereundum: Abipones
neutiquam recusare fœminarum nobilium gubernationem,
Britannorum veterum exemplo, de qui-
bus Tacitus in Agricolæ vita: *Soliturū quippe Britan-
nis fœminarum ductu militare.* Fuit sane, me apud
illos agente, matrona patritio genere orta, quam
Abipones *Nelaŕeyatè* nobilem gubernatricem seu Ca-
pitaneam appellabant, quæque suo in contubernio
familias aliquot numeravit. Illius originem, majo-
rumque merita honore prosequabantur Cæteri. Re-
ges ipsi Catholici, eorumque gubernatores Caziquio-
rum, cujus demum cunque nationis sint, in Ame-
rica nobilitatem agnoscunt, eosque singulos do-
mino-

minorum titulo dignantur, præfixo semper, ut apud Hispanos moris, eorum nominibus *Don* vocabulo, ut ex decretis, literisque Regiis liquet. Mos quoque per omnem, quæ Hispanici juris est, Americam obtinnit, ut Indorum Caziquii, postquam sacro fonte lustrati Regi Catholico fidelitatis dixere sacramentum, illud quale quale suum dominium, quod prius in subjectos sibi barbaros barbari adhuc dum habuere, porro retineant ipsi, eorumque poster. Quod apud Quaranos maxime observatur hac tamen lege, ut & ipsi hi Caziquii, & illorum subditi Indi pareant Capitaneo, cæterisque oppidi proceribus, qui calendis Januarii quot annis ritu Hispanico eliguntur, & a Regio Governatore confirmantur. In quovis Quaraniorum oppido Caziquii Complures degunt, quibus, si habiles sint, etiam magistratus officia sæpius deferuntur, ne Indi, Americanam nobilitatem sperni ab Europæis, suspicandi habeant occasionem. In S. Joachimi oppido, cui præfui, quinque Caziquii numerabantur. *Don Ignatius Paranderi D. Michael Yeyû. D. Marcus Quirakerà. D. Josephus Xavier. D. Michael Yazukà*, qui Capitanei (Corregidor dicitur ab Hispanis) munereungebatur annos complures. Hic in sylvis natus licet christianæ disciplinæ non tenax modo, sed & intrepidus custos fuit, ac omni laude superior. Quod sane rarum, mirumque. Experti sumus equidem passim, Caziquios plerumque plebejis stupidiores esse, & ad publica oppidi munia minus habiles. Ut ut verissimum illud: Ab aquilis non generari columbas; sæpe tamen & certum alterum: Heroum filii noxæ. Quis igitur vitio det Abiponibus, quod sæpius spreto natalium jure suffragiis Capitaneum designent suum, qui licet obscurus genere, sed virtute militari reliquis clarior. Idem factitasse Ger-

manos veteres Tacitus ait: *Reges ex nobilitate, Duces ex virtute sumunt.* De moribus German. §. 7.

C A P U T XIII.

De victus, itinerum, aliisque œconomicis Abiponum rationibus.

Feri Abipones ferarum ritu victitant. Nil ferunt, nil metunt. Nulla illis agri colendi cura. Naturæ instinctu, majorum institutione, ipsaque adeo experientia docti norunt, qui terræ, arborumque fructus, qua anni parte sponte sua proveniant, quæ feræ, quo loco suppetant, quibus artibus capiendæ. omnibus omnia istic communia. Etenim nulli, ut apud nostrates solet, territoriorum, fluminum, nemorumque domini, qui, exclusis cæteris, venationis, piscationis, lignationisque jura sibi vendicent solis. Quidquid per aerem volat, aquis innatat, in campis, sylvisque ultro nascitur, primi capientis est. Ligonem, stivam, securim ignorabant Abipones, sagitta, hasta, clava, equus instrumenta illis sunt, quibus, quidquid ad victum, vestitum, habitationem pertinet, sibi conquirunt. Cum non omnis omnia ferat tellus, cum varia variis anni temporibus nascentur, iisdem stativis inhærere diu illis haud licet. Ex loco in locum demigrant, ubi certa famis, sitisque remedia in promptu sint. Campi struthionibus, eorumque ovis copiosissimis, damu-

mulis, tigrilibus, leonibus, diverso euniculorum, animalculorumque, quæ Americæ propria, genere abundant, maxime perdicum examinibus. Fluminum majorum litora cervi frequentes, hujatibus simillimi, pervagantur. A' palustribus locis, ubi sylva in conspectu, suis scilicet elysis, aprorum innumeri greges raro absunt. Nemora præter alces, urfos formicarios simiorum, psittacorumque ingentes cateruas alunt. In annibus, lacubusque, qui omnes pisculentissimi, lupi, canes, porci aquatiles, lutræ innumera, anatum, anserumque agmina præsto sunt. Testudinum prægrandem multitudinem taceo, cum iis neque Abipones, neque Hispani Americani vescantur in Paraquaria. Statis temporibus corporum aquatilium pullos innumeros ad fluviorum ripas colligunt, & in mensæ suæ deliciis numerant. Absint hæc omnia, tot arborum fructus esculenti, mellis præstantissimi alvearia vix usquam desiderantur. Solæ diversissimi generis palmæ escam, potum, medicinam, habitationem, vestem, arma, & quid non? quærentibus suppeditabunt. Sub terra, quin & sub aqua radices nascuntur, esurientibus saltem opportunæ. Siliquæ Græcæ, quam S. Joannis panem vulgus appellat, duplex species per majorem anni partem fere superstes & cibum, & potum saluberrimum, nec palato insvavem præbet. En munificum etiam adversus eos, a quibus non colitur, Deum! En aureæ ætatis rudem imaginem! Exiguo, & prope nullo labore, quidquid ad quotidianos vitæ usus pertinet, obvium sibi vident Abipones, monetæ omnis ignari, commode tamen necessariis instructi, si pertinaciore Cœli siccitate exarescant amnes, vel desertissimis in campis ad sitim levandam sub Caracuatæ (de qua plura alio in loco) foliis latentem aquam detegent. Pomula aquei liquoris plena,

quæ peponibus similia, sub terra nascuntur, exugent, In fluvii arefacti alveo puteum hastâ cavabunt, e quo undam & sibi, & equo sufficientem, videbunt scaturire. Hispanus per has Americæ solitudines siti tabescit, quia illi vel istorum cognitio, vel patientia defuit laboris,

Vitæ subsidia cum nec uno in loco semper collecta prostant, neque longiori tempori, ac majori contubernaliū numero sufficiant, sæpius mutandæ sedes Abiponibus, ultro citroque commendum est. Nulla viarum asperitate, nullo locorum intervallo ab itinere abstinentur. Equis enim, quorum istic incredibilis multitudo, ac celeritas, iter faciunt viri, fœminæque, & quotidie, si festinare lubeat, multa terrarum spatia emetiuntur. Juvat hoc loco equi apparatus, equitationisque methodum perstringere. Frenum, quo uti solent, e cornu bubulo, quatuor lignellis craticulæ in morem transversis, duplicique loro, quod habenarum loco est, utrinque alligato componitur. Plerique jam ferreis utuntur frenis, iisque mirum in modum superbiunt, Ephippia Anglicanis, vel rectius clitellis persimilia ex crudo boum corio, juncis farto, confiunt. Nullus olim stapedum usus plerisque. A' dextro latere in equum affiliunt viri. Dextra habenas, sinistra hastam prælongamprehendunt, cui innitentes uno pedis utriusque impetu in altum profiliunt, indeque in equi dorsum præcipites delabuntur. Eadem ex equo desilientium velocitas, quæ nobis Europæis admirationi, illis in velitationibus magno usui esse solet. Calcariibus etiamnum abstinent. Quatuor pellis bubulæ veluti tabellas complicatas pro scutica adhibent, quæ equos seu novitios, seu refractarios ad cursum extimulant non quidem doloris sensu, sed strepitus, quem

quem edunt, terrore. Fœminis eadem, quæ viris, sunt ephippia, nisi quod illæ, elegantiz scilicet studiosiores, ex candida vaccarum pelle sua confici malint. Eodem, quo mares, modo divaricatis cruribus equo insident, hocque situ citra sexus sui perniciem plurium sæpe dierum itinera feliciter absolvunt. Sunt tamen, qui acerbissimos dolores, & incredibilem partus difficultatem, quam equestres Barbaræ plerumque experiuntur, huic virorum ritu equitationi tribuant. Per ejusmodi enim duris in ephippiis sessionem puellis teneris tenerum adhuc os coccygis, ossaque finitima comprimuntur adeo, ac indurantur, ut mirum non sit, matres dein in fœtu enitendo laborare plurimum, ac fere periclitari. Id ex medici per Europam clarissimi, mihi que familiaris sententia adnotandum putavi, ut Europææ fœminæ, virorum in equitationibus modo imitatrices audaculæ sibi Cavere, filiabusque adolescentulis consulere discant, quibus neque domi eadem de causa diuturnior sessio, aut durior toleranda, minus imperanda videtur. Equum inscendere dum volunt Abiponenses fœminæ, a sinistro latere Europæorum more in ejus collum umbilicotenus se jactant, indeque apertis utrinque pedibus ad ephippia, pulvino destituta, recedunt, confidentque; Nec illorum duritie, dum ad plures sæpedies iter producit, offenduntur, e quo conjicias, Abiponum cuticulam pelle bubula esse duriores, quæ scilicet quotidianis sine pulvino equitationibus dudum occalluerit. Sine ephippiis diu, multumque obequitantes Indi equi dorsum lædunt frequenter, sauciantque, quin tamen ipsi lædantur. Jam, dum cum familiis suis alio migrant, itineris rationem accipe. Uxor, præter mariti arcum, & pharetram, domesticam omnem suppellectilem suo portat equo, puta ollas,

cucurbitas, cantharos, conchas, lanei, & Gossipini filii volumina, textrinæ instrumenta &c. Hæc manticeis, quæ hinc atque hinc ex ephippiis pendunt, ex aprugna pelle confutis clauduntur; ibidem & catuli, & si quem habeat, infantulus locari solent. Præter hæc stoream grandem bene convolutam duabus cum perticis ad figendum, ubi ubi collibuerit, tabernaculum; Pellem item bubulam fluviatorum in trajectu pro cymba servitutam ex ephippiorum lateribus suspendit. Neque in viam se dabit unquam mulier, quin stipitem spatulæ instar, utrinque latum; in medio teretem, durissimo e ligno affabre factum, duasque circiter ulnas longum secum habeat; Hoc equidem ad cavandas radices esculentas, ad sternendos ex arboribus fructus, ramosque aridos foco alendo idoneos, quin & ad hostium, si qui per viam occurrant, arma, capitaque confringenda felicissime utitur. His sarcinis, quibus vix camelum parem crederes, fœminarum equus oneratus quovis in itinere incedit. sed majora audi. Eidem sæpe equo binas, ternasve seu mulieres, seu puellas infidentes videas. Non quod singuli singulis deessent equi, nam his abundant omnes, sed quod mutua confabulatione perinde, ut Europææ, mirum in modum delectentur, silentii, solitudinisque hostes juratæ. Cum equi plerique omnes, nisi assueverint, plurium sessorum impatientes sint, fœminarum sibi infidentium triadem humi sternunt illico, aut fere citra noxam, nisi quod istæ Amazones cochlearum instar per cespitem reptantes liberaliter explodantur a spectantibus, & ipsæ mutuos inter cachinnos in rusticum sonipedem eluctari denuo conentur toties, quoties excutiuntur.

Longo procedens ordine equitum fœminarum agmen a fronte, a tergo, a lateribus ingens canum, ceu satellitum, turba comitatur. Singulæ, conscenso jam equo, canes circumspiciunt suos. Vel unus e plurimis, quos habent, desideretur, illud suum, quo vocare eos solent: *Nè Nè Nè* omni vocis contentione tercenties repetent, dum omnes denique videant confluisse. Illud mihi sæpe admirationi fuit, quod, numerare cum nesciant, si vel unicus tanto ex grege absit, protinus animadvertant. Neque vitio illis danda tam anxia de canibus suis sollicitudo; His enim, cum vertagorum more in venatu damarum, lustrarum, struthionum utilem navent operam, veluti nutritiis, & prope dixeram, promissis conditis per viam utuntur. Hunc maxime in finem familia quævis permultos canes numerat, & vero nullo negotio alit. Carnis equidem incredibilis fere copia suppetit; Etenim cœsorum pecorum caput, cor, pulmones, viscera, quibus Europæi uti nōrunt, apud barbaros rejectanea sunt, & canum dapes. Ut adeo in controversiam vocari jure possit: Num canes hi venatici alimenta heris, an heri canibus debeant. Cibariorum affluentia canicularum Paraquariensium fœcunditas respondet. Vix unquam duodecim catulis pauciores, sæpe plures uno partu effundunt. Hoc propinquante serobem altissimam, ubi tuto fœtus deponant suos, pedibus fodiunt. Ad hanc portam relinquunt angustam. Descensus cum mæandris, ac flexibus tanta arte paratur, ut Cœlo quantumvis pluvio ad subterraneam hanc speluncam nihil prorsus aquæ pertingat. Cibi, potusque gratia inde prodit quotidie mater, heroque suo, suam veluti excusatura absentiam, ingemiscens adulatur prolaxis caudæ motibus; Multis a partu diebus suam denique sobolem palam ostendit.

ostentat, quin tamen ejus jactare possit venustatem; nisi rebus parvis, etiam nefrendulis, gratiam inesse dicamus. Etenim Indorum canes nullis elegantiz prerogativis gaudent. Mediocri fere sunt corpore, colore, ut apud nos, diversissimo. Nec pumilos, ut Melitenses, vel Bononienfes, neque mollossos, quales sunt laniorum; Minus canes villosi, crispique pili, pronissimi ad aquas & ad omnia dociles, usquam videas, nisi apud Hispanos, quibus ejusmodi Europæis navibus interdum adferuntur. Verum quamvis pulchritudine non emineant Indorum canes, eximia ad investigandas feras narium sagacitate, pari ad eas assequendas alacritate, vigilantia, sinceraque in heros suos propensione Europæis minime sunt posthabendi. In quavis Abiponum colonia aliquot canum centuriz cum excubent semper, formidabili, quem noctibus singulis una omnes voce edunt, ejulatu, latratuque ob quemvis levissimum motum continuo interturbatus nobis identidem somnus fuit, nunquam tamen, ne a barbaris hostibus opprimeremur repente, securitas præstita. Istorum equestris turma in coloniam sæpius irrepsit canibus universis altum tacentibus. Nemo tamen Abiponum est, qui illis succenseat; Nam magicis præstigiatorum hostilium artibus fascinos eos obmutuisse, stolidi credunt. Crederem ego Indorum canes ex canum Romanorum prosapia esse, qui Gallis in Tarpejam Capitolii rupem affilientibus, anserum tamen clangore proditis, præter morem siluerunt. Sed ignoscendum vigilantissimis bestiis, si diurna cursitatione lassatz cum bono quandoque Homero noctu dormitent. Fateor equidem me meam incolumitatem, dum per barbarorum, tigridumque insidiis obnoxia deserta toties iter facerem, canis mei vigiliis, ac custodiæ in acceptis refer,

referre, plusque mihi in illo fiducia, ac securitatis noctu fuisse, quam in centum Hispanis, Indisque viæ comitibus. His enim rhonchos trahentibus ex-
cubitor ille meus, si quid a feris periculi immine-
bat, latrando indicavit. Illud Paraquariæ felicitati-
bus adnumerandum, quod canum & quorumcunque
pecorum rabiem, atque adeo formidabilem Euro-
pæis provinciis hydrophobiam omnino ignoret. Sin-
gulare id Numinis beneficium, & inter naturæ miracu-
la connumerandum, cum istic bestię & Cœli æstuan-
tis caloribus, & diuturna siti, deficiente ad plures
leucas aqua, frequenter excrucientur; Ista equidem
alibi rabiei origo passim putantur. Verum relicto
jam denique fœminarum equitantium, canumque eas
comitantium agmine ad Abipones illarum maritos
oculos, animosque convertamus.

Sarcinis fœmineo equitatu commissis Abipones
sola hasta armati iter faciunt, ad dimicandum, si
occasio ferat, ad venandum quoque ut sint expedi-
tiores. Si quos struthiones, si damas, si cervos,
aprofve, aliam quamcunque feram si conspexerint,
equis pernicibus assequuntur, hastaque trucidant. Si,
quod cædi, edique possit, esurientibus haud occur-
rat, injecto igne campus accenditur, alto fere, ari-
doque gramine sylvescens. Sub hoc latitantes feræ
Turmatim profiliunt, & dum fugiendo cam-
pi incendium declinant, in crudeles Indorum ma-
nus incidunt, ligno, ferro, laqueo mox perituræ,
& ad focum assandæ. Desint cætera omnia, cuni-
culorum, queis campi scatent, examina jentaculum,
prandium, Cœnam dabunt. Ad ignem, ubi ubi
libeat, eliciendum nec silice illis, neque chalybe
opus est. Utrumque suppleant ligna duo palmum
circiter longa, quorum mollius alterum, alterum du-
rius.

rius. Primum illud, in medio non nihil terebratum, supponitur. Duriusculum lignum glandis instar acuminatum, mollioris foramini applicitum celerissima utriusque manus rotatione circumagitur eo fere modo, quo choceolatæ potio in spumam redigi solet. Mutuo hoc, velocissimoque ligni utriusque affricu, ac collisione ex ligno blandiore scobs, seu pulvisculi deteruntur simul, simul flammam, ac fumum concipiunt protinus; His paleas, finum bubulum, folia sicca, vel quidquid aliud manibus comminutum admovent Indi, ignis pabulum futurum. Lignum blandum, quo utuntur, jam ex arbore Ambay, jam ex arbutis caraquata, jam ex cedro, jam ex aliis sumunt; Durius vero, quod manibus circumagitur, ex Tatayî, quæ arbor materiem crocei doloris, & buxi instar durissimam, tingendis flavo colore telis aptam, moraque nostratibus omnino simillima præbet. Alii alia ligna hos in usus adhibent in meridionali, septentrionalique America, uti de barbaris Huronibus, & Iroqueis constat. In Europa quoque, ut ignem elicerent, lignum ligno terebatur olim, si Plinio fides, qui l. 16, c. 40. scribit: *Arbores calidæ morus, laurus, hedera, & omnes, e quibus igniaria sunt.* Lignum quaecunque idem præstare, suspicor. Vidimus equidem plaustra, dum longiori tempore axis a rota teritur, fricaturque, inflammari, ac denique conflagrare. Molarum rotis idem aliquando fatum erat. Vestales virgines Romæ ligno novum ignem, si prior illarum incuria extinctus, eliciuisse, scribunt. Festus in voce: *Ignis vestalium* ait: *Mos erat tabulam felicitatis materiam tamdiu terebrare, quousque exceptum ignem cribro aneo virgo in adem ferret.* Abipones, ut semper in promptu habeant, duo illa ligna suis in ephip-

ephippiis recondita ubique circumferunt, & uno vocabulo *Nednarà* appellant.

Sicubi per viam meridiari illis visum, aut noctem agere, solerter eam circumspiciunt stationem, quæ aquationis, lignationis, pabulationisque præbeat opportunitatem. Si quis infidiarum hostilium vel rumor, vel suspicio, in latebras se abdunt loci natura inaccessas, ut periculorum suspiciosi, sic in situ, qui securitatem polliceatur, deligendo versutissimi. Diceret, illos, suis cum familiis, quo quo migraverint, ubique, ac semper domi esse; Etenim, ut cochlea suam concham, sic isti storeas, quæ illis pro domo sunt, circumferunt. Binæperticæ humo infiguntur, quibus stoream duplicatam, aliquando triplicatam, ut ventum, aquamque excludat, annectunt. Ne solum, ubi cubant, ex nimbo præcipiti madesceret, ad tabernaculi sui latera canaliculum providenter fodiunt, per quem aquæ concurrentes aliorum derivantur. Equorum gregi ad pascua dimisso equam cicurem, quæ tintinnabulum e collo suspensum circumfert, fere associant; Ab illius conspectu haud recedunt; A' tigris imminente territi si spargantur per campum, ad illam redeunt subinde, ceu ad matrem; Hispani equidem *La madrina*: Abipones *Larè* eam vocant, quod matrem significat. Equis tamen pauculis compedes molli e corio injicere solent, ut ad carpendum gramen ambulare quidem, non tamen longius a tentoriis abire queant, promptique sint fessoribus, si quæ necessitas equitandi noctu ingruerit. Flumina vadi, pontis, cymbarumque expertia, qualia passim occurrunt, natando trajiciunt non viri tantum, sed & foeminae quantumvis adolescentulae. A' teneris natatui assuescunt Abipones, ut equitandi celeri-

tate volucrum, sic nandi promptitudine piscium rivales, rectius dicam, æmuli. Proles, ephippia, impedimenta reliqua pelle bubula, quæ illis pro Cymba est, transmittunt. Hanc Abipones *Natac*, Hispani *La pelota* appellant, ejusque usum in fluminum minorum trajectu sibi perinde familiarem habent. Illius structuram rudem accipe. Corium bubulum, pilosum, crudum, nullis alutariorum artibus subactum, maceratumve resectis pedum, cervicisque extremitatibus fere quadratur. Quatuor illius latera ad duorum circiter palmorum altitudinem, ut petasi solent, elevantur, & loro ligantur singula, ut in altum erecta maneant tetragoni figura retenta. Pelotæ fundo injiciuntur ephippia, aliæque sarcinulæ saburræ loco, quibus flumen trajecturus insidet in medio, habita æquilibratis cura. Uni pelotæ lateri perforato lorum funis instar innectitur, quod vel dentibus, vel manu prensat altera, altera remigans natator pelotam per flumen trahit sæviter nulla insidentis seu jactatione, seu periculo, licet fluctus perstreperant undique, a vento asperiore concitati. Natator, si ex innato aquis frigore correptis spasmis pedibus natare porro haud posset forsitan, & aquis hauriretur, pelota incolumis undarum cursu ad obviam ripam deportabitur. Si flumina latioris alvei, cursusque rapidioris superanda, natator viribus diffidens suis caudam equi ante se natantis manu altera tenet, se seque sustentat, altera pelotam ducit. Si ex me quæras, quot fluvios, quot vicibus coriacea hac navi trajecerim, ingenue tibi fatebor, me id ignorare. In tot enim, tantisque profectionibus prope quotidiana mihi fuit ejusmodi navigatio, ac non raro eodem die sæpius repetita. Primis vicibus mihi, ut Europæis cæteris, formidabilis hæc, atque adeo periculi plena videbatur; Sed crebriori mox experimento do-

doctus & me, & imaginarium periculum risi, semperque malui corio, quam titubante, semperque versatili lintre, vel cymba per quodvis flumen traduci. Si imbre in plures dies producto corium, pro pelota servitutum, madefactum, telæque instar emollitum fuerit (quod in itineribus mihi sæpe usuvenit) quatuor pelotæ lateribus, ac fundo arborum rami internuntur, quibus corium fulcitur, ac ad tutiorem fluvii trajectum firmatur. Hispanorum militum præfecti Americani natate, quamvis id sciant, nolunt, ne coram suis nudare se cogantur. Hinc adversum in litus tendentes pelotam inscendunt, quam, alienam natatoris se trahentis operam dedignati, binis arborum ramis, furcam referentibus, ceu remis impellere consueverunt.

Europæis quoque bellatoribus pelotæ usum aliquando profuturum, nil dubito, maxime in subitis adversus hostes, qui oppositam occupaverint ripam, excursionibus. Majori enim & sumptuum, & temporis compendio coria bubula, quam pontes cuprei, & cymbæ, quoquo lubuerit, transportarentur; Hæc plaustris, bestiisque indigent, illa militum humeris possunt aliquamdiu bajulari. Horum ope maximo silentio transmitti flumen noctu poterit, quod ad opprimendum hostem facit plurimum. Cymbæ enim remorum strepitu se eminus produnt hosti. Tribunus clari inter milites nominis meum de pelotæ usu consilium minime spernendum putavit. Præter alia hydraulicarum artium, quæ in bello sunt usui, spectacula corio bubulo, ut dixeram, instructo quempiam per Danubii fluctus navigantem exhibuit conferta nobilissimorum spectantium multitudine rei novitatem admiratione non minus, quam plausibus prosequente; veritus,



ne corium aquis aliquamdiu immersum mollesceret denique, ad illius firmitatem majorem pelotæ fundo per quatuor ejus latera totidem perticas ferreas, veluti subsedes inseruit. Verum, bona viri sagacissimi venia dictum sit, superflua, quin & noxia hæc illius erat industria. Præterquam enim, quod illo ferri pondere pelota magis deprimatur, corium bubulum pluribus licet horis aquis innatans parum suæ duritiei amittit. Ad fluminum Paraquariensium equidem ripas vidimus quotidie idem omnino corium transvehendis mercibus, quæ plaustra onerata veniunt, per integrum sæpe diem citra periculum adhiberi. Corium enim licet marescat in superficie, non nisi plurimarum horarum intervallo ab aquis penetratur. Novimus, clandestinos vetitarum mercium nundinatores naviculas e pluribus coriis confuisse, illorum commissuris pice nautica, vel sebo cineribus mixto diligenter perunctis, ut aquam, & periculum omne excludant. Coriaceæ hæc scaphæ præ ligneis id habent commoditatis, quod, cum mercibus exoneratæ levissimæ sint, manibus in continentem pertrahi, in propinguis sylvis, vel insulis exsiccare, ac abscondi possint, quoties, ne a speculatoriis Regionum militum per argenteum flumen navibus intercipientur, periculum sibi timent clancularii illi negotiatores. Hispanorum aliquis, cui aurum pluris, quam vita, unico vectus corio, remisque usus ex urbe Boni aeris ad coloniam Sanctissimi Sacramenti navigaverat, trajecto scilicet flumine argenteo illic quindecim circiter Leucas Lato, ut Gubernatori Lusitano nova, quæ Hispana navis attulerat, Lusitanis optabilia, solus, primusque nunciaret, amplissimam utique ab illo remunerationem expectans. Auri fames illum cæcaverat, ut trajectus periculum vel non videret, vel sperneret. Quamvis
Cælo

Cœlo sudo, aere pacato, tranquilloque flumine metam incolumis attigerit, quod tamen tanto aquarum Gurgiti, in momenta singula vicissitudinibus obnoxio, corioque imbecilli crediderit se se, temeritatis notam apud cordatiores Hispanos haud effugit, admirandusque omnibus, nemini imitandus videbatur. Hæc eum in finem à me memorantur, ut coria horris, leucisque plurimis aquæ immersa neutiquam infirmari, perspicias. Qui securitati suæ luculentius consultum volunt, pelotas duas duobus loris connectunt eo prorsus modo, quo per flumen Uruquayum lintres bini transversis trabibus copulantur. Alter enim alterum sustentat. Cæterum, an ad pontes, lintresque tenuioribus saltem in fluviis supplendos belli usibus corium bubulum aptari aliqua ratione queat, id rerum novarum machinatoribus cogitandum, excogitandumque relinquo. Fors illis arduum non fuerit, inventis seu addere quæpiam, seu demere.

Abipones grandiora etiam flumina equites ingrediuntur. Ast vado jam jam deficiente ex equo in aquas defiliunt. Equi jam natantis habenas dextra tenent, eademque remigant, Sinistra hastam largissimam, suamque, ne madescat, vestem in aere veluti suspensam complectuntur. Equo, si fluminis impetu se se abripi patiatur, colaphos identidem infligunt, ut his veluti stimulis in viam reductus designatam adversi litoris partem assequatur, quæ scilicet nec palustris, nec sylvestris, neque præaltæ nimium ripæ sit, atque adeo promptam, tutamque præbeat exscensionem. Vidisses, risissesque mecum catervatim natantes barbaros solo capite ex undis prominentes, svavissime tamen, uti alii læto in cespite solent, confabulantes. Inter illos me-

dius quoties corio infidens timenda flumina fulcavi! Periculi, timoris, meique ipsius pene immemor Abiponum meorum cum fluctibus nugantium tranquillitatem, agilitatemque & aspexi, & suspexi adeo, meis vix ipse oculis ut crederem. Illorum quemque ob tantam cum aquis familiaritatem Neptunum diceres: Quantum audeant, Europæorum fidem superat. Ex S. Ferdinandi Yaucanigarum Colonia ad urbem Corrientes profecti, quoties lubuit, ingens illud pelagus, quod ex magno flumine Paraquayo, & maximo Parana illic unitis conflatur, natantes natante cum equo Hispanis stupentibus trajecerunt. Hac enim in statione flumen propter latitudinem, altitudinem, rapiditatemque incredibilem ipsis navibus est formidabile, meque cum sociis navigantem toties terrore implevit, dum illa in Colonia degerem. Olim barbari hi prædones quoties cum longo animalium, quæ Hispanis rapuerant, agmine domum properabant, ingens hoc flumen Austrum versus, ex insula in insulam transeuntes, providenter transmiserunt, ut hac ratione singulis in insulis interquiescendi spatium & sibi, & bestiis natando fatigatis concederetur. Operæ pretium fuerit modum, quo plura equorum, mulorum, boumve millia adversum in litus per majora flumina traducantur, hoc loco explicare. Nunquam totum bestiarum agmen uno impetu, sed earum turmæ ab equitibus illarum terga prementibus, fugamque ex omni latere intercludentibus in flumen compelluntur. Ad id impetrandum aliqui binas erigunt sepes, initio latiores, in ipso litore angustiores, quibus constrictæ bestię non nisi binę, vel ternę eodem tempore flumen ingredi possint. Præmitti in aquam solent boves, equive cicures, quos abjecta tergiversatione promptius sequentur feroce. Ca-

vendum maximopere, ne impedito per compressio-
 nem nimiam pedum remigio natandi opportunitas il-
 lis adimatur, quia nimium confertis. A tergo, a
 lateribus Indi natantes, vel cymbula vesti natanti-
 bus invigilant Bestiis, ut designata ad oppositum
 litus tendant via; sibi enim relictæ secundo se defer-
 ri flumine patiuntur, & ad ea loca fluitabunt deni-
 que, quæ vel ripis arduis, vel palude, vel arboribus
 præclusa exitum negant. Si bos, si equus natans in
 gyrum circumagatur aliquoties, aquarum voragine
 mox haurietur jam sui, natatusque impos. Ad hoc
 impediendum Abipones boves seu segnes, seu refra-
 ctarios vel medio in flumine inscendunt, cornibus
 utraque manu prehensis eorum tergo insident, utro-
 que pede eorum pulsant latera, dum denique ad li-
 tus etiam inviti deducantur. Terra potiti terrore
 in furorem Converso minitabundis cornibus obvia
 quæque invadunt. Horum metu ipso in litore præ-
 altam conscendi arborem, cui incubans boves e flu-
 mine emergentes singillatim numeraveram, quippe
 Colonia nostræ usibus destinatos. Tauros feroces,
 quis credat? in tranandis fluviis semper expertus
 sum Vaccis Socordiores, quæ, quia timidiores, ma-
 gis morigeras se præbent ductoribus, majorique vi-
 rium contentione litori inhiare consueverunt. His,
 quas dixi, industriis multa boum millia me jam spe-
 ctante, jam curante fluvios majores sat feliciter tran-
 sivere, Indorum mox stomachis sacrificanda. Sæpe
 alias boves illigatis lintri majusculo cornibus natantes
 per vastiora etiam flumina transmittuntur maxima,
 quæ cogitari possit, securitate. Suspensis enim e lin-
 tris utroque latere boum capitibus eorum corpora
 nullam prope natandi sentiunt difficultatem. Hac
 ratione viginti boves singulis itineribus per flumen
 Paraguayum è prædio ad Coloniam Rosarii Abiponi-
 bus

bus a me conditam traducendos curavi per biennium. Pro lintris magnitudine boves jam plures, jam pauciores illi possunt alligari. Interdum natantium bestiarum agmen a pluribus cymbis, vel lintribus undique cingitur ita, ut a fronte præcedant alii, alii a tergo sequantur, cæteri utrumque latus stipent, impediantque, ne bestię natatu lassæ cum flumine defluant, ac a præfixo exscensione litore aberrant. Verum Abipones, his Hispanorum industriis neglectis, equorum natantium catervas natantes ipsi per quæcunque flumina feliciter transportare norunt. Hanc Abiponum in tranandis fluviis alacritatem Europæis sæpe optabam exercitibus, qui solo fluminis aliquando non maximi interjectu defensum hostem aggredi non audent, etsi cætera, si a natanti milite sine pontium, naviumque strepitu superari flumen posset, ad victoriam pronissima forent omnia. Sed quam rari eheu nantes vasto in exercitu! Insignem profecto castris Austriacis operam præstiterunt toties croaticæ copię, quæ pontibus, navibusque non expectatis natantes adverso in litore hostes, nil hostile veritos, toties oppresserunt. Infinitus sim, si trajiciendi fluminis modos, ac instrumenta, quibus veteres in bello utebantur, commemorem. Ex vegetio, aliisque, si lubet, id disces.

CAPUT XIV.

De Vestium forma, materia, ac utensilium cæterorum fabrica.

Hallucinantur misere, qui Americanos promiscue omnes sola, quam a genitrice sua acceperant, cuticula vestitos incedere, sibi persuadent. Hic error, multorum animis insitus, ex pictis, vel æri incisis imaginibus nasci videtur, dum quisunque demum Americanus Indus jam hirsuti satyri instar, jam ut cyclopum aliquis, Brontesque, Steropesque, & nudus membra Pyracmon a pictoribus, chalcographisque perperam exprimitur. Existere in America gentes omni corporis tegumento destitutas, non abnuo; Sed hanc corporum nuditatem omnibus communem esse, procul a vero abest. Quid in cæteris Americæ provinciis, quod ad vestitum attinet, moris sit, scripsere multi, & plures ex iisdem descripsere. Meum est de Paraquariis, & scilicet de Abiponibus meis, ut nunc sunt, præcipua attingere. Payaquis, barbarissimos fluviorum accolæ indumenti omnis juxta, ac pudoris nescios Indi cæteri abominantur. Egregie vestiti sibi videntur, dum variis coloribus a capite ad calcem picti, sphæralisque vitreis ornati, verius dixerim, onerati comparent. Mbayas, gentem equestrem, & impudentia Payaquis parem vidimus indumentis abundare, sed abuti; His enim conte-

gunt ea corporis, quæ omnium patere oculis tuto possunt; Patere sinunt, quæ pudor jubet velari. Abipones, ecquid de Mbayis sentirent, a me rogati: canibus eos similes sibi videri, aiebant, quia adeo impudentes. De illorum impudentia certe, impudicitis que publicis multa mihi conquesti sunt mei socii, qui illos inter versabantur. Utriusque tamen hujus nationis fœminæ eo vestimenti genere utuntur, ut verecundiæ consulant satis. Greges istorum barbarorum in urbe Assumptionis vidi frequenter. In sylvis, quas Mbae vera, Mborebiretâ alciū patriam vocant, Indos reperi pubetenus tenui velo præcinctos, cætera nudos, Indas vero, etiam infantulas, ab humeris ad talos usque tela alba, quam ipsæ texunt, decentissime vestitas. Idem in Indis sylvestribus, qui per Tapiraquay, & Yeyuy litora vagantur, observavi, dum ad S. Stanislai recentem Coloniam à sociis meis turmatim adducebantur. Inda vetula, ejusque quindecim annorum filiola, quas in sylvis Monday & Empalado fluvios inter inveneram, solo reticulo ex cannabe caraquata contexto, in quo noctu cubabant, interdum tegebantur, ut adeo eadem suppellex pro lecto illis, ac indumento, nimium sane diaphano, esset.

De Abiponibus adhuc barbaris, & qua qua luberet, ferarum instar palantibus id sancte affirmo, omnes sine sexus, ordinis, ætatisque discrimine honestissime semper, ac ritu suo plerumque eleganter vestiri. Ne paucorum quidem mensium infantulam nudam patiuntur. Hanc honestatis curam gens Hispana Paraquariæ, præsertim in Assumptionis, & Corrientes urbibus ut imitaretur, sæpe nequidquam optavimus. Adultiores etiam fœminæ immanem solis æstum cauſantes rejectis vestibus Verecundiæ quoties

ties publico in foro obliviscuntur! a sacris oratoribus non raro clam, palamque propterea reprehensæ. Vestis, qua Abipones utuntur, figuram nosse cupis? Linteamen, centonem, mappam mensæ, vel tapetem quemcunque quadri laterum sine ulla mutatione, sine manicarum additione pro veste adhibent. Telam ejusmodi quatuor laterum seu laneam, seu Gossypinam humeris injiciunt suis; Ejus extremitatem unam sinistro brachio illigant, dextro, ad quidvis agendum expediti ut sint, nudato. Laneo cingulo vestem hanc laneam, quæ variis picta coloribus Ab humeris ad talos defluit, plerumque ad calcem, infra pectus claudunt. In equum insilientes, ne denudentur, vestem compressis genibus coercent. Calceos enim, femoralia, tibialiaque omnino ignorant, vel ideo ad trananda flumina, ad cursum, equitationemque promptiores. Præter hanc, quam descripsi, vestem quæcunque aliud telæ genus tetragonum pallii instar sibi injiciunt, quod infra collum nodo connexum eos non solum contra frigus tuetur, sed & nescio, quam gravitatem illis aspergit. Hoc dum habitu equis vehuntur hastati, crederes, te Fabios, Marios, Scipiones, Epaminondas redivivos intueri. Adeo tota vestitus conformatio antiquitatem spirat. Aliquando dum arbores securi sternunt, lassitudinis metu extra aliorum conspectum vestem abjiciunt. Non nulli cum barbaris pugnaturi in arenam descendunt penitus nudi partim, ut ad tela declinanda sint eo expeditiores, quo leviores, partim ut vulnera aspernari videantur, cum plerique alii loricati pugnam ineant, ut alibi referam. Diuturnis in itineribus capite plerumque aperto imbres, cœli æstus, ventosque excipiunt. Non nulli tamen fasciam laneam rubri coloris fronti circumligant, ingens, me ipso teste, adversus solis ardores, doloresque capitis præ-

fidium. Hodie petasum Europæum, si quis illis obtingat, magni faciunt, præsertim adolescentes, quibus & Hispanorum ephippia cum stapedibus, ferrea item frena, mirum quantum, arrident. Idem vestimentum, quo viri utuntur, fœminis quoque usui est, alia non nihil ratione illarum corpori applicatum.

Hic qualiscunque Abiponum amictus mulierum opus est, ac princeps negotium. Istas profecto non assiduitas modo, sed & aviditas laboris plurimum commendat. Etenim, ut quotidiana domus negotia taceam, hæc oves tondent: Lanam in fila scitissime ducunt: Hæc coloribus variis, prout in promptu fuerint, ope aluminis eleganter tingunt: Mox telam ex illis contextunt diversissimis linearum, figurarumque ductibus, ac colorum varietate distinctam. Tappetem Turcicum crederes, nobilium in Europa mensis dignum, sed tegendis Abiponum corporibus duntaxat adhiberi solitum. Textrinx officina, &, e quibus componitur, instrumenta arundinibus, lignisque pauculis definitur, quæ complicata citra molestiam in itineribus equo circumferuntur. Alia quoque utensilia parandi ars Americanis fœminis congenita videtur. Norunt, ollas, cantharosque varix formæ ex argilla fingere non rota versatili, figulorum more, sed solis manibus. Hæc vasa argillacea non in furno, sed aperto in campo lignis circumjectis percoquunt. Nesciunt illa in vitri similitudinem lithargyro incrustare, sed rubro primum colore imbuunt, mox ad splendorem communicandum glutine aliquo nativo perungunt. Per omne, quod ab Abiponibus habitatur, territorium nives quidem nullæ omnino, pruinæ rarissimæ; Austro tamen pertinacius aspirante majorem in modum exasperatur

tur aura, ac leviter vestitis prope intolerabilis evadit aliquando. Adversus frigus pallio quodam lutrarum e pellibus concinnato se tuentur Abipones. Hoc vestimenti genus pariter tetragonum operose juxta, ac eleganter a fœminis conficitur. Illarum enim est Intris canum ope potissimum captis pelles detrahère: Detractas paxillis tenuissimis, ne rugas contrahant, solo affigere. Exsiccata dum fuerint lineis, ut in fritillo, quadratis rubro colore expinguntur. Nesciunt equidem Iadæ pelles alutariorum more macerare, concinnareque, sed manibus probe subactas, ac emollitas filo pertenni ad hujatum pellionum invidiam tanta consuunt dexteritate, ut pellium commissuræ oculum perspicacissimum fugiant, totumque pallium pellis unica esse videatur. Pro acicula spinis tenerrimis utuntur, queis, ut sutores subula corium, lutrarum pellem pertundunt, filum tenuissimum ex caraquata traduci ut possit. Ejusmodi pallium, quod a voce *Nichigebè* lutra nichigherit vocant, & viris, & fœminis commune, ridigior quoties aspirat aura; Quamvis vetuli, vetulæque has lutrarum pelles ne latum quidem unquem à se removeri patiantur, etiam dum maximis cœlum æstuat caloribus. Pauperiores aliqui cervorum, damarum, tigridumve exuviis induti comparent, Quiritum priscorum ritu, quos Propertius libro quarto: *Pellios dixit, rustica corda, Parres*. Pellium ad vestienda corpora usum populis prope omnibus olim communem fuisse, eademque cum mundo primordia habuisse quis nescit? Hunc enim morem non humano ingenio inventum, sed ipso Deo authore inductum ex libro Genes. 3. c. accepimus: *Fecit quoque Dominus Deus Adæ, & uxori ejus tunicas pelliceas, & induit eos, qui paulo ante, cum cognovissent se esse nudos, consuerunt folia ficus, & fecerunt sibi perizomata*. Tacitus certe veteribus Germa-

manis, Herodotus Afris, Arrianus Thracibus & scythiis pelles pro varietate provinciarum varias indumenti loco fuisse testantur. Homerus in Iliade 3: Heroes suos leonum, urforum, luporum, caprarum exuviis indutos nobis proponit, quamvis id ætatis laniæ, lini, quidni & serici alicujus usus jam viguerit, cum Helenam, Penelopen, aliasque tum græcas, tum Trojanas matronas fila duxisse, legamus. Americanos prope omnes, qui non omnem verecundiam exuerunt, ferarum pellibus se contexisse ad arcendum frigus, passim affirmant historici, ipsique observavimus perfrequenter. Alii avium multicolores plumas raro artificio consutas ornandi potius quam tegendi corporis gratia pellibus vel substituunt, vel addunt. Barbari monticolæ plerumque ex caraquata, vel ex cortice arboris pinô fila, atque ex his telam ad se aliqua ex parte contegendos parare consueverunt. Eadem tela, quamdiu maritum lugent, Abiponenses viduæ, viduatum crinibus caput, humerosque recepto more obnubunt. Barbari, quos Esquimaux appellant Galli, alique populi terræ laboratoris, & Novæ Zemblæ propinqui ex piscium vesica, aut visceribus indusia sibi norunt concinnare, quibus tamen ob immane frigus pallium adjiciunt, quod expellibus cervorum, vel luporum marinorum egregie pictis nitidissime consuunt, demirantibus artificium Europæis. Dum sudore diffluunt Abipones, pelles lutrarum, quippe ab alutariis non maceratæ, fateor, neutiquam balsamum, sed vix tolerabilem naribus colloquentium exhalant fætorem; Noctibus frigidiusculis eadem stragulorum subeunt vices. Harum pellium, palliorumque, usu detritorum, lacinia infantium fasciolæ sunt, ac tegumenta, quin & obligandis sauciorum vulneribus fere adhibentur, cum lineæ apud illos supellectilis nihil prorsus sit domi.

Superioribus seculis Americani corporum suorum nuditatem pluris, quam vestitum fecere adeo, ut indumenta ab Europæis obtrusa vel non acceptarent, vel accepta confestim abjecerint. Hoc memorant idonei scriptores illorum temporum. Hac tamen ætate, fidem superat, quanto ardore vestibus splendidis inhient Indi Paraquarienses. Petasum illis elegantem porrige, telæ, vel panni rubri aliquot segmenta, globulorum vitreorum fasciculum, & eris magnus Apollo; In cælum jusseris, ibunt. Diu, nocturne hæc aures nostras feriebat Abiponum supplicatio: Pater, da mihi vestem Pay! *Tachcaué bibilalk*, vel *aapar aik*. Quod ad Barbarorum conciliandas voluntates faciat magis, vestium largitione nihil est profecto; Hac, ut pisces hamo, celerrime capiuntur. Vix abundabit incolis Christianis Americana colonia, ni bobus, ovibusque abundaverit; Harum enim lana ad vestienda, illorum carnibus ad saturanda Indorum corpora opus est. Alterutrum desit, vel utrumque, ad sua redibunt latibula, ditioresque se fore putabunt, si Hispanorum inimici, quam si amici fuerint. Id quod sæpius me audiente cum gemitu dictabant, experti scilicet: Bellum cum Christianis præ pace plus emolumenti sibi attulisse. Bello equidem vigente armis acquisiverant, quæ sancta dein' pace nec infimis precibus impetrabant. Vetus hæc, ac quotidiana Abiponum querimonia, & si verum fateamur, æquissima. Luculentius id patebit ex illis, quæ, ubi de Coloniarum novarum statu differemus, narrabuntur. Disertissimus quamvis divinæ legis magister, ni una in discipulis suis vestiendis, alendisque sit liberalissimus, parum proficiet in Paraquaria. Adsit è nubibus cœlestium geniorum aliquis, Deum, Dei legem nunciet Abiponibus; vacuis si manibus venerit, si indumenta, si dapes, si
alia

alia dona non attulerit, actum aget, vix, ac ne vix quidem audietur. Veniat ex Acheronte Æthiopum Stygiorum nigerrimus, sed arcas vestibus, cibariis, cultris, forficulis, annulis, sphæruleis vitreis prægnantes adferat, offeratque, Capitaneus appellabitur, dociles, spondeo, propensos, morigerosque experietur Abipones ad unum omnes. Cur per bina, & quod excurrit, secula ad religionis nostræ amplexum necdum perducti sint Americani universi, si causas ex me quæris, dicam. Prima est Christianorum veterum pestifera exempla, ac in Indos parsimonia, duritiesque: Hac a sacris nostris avertuntur: Illis pervertuntur. Sacerdotum, qui ad illos Christum docendos mittuntur, extrema, & quæ vix credibilis Europæ, rerum omnium penuria, hæc altera causa est. Effatum hoc meum, quæso, non conjecturis, opinionibusve controversis, sed veritatibus, sed experientiis certissimis adnumerandum, putes. Tum denique mihi fidem habebis, postquam historiæ meæ posteriora capita pervolveris.



CAPUT XV.

De Abiporum moribus, consuetudinibusque.

Non omnia, quæ apud Barbaros, barbara. Ex fimo elegans sæpe flosculus, ac inter spinas rosa nascitur, ut bona mixta malis plerumque; sic Abiporum vitiis virtutes quædam consociantur, Christiano homine prorsus dignæ. Ex multis memorabo præcipuas ita tamen, ut vitiorum non obliviscar. Tota corporis conformatione quantopere decorum servant Abipones, ægre crediderit Europæus. Ex eorum vultu, ac incessu hilaris quædam, modestia, virilisque gravitas elucet, quam savi tamen comitate norunt temperare. Nihil solum, nihil petulans, vel asperum eorum in actionibus deprehendas. Quotidianis in congressibus pacata, tranquilla omnia. Vociferationes inconditæ, altercationes, aculeata dictiorum mordacitas nusquam locum habent. Amant facetias sermonis, sed a quibus omnis abest obscænitatis, acerbitasque. Diurnas, nocturnasque itineris molestias festivis confabulationibus condire solent, quin tamen, quod spurcitiâ oleret, unquam salibus aspergatur. Si quæ interdum controversia incidat, serena fronte, sedata oratione sententiam quisque profert suam; Nunquam, quod quibusdam Europæ populis solenne, in clamores, minas, contumeliasque erumpunt. Hæ qui-

quidem laudes ad Abipones sobrios pertinent; Temulenti enim, excusso scilicet rationis freno, amentes, sibi que ipsis dissimillimi evadunt. Cæterum suis in conventiculis urbanitatem colunt maxime. Alter alterum loquentem vix audet interpellare. Uni per semihoram aliquando belli eventum quempiam enarrant cæteri omnes non aures dare modo attentas, sed & ad singulas prope sententias annuere solent, ducto ex intimis præcordiis rhoncho, qui affirmationis signum, & assensus, quem identidem his interjectis vocibus significant: *Quevorken* utique *Cleerà* certissime *Chik akalagritan* nullus dubito. *Ta Yeegàm!* vel *Kem ekemar!* admirantis sunt exclamationes. Iisdem omnino vocabulis, quæ subsilientes magna vocis contentione pronunciant, sacerdoti ad populum verba facienti interloquuntur, idque urbanitatem putant. Contradicere cuicunque demum, licet luculenter hallucinanti, rusticitatem interpretantur. Salutant se, resalutantque binis vocibus: *La nauichi?* Jam venisti? *La ñauè.* Jam veni. Sed plerumque brevitatis causa solam voculam: *Là* salutans, salutatusque profert cum impetu. Idem salutandi modus *Quaraniis*: *Ereyupà?* Venisti jam. *Ayù angâ.* Veni. Prolixiori colloquio fatigati nunquam, nisi patre familias valere jussu, discedunt. Huic primus qui assidet, vicinior sibi interrogat: *Ma chik kla leyà?* Necdumne fati verborum est? Secundus tertium, tertius quartum iisdem compellat verbis, dum denique in circulo humi confidentium postremus fert sententiam: Satis jam verborum est *Kla Leyà*, ait: Quo audito uno omnes impetu, ac momento confurgunt. Mox singuli cum quadam amicitiae significatione patrem familias comiter inclamant: *Labikyegarik* Jam abeo à te. Quibus ille: *La micheroà* Jam abis à me, reponit. Gregarii Indi dicunt: *Labik* Jam abeo. Ad portam do-

domus (Putat locum, ubi exitur, nulla enim ulli est porta) dum pervenerint, converso ad patrem familias vultu: *Tamara* posthac, exclamant, *Te revisam dein* significare volunt. Uti hujatum vulgus: *Ad revidendum*, dicere consuevit sub abitum. Contra urbanitatis leges gravissime peccaturi sibi videntur, si obvium quempiam, quorsum pergat, non interrogarent. Hinc illa vox: *Miekanè* vel *Miekauchirè* quo vadis? identidem per forum resonat. Eadem interrogatio more recepta apud illos, qui lingua Quichua utuntur in Paraquaria. Obviantium sibi neminem sine illo suo: *Maipirinki* quo vadis? Transire patiuntur. unquam. Quin (scribere id me pudet) etiam remoto in campo alvi exonerandæ gratia dum subsidunt Abipones, minus transeuntes solenni interrogatione: *Miekane?* quorsum? elatissima voce salutant. Mirabat sæpè, illos non erubescere, cum cæteris in rebus singularem eorum verecundiam suspexerim. Toto certe, quod istis barbaris impendi, septennio observatum à me nihil, quo pudicæ aures, casti oculi offendi possent. Quæ quidem laus utrique sexui, omni ætati jure debetur. Mares polygamiam, uxorumque repudiationem majorum suorum, cæterarumque Americæ gentium exemplo licere sibi, arbitrantur; Perpauci tamen Abipones hanc sibi licentiam indulgent. Uxorùm repudiatio, quam multiplicatio apud illos frequentior. Quin in una per omnem ætatem conjuge acquiescunt permulti. Cum alienis, quas in conjugium non adsciverint, commercii quid habere, nefarium sibi, probrosumque putant. Hinc adulterium inter illos prorsus inauditum. Libidinum, quæ Europæis gentibus familiares, monstra huic nationi peregrina sunt, quin & ipsa earum nomina. Hilaritatem nativam vel vultu produnt pueri, puellæque; Nusquam tamen has illis immixtas videris, vel confabulantes. Re-

cens advena a Socio rogatus, patente in foro fidibus cecini. Fœminarum turba instrumenti musici, quod nunquam illis visum antea, svavitate capiebatur. Hac exciti adolescentes turmatim accurrerant. Istis propinquantibus dilapsæ mox fœminæ, ne una quidem remanente. Balneorum in propinquo flumine usus perjucundus omnibus, &, ni cœli procellosi aura rigidior terreat, quotidianus est. Ast cave, existimes: ut per æquor sirenes, Delphinique iisdem sæpe spectantur in fluctibus, sic masculos, fœmellasque in eadem lacus, aut fluvii statione natâre, lavarique. Abiponum è disciplina sexu discretos locus quoque discriminat, ac sejungit. Ubi fœminæ aquis immergunt se se, illic masculini generis ne umbram quidem deprehendas. Mulieres centenis sæpe plures uno agmine remotiores in campos excurrunt, fructus varios, radices, colores, utensilia alia conquisturæ; Quatriduum, sæpe octiduum ruri morantur, quin tamen masculum ullum seu itineris comitem, seu laboris socium, seu equorum curatorem, seu corporis sui, ferarum inter & hostium pericula, custodem sibi adfiscant. Amazones istæ sibi sufficiunt, seque, dum solæ sunt, credunt tutiores. Enimvero haud memini, fœminarum aliquam a tigride fuisse discerptam, vel a serpente ictam; Alterutro horum fato extinctos Abipones novi complures.

Barbari fuerunt Abipones, inhumani, feroces, haud nego; sed adversus illos duntaxat, quos hostes credidere suos. Antequam in Colonias a nobis condita pace nondum sancita immigrassent, cædibus, rapinis, incendiis Paraquariam prope omnem annis plurimis vexarunt; sed id jure belli integrum sibi, atque adeo honorificum existimarunt semper, quod Hispanos sibi insensos semper, infestosque vel exper-

ti,

ti, vel suspicati sunt. Vim vi repellere, injurias injuriis, rapinas rapinis, cædes cædibus reddere sibi videbatur, id quod iniquum, ac turpe negant; Nam bello vigente ab Hispanis in Lusitanos, ab his in illos eadem fieri toties videbant. Horum ducti exemplo non ficiarios se, non latrones, sed milites dici oportere, contenderunt, quorum munus est offendere hostes, se, suaque, ut poterunt, defendere. Norunt forte militem canis instar esse, illumque pro optimo habendum, qui pessimus fuerit, ut Martialis de Attalo asseruit. Hispanorum a cervicibus resecta capita sua vocarunt trophæa, solertissimeque ceu strenuitatis testimonia conservarunt. Armentorum innumerabiles turmas, tot equorum millia, & quidquid demum præterea rapuere Hispanis, prædas dixerunt belli jure obtentas. Pernegant usque, se fures esse. Andî, cur? Hispanorum pecora omnia sua esse affirmant, quippe suis in terris prognata, quas Hispani majoribus suis nequidquam repugnantibus occuparunt olim, quasque nullo (ut illis quidem videtur) jure usurpant etiamnum. Hos errores, qui intimis Barbarorum fibris in hærent, eximere, amicitiam, amoremque in Hispanos ferocientibus animis imprimere magnopere conati sumus omnes, sed fructu votis nostris inferiore. Hæreditario licet in Hispanos odio insaniverint, in ipsa tamen illorum trucidatione humanitatis quamdam speciem prodidere. Mortem inferebant, sed post feralem hastæ ictum emorientes torquere, excruciare, discerpere, dilaniareque crudeliter, ut aliorum Barbarorum mos fert, a se alienum putarunt, de mortuorum tamen capitibus amputandis mire solliciti, quorum ostentatione suam suis popularibus fortitudinem domi testificarentur scilicet. Imbelli sexui fere pepercerant; Pueros, puellasque innoxias abduxere incolumes. Infantes à matrum uberibus abstractos

fructuum, herbarumque succo per viam longissimam alere, ac citra noxam domum deportare solebant. Major hæc, quam credi in Europa possit, barbarorum lenitas, sed nobis exploratissima. Si quando vel matribus, vel prolibus mors illata, id aut adulescentes sanguinis Hispanici sitientiores, vel adulti suorum, quos Hispani olim trucidaverant, mortibus effrati præstiterunt. Hinc cæco furori, non nativo eorum ingenio tribuenda crudelitas, quam universa Abiponum natio abominatur. Sæviissent isti atrocius, si christianorum militum exempla sibi imitanda proposuissent. Ex plurimis bina in medium afferre liceat. In Indi Quaranii a se occisi cadaver petulantè dissectum, veluti in matulam, vesicam exonera- runt suam Paraquarii ex urbe Assumptionis milites- lidem cadaver alterius Quaranii, ceu lapidem suppo- fuerunt indusiis suis, quæ in fluvio Tebiouary a se lota lotoriis malleis illic tunde- bant clarissimi, si superis placet, illi heroes, contra exanimis solum, a quibus porro timendum nihil, animosi, illorumque imitadores, qui in Mauri mortui pectus hastam altissime immerfant, unde Hispanorum proverbium: *Al Moro muerto gran lanzada* Atrocioris sævitæ Europæorum per Americam militum documenta Historici passim adferunt, quæ si legerent Abipones, ab immanibus feris patrata jurarent. Quam mite illis extra bellum, quam tractabile ingenium sit, ex his, quæ subjiciam, colliges.

Hispanos, Indos, Æthiopas, vel ex his mixtos a se bellos captos non ut servos vexant, sed, prope dicerem, filiorum instar comiter, indulgenterque habent. Si quida captivo sibi præstandum velit, non imperantis, sed supplicantis voce id significat herus. *Si tibi lubueris*, blande præfatur; vel *Misereare mei*,

equum-

equumque mihi meum adducito Amamât gröböchem, vel
Grcáuagtikâm, Yañerla aböpegak tak nabörechî ena. Quan-
 tumvis tergiversantem, oscitantemve in heri obsequio
 captivum nec verbo, minus verbere plecti usquam vi-
 di. Tenerrima est multorum, ac incredibilis suos in
 captivos pietas, beneficentia, fiducia, Hos ut vestiant,
 se nudant. Cibus sibi substractum esurientes licet
 esurientibus his porrigunt. Alaykin Caziqui princi-
 pis uxor vetula Captivo suo æthiopi, me inspectante,
 equum apparavit, instravitque frequenter. Senicula
 alia Rebachigui Caziqui mater ægrotanti puero, cap-
 tivo suo lectum cesserat suum multis noctibus, hu-
 miq; jacens misere in illius obsequium diu noctuque
 excubavit. Hac facilitate, hoc gratificandi studio cap-
 tivos sibi devinciunt suos, ut, quotidiana quamvis
 præsto sit fugiendi opportunitas, de fuga ne quidem
 cogitent unquam, sorte sua contentissimi. Novi com-
 plures, qui dato pretio redempti jam, suamque in-
 patriam reducti ad Abipones heros suos sponte revo-
 larunt, quos jam ad venationem, jam ad bellum ali-
 is inferendum sequuntur, nihilque pensi habent Hi-
 spano sanguine, quamvis ipsi Hispani sint, manus
 contaminare suas. Quantus hic mihi lamentandi cam-
 pus pateret! Quot Hispani genere, a pueris apud Abi-
 pones educati, illorum ritibus, moribus, mille no-
 cendi artibus imbuti Paraquariæ, patriæ suæ, carnifi-
 ces exstiter! Quoties hi cruentis Barbarorum expedi-
 tionibus immani Christianorum cum strage conjunctis
 interfuerunt, non itineris tantum socii, sed & viarum
 duces, omnium rapinarum, cædium, incendiorumque
 participes, verbo, calamitatum publicarum instru-
 strumenta perinde, ut Lusitani, Hispani, Itali religio-
 nis sanctæ desertores piratis Algiriensibus, ac Marocca-
 nis ad intercipiendas popularium suorum naves egre-
 giam navare operam consueverunt. Corruptionem
 opti-

optimi pessimam esse, & ex vino meliori melius existere acetum hi scilicet exemplo confirmant suo.

Plurium, quos apud Abipones novi, ejus generis captivorum & vultus, & facta impia meos ante oculos versantur adhucdum, qui nocendi Hispanis studio, barbarieque Barbaros omnes antecellebant. Militibus Jacobopolitanis in chacum missis, dum meridiaturi conquieverant, Calvaria in oculos forte incidit. Multis ultro, citroque habitis interrogationibus, cujusnam illa esset? planissime compertum est; Hic loci quatuor Hispanos paulo ante trucidatos, cædisque authorem Hispanum fuisse, qui (cognomen novi, sed taceo) Abiponum captivus, & ductor, ac Abipone quovis perniciosior Hispanæ genti erat; Locus hic, quem sæpius transiveram, in hanc usque diem a sepulchris (de las sepulturas) retinet nomen. Plurima hic de hujus furfuris colluvie, de Almaráz, de casco, de Juanico, de æthiope correntino, de Joanne Josepho Indo Ytatingua, & maxime de Joanne Diaz Caëper lahachin memoranda occurrerent. Ille Abipon origine, puer ab Hispanis bello captus, & sacris Christianis initiatus est subinde. Viginti admodum annos, quos in S. Jacobi urbe Joannis Diaz Hispani Captivus egit, probus, imo & pientissimus audiebat. Ultima, quæ Pascha præcedit, verni jejunii hebdomade in tergum suum cruento flagello quot annis publice sævebat; Sed factò demum ad gentiles suos transfugio in Hispanos sævire capit atrocius, fusoque toties illorum sanguine mirum quantum apud suos inclaruìt, quibus viarum, locorumque scientissimus perutilis fuit; Nam & exploratoris, & ducis partes, dum ad Hispanos mactandos itabant, nemo unus illo præclarius egit, nemo lubentius. Inita dein cum Hispanis pace, conditoque Abiponibus conceptionis sub nomine op-
pi-

pido idem Cæperlahachin plurium linguarum gnarus interpretem ibidem egerat, quo quidem officio in rem suam abusus nullum non movit lapidem, ut Hispanorum amicitiam suspectam, Christi religionem odiosam, religionis magistros nos invidiosos redderet Abiponibus Catechumenis, energumenorum nomine id temporis dignioribus. Pietatis tamen, amicitiaeque simulatione id impetravit versipellis callidissimus, ut & Hispanis, & Abiponibus credulis mire probaretur, utrisque licet periculosus, nobis praesertim, qui eam coloniam procuravimus, undeque intolerabilis. Sed en! Pestilente filio mater erat pestilentior. Hæc, quæ vivendo seculum pridem exceßerat, præstigiaticum omnium antistita populo ut ob rugas venerabilis, sic ob magicas, quas callere putabatur, artes formidabilis nunquam cessavit adhortari suos, ut sacram ædiculam, nostras institutiones, baptismum, etiam prolibus moribundis conferendum, cane pèjus & angue refugerent, ac execrarentur. Vides matrem filio dignam, mali corvi malum ovum. Sed pœnas dedit denique vindici Deo infauſta (Medeam dicas, an Megæram, mihi perinde est) anus. Ex oppido cum contubernalium manipulo profuga patente in campo à Mocobiis præter alios complures trucidata misere occubuit. Quo fato demum, quove in loco Cæperlahachin interierit, etiamnum ignoro.

Quoquo lubet, evagandi libertas, victus, vestitusque sine ullo labore copia, equorum multitudo, otandi, lasciviendique pro arbitrio facultas, plenissima, ubi nec lex, nec censura timetur, impunitas captivos Hispanos svavissimo vinculo ita alligat Abiponibus, ut Captivitatem suam præ omni libertate dulciorem putent, patriæ, parentumque prorsus immemores, ubi, ni vapulare malint, ac inedia tabescere,

ad legum normam vivendum sibi norunt, quotidieque laborandum. Catharina nobilis ex urbe sanctæ fidei Christianæ disciplinæ vel inter barbaros tenacissima persoluto a suis pretio redempta in patriam rediit. Ejus filius Raymundus, ac filia Captivo nupta apud Abipones, ubi adoleverant, remanere, quam matrem sequi maluerunt. Plures alii, aliæque e patrio solo ad spontaneam Captivitatem gestientes rediere. Novi captivos Ingenii adeo maligni, ut liberari illis cupiverint heri, libertatemque iis gratuitam identidem obtulerint. In plerisque captivorum vestigium Christiani, quin ne hominis quidem deprehendas. Abipones perpauci, etsi polygarniam licere sibi falso persvadeant, uxores sibi plures eodem tempore adsciscunt; captivi raro una contenti captivas seu Hispanas, seu Indas, quotquot possunt, ducunt. Abiponenses enim feminæ & Hispanos, & cujuscunque demum nationis Indos conjugio dedignantur suo, nisi rerum gestarum splendore, per exterorum nempe cædes, ac rapinas, nobilitati jam pro Abiponibus reputentur. Isti, cum præ quavis alia natione nobiliores sibi videantur, captivas Hispanas nunquam sibi pro connubio volunt, minus pro clandestina turpitudine. Hinc illarum pudor in captivitate apud Barbaros, quam in libertate apud suos longe tutior fuerit, si modo Captivorum insidias evaserint. Hispanas complures post diuturnam Abipones inter Captivitatem nullius, quod castimoniam repugnet, flagitii reas sacro pro tribunali judex invenit. Uno omnes ore fatebantur: Fœminam nullam, ni ipsa id velit, hos apud Barbaros perversum iri. De adolescentum, qui ibidem diu captivi, integritate idem testor. Ecquis, amabo, Europæorum crederet, Barbarorum, qui Deum non colunt, contubernia castitatis gymnasia, & propugnacula esse?

Id mihi certissimum, morum licentiam, quæ cultiores etiam inter nationes Europæ passim grassatur, ab illis longissime abesse.

Hanc de Captivis historiæ digressionem boni consule, lector, si tamen digressio fuit, cum ad Abiponum pudicitiam, benignitatemque commendandam faciat plurimum, quod capitis præsentis est argumentum, aliis porro experimentis a me stabiliendum. Hispanos plebejos, æthiopes, Indos Christianos, qui vel ab heris suis profugi, vel viæ aberratione, vel alia de causa in Abiponum contubernia fortuito incidere, hospitio comiter accipiunt, cibo, ac quocunque possunt, officiorum genere amicissime prosequuntur. Idque eo lubentius præstant, quo liberalius isti advenæ Hispanam gentem vituperaverint. Quod si isti neglexerint, pro Hispanorum speculatoribus habebuntur, sibi que pessime consulent. Pro nostra, qui illorum colonias procuravimus, securitate vigilabant diligenter. Si quod seu ab exteris hostibus, seu a temulentis, furentibusque contubernalibus periculum nobis instare nosset, id citra cunctationem nunciaverant, ac toti erant in illo propulsando. In itineribus dum transmittendi fluvii, dum equi apparandi, dum repentinæ hostium per viam insidiæ seu declinandæ, seu reprimendæ, incredibile, quanta animi propensione nobis opem tulerint. En! quam mite his barbaris pectus, benevolentiaque plenissimum. Quamvis Hispanos, quos ceu hostes aspexere suos, jam necare, jam spoliare consueverint bello durante, suis tamen, vel quidquid eripere, nunquam solent. Hinc apud illos, quamdiu sobrios, rationisque compotes, homicidium, furtumque phœnicis instar rarissimum, melius dicam, inauditum. Sæpe, diuque a suis absunt domibus. Reçulas suas, quæ seu ad vestitum, seu ad ornatum, seu

ad domesticam penum pertinent, sine custode, sine porta omnium manibus, oculisque patentes relinquunt interea, quin jacturam earum vereantur. Reduces e diuturno itinere intacta vident omnia. Tot portæ, tot claves, tot repagula, tot arculæ, tot excubitores, quibus adversus fures sua tuentur Europæi, res ignota Abiponibus, atque adeo supervacanea, cum nulla apud eos furum seu suspicio, seu periculum. In S. Hieronymi oppido nostra e domo mantile; Alias alia domestica e suppellectili clanculum nobis sublata. De furto certior factus Ychoalay Caziquius Abiponum suorum neminem furacem esse, confidenter asseruit. Hanc suspicionis maculam ut abstergeret, genti suæ intolerabilem, nullis in fures indagandi industriis pepercit. Et vero patuit subinde, captivorum rapaci manu, quæ deerant, perivisse. In S. Ferdinandi oppido muliercula, quæ globulos vitreos, sacrae imaginis ornamenta, e templo clanculum abstulit, a Caziquio Kachirikin detecta est, ejusdem, ni Patris preces, minæque intercessissent, hasta jam jam confodienda publico in foro. Ob rapacitatis notam Abiponum nomini inustam in tantas exarsit iras Indus, cætera non optimus, nam latronum, qui Hispanorum e prædiis equos innumeros rapuerant, primipilus. Dum pueri, puellæque vel pepones nostro in horto adultos, vel pullos nostris in ædibus procreatos non raro clepsere, a furto excusari fors poterunt, quoniam ista vel primi capientis esse, vel domino non multum invito auferri, perperam existimarunt.

Naturales Abiponum virtutes etsi ultra propositum fusius exposuerim, nihil dixisse mihi videor, nisi de laborum tolerantia, quam in illis usque suspexeram, paucula adjecero. Quis belli, venatusque quotidianas molestias enumeret? In hostes profecturi men-

menses sæpe binos, aliquando ternos in asperissimo
 per solitudines itinere consumunt; Leucas trecentis
 plures conficiunt. Ingentia flumina, paludes longis-
 simas, fluminibus periculosiores, nando superant. Cam-
 pos ut latissime expansos, sic lignis, aquisque desti-
 tutos transmittunt. Dies integros ephippiis, vix li-
 gno mollioribus, insident, neque pedes stapede ful-
 ciuntur. Manibus hastæ prælongæ pondus incumbit
 semper. Equos fere tolutarios adhibent, quorum
 gressu subsiliente equitis ossa miserrime quassantur.
 Aperto plerumque capite soles ardentes, imbres effu-
 sos, non raro in dies plures productos, pulverum nu-
 bem aridjs in campis, ventorum turbines excipiunt.
 Lanceis fere vestibis nudo corpori appressis teguntur,
 quas si Cælo nimis caloribus æstuante ad umbili-
 cum usque demittant, pectus, scapulæ, brachia a
 circumvolitantium muscarum mordacium, tabano-
 rum, vesparum, culicumque examinibus miserandum
 in modum compunguntur, ac sanguine diffluunt.
 Viatico vacui cum iter aggrediuntur semper, circum-
 ferendi illis toto die per campum oculi ad feras de-
 tegendas, quas pernici mox cursu insequantur, ster-
 nant, & in famis suæ remedium convertant denique.
 Poculo cum careant, ad fluminum, lacuumve mar-
 gines noctem agere solent, inde molossorum ritu a-
 quam sorbillaturi. Verum hæc aquationis opportu-
 nitas caro illis constat; Nam loca humidiora non
 culicum modo, ac serpentium, sed & ferarum metu-
 endarum seminaria esse consueverunt, quæ noctes in-
 somnes & vitæ discrimina minantur. Duro in solo
 sub Jove jam frigido jam igneo cubant, sæpeque,
 dum nimbo fœta tempestas irruit, aquis immersi evi-
 gilant. Exploratorum munere, quorum est videre
 omnia, a nemine videri, quoties funguntur, pedi-
 bus, manibusque per rupes invias, per saltus illis

reptandum frequenter, ne prodantur; dies, noctesque sine somno, sine cibo transigendæ. Idem iis usi veniunt, dum clade vel illata vel accepta ab hoste terga premente diutius præcipitanda est fuga. Hæc agunt, hæc tolerant Abipones, quin tamen in querelas prorumpant, vel concitata bilis indicium verbo præbeant unquam Europæorum more, qui ad levissimum molestiæ sensum stomachari, ira accendi, furere, & si superos flectere nequeant, Acheronta vocare solent. Multis, arduisque in itineribus Abipones Comites, adjutoresque habui. Ipse communium viæ miseriæ participes, sed & patientiæ egregiæ illorum testis, ac præco fui. Enimvero obstupui, ab his barbaris quotidianas itinerum asperitates silentio concoqui, fronte serena, ridente ore, placidis oculis tollerari, facietis, colloquio hilari sitim, esuriem, elementorum inclementiam mitigari, dum meam interdum patientiam prope fatiscere, certe fatigari advertissim. Fieri posse credam? (Eques Equitibus ajebam sæpe) ut equorum, quos olim Hispanis rapuistis, causa, a sole torreri, a culicibus dilaniari, aquis immergi, calamitatibusque aliis excrucii vos fiveritis? Ego sane, si quidquid uspiam equorum est per Americam, mihi obtingeret, hujus spe lucri neque aculeos culicum, quos hodie sensimus, mihi perferendos putarem. Risere hæc Abipones. Quod a nobis patientia dicitur, illis natura esse videtur. Obdurato sunt ad molestias quasunque animo, quin & corpore, quod per longum a pueritia usum prorsus occalluit, sensus propemodum experte. Adeo a teneris assvescere multum est. Adhucdum pueri, patrum exemplo, pectus, brachiaque spinis acutissimis pertundunt sua citra ullam doloris significationem. Inde est, quod adulti vulnera sua, ceu aliena, sine gemitu ferant, & per aliorum commiserationem mag-

nam

nanimitati suæ injuriam fieri arbitrentur. Acerrimus etiam dolor ægroris, vel faucibus vitæ usum adimet forsitan, suspirium extorquebit nunquam. Gloriæ titillatio, quam ex fortitudinis fama percipiunt, illos invictos reddit, ac tacere jubet.

Pleraque, quæ celebranda hic putavi, & viris, & fœminis sunt communia ita tamen, ut hæc tum virtutibus propriis clareant, tum nævis singularibus laborent. Suos uterque sexus patitur manes ubique gentium. Universis Americæ populis innasci videtur desidia, otiandique libido. Hanc vituperationem in Abiponenses fœminas neutiquam cadere, lubens pronuncio. Qui earum sedulitatem indefessam, solertiam, industriamque non demiraretur mecum, nemo fuit. Negotia domestica, quibus obruuntur quotidie, alacri, propensoque animo pertractant. Illorum est indumenta marito, liberisque contexere; Carnem coquere: Radices edules, varias e sylvis fruges adferre: siliquam Græcam conquirere, molere, & affusa aqua in potum convertere: Aquam, lignaque ad quotidianos familiæ usus comportare. Ridiculus, sed apud Abipones civitate donatus mos fert, ut vetula totius contubernii maxime annosa domesticis omnibus de aqua prospiciat. Hæc, etsi annis, unde hauriatur, propinquus sit, amplis cantharis equitando fere adfertur; Eodem modo ligna ad alendum focum. Fœminas trecentis curis occupatas licet nunquam audies de molestia conquerentes; Imo, quod lana, gossypium, coleres, alumen ad vestes pro suis elaborandas sibi desint, lamentantes sæpius audiui. Adeo non tolerantes modo laboris sunt, verum etiam sitientissimæ. Hispano nobili Abiponensis captiva pro ancilla plures annos fuit; Istam præ tribus aliis sibi utiliore esse, mihi affir-

mavit, maximique a se fieri, quod jussu prævertat suum, tempestive, curate, promptissimeque officio fungatur. Honorificam *devoti feminei sexus* appellationem omni jure sibi vindicant. vix audito Campanæ vocantis tinnitu ad explanationem Christianorum dogmatum celerrime convolant, humique modeste confidentes in templo arrectas, avidasque Sacerdoti docenti aures præbent. Mirifice probant Christi legem maxime, quod per eam nulli liceat marito conjugem repudiare suam, aut plures ducere. Hinc & se, & suos maritos ut quamprimum salutaribus lustremus undis, peroptant ardentem, quo de conjugii sui, ac mariti perpetuitate redderentur certiores. Istud de fœminis junioribus dictum puta; Vetulæ enim, quippe superstitionum tenacissimæ, rituumque barbarorum antistitæ, Christianis Sacris impense oblectantur. Hæc equidem si Abiponum natio amplectatur, se se amissa veteri autoritate omnibus risui, contemptuique futuras, prospiciunt. Uti fœminæ seniores, sic adolescentes Abipones religionis progressibus obstant maxime. Isti equidem militaris gloriæ, prædarumque ardentes desiderio secandis Hispanorum cervicibus, eorum plaustris, prædiisque spoliandis perditissime inhiant, quod divina sibi lege interdictum nôrunt. Hinc avorum suorum institutis inhærere, equis velocibus terras percurfare malunt, quam templi inter parietes verba facientem Sacerdotem auscultare. Si per Abipones seniores, junioresque fœminas stetisset, universa dudum natio religioni se nostræ mancipasset.

De fœminarum Abiponensium pudicitia variis jam locis honorifica a me mentio facta est, faciendæ sæpius dein. Nefas sit, illarum temperantiam, sobrietatemque silentio præterire. Multo illis sudore con-

constat, maritis suis jam ex melle, jam e filiquis Græcis dulcem potum parare; Sed hunc ne extimis quidem labris delibant ipsæ, ad solius aquæ haustum per omnem ætatem condemnatæ. Verum utinam, ut a temeto quovis sibi cavent, sic & jurgiis, contentionibus, rixisque abstinerent! Hæ certe inter illas quotidianæ sunt, ac non raro cruentæ futilissimis de causis. De rebus nihili plerumque disceptant, rixanturque, ut Horatius ait, de lana sæpe caprina, vel de umbra asini. Unicum sæpe vocabulum, quod a Cavillante fœmina enunciat, ingentis belli semen, & classicum fuit. Tribus duntaxat, ut cum Græcis loquar, scommatibus Abiponum natio utitur, scilicet irascens alter alteri dicit: *Acami Lanâraik* tu es Indus, id est, plebejus, ignobilis. *Acami Liebie-gâraik* tu es pauper, miserabilis. *Acami Abamraik* Tu es mortuus. His epithetis ineptissime abutuntur aliquando. Equis non rideat, dum equum fulminis instar fugitantem, quem eques Indus cursu citatissimo assequi laud potest, *abamraik* mortuum audit vocari? orta duas inter fœminas contentione altera alteram vel miserabilem, vel plebejam, exanimem forte pronunciat. Ingens mox vociferatio existet. A verbis ad pugnos venietur. Concurret universum fœminarum agmen in foro, non spectandi solum, sed & ferendæ opis, ut visum fuerit, gratia. Hæ illius, istæ alterius partes tuebuntur. Duellum denique in bellum desinet. Tigridum more dentibus in aliena ubera involant, morfu sæpe cruentissimo. Unguibus genas laniant. Crines manibus evellunt, & quod prima fere aggressione conantur, auriculæ extimæ foramen, cui spira ex palmæ foliis ornatus gratia inferitur, miserrime dilacerant. Erebi furias, amphitheatri Romani feras, vel gladiatores ad certamen crederes concurrisse.

Quam-

Quamvis maritus conjugem, Pater filiam sanguine diffluere, vulneribus impleri videant, eminus immoto pede, tacito ore, quietis oculis hæc spectant; Amazonibus applaudunt suis: Rident: Animis muliebribus tantas inesse iras, mirantur, sed a viro alienissimum putant, foeminarum in dimicationes se se ingerere, vel alterutri parti suppetias venire. Quod si pacis accelerandæ spes nulla affulgeat, Patrem adeunt. En! ajunt, mulieres nostræ rursus judicio carent hodie. Age, sclopeto illas terreto. Hujus fragore, quin & conspectu solo perculsæ ad sua fugam maturant tentoria. Verum cum dictæ, quæ rixarum origo extiterant, vel suis e tentoriis stentoria repetant voce, neutraque videri victa velit, iterum, iterumque ad forum reduces pugnam restaurant. Magnæ interdum molis erat motos componere fluctus, cum paucis plerumque syllabis colonix malacia interrumpatur. Divino utique factum consilio, quod Abiponenses foeminae temeto prorsus omni abstineant. si enim sobriæ tantum furere solent, temulentæ quantum non auderent? Actum erat dudum de universo Abiponum genere. Mares enim, ni ebrii sint, æternam inter se pacem colunt, vociferationis, discordiæ, rixarumque semper hostes. Cætera, quæ ad nationis istius ritus, moresque pertinent, seu laudibus, seu censuris digna, per historiæ decursum suo quæque loco attingam. Ex his, quæ diximus, conjicies, multa barbaris propria Europæorum etiam cultissimorum imitatione digna videri. Parum sane abest, quin clarissimo Leibnizio assentiar, qui in præfatione ad novissima Sinica scripserat: *Certe talis nostrarum rerum mihi videtur esse conditio, gliscen-
tibus in immensum corruptelis, ut propemodum necessarium
videatur, Missionarios Sineusum ad nos mitteri, qui Theo-
logia*

logiæ naturalis usum, praximque nos doceant, quemadmodum nos illis mirrimus, qui Theologiam eos doceant revelaram. Mutato nomine de Abiponibus idem dixerò, qui, etsi quibusdam in rebus tales sint, ut vix hominum classi accenseri mereantur; Reflexis tamen in quasdam illorum actiones oculis fateamur, necesse est, Christianum etiam hominem ex illis comitem, honestatem, tolerantiam, sedulitatemque discere posse. Sed utinam hæ barbarorum virtutes totidem vitiis non obscurarentur, quot nigris maculis candidæ tigridum pelles distinguuntur. Ex iis, quæ mihi porto memoranda restant, illud luculenter patebit.

C A P U T XVI.

De Abiponum lingua.

Multitudo linguarum, ac varietas, quarum vel sola in Paraquaria usus, fidem excedit, prope dixissem, & numerum. Neque sola eas dialecto differre, existimes velim. Pleræque ipsa radice a se discrepant. Suspiciendum magnopere illarum artificium multiplex, cujus architectos, ac inventores stupidissimos hos Barbaros exstitisse, nemo sanæ mentis sibi persuaserit. Ego sane hac meditatione ductus identidem affirmavi, reliqua inter, quibus de æterno, ac sapientissimo Numine convincimur, argumenta hanc linguarum seu varietatem, seu artificium con-

numerari oportere. Nostri homines linguis omnino quatuordecim totidem Paraquariæ nationibus sacram navarunt operam, & religionem latissime propagarunt. Non singuli omnes, sed singulas calluere linguas, aliqui binas, ternasve probissime nôrunt, variis scilicet cum populis aliquamdiu versati. Horum ego ex numero, quippe qui septem annos Abiponibus, undecim Quaraniis docendis insumpserim. Nationes, quibus labor noster impensus, constitutæque a nobis coloniz, noveris esse, Quaraniis, Chiquitos, Mocobios, Abipones, Tobas, Malbalaes, Vilelas, Passaines, Lules, Isistines, Homoampas, Chuni-pies, Mataquayos, Chiriguanes, Linguas seu Quay-curus, Mbayas, Pampas, ferranos, Patagones, Yarôs. His adde: linguâ Qvichuâ, quæ toti Peruvio propria, mancipiis Africanis, plebi Hispanæ, quin nobilioribus etiam matronis per Tucumaniam præsertim familiarissima, nostrorum hominum plurimos tum e suggestu, tum sacro in tribunali usos fuisse. Præterea Chiquitorum in oppidis, quæ diversissimis conflata e nationibus, diversas quoque linguas viguisse, novimus. Abiponum, Mocobiorum, Tobarum linguæ eandem certe originem, eamque inter se affinitatem habent, quam lingua Hispanica, & Lusitana. Quælibet tamen istarum non sola dialecto, sed innumeris quoque vocabulis ab alia discriminatar. Idem prope sentiendum de lingua Tonocotè, quæ apud Lules, ac Isistines usu recepta. Chiriquanarum, Quaraniorumque, quorum terræ quingentas facile leucas ab illorum solo distant, lingua eadem fere est, pauca si excipias, quæ alterutrius gnarus paucas intra hebdomadas nullo negotio perdiscit.

Multi, qui de Americæ rebus commentati sunt, Europæi quasdam linguarum Indicarum lacinias, notiones, sententiasve historię suæ, vel lexicis inspersere; sed superi boni! quam omni ex parte mancas, quam fæde corruptas. Vix vocabuli literulam, quam non mutilassent, reliquere. Lingua illius quamvis scientissimi, quid dictum velint, divinando solum, veluti ænigmata, vix denique assequimur. Sed ignoscendum his scriptoribus, quod corruptis fere e fontibus notitias hauserunt suas. Plures, qui Americam vix a limine salutarunt, vel Americanos per transfennam duntaxat viderunt, barbararum mox linguarum vocabula in chartas conjiciunt, Europæis obtrudendas, quamvis nec illorum sonum rite perceperint, neque significationem penetrarint. Inde est, quod locorum, fluminum, arborum, plantarum, animalium nomina Americana miserandumque in modum castrata tot in codicibus circumeant, ut sine risu legi a nobis nunquam possint. Pueri Hispani vel cum pueris Indis confabulando quotidie linguas Indicas velocissime, felicissimeque combibunt, quod tamen adultioribus longi temporis, improbi laboris negotium esse solet. utrumque experti sumus. Novi confirmatæ jam ætatis homines, qui, quamvis annos complures Indorum consuetudine usi, quot syllabas, totidem prope errores pronunciarunt. Arduum est Europæo, & aures, & linguam peregrinis, distortissimisque vocibus assuefacere, quas Barbari jam lingua sibilando, jam naribus rhonchissando, jam dentibus stridendo, jam gutture strepitando enunciant adeo obscure, festinanterque, ut non hominum colloquentium verba, sed anatum in lacu garrientium voces audire tibi videaris, nullumque literarum vestigium vel attentissimus deprehendas. Dudum optaverant viri

eruditi, ut tandem esset unus aliquis, qui linguæ Americanæ cujuscunque gnarus ejus systēma, anathomē, totam denique œconomiam enucleatius exponeret. Ipsissimum est, quod ad implenda istorum vota compendio tractandum aggredior de Abiponum lingua. Hujus argumenti lectionem si fastidias lector, haud tibi succensebo; Nam & ejusdem scriptio mihi fastidio fuit. Scripsi tamen, eruditis, ut quidem opinor, gratificaturus. Rudibus, qui Grammaticæ partes, regulasque ignorant, sva-deo, ut paginas Barbaris vocabulis asperas transiliant omnino.

Americanorum plerique quibusdam carent literis, quibus Europæi utimur; utuntur quibusdam, quibus caremus. Frequentissima apud Abipones litera, quam Europæi nescimus, sonum ex R. & G mixtum habet. Ut rite enunciatur, palato allidenda tantillum lingua, simul guttur versus est retrahenda illorum more, qui naturæ vitio literam R balbutiendo proferunt. Ad hanc Abiponibus peculiarem literam significandam R. vel G pro arbitrato scripsimus, sed nota aliqua insignitam. Sic *Laetārat* filius. *Achibirāik* sal. *Nelaŕeyŕat* Capitaneus, Caziquiŭs. Pluralis numerus illud ꝑ in K. commutat. sic *Laekāte* filii. *Nelaŕeykatē* Capitanei, Caziquii, Nobiles. Multum negotii façessit Europæis literæ hujus pronuntiatio, maxime, si eodem in vocabulo crebrior recurrat. uti: *Raŕegrānŕaik* Indus Vilela. *Rellaŕanŕaŭ* porro Venatur equos sylvestres. *Lapŕiŕarŕaik* Versicolor. &c. Vel ex hujus literæ pronuntiatione, quamvis cætera linguæ suæ scientissimum Europæum Abipones cognoscent, & a gentilibus distinguant suis haud secus ac Capite 10. Libri Judicum, Versu sexto Galaaditæ Ephraimitas unica ex litera digrovere,

cum

cum isti verbum *Sibboleth* solum per S, idest, per D Samech; Illi vero *Schibboleth* per S & C, idest, per V Scim proferrent.

Adhibent Abipones Gallorum, Hungarorum, Germanorum more ö, quod tamen per ë duobus punctis notatum scribere maluerunt Hispani in Paraquaria. *Abëpegak* equus. *Yahëc* vultus meus. K Græcum illis frequens. N perinde ut Hispani pronunciant, N litteram J subjungendo. Sic *Español* Hispanus quasi ut *Espaniol* proferendum. Abipones dicunt: *Menerañi* est intus. *Yoamcachiñi* Inferior pars bona est. Legitima hujus, aliarumque literarum enunciatio viva voce duntaxat explicari rite-potest.

Accentuum, punctulorumque religiosissime habenda est ratio. Idem enim vocabulum punctulo omisso, variatõe accentu aliud atque aliud denotat. Sic: *Heët* fugio. *Heët* loquor. *Háten* despicio. *Háren* collimando attingo. Vocabulis longioribus, quæ ex decem, ex viginti, ex pluribus literis componuntur, hæc lingua abundat. Ubi deprimenda vox, ubi tollenda, accentus eodem in verbo repetiti docent. Fere enim modulata, ac cantatrix est gentis hujus locutio. Ad condiscendam pronunciationem soli accentus vix sufficiunt. Notas musicas singulis syllabis adjicere, supervacaneum haud foret, nisi vox viva magistri hanc industriam suppleverit. Juvat exempla accentuum adferre. *Hamihégemkiñ*. *Debáyakaikin*. *Raregrágremañachiñ* *Oabérkaikin*. Nomina sunt Abiponum. *Gréauagyégarigé* Miserere mei. *Oabáyegalgé* libera me. *Hapagrañútapegetá*. Vos mutuo docetis. *Nicauagrañtápegaralgé* Intercedo pro te. *Hemokáchiñútápegioá* Tu me laudas. En viginti literarum verba! Monosyllaba haud multa deprehendas.

Proceri Abipones vocabula amant longiora, sibi scilicet similia.

Genus habent masculinum, & foemininum, Carent neutro. Generum cognitio solo usu comparanda est. *Grabaulai* Sol illis foemininum est, ut Germanis *Die Sonne*. *Grauek* Luna masculinum, ut nobis *Der monde*. Adjectiva aliqua utriusque sunt generis. sic: *Naà* malus, & mala. *Neeu* bonus, & bona. In aliis quodvis genus propriam habet terminationem, sic: *Ariak* bonus, præclarus. *Ariayè* bona, præclara. *Cachergaik* Vetulus. *Cachergayè* Vetula.

Nomina neutiquam per casus immutantur. Littera nomini præfixa interdum casum indicat. Sic: *Ayim* ego. *M' ayim* mihi, *Akami* Tu *M' akami* Tibi.

Nomen pluralem e nominibus formare, perquam arduum tyronibus. Tanta enim est varietas, regula statui vix ut queat. En exempla aliquot!

*Singularis.**Pluralis.*

Laetarāt filius

Laetkatè Filli

Lekāt metallum

Lekachì Metalla

Ahēpegak equus.

Ahēpēga Equi

Yúihák Bos

Yúihà Boves

Nekététāk anser

Neketéterì anseres

Oachígranigà cervus

Oachigranigal cervi

Iníerā flos siliquæ Græcæ,

Iniegari flores, vel anni.

vel annus

Neogà Dies

Neogotà Dies

Eergfaík stella

Eèrgfaìè stellæ

Aapaiaik Tela linea, vel
lanca.

Aapaiaikà telæ

Yapòt Magnanimus

Yapochì Magnanimi

Lachaogè Rivus

Lachaokè Rivi

Letèk folium arboris

Letegkè folia

Ketèlk Mulus

Ketelra Muli

Panà Radix

Panarì Radices

Ìibichigì Iratus.

Ìibichigerì Irati.

E pauculis his patet, in eandem licet literam
desinentia nomina diversissimos plurales habere. Cz-
terum ut Græci præter pluralem numerum Dualem
quoque adhibent, quo duo duntaxat explicantur;
sic Abipones duplici Plurali utuntur, quorum primus
uno plures, alter, plurimos significat. Sic: *Foalè*

vir. *Joaleè*, vel *Joaleèna* viri aliquot, *Joaltripi* viri plurimi. *Abèpegak* Equus. *Abèpega* Equi aliquot *Abèpegeripi* Equi plurimi.

Miror, Abipones plurimorum Americanorum more non habere duplex verbum, quo primam personam Pluralis numeri *Nos* exprimant. Sic Quarantii duplici modo ly *Nos* proponunt; Jam dicunt *Nandè*, jam *ore*. Primum vocant *inclusivum*, alterum *exclusivum*. Suis in precibus Deum alloquentes ajunt: *Nos* peccatores *ore angaypabiya* quia Deus a numero peccatorum excluditur. Hominibus colloquentes: *Nande angaypabiya* nos peccatores ajunt, quia hi, quibuscum loquuntur, pariter peccatores sunt, & hinc vocabulo inclusivo; *Nande*, utuntur.

Cum nominibus possessivis, *Meus*, *Tuus*; *Suus* Careant, id quovis in nomine per additionem, vel mutationem literarum variam suppletur, quod & linguis Hebraicæ, Hungaricæ, variisque Americanis usu venit. Major apud Abipones ob tantam mutationis literarum varietatem inde nascitur difficultas in secunda persona maxime. Exempla accipe. *Netà* Pater indeterminate. *Yità* Pater meus. *Gretay* Tuus. *Letà* Illius. *Gretà* Noster Pater. *Gretay* Vester. *Letai*. Illorum.

Naetarat, filius, quin, cujus sit, exprimatur. *Yaeirar*. Meus filius. *Graetfachi* Tuus. *Laetirar* Illius.

Nepèp. Avus maternus. *Yepèp*. Meus. *Grepepè* Tuus. *Lepèp*. Illius.

Naal Nepos. *Yaal* Meus. *Graali* Tuus. *Laal* Illius.

Naal

Nenàk frater natu minor. *Yenàk* Meus. *Grenarè*
Tuus. *Lenàk* Illius.

Nakirèk Sobrinus *Nakirèk* Meus. *Gnakiregi*
Tuus. *Nakirek* Illius.

Nobeletè. Hastile Lanceæ. *Yohéletè*. Meum.
Groheliqbi Tuum. *Lobeletè* Illius.

Natatra vita. *Yatatra* Mea. *Gratatre* Tua. *Latatra*. Illius.

Verum hæc sufficiant ad demonstrandam secundæ cumprimis personæ multiplicem variationem. Apud Quaranos Possessiva pariter nominibus affixa quidem, sed nil prorsus difficultatis adferunt, quoniam eadem omnibus in verbis per personas mutatio. Sic: *Tuba* Pater. *Cheruba* Meus. *Nderuba* Tuus. *Tuba* illius. *Guba* suus. *Tay* filius. *Cheray* Meus. *Nderay* Tuus. *Tay* Illius. *Guay* Suus. *Che* primæ. *Nde* secundæ præfixum quibuscunque demum nominibus, nunquam variatur. In plurali perinde, *Nande*, vel *Oreruba* Pater noster. *Penduba* Vester Pater. *Tuba*, vel *Guba* Illorum vel suus Pater, generatim in aliis omnibus substantivis hæ particule possessivorum supplent vices.

Peculiarem in possessivis nominibus animadversionem Abiponum accipe. Si quam rem videant, ejus Dominum ignorent, interrogaturi: *cujus est hoc?* Alio, atque alio verbo id præstant. Si enim res, ejus dominum nosse cupiunt, animata sit (etsi anima solum vegetativa gaudeat) Ut triticum, equus, canis, captivus &c. dicunt: *Cabami lelà?* ejus possessio est hoc? Respondebit alter: *Ylà* mea. *Grelè* tua.

Lelà illius. *È* contrario si res inanima fuerit. E. G. *Haſta*, *veſtis*, *cibus* &c. ajunt : *Kabamì kalàm ?* Cui hoc eſt proprium? Reponetur interroganti : *Aimè* mihi. *Karamì* tibi, *Halàmè* illi, *Karamì* nobis &c.

Pronomina primarum, & ſecundarum perſonarum nullis ob locum, vel ſitum mutationibus ſunt obnoxia. Sic : *Aym* ego. *Akamì* tu. *Akamè* nos. *Akamì* vos, Si *Solus* addatur, hac ratione inflectuntur : *Aymàtarà* ego ſolus, *Akamàtarà* tu ſolus. *Akamè* àkalè nos ſoli.

Pronomen vero tertiæ perſonæ : *Ille*, *is*, *iſte* pro ratione ſitus, in quo eſt ille, de quo ſermo, varie mutatur. Si enim ille, de quo loquor

	<i>Maſcul. Ille.</i>	<i>Fæmininum Illa.</i>
Eſt præſens dicendum :	<i>Eneha</i>	<i>Anahà</i>
Si ſedet :	<i>Hìniha</i>	<i>Hànìha</i>
Si jacet :	<i>Hìriha</i>	<i>Hàriha</i>
Si ſtat :	<i>Hàraha</i>	<i>Hàraha</i>
Si ambulat, & videtur :	<i>Ehahà</i>	<i>Ahaha</i>
Si non videtur :	<i>Ekaha.</i>	<i>Akaha.</i>

Ille ſolus variis item modis enunciatur

Si ille ſolus ſedet, dicendum :	<i>Yñitara</i>
Si jacet :	<i>Iritara</i>
Si ambulat :	<i>Ekàtara</i>
Si abeſt :	<i>Ekàtarà</i>
Si ſtat :	<i>Eràtara.</i>

Comparativum, & Superlativum gradum non additione Syllabarum, ut cæteræ paſſim linguæ, ſed aliis modis explicant. Hanc ſententiam : *Tigris* pejor eſt

est cane, sic efferet Abipon: *Canis non est malus, quamvis tigris jam mala sit. Nētegink ebik naà, oágan nibirenak la naà.* Vel hoc modo circumscribet: *Canis non est malus, ut tigris. Nētegink chi chi naà, yágam nibirenak.* Si dixeris: *Tigris est pessima*, Abipon dicet: *Tigris supra omnia est mala Nibirenak Lamerpēēhoge Kenoōoge naà.* Vel sic: *Tigris est mala, ut nihil habeat aequale in malitia. Nibirenak chit keoà naà.* Interdum elatiore solum voce superlativum, vel quaecunque eminentiam exprimunt. *Ariaik* pro ratione pronunciationis rem jam mediocriter bonam, jam optimam significat. Si toto pectoris impetu, voce elata, & in acutum sonum desinente pronuncietur, superlativum denotat; Si voce sedata, & depressa, positivum. Maximopere sibi rem aliquam placere, vel probari ostendunt, dum has voces: *Là naà!* *Ariaik*, vel *Eúcnék* præmittunt. *Jam est malum! Pulchrum hoc, vel præclarum est!* *Nehaol* Noctem significat. Si voce acutiori, cumque pectoris impetu exclament: *Là nehaòl.* Jam est media, provecta, concubia nox; innuere volunt. Si leniter, & veluti oscitanter dicant. *La nehuòl* noctem primam nunc incipientem indicant, Videant aliquem sagitta scopum attigisse, sine cunctatione tigridem obviam stravisse &c. dumque istum dexteritate eminere significant: *La yáraigè.* *Jam scit.* Voce alta exclamant. Quod maximi præconii instar apud illos,

Diminutiva effingunt adjiciendo ultimæ nominis syllabæ: *Avàlk. Aole*, vel *Olek*, sic: *Abepégak* Equus, *Abēpegeravàlk.* Equulus, *éénék* Puer, *éénékavàlk* puellus. *Haáye* Puella. *Haayáole* Puellula, *Paý* Pater, quo nomine, a Lusitanis in Americam in vecto, Sacerdotem compellant. *Payolek* Paterculus, quo insigniorem benevolentiam in nos expressere,

Ira-

Irati non nisi: *Pay* vocabulo utebantur. *Käepak* lignum *Käeperáole* lignella, quo nomine Rosarii Mariani globulos affecere. *Lenechi* parvus, modicus. *Lénechiólék*, vel *Lenechiavalk*. Diminutivis creberrime utuntur, quibus jam tenerum amorem, jam contemptum alterius indicant. Sic: *Yóale* vir, homo. *Yoaleólék*. Homunculus. Frustum hominis. Sæpe apud illos diminutivum præ omni superlativo luculentior amoris, vel laudis significatio est. Sic equum strenuum, vel cæteris elegantior *Abépegeraválek* blandientes appellant. Hispani quoque animi sui propensionem significantius produnt, dum dicunt: *Bonito*, quod est diminutivum, quam dum dicunt: *Bueno*, quod bonum, vel bellum significat. Idem quibusdam in rebus Germani diminutivorum usu præstamus non raro.

Americanæ gentes pleræque Numeralium nominum sunt egentissimæ. Abipones non nisi tres numeros vocabulis propriis norunt exprimere. *Íñitára* unum. *Íñoaka* duo. *Íñoaka yekaini*. Tria significat. Reliquos numeros miris industriis suppleant. Sic: *Geyenk ñatè* digiti struthionis, qui, cum tres anteriores, unum aversum habeat, quatuor sunt, & pro hoc numero exprimendo illis serviunt. *Noënbalek* pellis pulchra, quæ scilicet quinque colorum maculis distinguitur, ad significandum quinque adhibetur. Si Abiponem interrogas de cujuscunque rei numero curto, digitis erectis respondet: *Leyer iri: En tot!* Si illius intersit, curate rei numerum edicere, digitis utriusque manus, vel utriusque etiam pedis, & si omnes hi non æquent numerum proferendum, digitis pedum, manuumque aliquoties ostensis interroganti respondebit. Hinc *Hanámbegem* digiti unius manus quinque: *Lanámbegem* digiti utriusque manus decem: *Lanámbegem, cae Grácherbaka anámichiribegem* digiti manuum, pedumque

que universi *viginti* significant. Habent & aliam numeros supplendi methodum. Redeunt aliqui ex campis, ubi vel equos sylvestres venati, vel cicuratos jam exteris furati sunt. Nemo Abiponum interrogabit reduces: quot equos domum adduxistis? Sed: Equorum, quos adducitis, turma quantum spatium occupat? Reponent interrogati: *Equi una serie collocari totum hoc forum occupant*, vel: *Ab hoc nemore ad annis ripas usque se extendunt*. Cui quidem responso ad faciendam de equorum multitudine conjecturam omnes acquiescunt, etsi certum numerum ignorent. Interdum arena, vel gramine palmam manus implent, hacque interrogantibus exhibita rerum ingentem multitudinem innuere sibi videntur: Verum, dum de numero agitur, quidquid Abipones tibi affirmaverint, cave, assensum præcipites tuum. Non ignorantes modo, sed & hostes sunt arithmeticae. Hallucinatur fere illorum memoria. Numerandi tedium haud ferunt. Hinc ut aliorum de numero interrogationibus se expediant, digitos pro arbitrato, quotquot lubuerit, ostentant, jam falluntur, jam fallunt interrogantes. Sæpe si res, de qua quæris, triadem excedat, Abipon digitorum exhibendorum molestiam pertæsus: *Pôp! Mulci. Chie leyekalipi* innumerabiles, exclamabit. Aliquando decas militum advenit, undique tamen populi concursantis vociferatio personuit: *Yooliripi latenk naïeretâpek*. Viri copiosissimi propinguant.

Numeralium porro, quæ a Grammaticis ordinativa dicuntur, major est penuria; Ultra primum equidem numerare nesciunt. *Era nâmachit* primum. Hinc Decalogi præcepta hoc modo recensentur: Primum præceptum *Era namachit*; cum secundum, tertium, quartum lingua sua exprimere nesciant, horum loco præ-

præceptis reliquis præmittitur: Et aliud, & aliud &c. *Car labáua*, *car labáua* &c. Habent tamen nomen, quo prior ordine, & posterior denotatur. Enám *cabèk* qui præcedit. *Inagebék*, qui ultimus sequitur.

Numeralia descriptiva duo duntaxat habent. Singuli *Initarapè*. Bini *Inóakatapè*, & jam hæret aqua. *Linoaka yabat* duabus vicibus, vel bis. *Ekátarapek* una vice, vel semel. Interdum: *Haúe ken*. En arithmetice Abiponicæ compendium, curtissimamque numerorum suppellectilem! Vix opulentiores sunt Indi Quarani. Neque enim ultra numerum *quatuor* progrediuntur. 1 *Peteý*. 2 *Mokoý*. 3 *Mbohápí*. 4. *Irundý* dicunt. Primus *Iyipibæ*. Secundus *Imomokoyndaba*. Tertius *Imombobapibaba*. Quartus *Imoirundýbaba*. Singuli *Peteýrey*. Bini *Mokoymokoy*. Terni *Mbohápíhapi*. Quaterni *Irundý rundý*. Semel *peteý yebi*. Bis *mokoy yebi* &c. Quarani perinde, ut Abipones, si res numerum quatuor transcendunt, promptissime respondere solent interroganti numerum: *Ndipapabai*, vel *ndipapabai*. Innumerabiles. Cum vero numerorum scientia tum ad alios vitæ civilis usus, tum maxime ad sinceram sacro in tribunali peccatorum confessionem pernecessaria sit, in publica Catechismi seu explanatione, seu recitatione lingua Hispanica numerare docebantur quotidie Quarani in templo. Dominicis diebus universus populus a primo ad millesimum usque numerum Hispanica lingua clara voce numerare consuevit. Sed æthiopem lavimus. A plerisque musicam, pictoriam, sculptoriam artem promptius, quam numeros perdisci, experti sumus. Numeros omnes lingua Hispanica enunciare quamvis noverint, numerando tamen facile, frequenterque turbantur, ut adeo cautissime illis hac in re adhibenda sit fides.

Quod

Quod ad Verborum conjugationem pertinet, nullum prorsus paradigma præfigi potest; Nam in verbis prope singulis singularis numerus præsentis temporis indicativi modi variat, & multo plus difficultatis adfert discentibus, quam illa Græcorum incrementa. Secunda potissimum persona non in principio solum, sed & in fine, vel medio alias, atque alias literas sibi adsciscit, quod exemplorum, quæ adscribo, aspectu planissime patebit:

*Singularis.**Pluralis.*

Amo	Rikapit	Amamus	Grkapitak
Amas	Grkâpichî	Amatis	Grkâpichii
Amat	Nkâpit	Amant	Nkapitê.

Scio. Riâraigê. Graâraigê. Yaraigê.

Recordor. Hakaleent. Hakaleenchî. Yakaleent.

Idem. Netûnetâ. Nichuñtâ. Netûnetâ.

Doceo. Hâpagrânâtrân. Hapagrânâtrânî. Yâpagrânâtrân.

Festino. Rihahagalgê. Grahâlgali. Yahâgalgê.

Morior. Riigâ. Gregachi. Yigâ.

Submergor. Riigarâñî. Gregachâñî. Ygarâñî.

Salto. Riahât. Rahachi. Rahât.

Timeo. Rietachâ. Gretachi. Netacha.

Cupio. Rihê. Grihi. Nihê.

Volo, volas. Natahegem. Natâchihegem. Natahegem.

Sum ebrius. Rkîhogêt. Grkîhogichî. Lkîhogêt.

Sum piger. Riâal. Graali. Naal.

Sum fortis. Riahôt. Grihochi. Yhôt.

Bene valeo Rioamkatâ. Groemketâ. Yoamkatâ.

Calco Hachak. Hachafê. Rachak.

Comedo. Hakeñê. Kinigi. Rkeñê.

Vemo.

<i>Vomo.</i>	Riemaletapèk.	Gremalitapèk.	Némaletapèk.
<i>Dormio.</i>	Aatè.	Aachi.	Roatè.
<i>Pudet me.</i>	Ripagàk.	Grpágafè.	Npagàk.
<i>Collimo ad scopum.</i>	Hatenetalgè.	Hachínitalgè.	Yatene- talgè.
<i>Magni rem astimo.</i>	Riápategè.	Grpáchilgè.	Yápategè.
<i>V-rbero.</i>	Hamelk.	Hamelgi.	Yamelk.
<i>Bibo.</i>	Nānām.	Nānāmī.	Nānām.
<i>Facio.</i>	Haèt.	Eichī.	Yaèt.
<i>Obedio.</i>	Riahapèt.	Grahapichi.	Nahapet.
<i>Advenio</i>	Nauè.	Nauichī.	Naue.

Verum paucula hæc sufficiant ad mutationem verborum prope singulorum diversissimam perspicendam. Abstineo pluribus, quæ in promptu mihi essent, exemplis. Haud equidem Abiponum linguam te docere, sed de illius exotica novitate convincere mihi est propositum, & fastidium scilicet, quod prolixitas vocum Barbararum adferret, evitare. Ex paucis, quæ adnotavi, colliges, quot verba, totidem ferre secundæ cumprimis personæ inflexiones esse, ac variationes usu ipso, non ex regulis perdiscendas. Cætera indicativi tempora, uti & Modi omnes cujuscunque demum conjugationis parum negotii facessunt discentibus linguam, cum aliquæ duntaxat syllabæ vel particulæ tempori præsentī Modi indicativi adjiciantur. En! *Rikapit* amo. Imperfecto carent.

Præteritum: Amavi *Rikapit kan*, vel *Kanigra*.

Plusquamperfectum. Olim amaveram, *Kánigra gé-he rikapit*.

Futurum. Amabo. Rikapitām. Easdem particulas secundis, & tertiis personis, cætera nil mutatis ad-
junge. Sic: *Amas* Grkapichi. *Anastī.* Grkapichi kan.
Amaveras. Grkapichi kanigra gebe. *Amabis.* Grkapi-
chiam. *Am* enim syllaba futuri est & præsentis disun-
ctio.

Imperativum modum ipsum præfens, vel futu-
rum nihil omnino mutatum efficit. Sic: *Grabálgali.*
Festina, quod ipsum secunda indicativi persona, festi-
nas. *Eiebi fac.* Grkapichi ama. Vel Grkapichiam,
quod idem *amabis* significat. Interdum verbo particu-
lam *Tach* in secunda Imperativi persona, vel *Ták* in
tertia præmittunt. Sic: *Tach Grabápicbi* obedi. *Tach*
grakatrani. Dic. *Tak hanek.* Veniat. Quod idem mo-
dum permissivum denotat. Sic: *Tak hanek kaámelk.*
Veniat, per me licet, Hispanus. Prohibitio per futu-
rum præfixa particula *Tchik*, vel *Ch* è pro ratione
sequentis literæ explicatur; Sic: Non occidas, *Chit*
kahamatraniam. *Chit noaharegraniam.* Non mentiaris.

Optativus, & subjunctivus e variis particulis,
quæ præsentis Indicativi jam præponuntur, jam post-
ponuntur, formatur. Quod exemplis patefiet.

Chigriek utinam. *Chigriek grkapichi G' Dios, eknam*
kaoyarik. Utinam amares Deum, qui est Creator. *Ker*
si: Ket greenrani, G' Dios grkapichi ket. Si esses bonus,
amares Deum. *Ket* si in conditione, & conditionato
repetitur.

Amla postquam. *Amla grkapichi g' Dios,*
Dios 'lo nkapichieroam. Postquam amaveris Deum,
Deus amabit te.

Ebenà donec. Ebenà na chigrkápichi g' Dios, chírl gihè groamketápekà'm. Donec vel quamdiu non amaveris Deum, non eris unquam quietus.

Amamach quando. Amamach rikápieñoa, lo Grkápieñoam. Quando amaveris me, amabo te.

Kër mat. Si. Kër mat nkápieñoa, là rikapitla kër. Si amassent me, amassem illos.

Tach ut. Tach Grkápieñoa, rikapieñoam. Ama me, ut amem te.

Infinitivo carere videntur Abipones. Hunc aliis suppleant modis. Exemplis id fiet planius; sic:

Jam volo comedere. Là ribete m' bakéñe. Ribe, vel ribere volo, & Hakeñe comedo, utrumque ponitur in eodem modo, tempore, & persona; Litera *M* illis interjecta infinitivum facit nostrum vel supplet. Non possum ire. Haoaben m' abik, Haoaben, & abik in prima persona presentis indicativi ponitur, solo *M* interposito. Non scis me docere Chig graaraige m' riapa grañi. visne baptizari, seu, ut Abipones loquuntur, visne tibi lavari caput? Mik mich grebech m' nakarigi grema-rachi?

Necessitatem infinitivi, Supini, Gerundiorum variis locutionibus, sibi propriis eludunt. Iuvat hoc exemplis aliquot illustrare. Dum nos dicimus: Possum ire. Abipon id hac ratione exprimet: Ibo. Nulla est difficultas. Vel, estne aliqua difficultas? Labikam. Chiggeka Loaik, vel Maniga loaik? Debes ire. Abipon sic reddit: Yoamkata kër, lame. Eas, æquum est. Non debes ire, vel non convenit. Mich grebech m' amè?

Oagan ebik yoamk. visne abire? Quamvis id non convenit. *Quam peritus natandi hic homo est!* Abipon hoc sic effert: *Quantus natator est hic homo!* *Kemen álařankacbak yóale!* Comedendo robustus ero. *Rihotam,* am hakeñe. *Ero robustus, dum comedam.* *Venio ad te videndum.* *Hanegiyeroa.* *Venio ad te alloquendum.* *Hēechiapegrari.* *Kleranam Kaúe, la náue.* Loquar tibi. *Id causa fuit, quod jam veniam.* *Soles mentiri puer.* *La noabaregrān kén oenek.* *Particulæ Kén, & Aage* *Con-*
svetudinem significant. *Idem sic exprimit Abipon.* *Noabaregrān oenek.* *La laberek.* *Mentitur puer.* *Jam*
est illius consuetudo. *Soleo orare.* *Klamach hanáyaage' n'*
bēeroalá.

Vocis Passivæ, dum quid affirmatur verbo, nulla peculiaris forma, sed vel participio aliquo passivo, vel verbis activis exprimitur. Ubi nos dicimus: Rem perditam, vel finitam esse, illi ajunt: Rem periisse, cessasse, non apparere &c. *Yúibak oaloa,* vel *Chigigibe.* *Periit, vel non comparet jam bos.* Dum quid negatur, verbo solum activo, præfixa particula *Chigat* vel *Chigichiekat* explicatur passivum. Sic: *Nescitur.* *Chigat Yaraige.* *Yaraige* est tertia persona indicativi præsentis verbi activi. *Istud non comeditur.* *Chigat yaik.* *Istud non usurpatur.* *Chigat eyga.* *Non fui certior factus* *Chigat ripachigni.* *Equi non fuere bene custoditi, propterea periverunt.* *Machka Chigat nkebayape enò abēpega, maoge oaloéra.* *Stellæ non possunt numerari.* *Chigichiekat nakaiñi eēgræ.* *Quod ignoratur, non debet narrari.* *Am chigat yaraige.* *chigichiekat yaratapekam &c.*

Ex verbis pluribus activæ significationis participia tum activa, tum passiva, non tamen futuri temporis, formantur. *Rikapit* amo. Ex hoc fit: *Ykapi-*

cherat a me amatus, seu meus amatus. *Grkapicheſachi* tuus amatus. *Lkapicheſat* illius amatus. Ex isto nascitur ſœmininum: *Ykapichkatè* Amata mea. *Grkapichkachi* tua amata. *Lkapichkatè* illius amata. Ego sum amatus ab omnibus *Lkapicheratè* Kenoaraoge. Ex hoc participio derivantur: *Kapicheſa* amor. *Ykapicheſa* amor meus. *Kapichſaik* amans, amator.

Rikaſage Miſereor, benevolentia aliquem prosequor. Participium illius paſſivum: *Ykaſagrat*. Benevolentia a me affectus. Subſtantivum: *Ykaſagra*, mea Benevolentia. *Kaaſgrankatè* Instrumentum, modus, locus benevolentiae, vel ipſum beneficium. *Kaaſgrankachuk* Benevolus, miſericors. *Ykaſagek* benevole a me habitus. *Grkaſagigi* benevole a te habitus &c.

Hapagranatran doceo. *Napagranatſanak*. Docens. Magiſter. *Napagranatek*. Qui docetur, diſcipulus. *Napagranatſanſek*. Doctio, inſtructio. *Napagranatſankatè* Locus, ubi, vel materia, quam alter docetur. Pluribus exemplis ſuperſedeo. Oculis quidem tuis, labiisque laſſitudinem metuo jam, ac ſatietatem; Nam vel ſcribenti mihi ſtadium jam jam ſe inſinuat. Superſunt tamen plurima, que neſas ſit ſilentio præterire.

Formidabilem jam tyronibus Abiponenſis linguæ labyrinthum ingredimur, ubi, niſi ut Ariadne Theſeum, ſic te experientia longior duxerit, nuſquam tuto citra erroris diſcrimen ambulaveris. Verba, quæ tranſitiva, vel reciproca vocant grammatici, intelligo. Actio unius in alium noſtris linguis per ipſa pronomina: *Ego*, *tu*, *ille*, *nos*, *vos* nullo negotio explicatur. Abipones e contrario omiſſo illorum pronominum uſu, varia verborum inflexione, novis hinc,

atque illine implexis particulis id præstant. Exemplis hæc fient planiora. *Amo te, tu amas me, Ille me, vel te amat. Nos illum amamus. Amatis nos, vel illos,* latini sine verbi mutationibus, pronominum ope mutuum amorem exponunt, quod multis cum ambagibus, vario temper artificio præstant Abipones. Sic: *Amo Rikapit. Amo te Rikapichieroa. Tu amas me Grkapichia. Ille amat me Nkapichia. Ille amat te Nkapichieroa. Amamus illum Grkapitae. Amamus illos Grkapiila. Amo me ipsum. Marnikapitala. Amas te ipsum Nikapichialta. Nos mutuo amamus Grkapiitaa. Verum utinam hoc verborum omnium foret paradigma! Alia alia sibi adfiscunt particulas, syllabarumque mutationes. Sic:*

Rikauage. Misereor. Misereor tui. Rkauagyegari-ge. Tu misereris mei. Grkauagiye. Tu misereris nostri. Grkauagyegarik. Miseretur mei. Nkauagyge. Miseretur tui. Nkauagyegarige. Miseretur illius. Nkauagege. Miseremur nostri mutuo. Grkauagekapegetaa. Misereor mei ipsius. Nikaakaltaa.

Hapagranan. Doceo. Doceo me ipsum, seu disco. Neapagan. Docemus alter alterum. Hapagran-kapegeta. Doceo te. Hapagran. Doces me. Riapagran. Docet me. Riapagan. Docet illum Yapagan.

Hamelk verbero. Ego te. Hamelgi. Tu me. Riamelgi. Ille me. Riamelk. Ille te verberat. Gramelgi. Ille illum Yamelk.

Hakleente. Recordor. Ego tui. Hakleenchitapegrari. Tu mei Hakleenchitapegi. Ille mei Yakleentepagegi. Vel his visis deprehendas in verbis transiivis variationem, cum jam eroa, jam yegarige, jam rari,

jam alias particulas aliis personis inspergere oporteat. Illarum cognitio, mihi crede, incredibiliter fatigat Europæos, & non nisi longa cum his Barbaris consuetudine tandem obtinetur. Alii quoque Americani verbis istis transitivis utuntur, sed ad mutuam actionem, vel passionem explicandam una illis est forma. Sic Quaranii dicunt: *Abaibù*. Amo. *Orobaibù* amo te. *Ayukà* occido. *Oroyukà* te occido. *Amboe'* doceo. *Oromboe* te doceo &c. Quid, quæso, facilius, quid expeditius?

Relativum *Qui*, *quæ*, quod interdum exprimunt per *Eknam*, vel *enonam* plurali numero. Sic *Dios*, *eknam* Kaogarik. Deus, qui est Creator. *Hemokáchin nauáchiekà*, *enonam Yapochi*. Magni facio milites, qui sunt strenui. Interdum, latinorum more, Relativo *Qui* suppresso participium, vel adjectivum aliud substituant. *Riákayà neregingà oakaika*, *Kach quenò abam-íæka*. Abominor canes mordaces, & mortuos.

CAPUT XVII.

De aliis Abiporum linguæ proprietatibus.

Abiporum linguam verborum egenam, ac jejunam, an locupletem dicam, anceps hæreo etiamnum. Postquam exposuero, quibus vocabulis hinc destituitur, inde superfluat, tute sententiam feras iudex. Desunt Abiponibus vocabula, quæ quotidianæ locutionis videntur elementa. Carent verbo substantivo: *Sum*, quod quidem & quaranii non habent. Carent verbo: *Habeo*. Carent vocibus, quæ *hominem, corpus, Deum, locum, tempus, nunquam, semper, ubique &c.* Significent, quæ tamen singula humana in consuetudine identidem recurrunt. *Ego sum Abipon. Aymè Abipon.* Ego Abipon, dicere solent. *Tu es plebejus - Akami Lanarai.* Tu plebejus. Sæpe adjectivo, & verbo substantivo verbum aliquod neutrum substituunt exemplo latinorum, quibus perinde est dicere: *Sum sanus*, vel *bene valeo*. *Sum fortis Riabòr*, tu *Gribochi*. Ille, *Ybòr*. *Sum magnanimus. Riapòr*. Tu *Grapochi*. Ille *Yapòr*. *Sum timidus. Riakalà*. Tu *Grakaloi*. Ille *Yakalò*. *Veniat Hispanus, jam ero strenuus. Tach hanék Kaámelk, la riaporam*. viden', ut Abiponibus facile verbo substantivo carere! quin & verbo: *Habeo*. *Habeo multos equos. Ayte yla abépega*. Multi equi mei. *Habeo multos pulices. Netegink loapakate enò!* Pop. Non habeo Carnem. *Chirkaeká Lpabè*. Non habeo pilces. *Chigeko*

koà ndayi. Hekà Abiponibus idem sonat, quod latinis *datur*, vel *supperit*, Germanis *Es giebet*. Hispanis *ay Chirkaekà* est negativum, significatque: Non dari, non suppetere carnem, pisces &c. In plurali numero dicitur: *Chigekoa*. Daturne cibus? *Meka Kanák*?

Neoga diem significat, sed & tempus. *Grauek* Luna pro mense accipitur. *Yñiera* flos siliquæ Græcæ est, simul annum denotat. Hinc dum ex alio, quot annorum sit? quærent, *quoties jam te vivente siliqua græca floruit?* ajunt: *Hegem levera yñiegari?* Quæ phrasis utique poetica. Pro corpore vel pellem, vel ossa, partem nempe pro toto, nominant. *Poalè* virum significat duntaxat, pro homine tamen significando pariter adhibetur. Eodem modo Quaranii vocabulo: *Aba*, quod virum, & nationem Quaranicam denotat, utuntur, cum nomine, quod hominem significet, careant. *Aba che* triplicem sensum continet, scilicet: Ego sum Quaranius. Ego sum homo, vel ego sum vir. Quid horum dictum velit, ex colloquii argumento colligendum est. Nusquam forte plures, quam Abiponum in patria, virgines; Neque tamen, nisi per circumscriptionem, norunt virginem explicare. Vox enim: *Haayè* juvenculam qualemcunque, etiam corruptam, significat. Pro nunquam *Chik*, vel *Chis* non solent collocare. Sic: Nunquam hinc migrabo. *Chik rihukam*. Frequentius: *Chislighe rihukam* ajunt; *Chislighe*. Non apparet tempus, quo migrandum mihi, denotat. Aeternum per interminatum explicant. Sic: vita sempiterna. *Eleyra chis Karaikañi*. Vita, quæ non finitur. Deum, cujus nomen ignorant, cum Hispanis vocavimus: *Dios*, etiam *Kaogarik*, vel *Naenarfanak lipigem*, *Kachka aalè*, Deum, qui rerum omnium effector, vel creator cæli, & terræ. *Kauè* facere significat. *Kaogarik* factorem. *Tetarik* & *Kauseè* ova, Gallinæ opera, appellant.

Ubique una voce dicere nequeunt, sed circumscribunt hac ratione : Deus est in cœlo, in terra, & non est locus, ubi non sit. *Menetabegem quem hipigem, menetañi quen anloa, Ka chigekôr amà, chig enaè.* Præterco alia innumera, queis destituntur, vocabula; Illa tamen variis modis supplere norunt; Norunt quoque res non paucas, quæ apud nos una semper, eademque voce exprimi solent, multis nominibus insignire, vel eandem verbi radicem novis particulis ita vestire, ut aliud semper atque aliud vocabulum possit videri. Ut linguæ hujus inopiam exemplis aliquot detexi, sic ejus quoque copiam breviter exhibendam mihi putavi.

Incredibile, quot synonymis polleat. Sic: *Kacher-gaik. Kamer-gaik. Kere-gaik. Laykame'*, senem significat. *Mortuum: Elor-gaik. Egarg-gaik. Ahamr-gaik. Chikacka Laeb.* Bellum; *Nabamatrek. Nuichiera. Noélakierék. Anegla.* Cibus. *Kinierat. Hanák. Nakà. Naek.* Caput: *Lema-rat. Lapanik.* Cœlum: *Hipigem. Obajenk. Nescio. Chigriar-gaik. Taagè. Uriakà. Nra. Chig netun. Akaminaii,* quod postremum perinde est, ac si interroganti alteri reponeret: *Tute id noveris, fateturque se, quod interrogatur, nescire.* Interdum eadem interrogantis verba repetunt, quo ignorare se id testantur. *Vulnus* qualecunque vocant *Lalagler.* Si illud dentibus bestiae alicujus vel hominis inflictum; *Naagek.* Si cultro, vel ensè: *Nichar-bek.* Si lancea: *Noarek.* Si sagitta: *Nainek* vocatur. *Pugnant,* si ratio pugnae non exprimitur; *Roélakirapegetà.* Si pugnant hastis: *Nabánre-tà.* Si sagittis: *Natenetápegetà.* Si pugnis se contundendo: *Nemarketápegetà.* Si solis verbis: *Ycherikále-retà.* Si duæ uxores pro eodem suo marito: *Nejé-reta.* Rem aliquam finitam esse, diversis vocibus ex-

plicant. Finita est infirmitas: *Láyamini*. Finita est pluvia, luna, frigus: *Lánámreuge neetè*, *grauék*, *lazarà*. Finitum est bellum: *Nabálañi aneglà*. Hispani milites sunt finiti, id est, internecone deleti: *Lanamichirini Kaáma yoolirípi*. Finita est mea patientia: *Lánámouge yapik*. Finita est tempestas. *Layambà*. Finivit suum officium, defunctus est suo magistratu: *La yau-erelgè*. Fini, absolve denique tuum opus: *Grabálgali*, *Laama:chi graénaregi*, Jam jam res finitur: *Layam ayam*. sub finem mundi. *Amla banamrani*. Pugna si committatur sagittis, dicitur: *Noatarek*. Si hatis: *Noara:raurék* vel *Nahamatrek*. Si pugnis solum: *Nemarketrek*. Hoc vocabulum eventus ridiculi memoriam mihi refricat. Laicus quidam noster Bavarus ad struendum Missionariis tugurium in recenti S. Hieronymi colonia versabatur aliquamdiu. Fabrilis opere occupatus Abipones quotidie spectatores habuit suos, colloquentesque, quin vel syllabam intelligeret, auditiv identidem. Cum voces *Nahamatrek*, *Noatarek* aliaque plurima verba in *Trek* desinentia frequentissime perceperit, mensæ accumbens Patri Josepho Brigniel Austriaco ingenue dixit: Nullus sim, si hæc Abiponum lingua cum nostra Germanica non habeat maximam affinitatem. Vix ovum ovo similis. Iterum enim, iterumque, aiebat, *Trek*, *Trek* audio pronunciari.

Hanc Abiponum linguam hand abs re linguam Circumstantiarum dici oportere asseruimus. Nam ad situs rei, de qua sermo, diversitatem indicandam alias, aliasque particulas verbis affigunt; Jam *Hegem* sursum. *Añi* deorsum. *Aigit* Circa. *Hagam* in aqua ónge foris, vel foras. *Alge*, vel *Elge* in superficie &c. Exemplis res evadet luculentior. Eodem verbo: *Est*, contenti dicimus: Deus *est in Calo*, est *in terra*, est *in aqua*, est *ubique*. Abipones nova semper par-

ticula, quæ situm indicet, verbo est adjecta ajunt: *Dios menetabegem Ken hipigëm* Deus moratur supra in Cælo. *Menetañi Ken aãloà* moratur infra in terra. *Meñeràbagàm Ken enarap* moratur in aqua. &c. En particulas añz. *Hegem. Hagam* Verbo: *Ménetá* affixas. Sed adverte animum ad reliquas. Quanta verbi assequor variatio! Assequor adventantem: *Hauíre-zaigit*. Assequor abeuntem: *Hauiraà*. Assequor manu, quod est infra me: *Hauirañi*. Quod est supra me: *Hauirihegemége*. Non assequor oculis: *Chit beonáage*. Non assequor intellectu: *Chig ñetu-ñéaigit*. Assequor sagitta. *Ñazen*. Proficiscentes alii alios assequuntur: *Yáneráatà*. Vel. *Yauirétapegetà*. Assecutus sum, quod alter animo suo meditatur, vel machinatur. *La bñni Larenairanrek Lanel* Assecutus sum, quod petii: *La bñni eka Kan abelñanñat Kñi*. Audi alia exempla. Metuo: *Rietashà*. Metuo aquam: *Rietachabagam*. Fulgurat: *Rkábagelk*. Fulgurat eminus: *Rkábagelkãtaigit*. Splendet: *Richák*. Splendet in superficie: *Richákatalgè* splendor late se diffundit: *Richákãtaugè*. Aperio portam plateam versus: *Hebòtounge Labàm*. Hinc ingredi cubiculum Patris volentes clamitant: *Ybuchingè Labàm*. Aperio portam fenestram versus: *Hebòtoà Labàm*. Si duplicem portam simul aperiam: *Hebòtetzeltgè Labàm*. Claude portam: *Apèègi Labàm*. Morior. *Riigà*. Sum moribundus: *Riigarari*. Morior suffocatus: *Riigarañi*. &c. &c.

Commemorandæ jam veniunt aliæ particulæ, quæ maximi apud hos barbaros usus:

Là jam, singulis prope verbis præfigunt. *La rëðkatari cachergayè*. Jam plorat vetula. *Là rielk* Jam sum territus. *La nañam* Jam bibo.

Tapek

Tapek, vel *Tari* ultimæ verbi syllabæ adnecum actionem, quæ nunc suscipitur, denotat. *Hakiriogran aro* terram. *Hakiriogranetapek* nunc, dum loquor, aro, *Haoachin ægroto*. *Haoachinetari* Hoc temporis puncto ægroto.

Kachit. Facio. *Arairaik abepagak* cicur equus. *Arairaikachit abepagak*. Facio equum cicurem. *Rièlk Paveo*. *Rièlkachit nibirenèk*. Tigris me fecit pavidum. *Ayerbègemegè*. Res alta *Ayercachibègemegè*. Rem facio altam, in loco altiori colloco.

Rat, vel *Ran* ejusdem cum priori significationis est quibusdam in verbis. *Rpaè enarap* calida aqua. *Hapaèrat enarap* calefacio aquam. *Laà magnus*, amplius. *Laararat* amplifico. *Lenechi* parvus tenuis. *Lenechitarat* extenuo, *Haoatè* dormio, *Haoacheèan akiravàlk*. Infantulum facio dormire.

Ken verbum reddit frequentativum, consuetudinem, ac habitum notat. *Roèlakikèu* solet digladiari.

Aagè substantivis: *Lahèrek* opus, vel *Yaàràirèk* scientia affixum pariter consuetudinem explicat. *Nèoga latènk nañametapek*; *Gramachka Lahèrekàage*, vel *Maè yaàràirèk aage*. Toto die potat. Hæc denique illius est occupatio; Hæc illius est scientia. Verbo. Illius est consuetudo.

Ir. Materiam, ex qua res aliqua componitur, significat. *Nichigehèrè* Pallium ex Lutræ pellibus confutum, *Nichigehè* enim Lutra est Abiponibus.

Kàepe-

Káepèrit. Locus sudibus terræ infixis munitus, Hispanis la palisada, vel estacada. *Káepak* lignum significat.

Har. Arborum, vel frugum quarumcunque naturale solum indicat. *Nebokebat*. Sylva, ubi palmæ nascuntur *Neboke* palmæ species. *Nemelkebat* ager tritico confitus, quod *Nemelk* dicitur. Quaranii eodem utuntur compendio; sed particulæ *Hat* substituant *Ti*, sic: *Abati* Turcicum triticum. *Abatiti* ager, ubi hoc procreatur. *Peri* Tabaca. *Perindi*, ubi tabaca crescit. Euphoniæ causâ, quam maximopere curant Quaranii, *ndi* loco *ti* ponunt.

Ik. In hanc syllabam omnia prope arborum nomina desinunt. *Apèbe* fructus Chañar. Arbor *Apebik*. *Oaik* filiqua Græca albi coloris; *Roak* rubri. Arbores illius feraces *Oaikik*, *roaikik*. quamvis & uno nomine *Hamáp* filiqua Græca appelleretur.

Reki. Significat Vas, locum, vel instrumentum, quo res aliqua clauditur, servatur, vel continetur. *Nanamreki* Poculum, a *Nanam* poto. *Nee-rki* idem significat. *Nèet* enim & *Nanam* synonyma sunt. *Kataranreki* furnus, acerra a *Nkáarék* ignis. *Keyeerânreki* Linter, in quo vestes sinigmate lavantur. *Keyaranrât* Sapo, seu sinigma est illis.

Layt. Ejusdem prope, cujus prior particula, significationis. *Yabogék Layt* pyxis, qua tabaca servatur *yabogék* enim tabaca in pulveres redacta. *Abèpegrlayt*. Septum, quo equi clauduntur.

Lanà magni omnino usus, & sæpe sacra antehora, quam tyrones lingua hac leviter tincti ad se se explicandos arripiunt. Significat id, quod vel instrumentum, vel medium, vel pars rei alterius perficiendæ. Exemplis palam fiet. Abipones tabacæ folia sale mista, & vetularum salivâ subacta mandunt quotidie, ac medicinam appellant. Horis prope omnibus adsunt, & : *Tachkaûe Pay npeetèk yoetà*, ajunt, Pater da mihi folia tabacæ meam medicinam. His acceptis mox subjungunt: *Tach kâue achibiraik noetà lanà* da mihi etiam Sal, quod ad illam medicinam componendam servit. Adest alter, & : *Tachkaûe lazaràn, Ipabè lanà* ait: Da mihi cultrum, quo Carnem scindam. Vel: *Tachkaûe Kèepe yèeriki lanà*. Da securim, instrumentum domus mihi fabricandæ. Lingux peritiores hac vocula *Lana* fere abstinent; Illius loco ex verbis effingunt substantiva nomina, quibus rei faciendæ instrumentum, vel medium bellicissime exprimitur. Sic: *Noetarèn Medeor. Noetarenà-tarànùs Medicina. Noetaranatarankatè. Instrumentum medicum. Hakiriogran aro. Kiriogrankatè. Aratrum Nabategran Tondeo. Abategkatè Forfices, vel emunctorium candelæ, quod lychnum quasi tondeat. Gebayù. Aspicio. Geharlatè Speculum, Rietachà Timeo. Netachkatranùat. Instrumentum terroris injiciendi. Vultus deformitate insignes hoc nomine faceti appellant, veluti oculorum terri culamenta.*

Larè Locum actionis indicat. Sic: *Nahamàrālatè* locus pugnx, *Kimierālatè* locus, ubi comeditur, scilicet mensa.

Res ex Europa allatas, vel ab Europæis excogitatas nominibus vernacula e Lingua depromptis haud ineptè insigniunt. Nolunt vocabulorum inopes videri, mendicatisque ab externa gente vocibus linguam contaminare suam aliorum Americanorum more, qui passim ab Hispanis verba mutantur. Equos, quos Hispani cavallos, Quaranii *Ca-vayà* appellant. Boves, quos Hispani *Nobillos* dicunt, ab illis *Nobi* vocantur &c. Abipones e contrario equum *abèpegak*. Bovem *yùibàk*. Taurum *yùibàk lepà*, id est, bovem non castratum lingua propria appellarunt, etsi ante Europæorum adventum has ignorarint bestias. Templum *Loakal Leeriki* domum imaginum, vel *Natamenrèki*, ubi Deo gratiæ aguntur. Sclopetum *Netelranre*, quod arcum, e quo sagittæ vibrantur, significat. Quidsi ex verbo: *Neerè* tempestas hoc vocabulum derivatum, quod sclopetum tempestatis tonitrua imitetur. Pulverem nitratum *Netelranre leenra* farinam sclopeti: librum *Lakarka* quod verbum, linguam, orationem denotat. Epistolam, schedam quaecunque literis conscriptam, vel pictam *El rka* dicunt, qua voce utuntur alias, dum fœminæ intrarum pelles variis linearum ductibus rubro colore expingunt, e quibus pellibus penulas ad arcendum frigus conceinnant. Melopepones, vel pepones aquaticos *Kaama lakà* cibum Hispanorum vocant. Animam, umbram, Echo, imaginem eodem nomine insignierunt *Loàkal*, vel *Lkibi*. A latinis quoque vox *imago* pro Echo adhibita. Valerius Flaccus l. 3. Argon: *Rursus Hylam, & rursus Hylam per longa reclamar avia, respondent Hylæ, & vaga certat imago*. Ut imago figuræ. sic Echo vocis repræsentatio est. Gossypium, quod telæ materies, *Aaparaik* telam appellant. Triticum *Etanta lperà* granum panis, *Netelranre lperà* plumbeas sclopeti

peti glandes, vel *Káamà lanarba* sagittas Hispanorum. Fides, seu Chelyn *lúigi*, quod lumbos animalis indicat. Metallum quaecunque *lekàt*; Nummos argenteos *Lekacháole* parva metalla vocant. Infernum *Aalò labachini* centrum terræ, vel *Keevét Léeriki* dicunt, domum diaboli. Indusium *yelamirkie* Tibialia, vel ocreas. *Lichil lelamirkie*. Femoralia. *Ykie-marba*. Calceos *yachrbárlatè*. Petasum *Nearà*; vittam, mitram, quaecunque Capitis tegumentum *yetapehè*. Globulos vitreos *Ekalræye* vocant. Omitto his similia.

Familiares sunt his Barbaris metaphoræ. Capitis dolore affecti: *Là yivichigi yemarar*. Jam caput mihi irascitur, exclamant. Manuum labore fatigati: *Là yivichigi yauigra* Jam Sanguis mihi irascitur, subridendo ajunt. Irati: *Là anabegem yauel* Jam mihi cor assurrexit, dicunt. Molestiæ alienjus impatientes: *Là lanamouge yapik* Jam finita est mea patientia. Jam non sum huic dein ferendo, vociferantur.

Quamvis Quaranii, pluresque alii Americæ populi non nisi postpositiones habeant sua in lingua, Abipones Præpositionibus utuntur. Sic Quarannii Sanctæ Crucis signum manu formantes ajunt: *Tuba baè laýra, bæ Espiritu Santo rera pipe*. Amen. Patris, & Filii, & Spiritus Sancti nomine in. Amen. *Pipe* enim *In*. *Rera* nomine significat. Abipones e contrario: *Men lakalátoet Nerà, Kat Náitárat, Kachka Espiritu Santo. Amen*. In Nomine Patris, & Filii &c. *Men In. Lakalátoet* nomen exprimit. *Men. Mek. Kèn. En Kera In*, vel ad jam cum motu jam sine motu significat. *Men aaloo, Men bipigem* In terra, In Cælo. *Labik Ken nepàrk* jam abeo ad Campum, *La ribi mek Kaáma Loerè*, Jam migro ad

ad Hispanorum terras. Propositionem *Cum*, quæ societatem notat, ignorant. Sententiam hanc: *Ibo tecum*, sic efferunt. *Grabautapekam*. Te comitabor. Vel aliter per *etiam*. *La me? Clachkehin*. Abis? etiam ego. *Dominus tecum*. *Dios Gnoakàra biñtaroat*. Dominus tibi associatus est. *Haraà* propositio significans instrumentum, quo res peracta est. *Xóale yabámat nibirenak naraà lobélese*. Indus macstavit tigridem lanceâ. *Xágam* sicut, vel instar. *Roabâ yágam netegink* Invadit instar Canis.

Ipſa adjectiva adverbiorum vices plerumque ſubeunt; Hæc perinde, ac illa, prout tempus præteritum, vel futurum ſpectant, verborum inſtar, varie ſeſcuntur, ſic: *Ariaik*. *Neñ*. Bonus, & bene ſignificat. *Kemen ariask kân!* quam bonus, vel quam bene fuit. *Kân* præteriti nota eſt. *Ariaekam*. Bonum, vel Bene erit. *Am* nota futuri. *Kirè*, nunc. *Kirekân* nunc fuit. *Kitâm* nunc moritur. Si de re præterita quæras, dicendum: *Hegmalagè* quando. Si de futura: *Hegmalkâm*. Ad præteritum reſpondent jam: *Nehegetoè* Dudum. Jam: *Hákekemát*. Nunc, hoc temporis puncto. Jam: *Chigabák* nondum. Jam: *Kiténoga* hodie *Kiténegin*, vel *Kit nehaól* Iſta nocte. *guaâma*. Heri. Ad futurum: *Amâ*. *Amlayerge*. *Chitkibe*. Poſt longum temporis intervallum. *Amlâ* Poſtea. *Am richigni* Cras. *Anekére láhaua* Perendie *Am náama* ad vesperrum. Et per *Kachka*, *Kach*, vel *Kat*, prout ſequenti litteræ melius conſonnerit, exprimitur. *Non* *Yná* omnes, promiſcue dicunt. Ita pro ratione tum ſexus, tum ætatis diverſe explicatur: *Héé* viri atque adoleſcentes reponunt interrogantibus. *Hâà* fœminæ omnes. Vetuli ducto ex intimo pectore rhonchó, quidquid demum ſit, affirmant. Id non literis, ſed

viva voce, licet non citra raucedinis periculum, facilius, apertiusque potest declarari. Quanto sonantior rhonchus, tanto luculentior affirmatio.

Eürigri, Eörat, miekaenegem, Cur, qua de causa, *Miéka énegeu nkaué, nauichi enà?* quid causæ fuit, ut venires? *Men* interrogationis est particula, an significans. *Men leerà?* Estne verum? *Klerà* est certum. *Chigera*. Non est verum. Vel si de rei veritate dubitant, respondent: *Eürinigi*. Interdum, dum falsitatem alterius relationi subesse arbitrantur, præteritum futuro conjungunt, & per ironiam reponunt: *Kánigra Leeràm*. Olim verum id erit. *Kánigra* præteritum, *leeràm* futurum est.

Litera *M* verbo præfixa interrogationem denotat. Sic: *M'ayre nauachieka?* An multi milites sunt? *M'oachini*. An ægrotas? Si prima, quæ *M* sequitur, litera consonans, vel *H* sit, illa penitus absorbetur. *M'auékam ena?* Veniet ne huc? Ex verbo: *Hauékam* veniet, *H* penitus omittitur, diciturque: *Mauekàm*. *Mauichi Kenà?* Hucne advenisti? *Nauichi*. *N* litera eliminatur, & *M*. substituitur: *Mauichi*. *Mik* solum, vel *Mik mich* interrogationis formulæ sunt. *Mik mich grihocbi?* Num bene vales? Alias solo accentu, vocisque elatione interrogatio cognoscitur. *Layàm nauichi?* Tandem venisti? *Origeena*, *Morigi* vocalæ sunt interrogantis simul simul dubitantis. *Morigi npágák oenèk?* Forsitan pudet juvenem? *Hegmi hínnerkam?* quid tandem erit? *Orkeénam*. Nescio, quid futurum sit.

Latàm prope, parum absuit, quin submergeret, *Latàm riýgerani*. *Latam riabámat ýiuihák*, *Bos* me prope occidit. *Yt*, vel *yeb* solum, duntaxat.
Tach-

Tachkaue yt leneckiaualk. Da mihi tantum modicum quid. *Mat*, vel *Gramachka* denique. Quando cum asseveratione seria aliquid affirmatur, vel cum iactantia. *Gramachka Abipon yapochi.* Denique Abipones sunt magnanimi. *Eneba mat yoale.* Hic denique est vir. *Chik*, *chit*, *chichi* prohibentis voces sunt, uti ne apud Latinos. *Chik grakalagitirani*, ne dubites. *Chichi noabaregrani* ne mentiaris. *Klatum Keen* quamvis, *oagan* tamen. *Eneba Klatum Keen etenek*, *oagan netackaik.* Quamvis iste sit pulcher, est tamen timidus. *Tan* Quia. *Máoge*, ideo. *Tán ayre apatáye ken uepark*, *máoge chik dârekan.* Quia multi culices in campo, ideo non dormivi. *Men*, *Men* sicut, ita. *Men nerâ*, *men naetarâ*. Sicut pater, ita & filius.

Diversas habent admirantis, dolentis, gaudentis &c. Exclamationes. *Kemen apalaik akami!* Quam tu sordidus, & rerum tuarum tenax es! *Kemêa naáchik*, vel *Kimili naáchik!* O quam erit mihi hoc utile! Est modus gratias agendi pro accepto munere. Haud enim Abipones, aut Quaranii verbum ullum possident, quod gratias agere, vel gratitudinem significet. Quid mirum, quod gratitudinem ne de nomine quidem notam factis rarissime constentur. Beneficiis equidem, ut quidam dixit, utuntur ut floribus, tamdiu gratis, quamdius recentibus. Repulsa unica beneficiorum priorum memoriam penitissime apud Indos abolere consuevit. Quaranii dono accepto eadem phrasi dicere solent: *Aqulyebete angâ* salutare mihi hoc erit. Abipones interdum, postquam, quod petierant, impetrarunt, nil nisi hanc voculam: *Kliri* Hoc erat, quod volui, beneficium conferenti repouunt. Alias seu admirantes, seu miserantes exclamant: *Kem ekemat!* *Ta yeegâm!* *Ndrê* quod iis subita

N 2

quam

quavis novitate attonitis familiarissimum. *Tayrezà!*
 O pauperculum!

Verum satis hæc, superque fuerint, ut Abiponenſis Linguae ſalebras, difficultates, exoticumque artificium animo concipias. Quod ſi enim, quæ ad ejus penitiorem ſcientiam pertinent, complectar ſingula, juſtum utique volumen exiret. Pater Joſephus Brigniel primus gentis illius cultor, dum S. Hieronymi Coloniae annos admodum duodecim præſeſſet, primus item Linguae huic diſcendæ, moxque tradendæ operam dedit, nuper barbarorum diſcipulus, ſubinde ſociorum, qui ſuppeticas miſſi, magiſter. Præcipua Religionis capita, ſolemnes Eccleſiæ precatones in Abiponenſem traduxit linguam, univerſæ in quatuor dein colonias tributæ nationi ſubſidio futuras. Incredibile, quantum moleſtiæ hoc in ſtudio devoraverit, etſi ut laborum patientia, ſic memoriæ tenacitate plane ferreus. Cum Latinis, Germanis, Gallis, Italis prompte, cum Hiſpanis, Quaraniſque, quorum diu Apoſtolus fuerat, etiam eleganter loquebatur, ſex linguarum probe gnarus; Cum Abiponibus tamen balbutire denique ut noſſet, hic labor, hoc opus fuit. Ut rerum nomina, nominumque inflexiones, ac uſum expiſcaretur, omnem ſane movebat lapidem. Aſt quamvis diſcendi avidiſſimus nulli induſtriæ parceret, magiſtri nempe, ac libri, qui docerent, fere deſiderabantur. Haud deſuere equidem Hiſpani, qui adhucdum pueri bello capti Abipones inter Abiponenſem combibiſſent linguam, ſed iſti linguae patriæ plerumque jam immemores. Qui adultiores in Barbarorum captivitate incidere, eorum linguae adeo infeliciter demum aſſueſcunt, ut quatuor verba ſine totidem erroribus vix, ac ne vix quidem noverint proferre. Nativæ linguae ſenſum

sim obliviscuntur, quin alienam rite perdiscant. Utraque loquuntur, sed neutram vel mediocriter callent. Idem Germanis, Italis, Gallis in America evenisse, vidimus, qui patriæ linguæ obliiti Hipanicam rarò perfecte sunt assecuti. Idem de Abiponibus sentientium, qui apud Hispanos aliquamdiu captivi ad suos rediere. Ex captivis igitur errare citius, quam loqui discas. Si quis tamen illorum linguæ utriusque mediocriter gnarus a nobis conductus est magister, superi boni! quanta nobis fastidia erant exhaurienda. Interrogatus: quo nomine hanc, illamve rem compellant Abipones? Voce tam dubia, tam obscura respondet, ut ne syllabam, ne literam quidem unam percipias. Si bis, si ter idem tibi pronunciari vocabulum poscas, commota mox bile stomachatur, & obmutescit. Vix lapsa institutionis hora verborum aliquot, quæ enuntiavit, mercedem quotidie postulat: Hodie cultrum, Cras forficulas, perendie globulos vitreos, alias aliud majoris pretii. Si negas illi postulatum præmium, vix tandem te reviset; Si porrexeris, ad petenda semper majora indies evadet audentior. Summa discipuli miseria, si magistri vel rari, vel nimium cari. Rerum, quæ oculis observantur, nomenclationem quotidiana cum Indis consuetudine paulatim perdisci, haud inficior; At illa, quæ oculos fugiunt, quæ ad Deum, ad animum pertinent, conjectura solum, & longissimo rerum usu tandem cognosces. Dum de equis, de tigride, de armis sermo, Abiponum quemlibet Demosthenem, Tulliumve experieris. Dum de animi affectionibus, functionibusque, de virtutum habitudine quæstio, responsa nocte obscuriora reddent, vel elinques adstabant.

Quaranicæ linguæ studentibus nobis Grammatici Codices, terna item lexica Patribus Antonio Ruyz de Montoya, & Paulo Restivo ficulo authoribus edita temporis perinde, ac laboris compendia exstiterunt. Horum ope nostri adeo accelerati fuere progressus, ut mense tertio exeunte Quaraniis sacro pro tribunali aures præbere permetteremur e quatuor sociorum antiquiorum sententia, qui superiorum jussu nostram linguæ scientiam longo examine acriter sunt periclitati. Quæ quidem librorum subsidia, cum Abipones inter deessent, Josephus Brigniel laboris contentione, & quotquot poterat, industriis supplevit. Si quam vocem novam, vel elegantiam e Barbarorum colloquio, ut aves e fimo tritici grana legere solent, detexit, in adversaria retulit diligenter, ac demum lexicon conscripsit, quod progressu temporis ad centum quinquaginta phyliras excrevit. Illud a sociis subinde descriptum, limatum, magnisque accessionibus locupletatum fuit. Scilicet facile est inventis addere; Nam successores antecessorum humeris insistentes & longius, & plura vident. Opulentum Peruvium Pizarus, Mexicum Cortesius penetrarunt, sed columbo, qui Americam primus vidit, præeunte. Brigniel noster viam, qua tantis in tenebris linguæ barbaræ incedendum sit, primus ostendit, ducem se præbuit reliquis, & ut paucis dicam, in illa rerum caligine rudia grammaticarum legum lineamenta indicans lucem accendit, vel hoc nomine æternum celebrandus. Illo per biennium & contubernali, & magistro usus vocabularium scripsi non alphabetico ordine digestum, sed eo fere modo, quo Amos Comenius *Vestibulum linguarum* concinnaverat, ac in hanc usque diem retineo.

Novis Abiponenſem linguam difficultatibus im-
 plicat mos barbarorum ridiculus, vocabula univerſæ
 Nationi communia antiquandi identidem, novaque
 illis ſubſtituendi. Ritus funebres iſtius conſuetudinis
 ſunt origo. Nolunt Abipones ſuperelle quidpiam,
 quod vita ſunctorum memoriam refricaret. Hinc vo-
 cabula apellativa, quæ ſcum mortuorum nominibus
 aliquam referunt affinitatem, mox abolentur. In S.
 Hieronymi oppido tabe confectus eſt Abipon juvenis,
 cui nomen *Hana* fuit. Eadem vox *acum*, vel *ſpinam*
 ſignificaverat id temporis; Sed mox a morte adole-
 ſcentis vox *Hana* abrogata eſt, illique ſubſtituta: *Ni-
 chirencate*, quod dein *acum*, denotaret. Primis,
 quos Abipones inter egeram, annis quotidiana fuit
 interrogatio: *Hegmalkam Kahamátek*? Quando erit bo-
 um occiſio? Aſt ob Abiponis alicujus obitum vox
Kahamatek interdicta eſt, & illius loco: *Hegmalkam
 négerkata* dicere, præconis voce jubebantur omnes.
 Vocabula: *Nihirenak* tigris cum *Apañgebak*. *Peúe* Cro-
 codilus cum *Kaeprbak*. *Kaáma* Hiſpani cum *Rikil* permu-
 tarunt, quod hæc cum nominibus recens vita ſunctorum
 Abiponum ſimilitudinem nonnullam referrent.
 Taceo plurima alia ejuſmodi. Inde eſt, quod voca-
 bularia noſtra lituris ſcatuerint, cum antiquata voca-
 bula ex illis identidem expungenda, novaque inferen-
 da fuerint. Nova rebus nomina indere, Vetularum
 juſ, ac negotium eſt. Mirabar ſæpe, recens inventa
 ab his vocabula remotiſſimis mox contuberniis inno-
 teſcere, univerſamque nationem vetulæ unius inven-
 tionis, ac arbitrio, quin vel unus repugnaret, acquie-
 viſſe tanta cum religione, ut ſummi æque ac infimi
 neſas putent vocabulum abolitum porro enunciare.

His aliud, quod linguæ hujus ſtudium diſcenti-
 bus aggravat, accedit. Ad nobilitatis gradum

promoti Hécheri, & ncláreykaté audiunt, ac ipso sermone a vulgo se distinguunt. Verbis utuntur ple-
rumque iisdem, sed literarum jam interpositu, jam
additione adeo transformatis, aliud plane linguæ ge-
nus ut esse videatur. Virorum, qui ad hanc nobi-
lium classem pertinent, nomina in *Lu*; scæminarum
(Nam & istæ his honoribus initiantur) in *En* desi-
nunt. Quam ipsam syllabam, si cum illis, vel de
illis loquaris, verbis, substantivisque adjicere oportet.
Hanc sententiam: *Iste equus est possessio Capitanei De baya Kaykin.* Lingua vulgari sic efferet Abipon: *Eno ha abé, pegak Debayakaykin lela*; Lingua Hécheri autem dicen-
dum: *Debayakaykin liliu.* Plebejum adventantem salu-
tant: *Là nauichi?* Jam venisti. *La naïuè*, jam v eni,
alter reponit, Si veniens sit nobilis, salutandus est :
Là naïurin Jam venisti. Ille cum fastu, & magnifica
vocis modulatione: *La naïuerinkie*, respondet. Variæ
syllabæ verbis vulgaribus vel adjectæ, vel interjectæ
sermonem reddunt adeo obscurum, ut lingua prorsus
diversa loqui nobiles videantur. Quid, quod & iidem
vocabula sibi interdum propria vindicent, quibus, qui
de vulgo, sibi fere supersedendum putant. Sic: Ple-
beji matrem *Larè*, nobiles *Licbiá*. Filium ille *Laétaaras*,
isti *Illalék* apellant, ut cætera taceam. Apud Abipo-
nes Yaaukanigas, cæteris arrogantiores, scæminarum,
puerorumque sæcem nobilium ritu ad pompam loqui,
sæpe indignabar. Quidam & risus ciendi gratia hunc
Hécherorum stylum affectant. Nos seu in rerum di-
vinarum explanatione, seu familiari in colloquio lin-
gua vulgari, quippe omnibus perspecta, utendum
nobis, putavimus.

Triplex esse Abiponum genus, dixi: *Rükabe. Na-
kaikétergebe. Yaaukanigas.* Eadem omnibus lingua. Sin-
guli singulos intelligunt, a singulis intelliguntur. Vo-
ces

ces tamen peculiares in quavis istorum classe deprehendas. Rūkahe culices : *Ayre* ; Nakaiketergehe : *Aparāye* nuncupant. Utrumque nomen culicibus bel-
le congruit ; *Ayre* enim multos significat, *Aparāye* a
napāra derivatur, quod stoream, qua pro testō utun-
tur, denotat. Tanta enimvero Abiponum in fini-
bus culicum est frequentia, ut iis non tegi solum, sed
& opprimi incolæ videantur. *Bibere* apud Rūkahes
neēt, apud Nakaiketergehes *nanām* est. Isti caput *Lap-
nañik* ; Illi *Lemañas* dicere malunt. Jaaukanigæ in
verborum usu jam hos, jam illos imitantur ; In qui-
busdam tamen ab utrisque differunt. Lunam vocant
cæteri *Grauk* ; Isti vero *Eergraik* Stellam per antono-
masiam appellant. *Iris* ab aliis *Oábetà*, a Jaaukanigis
Apich dicitur. Omitto plura ejusmodi. Sed quanta
quanta hæc varietas, difficultatis parum, nihil admi-
rationis affert ; Tot gentibus Teutonica in usu est
lingua, & quantum hæc non dialecto solum, sed &
verbis passim per provinciam variat. Equum hi
Pferd ; Illi *Ros* ; Alii *Gaul* appellant. Quantum He-
truscus a Mediolanensi, Sabaudō, Veneto differt ?
Quantum Castellanus ab Arragonē, Bático, Navarro,
Valentino ! Verum ut ingens, quod Americanas in-
ter linguas intercedit, discrimen luculentius pateat,
aliquot illarum paradigmata corollarii loco adnectam.

CAPUT XVIII.

Variarum Americæ linguarum specimen.

Risi persæpe multorum interrogatiunculam: Quem sonum ederet Americanorum lingua? avidius, quam sagacius ex me quærentium. Infederat scilicet rudium animis opinio, per immensos terrarum tractus innumerabiles Americæ populos uno omnes ore loqui. Verum jam alias dixi, non modo singulas Americæ provincias, sed singulas quoque provinciæ cujuslibet nationes propria sibi gaudere lingua, quæ a reliquis toto plerumque differt coelo. Discrimen istud oculis, auribusque exploratum ut habeas, en signi crucis Romano ritu formandi methodum in quatuordecim Americæ linguis! Binas istarum, Quaranicam scilicet, & Abiponensem ipse calleo, atque annos omnino octodecim exercui. Reliquas focii, qui alios inter Indos incanuerunt, me poscente adnotarunt. Si, quotquot Americanis sacram navarunt operam, socios omnes idem rogitaſsem, linguas centenis fors non pauciores his in commentariis jam exhiberem. Habeo, de quibus te præmoncam, paucula. Hispanis, lusitanisque solenne est, duplicem semper crucem formare. Primum enim frontem, os, ac pectus Germanorum more cruce signantes: *Por la señal de la santa Cruz de nuestros enemigos libra nos Dios nuestro señor.*
Per

Per signum S. Crucis de inimicis nostris &c. ajunt, quod pie præfati manum fronti, pectori, utrique humero, ut latinorum mos fert, applicant, ac: *En nombre del Padre, y del hijo, y del Espíritu Santo, Amen.* In nomine Patris, & filii &c. dicunt. Duplicem hanc crucis formam Hispani *perfigurare*, y *santiguarse* se signare, & sanctificare, vocant. Hispanorum ritui Indos conformari oportuit. Hinc versus primo loco linguis Indicis expressos: *Per signum S. Crucis &c.* Secundo loco: *In nomine Patris &c.* Significare, noveris. Literas *Ch* more item Hispanico scias pronunciari. Hinc dum legis: *Nachabèt Naschabèt* dicendum est. Ne mirare, si *Dios. Cruz, Cruzú, Cruspa, Espíritu* santo voces vel Hispanicas, vel ex Hispanicis detortas hic identidem deprehenderis, carent equidem vocabulis propriis Americani, quibus *Deus, Crux, Spiritu, Sanctus* rite exprimi queant, Norunt Crucem alii alii Deum lingua patria nuncupare, nemo Spiritum, sanctum,

In 32 Oppida distributi Quaranii sic ajunt:

Per signum S. Crucis &c. I. Santa Curuzù raan-
gaba rehe oreamotareymbara agui orepiçirò epè

Tupâ oreyara

In nomine Patris &c. Tuba, hæ Tayra, hæ Espiritu santo rera pipé. Amén.

Adverte signum ~ literam per nasum ~ per guttur ~ per nasum, & guttur simul pronunciandam esse, monet. & apud Hispanos litera Z æquivalet,
Cmu

Cum Quaranica lingua non præpositiones sed postpositiones habeat, utraque Crucis formula sic sonat.

I. Sanctæ Crucis signum per nostris inimicis ab libera nos Deus Domine noster.

II. Patris, & Filii, & Spiritus sancti nomine in. Amen.

Abipones equites.

I. Kaána nachahét santa likinánala oahayégalgè gnaágroá Dios Gnoakára.

II. Men Lakalátoét Netà, kat Naitarát, Kachka Espiritu santo. Amèn.

Mocobies, seu Amòkebit duobus in oppidis. Equites

I. Kena Letanèk santa Latizenfaníat Gdomariti Kenoà nokiatedofba Dios Gnoakodo.

II. Keleníat Neta, Oka Ilialek, Oka Espiritu santo. Amèn.

Nora. Litera r̃ uti apud Abipones, nec ut R, nec ut G, sed ut mixta ex utraque enunciatur.

Tobas, seu Nátakebit, Equites uno in oppido.

I. Tigága Laanèk santa Lottisdagáñadak Nífontiagà Kanalatagaua Abockiakatit señor Okkomi.

II. Lettaà, Llalèk, Espiritu santo Leenagàt. Amen,

*Mbayas, seu Eyiguayegi, Quaykuru, vel Oaekakalër
Equites uno in oppido.*

I. Santa Nikenaganagalatè liguága talo Konogoa
temà Konoelgódódipi ákami Dios Konibotàgodi.

II. Tigi Liboonágadi Eliódi, liónigi, ninága Espi-
ritu santo. Amen.

Ecquid hæc lingua svavis, mellea, cæterisque blandior videtur? A literis *F* & *R* abhorret. Literis *D* *L* & *G* abundat. Sed, qui hac lingua utuntur, Mbayæ ante reliquos Barbaros Barbarissimi, Athletici corporis, bellicosi, cunctisque formidabiles. His solis strenuitatis gloriam tribuunt ultro Abipones, etsi quosvis alios Paraquariæ populos præ se aspernentur. Adverte præterea, quatuor has linguas Abiponum scilicet, Mocobium, Tobarum, Mbayarum eadem olim matre natas fuisse. Id nemo nostrum in dubium revocat. Verum superi boni! quanta has inter sorores hodie dissimilitudo! Quam diversa lineamentorum conformatio! Crucem Abipon vocat: *Likinranala*, Mocobi: *Larizenranrat*. Toba: *Lottisdaganadak*. Mbayæ: *Nikenagana galate*. Quid dissimilius usquam? Signum Abipon appellat: *Nachabet*, Mocobi: *Lesanek*. Toba: *Laanek*. Mbaya: *Liguaga*. Ingens sane duarum vocum metamorphosis, sed nobis Europæis neutiquam miranda, quippe qui novimus: Illyricam linguam Bohemicæ, Slavonicæ, Croaticæ, Rascianicæ, Russicæ, Polonicæ, Vindicæ, Carniolicæ matrem extitisse; Latinam Italicæ, Gallicæ, Hispanicæ, Lusitanicæ, Catalaunæ, Forojulensis, Sardinicæ; Germanicam Flandricæ, Svecicæ, Danicæ, Helveticæ &c. Ast quam dissimiles ejusdem matris filiæ! Germanus Belgam, Carniolus Russum, Italus vel Hispanus Gallum, nisi Oedipus sit, loquentem ægerrime intelliget, & divi-

nan-

nando solum loquentis animum assequetur. Navigavimus anno 1748. cum svecis liburno Ulyssiponem; Anno 1769. cum Danis ex portu Gaditano in Italiam. Isti patrio usi sermone nobis Austriacis quot verba, totidem ænigmata protulisse videbantur. Sed jam ad linguarum ipsa origine a se discrepantium contemplationem progrediamur; Quæ cum mihi sint peregrinæ, parentheses multas porro ne metue.

Lules, & Yssitines pedites duobus in oppidis. Hæc illorum lingua Tonocotè vulgo dicitur

I. Santa Cruz Yapsaps tayulè Enunupçen uà tac: sèsi çen.

II. Pe, Kuè, Espiritu santo uètplè. Amen.

Vilela (Raregrânraik Abiponibus) Passain, Chunipi,
pedites duobus in oppidis.

I. Santa Cruz udcebeb rurup Gosagpilet Nakis
tum moyóm Dios Pekís.

II. Tatè, Ynakè, Espiritu santo Guatebè. Amen.

Maragnayi, Abiponibus Ychibachi Pedestris populus
uno in oppido:

I. Ta noltelxanèk santa Lekakilús Thetla Lekoix
naimameg Illabug Illakatupà.

II. Noala ku lei, uetlas lei, uet Espiritu santo
Yhilei. Amen.

Ut sonus linguæ, sic nationis perfidæ, pediculo-
sæ ingenium absurdum. P. Augustinus Castañares,
&

& P. Franciscus Ugalde Cantaber Socii nostri nostra
 etate ab illis sunt trucidati.

Chiquiri pedites in 10 Oppidis.

I. Oí n' aucipi santa Curuzis okemai zoichacu
 zoichupa mo unama pocheneneco Zumunene.

II. Au n' iri Naki Yaitotii, Ta Naki Ritotii,
 Ta Naki Espiritu santo. Amen.

Est lingua multi artificii, ac laboris, sed latissis
 mè patens.

Zamuci, quorum lingua utuntur nationes Ygaroño, Kaiporades, Karao, Tunacho, ymono, & tres alie Chiquitorum oppidis passim aggregata.

I. Guiozè santa Curuzire Tupadè arota noc ihia
 yetaddoe.

II. Daire, Abire apo, enapò Espiritu santo aha
 iru. Amen.

*Lingua Quichua, quam alias linguam del Cusco appellant
 non in Peruvio duntaxat, sed & in finitima Tucumania Vulgo usitata.*

I. Santa Cruspa unanchanraicu acaicu cunaman-
 ta Guespichi huaicu Dios.

II. Dios Apuicu Yayap, Churib, Espiritu santo
 sutimpi. Amen.

En undecim linguarum, quarum in Paraquaria
 usus, Specimen! utinam & cæteras, queis Pampas,
 Serranos, Patagones, Charruas, Payaguas, Malbala-
 es, Guanoas, Quanas, Calchaquies, Quayaguís,
 Qua-

Quakis &c. uti novimus, a sociis meis, qui illas cal-
luere, describi curassem. Tres, quæ Mexicanis in pro-
vinciis vigent, subnecto.

Lingua Cochimi in California vulgaris.

I. Santa Cruz makiguá magæ temedegua ba-
pac pakamadèn Dios Wavabapà.

II. Dios áe Ijem, Vifajem, Espiritu santo maña
juann Amen.

* Adverte, literam J Yota H instar cum aspira-
tione proferri.

Lingua Waicurà Ejusdem Provincia.

I. Akatui tipichèu tè santa Cruz pèn Kepeta-
kuriu kepe kakuña Dios Urekepe tuyakakéne.

II. Tiè tè Tiàre tipicheu; tè Tichánu chie, Tè
Espiritu santo chie. Amen.

Hæc lingua asperrimo literarum K & T con-
cursu identidem crepitans, ut auribus, labiisque mo-
lesta, sic vel ad lemures terrendos aptissima cui non vi-
deatur?

Lingua Mexicana in Irocatzin usitata.

Per Signum S. Crucis &c. omittunt.

In nomine Patris &c. In Dios Itatzin; in Dios
Ipiltzin, in Dios Espiritu santo ma Xichiva. Amen.
De linguis, quibus in Sonora, in Cinaloa, in aliis
Mexici provinciis utuntur indigenæ, nil adnotatum
habeo,

habeo, etsi Veteranos Missionarios illarum scientissimos in Hispania habuerim aliquamdiu contubernales.

Hæc postquam attentius perlegisti, quantum Americanas inter linguas interfit, perspexeris utique. Plerasque illarum non dialecto sola, sed ipsa prorsus radice differre, aliasque aliis e fontibus ortas fuisse periti existimant, qui vocabulorum, quæ variaz utuntur gentes, anatomen curatissime suscepunt. Ex innumeris Americarum linguis pauculas duntaxat Europæorum auribus delibandas porrexì. quidsi cæteras in medium adferrem, quæ in Provinciis Peruviana, Chilensi, Quitensi, novi regni Granatensis, in Brasilia, Maragnone, Cànada, Florida, Virginia, Acadia, in tot vastissimis Americæ insulis ad immensa litora fluminum Mississipi, S. Laurentii, Amazonum, Orinoci &c. Tot inter Barbarorum gentes etiamnum supersunt? Linguarum multitudinem spectares, fide, prope dixissem, & numero superiorem. In Babylonica confusione duas supra septuaginta linguas extitisse Divus Hieronymus refert. In utraque America tot extant, ut illarum seu numerum, seu nomina etiamnum ignoremus. Omnium consensione laudatus Antonius Vieira noster Regius Romæ, & Ulyssipone aliquamdiu Concionator, demum Brasiliæ, Maragnonizque strenuus Apostolus, dum in urbe Maragnonica S. Ludovici in festo Pentecostes seculo superiore ad populum verba faceret, palam edixit: *In litoribus fluminis Amazonum, quæ incolis confertissima, ad annum 1639. usque, centum quinquaginta linguas fuisse detectas; Labentibus dein annis novas identidem & nationes, & linguas innovasse.* Ex uno fluminis unius angulo facilis erit ad immensa Americæ spatia conjectura. Explodendi potius, quam refellendi sunt, qui linguam

lars ll. o com-

communem, ubique locorum vulgatam, vulgaremque populis omnibus in America Australi (uti Malayisia lingua in magna ad orientem solem India) vigere perperam affirmarunt. Quæ enim, amabo, communis illa lingua? quo nomine vocatur? Nos equidem, quibus istic comæ, barbæque incanuerunt, illam etiamnum nescimus. Quæ si suppeteret, gratulandum magnopere foret Missionariis; Nam illa sola imbuti docendis Paraquariis, Chilenfibus, Peruvianis, Quitensibus populis sufficerent, ac molesto alias, aliasque linguas discendi onere levarentur, quoties alias, atque alias gentes suscipiunt erudiendas. Quid si linguæ universalis nomine Quichuam intelligant? Illam enim linguam Generalem Peruvii nuncupare consueverunt. Haud inficior, hanc ab Indis, & Æthiopibus, qui Hispanos inter versantur, quin & ab Hispanorum vulgo in Peruvio, in confini Tucumania, in Quito usurpari passim; sed eandem penitissime ignorari a plerisque omnibus Americæ Australis incolis, a Chilenfibus, Brasiliis, Paraquariensibus, certum omnino nobis, & exploratissimum. In Chaco universo, tot nationum seminario, ecquis tandem Quichuam vel de nomine novit? Nisi forte captivus apud Tucumanos eam condidicisset aliquando. De Quarantica lingua id jure affirmavero, illam non Brasiliæ modo sed & vicinæ Paraquariæ latissime, longissimeque dominari, quamvis utrobique numerosas, quæ illam penitus nesciant, nationes deprehendas. Quarantica a Brasiliensi, qua Indi Tupies utuntur, haud multum sane differt. Discrimen, quod utramque inter linguam intercedit, pauculos intra dies perdiscas. Quotiescunque Quaranii H adhibent, Tupies illud per Zeta efferrunt. Sic isti: *Mbozapý* dicunt. Illi: *Mbobapý*, quod *tres* significat. Quaranii lintrem *Ygà*:
 •Bra-

Brasili: *Ygara* vocant &c. Grammaticam Brasiliæ linguæ a Sacerdote nostro Josepho Anchieta Brasiliæ Apostolo, &, ut passim dicitur, thaumaturgo (Il-
lius virtutes dudum heroicas, & eminentes Vatica-
num declaravit) concinnatam mihi Quaranicam con-
discenti magno usui fuisse lubens fateor, etsi alias
a Patribus Ruyz de Montoya, & Restivo typis
datas neutiquam neglexerim. Verum satis super-
que de linguis Barbarorum. Jam ad nuptiales,
conjugales, genethliacos, funebres, medicos, vena-
torios, aliosque gentilitios Abiponum ritus mihi
properandum. De militari eorum spiritu, & quæ ad
militares expeditiones pertinent, post hæc multis
capitibus prolixè disseram. Bellum equidem princeps
Abiponum negotium, quamvis illos prædatoribus re-
ctius, quam bellatoribus putem adnumerandos.



CAPUT XIX.

De Abiponum nuptiis.

Quot nationes, totidem prope Connubiorum ritus Americanis in historiis deprehendens, facilius ut sit eos ridere, quam numerare, vel narrare. Vix tamen hoc in genere quidquam inter Abipones detegas, quod aliis, ubi ubi demum, Gentibus non fuisset aliquando usitatum. Ex dicendis id palam fiet. Abipones, quod alibi dixeram, non nisi confirmata jam ætate ad nuptias adspirant. Raro matitum inter illos videas, qui quinque minimum lustra vivendo non exegisset. Nemo omnium illos sibi imitandos putat, qui primam suam ætutulam devovent Hymenæo. Neque puellam, quæ anno vicefimo proxima non sit, nupturire audias. Permultæ pudicitiam tanti faciunt, libertatemque suam, ut parentum duntaxat imperio, non nativa propensione in thalamum consentiant denique. Romani adolescentulas teneriores pro conjugio ambivere vel idcirco, quod procedente ætate earum integritati labem timerent. Id periculum, quin & periculi suspicio longissime profecto abest Abiponensibus a fœminis, pudoris sui perinde, ac vitæ acerrimis semper custodibus. In vagas effundi libidines, a maribus quoque omnino alienum. Hinc adulter, scortum, incestus &c. Ut probrosa Europæis, sic inaudita Abiponibus nomina. Quæ non bipedum mo-

03

fucci, & vigoris plena, proceritatem eximiam, artus robustos, ingenia vivida, tardam, vegetamque senectam, vitæ diuturnitatem incredibilem Seri conjugii fructus esse, probavi. Serò nubendi consuetudinem tum alibi passim, tum apud Carmanos, finitimum Indis populum, viguisse patet ex Strabone L. 15. Ubi ait: Neminem uxorem ducere, nisi prius hostis caput a se amputatum Regi attulisset, Hostium capita detruncare adultiorum est fere, raro juvenulorum. In tot Quaraniorum millibus paucos insigniter proceros, aut admodum vivaces deprehendi. Ratio in promptu est: Masculi septimo decimo, feminae quintodecimo ætatis anno conjugium inire solent; Quid si illo necdum inito jam lascivirent? Multa hic, quæ in mentem veniant, consulto prætereo.

Si cui Abiponum sponfam deligere visum, cum puellæ parentibus de pretio, quo illam sibi comparet, pacisci oportebit. Quaterni, vel plures equi, globulorum vitreorum, aut e limacum concha fictorum fascēs, vestis e lana varii coloris tapetis Turcici instar contexta, hasta mucrone ferreo præmunita, alia id genus utensilia a sponso persolvuntur. Abipones namque, ut Cæteri omnes Indi, quorum curam gessimus, monetam nec norunt, nec possederunt. In pluribus equidem Hispanorum per Paraquariam urbibus nullus plane pecuniæ usus. Rerum, quas natura profert, permutatione mercatus omnis istic definitur. Imperiales argenteos, qui Abiponibus bello adhuc vigente ex Hispanorum e Peruvio venientium spoliatione olim obtigerant, jam lapidis, jam securium ictibus in bracteas attenuarunt, quas subinde ceu monilia e collo suspendebant alii, alii freno, lituove suo ornando impende-

debant, Plurimis ab hinc annis currus argento Peruviano onustos solitario in Campo diripuerant, aurigis, custodibusque primo impetu confossis. Quivis, quantum equus capiebat, fugiens asportavit. In urbe S. Fidei obvius Hispanus palliū rubrum suis detractum ex humeris Abiponum cuiuspiam propinaverat, qui nil titubans pro illo duo scutorum Hispaniensium, quatuor scilicet florenorum nostratium millia confestim porrexit. Hæc enim summa argenti saccis singulis (quos Zurroneſ vocant) claudi consuevit a Peruvianis. Adeo Abipones monetæ usum, valoremque ignorant. Cæterum ab his Barbaris uxores emi reculis quibusvis pecuniam suppletibus haud est, quod miremur. Idem enim apud Græcos, Hebræos, Romanos, aliosve aliquando more receptum. Jacob certe tot annorum servitute Liam, Rachelemque Sorores a Labano earum patre demum extorsit. Genes. 29. c. David centum Philistæorum occisione Michol Saulis filiam est meritus. 1 Reg. 18. Saxones, & Burgundiones trecentis solidis uxorem sibi a parentibus coemebant. Et si Herodoto fides, apud Assyrios virgines nuptiis maturæ in foro prostabant venales. Frotho tertius Danorum Rex decreto publico victis a se Ruthenis, ne quis eorum uxorem, nisi emptam, duceret, præcepit, mariti in illam fidem minus desultoriam fore ratus, si noverit novam sponsam quovis pretio sibi esse comparandam, ut Saxo libro 5. refert.

Frequenter accidisse, memini, ut, quæ parentes inter, ac sponsum pacta, transactaque fuerant, puella rescindat, ac pertinacissime non modo qualecunque connubium recuset, sed ne mentionem quidem illius ferat. Complures puellæ nuptiarum metu fuga dilapsæ per sylvarum, lacuumve recessus

multis noctibus Latuere; Minusque tigris ubique infestarum insidias, quam intentatas nuptias reformidare videbantur. Istarum quædam ad sponsi ædes jam jam deducenda ad sacram refugit ædiculam, istic sub ara latitans sponsi obtrusi minas, expectationemque elusit. Nuptialium apud Romanos rituum pars fuit non ultima, ut sponsa obluctans materno a sinu, domusque paternæ liminibus simulata vi abstraheretur, ne scilicet nuptiis inhiare, sed ad eas cogi invita putaretur magna verecundiæ apud omnes commendatione, rectius dicam, simulatione. His affinia de Grönländis legeram. Si quis istorum ad conjugium aspirat, per duas vetulas facundia celebriores negotium agit suum. Hæ puellam, quam sibi designaverat, a parentibus deponunt. Illorum consensum ut primum sponsæ nunciant, illa solutis mox crinibus vultum contegit, fictisque, verecundiæ famam aucupans, diffundit lacrymis, ac nullum facit tergiversandi, lamentandique finem. Verum a duabus illis nuptiarum conciliatriculis ad sponsi ædes raptatur verius, quam ducitur; Multis lenociniis, blanditiisque delinita illum voti compotem reddit denique, ac maritum pronunciat suum, vultu lacrymis, animo solatiis innatante. Aliquot post diebus ceu conjugales aspernata amplexus in paternam refugit domum. At sacco inclusa per easdem vetulas ad mariti ædes bajulatur. Felices Europæi! quibus ad uxores seu consequendas, seu domi retinendas nec sacco, neque tot artificiis opus est. Hanc puellarum, dum de nuptiis agitur, tergiversationem apud Romanos, ac Grönländos, fictam, simulatamque, apud Abipones sinceram, seriamque fuisse, nunquam dubitavi, quippe de illarum honestate Certissimus.

Fingamus jam a sponsa Abiponensi ratam haberi parentum suorum de Conjugio ineundo voluntatem, neglectis aliis, quæ alibi solennes, ceremoniis illa ad sponsi tentorium deducitur non sine pompa. Octonæ puellæ vestem elegantiores tapetis instar expansam elatis brachiis, ceu umbellam sustinent, sub quæ defixis humo oculis, mæsto silentio, Verecundiam spirans incedit sponsa, circumfusus de more spectatorem. Amanter a sponso accepta, amiceque salutata a contubernaliis paternas in ædes eodem, quo venerat, modo, ac comitatu reducit, unde secundo, ac tertio itinere cucurbitam, ollas, cantharos, reliquam profilo texendo supellectilem itidem sub umbella ad sponsi tentorium deportat, post perbreve collocutionem ad parentum ædes regressura, ad quas novo item marito seu cibi capiendi, seu noctis agendæ gratia quotidie est itandum. Ea enim sollicitudine matres filias curant suas, ut eas a se avelli etiam nuptas minime patiantur, neque alienis arbitriis illico relinquunt. Perpecta generi sui probitate, vel nata jam prole distincta vivere in domo illis concedunt denique. Pauculi hi nuptiarum Abiponensium sunt ritus, quos tamen virorum compotatio interdum reddit jucundiores. Aliquando militare tympanum a puero tentorii alicujus apici insidente pulsatur, nuptiarum præcone. Quod sponsa, dum ad sponsi domum deducitur, umbella tegatur, id Romanorum moribus consentaneum, qui feminarum, dum marito tradebantur, capita velabant, seu flammeo, lutei coloris velo obnubebant, unde nuptiæ dictæ. Alios nuptiarum, quibus Americani alii utuntur, ritus missos facio præter unum, cujus Pater Josephus Gumilla in suis de fluvio Orinoco commentariis meminit, cujusque citra risum meminisse nunquam potui. Esse nimirum istic nationem aliquam, ait, quæ puellis vetulos, ve-



tulas adolescentibus despondere, ac in matrimonium dare consuevit: Has ceu moderatrices, illos ceu moderatores petulantiae juvenilis. Juvenes enim ætate, ac imprudentia pares connubio jungere, stultum stulto associare est, inquit. Rationes præterea, quibus ad claudicans hoc cum ætate imparibus conjugium probandum ducuntur, alias addunt, sed a me nequaquam memorandas. Illud juvenum cum vetulis matrimonium tyrocinii instar est, quo aliquot post menses defunctæ pares paribus ætate nubere permittuntur. Legis absurdissimæ observationem dum vetuli, vetulæque incredibiliter apud adolescentes urgent, quidni negotium agere suum videntur? Id sane Guilla historicus affirmat.



C A P U T XX.

De Abiponum conjugio.

Uxorū seu multitudinem seu repudiationem Hebræis, aliisque gentibus quondam, Mahometis sectatoribus, ac sinensibus etiamnum familiarem novimus. Græci, Romanique non omnes illam respuerunt, nec semper. Quid mirum apud plerosque Americæ Barbaros polygamix, repudiique abusum invaluisse, exempli vetustate corroboratum. Haud tamen, quod jure suspicias, universa Abiponum natio aliarum gentium vestigia premit. Major illorum pars una, eademque in conjugē acquiescere solet. Quamvis haud distheat, uxorum repudiationem, perinde ut apud Europæos indusiorum mutationem, crebram iis esse, novi tamen complures, qui eandem per omnem ætatem retinuerunt uxorem. Quod si quis eorum vel sui impotentior, vel rerum potentior apud suos conjuges sibi adsciscat plures, illas per varia multis a se leucis remota contubernia distributas habere solet, & per anni intervalla jam hanc, jam aliam invisit. Si quando plures, quod rarissimum, iisdem in ædibus alat, quotidianas earum de Gubernandæ familiæ prærogativa, de mariti benevolentia altercationes, pugnas, pugnosque sibi mutuo impactos ecquis numeret? *Nejerenta*, ut superius adnotavi, peculiare est vocabulum, quo duas pro marito luctari uxores significant. Nam si aliam ob causam pugnatur, *roclakitápekera* dicunt.

Sed jam repudii uxorum rationem videamus. Frequens id non modo, sed & insolens apud istos, quod pro arbitrato, impune rejiciunt, quas conjugii vinculo sibi prius adstrinxere, ut adeo de veritate matrimonii barbarorum jure dubitent Theologi, cum vinculi conjugalis perpetuitate id videatur carere. Displiceant uxores, satis est. Res sibi suas habere jubentur. Nulla præterea seu culpa, seu causa inquiritur; Voluntas uxorem fastidientis mariti stat pro ratione. Quamvis enim Græcis, Hebræis, Romanis repudiandæ conjugis libertas concessa, certis tamen legibus coercita suos intra limites stetit, judice uxoris culpam, maritique jura arbitrante. Apud Abipones ipse maritus actor, ipse judex, & arbiter nemine obloquente. Non longe quærenda est repudii causa, neque ullius autoritate approbanda. Demulceat mariti oculos alia, cui plus venustatis, veteranæ conjugii migrandum erit vel solo hoc nomine, quod vel forma evanescens, vel ætas provectior eam accusaverit, etsi a conjugali fide, a morum integritate, a præstitis solerter obsequiis, ab edita sobole commendetur undique. Nova oculis blandiens venustas ex mariti memoria delet superiorum temporum officia, novasque mox nuptias perſuadet. Nemini potentiorum jus, animusve seu tutandi repudiatam, seu coercendi repudiantem. Oblata tamen compotatione, ubi in temulentorum animis injuriarum memoria recrudescit, propinquitate sanguinis conjuncti probum repudiatæ mulieri illatum ferociter solent vindicare. Sæpius etiam fœminæ nuper ab alio rejectæ ab alio ducuntur confestim. Aliquæ tamen, quæcis forma tristior, ætas productior, maritum diu nequidquam præſtolantur novum, tumulto scilicet, quam thalamo aptiores. A fœminis junioribus divinam legem mirifice probari, optarique & suum

um, & maritorum baptismum, quod per hunc conciliata conjugio perpetuitate maritorum in mutandis, augendisque uxoribus libertas porro cohibeatur, alio loco dixi. Ex tanta repudiationis licentia cruentas prolium strages, & nationis universæ diminutionem incredibilem enasci, pariter memoravi alias. Per triennium pleraque matres lac præbent proli, ac a marito abstinent. Hic moras pertæsus priori resecta aliam sibi thori sociam adiscit. Ad prævertendum igitur repudii periculum proles mox a partu, quin sæpe partu non expectata interimunt suas, ut lactatus diuturno onere expeditæ operam dare queant marito. Confirmatis opera nostra ad Divinæ legis normam Abiponum conjugiiis, nexuque semper duraturo firmatis, abolita demum est matrum suos in fœtus crudelitas, copiosiore mox sobole natio universa se locupletatam mirabatur. Patuit sane, quantum ad generis nostri incrementum, ad domesticam familiarum concordiam intersit, eliminata repudii, polygamixque licentia maribus singulis singulas duntaxat uxores concedi. More receptum erat Abiponum in Coloniis, ut conjuges eodem tempore, quo sacris undis lustrabantur sacra in ædícula, conjugalem & Christiana disciplina consensum nobis, testibusque præsentibus renovarent. Vix risum tenui, dum vetula rugis liberaliter confita marito mediocris ætatis, formæque liberalis perpetuam fidem, societatemque maxima vocis contentione coram sacerdote eam interrogante spondit, ad æternam certissime viduitatem damnanda, si idem eandem maritus, ut poterat, respuisset.

Multa reprehensione digna, non pauca item, quæ laudem mereantur, in Abiponum adhuc barbarorum conjugiiis deprehendas. Referam potissima,
Quam

Quamvis primus duntaxat, secundusque cognationis gradus e Pontificum Romanorum paterna indulgentia Indorum matrimonium dirimat, Abipones tamen naturæ solius admonitu, majorumque suorum exemplo nuptias cum quomodocunque cognatis recusant omnino, & angue pejus averfantur. Debayakaykin illorum Dux Clarissimus ad reliquum uxorum gregem binas sorores sibi adjungere est ausus. Quod facinus licet omnes execrarentur, nemo tamen unus fuit, qui illi vel succenseret, vel illum imitaretur. Illius authoritati tribuendum aliquid, connivendumque putarunt. Cambyfes Rex, dum de sorore ducenda cogitaverat, a proceribus seu timidis, seu stupidis id responsi tulit: Nullam equidem extare legem, quæ connubium cum sorore indulgeat; Non ignorare se tamen aliam legem: Quod Regi Persarum integrum sit facere, quidquid allubuerit. Hanc de Rege potentissimo historiam Debayakaykino Abiponum Regulo, quantum poteris, accomoda, qui ut bellatores permultos Hispanis profligandis in campo opposuit, sic præter nationis suæ morem Bellonas conjuges nulla propinqui sanguinis habita ratione sibi plures indulgere est ausus, indignantibus cunctis, nemine refragante. Hanc cognationis reverentiam, qua a nuptiis absterrentur, Paraquariæ populis plerisque omnibus a natura insitam esse, experimentis minime dubiis exploratum habemus. In illa me sententia magnopere confirmavit Caziquius Roÿ barbarorum in Mbaeberà sylvis primipilus, qui, dum circumfusæ multitudini religionis capita exponerem, facta de incestis consanguineorum nuptiis mentione, in has eruperat voces: Bene ais, mi Pater! Connubium cum cognatis res est profecto turpitudinis plenissima. Verum id jam perspectum nobis, & a majoribus nostris acceptum. Is illorum hominum sylvestrium sensus, etiam multiplicare

care uxores, easque, quoties visum, a se repellere nec rationi absolum, nec indecorum sibi putent. Quam acerbo in incestos amores odio ferantur Abiponenses fœminæ, eventus, quem refero, luculentissime docebit. Abiponum quispiam adhuc puer sacro latice tinctus, ac Chrysostomi nomine initiatus postquam per Hispanorum prædia sæpe, diuque cum intima, & infami hominum colluvie versatus esset, eos imbibit mores, ut sui jam dissimilis Barbaros ipsos improbitate superaret. Ad nostram Rosarii Coloniam postliminio redux quidquid turpitudinis alibi didicerat, hic imitatione exprimere conabatur. Ausus est cognatam mulierem, ætate florentem, ac nuperrime marito, qui in velitatione occubuit, viuatam ad flagitium pellicere. Quamvis virtute mulieris, quam opprimere tentabat, fortissime repressus cogitata haud perfecit, nefandi tamen conatus fama illico pervulgata contubernalium omnium animos furore accendit, facinus inauditum, incredibile, & apud illos prodigio simillimum acerbissime indignantium. Fœmina de oppugnata sua pudicitia identidem conquerens lamentis domum implet, ac ad impudentiæ nefariæ vindictam parentes, cognatosque exstimulat suos. Nec mora: Appetente aurora armis, armatisque perstrepat omne forum. Contra petulci juvenis parentes itur, cæteris ad alios, aliosque juvandos concursantibus. Pugnatur. Hic hastis, sagittisque viri, inde mulieres pugnis, unquibus, dentibus atrociter impetunt se se. Hæc facies Trojæ, cum caperetur, erat. Verum, ut sæpe alias, tota dimicatio intra minas, ac terrores silet denique. Multa vociferatio, vulnera pauca, uti in tempestatibus fulmina tonitribus semper rariora. Tranquillatis cæterorum animis vidua sui præ verecundia impositum nullum faciebat lamentandi finem. Recurrente
ani-

animo identidem probri memoria, ut contubernali-
um se subduceret oculis, fugam semel, iterumque la-
crymans tentavit, sed ab insequente sceminarum ma-
nipulo ægre domum retracta est. Cum denique nul-
lis suorum seu precibus, seu rationibus acquiesceret,
parentibus, fratribusque comitantibus rusticatum tan-
tisper discessit. Anxiam adeo pro servanda integrita-
te sollicitudinem vel in sceminis, quæ Christo sacra-
mentum dixerunt, quidni haud raro desiderant ma-
riti Europæi?

Alterum, quod in barbara Abiponum gente suspi-
ciendum utique, est integerrima conjugum fides. Hanc
nec oppugnatam, neque expugnatam usquam audias.
Mariti plures non raro mentes domo absunt, uxori-
bus in virorum contubernatio citra periculum, aut
periculi suspensionem remanentibus. Quod Græci de
Penelope Ulyssis annos viginti absentis fidissima con-
juge fabulati sunt, id verissima de Abiponum conju-
gibus historia est. Quod si tamen Abiponum cuiquam
vel minima de uxoris integritate suspitionis rimula
pateret, id tacitus non concoqueret, quin de injuria
suspectum, etsi nunquam convincendum, acerrime
ulcisceretur. Opportune eventus memini, qui ad
hoc argumentum magnopere facit. Mulierculam nu-
per Pachicæ Caziquio nuptam Abiponum aliquis in
via offendit, eques equitem. Ab illa melopeponem
poposcit; Fructibus enim onusta ex agro redibat suo.
Repullâ svavis pro peponem fuit. Nec plura. Totum
negotium quatuor verbis, momentis totidem perac-
tum innocenter. Transiens forte alter quispiam col-
loquentes eos eminus vidit, visisque, quæ libuit, af-
finxit. Crescente per hominum ora rumusculo in su-
spicionem turpitudinis tentatæ vocatur Indus, qui
præter peponem sibi desideravit, poposcitque a scemi-
na

na nihil. Excandescit ira Pachieke ejus maritus, vido adolescens ingenio, laudisque militaris avidissimus: Vocatis in armorum Societatem amicis, uxoris suæ, quod perperam sparsum, tentatorem nil tale cogitantem aggreditur. Accurrentibus suppetias contubernalibus omni telorum genere certatur aliquamdiu. Excussis pacificatorum opera armis, iterumque resumptis in arenam sæpius redeunt. Tumultuatio dies aliquot tenuit. Redintegrari tamen pax, amicitiaque inter illos minime potuit, Pachieke suspitionis tenace, altero contumeliæ semper memori. Ergo hic aspersam nomini suo labem aboliturus, ulturusque, ad insolens flagitium adjicit animum. Matrem vetulam, sororemque cælibem Caziquii Pachieke eidem equo infidentes extra oppidum conspicatus in utramque ex improvviso irruit. Puellam ex equo deturbat, & non libidinis, sed vindictæ impulsu violare nititur. Verum matre, filiaque acriter reluctantibus cum voti compos non fieret, ira percitus vetulæ matris furam sagitta consauciat. Hæc sanguine diffluens domum se recipit protinus; Luculentum in pede vulnus, quod vociferans palam exhibuit, classici instar fuit, quo ad arma evocabantur universi. Undique concurritur; His vindicandi vulneris, illis vindices reprimendi, plerisque aliis restituendæ pacis cura, studiumque erat, cujus cum spes nulla affulgeret, Pachieke cum sua & assellarum suorum familiis relicto S. Hieronymi oppido in campum remigravit postridie, ubi aliis nationis suæ Barbaris adhuc ferocibus associatus per hostiles assaultus & dicto oppido, & Hispanorum Coloniis multum sane negotii aliquamdiu faceffiverat, de quo uberiorius dicemus alibi. En! tantum ex scintilla incendium. Futilis de tentata conjugis pudicitia suspicio turbarum incredibilium semen exstitit. Dixisses, ob raptam Helenam bellum Trojanum renovari.

Inter cætera conjugum Abiponenſium decora connumerandus utique venit tenerrimus in proles ſuas amor, quem in illis alendis, veſtiendis, tuendisque palam faciunt. Equitandi, natandi, venandi, bellandique artes a prima ætatuſa ut condiſcant pueri, Patribus maxime cordi eſt. Puellæ ad domeſtica ſcæminarum officia, a matribus ſolerter erudiuntur, laboribusque, ac moleſtiis tempeſtively aſſueſcunt. Illud tamen iis vitio dandum, quod liberos parum morigeros, vel refractariolos nec verbo corrigere, minus verbere multare auſint. Alaykin princeps oppidi conceptionis Caziquius, quoties me inviſerat, filiolum quinquennem gremio ſuo inſidentem tenuit. Hic ſimioſi inſtar ſemper inquires patris vetuli jam naſum, jam crines vellicabat, jam maxillas manu quatiebat. Senex hæc inter animo geſtiens: Heus tu Pater, mihi aſcebat, hunc puerum impavidum aliquando militem, Capitaneum inſignem fore, ecquid dubitas etiamnum? Quippe qui nec me tot palmarum ducem, Hiſpanisque omnibus olim formidabilem vereatur. Idem puellus in matrem, a qua domum revocabatur, oſſa, cornua, & quidquid quiſquiliarum in promptu fuerat, jaſtare ſolebat. Hanc pueri inſolentiam, quam plerere oportuerat, bellicoſus pater intrepidi animi indicium interpretabatur, quin effuſiſſimo cachinno, atque laudibus proſecutus eſt. Nimius ſcilicet, quo in liberos feruntur, amor frenum barbarorum eſt, quo moeſtitiam illis inferre, prohibentur. Verum quis neſcit, immoderatum parentum amorem peſtem liberorum eſſe certiffimam in noſtra etiam Europa?

CAPUT XXI.

Memorabilia de foeminarum Abiponenſium partu.

Tum curioſitati Europæorum, tum utilitati conſulturus de hoc argumento, invitus licet, ſcribam paucula. Ne metue, nihil, quod ægre ferat verecundia, hic deprehendes. Neminem pigebit legere iſta, quia riſu digna aliqua; Nec pœnitebit legiſſe, quia forſitan uſui futura non nulla. Abiponenſes, aliæque equeſtrium nationum foeminae maximas in enitendo fœtu tolerant difficultates, & præter Europæarum morem diutius e dolore partus laborant. Ego quidem, dum tot annos in Paraquaria agrem, de inveſtiganda ejus rei cauſa nunquam cogitaveram. Hac demum in urbe Vindobonenſi cum Clariffimo, Cæſareoque medico Yngenhuſio de Americæ rebus familiariter collocutus didici, quod lubens antea ignoravi, ſcilicet, in foeminis junioribus equitationi crebrae aſſvetis per frequentem illam ſeſſionem, Succuſſionemque os Coccigis comprimi, ac indurari, partumque ſubinde, ut anatomes gnaris patet, reddi difficiliorem, quod alias jam memoravi. His accedit, quod Abiponum mulieres virorum more ephippiis bubulo e corio duriffimis infideant, equitandoque majorem ætatis partem agant: Quod proles noſtratibus vaſtiores in lucem edant: Quod idoneis, quæ opem ferant, obſtetricibus deſtituantur. Ars hæc & com-



munis omnibus, & omnibus ignota videtur, ut adeo repeti possit, quod Pharaoni Regi Lib. exodi cap. I. responsum: *Non sunt Hebraeae, sicut Aegyptiae mulieres; Ipsae enim obstetricandi habent scientiam.* Ea propter nec rarum, neque mirum, indas equestres biduo interdum, triduove parturire, saepiusque de illarum vita conclamari.

Didicimus, nescio, quo authore, remedium praesentissimum, & admodum parabile, quo partum promoveri feliciter, accelerarique, annorum septemdecim spatio experti sumus. Dicam paucis: Brassicae recentis, quam vulgus latinorum caules perperam vocat, folia aliquot in mortario ligneo contusa, vinoque permixta parturienti epotanda porriguntur. Sola haec potio virtute pollet tanta, ut foetus (sit vivus, sit mortuus jam) citra cunctationem, ceu nitratus pulvis admoto igne, in lucem exturbetur confestim. Certissimam hanc remedii efficacitatem historicus religiosissime affirmo; Illud tamen, medicus cum non sim, Europaeis seu suadere, seu obtrudere non ausim; Variarum enim, tamque ancipites sunt parturientium habitudines, varius item foetus in utero situs, ut Chirurgi manu interdum, medicique dexteritate opus sit eximia. Quod si tamen dictus ex brassicae foliis, ac vino potus cuiquam alteri probaretur, illius parandi methodum expono minutius. Imprimis ad cavendam abortionem diligenter ex parturiente resciscatur, num habita mensium, quibus uterum gessit, ratione partus legitimi adesse tempus existimet. Brassica, cujus folia ad partum juvandum adhibentur, illa ipsa est, quam passim Caules dulces (*süsse Kraut*) vocamus, quae minutim concisa, in dolio compressa acefcit denique (*saure Kraut*) & Germanorum in mensis quodtidia-

tidianus prope est cibus. Brassica enim, cui crispæ sunt folia (Köhl) eandem medendi parturientibus facultatem num habeat, nescio. Attendenda porro e partu laborantis ætas, ac vires. Junioribus, imbecillioribusque unicum folium brassicæ adultæ sufficit; Robustioribus, ut vim certius exerat medicina, bina, ternæve mediocria folia insumuntur.

Vinum, quo plerumque in Paraquaria utimur, ex regno Chilensi advectum coloris est purpurei, spissum, & admixta quadam dulcedine non nihil asperum. Crederem illud per vinum rubrum Budense, Agriense, Soproniense, melius tamen, ut quidem autumo, per Tyrolense suppletum iri nostris in provinciis. Quod si istorum copia non sit, vino quovis Austriaco hunc in finem citra formidinem utendum, putarem. An parturiens vinum una cum fæcibus contusæ brassicæ haurire possit, vel soleat, profecto nescio; Nunquam enim ipse coram porrexī fœminis hanc potionem, sed per alios misi. Interrogatus non raro: Num solum brassicæ succum vino commixtum, an fæces quoque brassicæ sorbere oporteat? Agerent pro arbitro, respondi. Opinor equidem solo illo e brassica expresso succo, vino commixto, partum promoveri. Succus enim ille ut ventrem, sic uterum relaxat. Fæces, brassicæ sicca, terreque portio, & ut ita dicam, brassicæ caro, alvi restringendæ potius vim habent, ut Arnoldus Villanovanus, Zacharias Sylvius medicus Roterodamensis cum aliis docent. Ingratissimi est saporis illa potio, & vix primoribus labris delibata non palatum modo, sed omnes corporis artus validissime afficit, facitque inhorrescere; Sed exhausta præ omnibus, quæ tentata alias, remediis velocius, feliciusque exoneravit parturientes. Quotidiana pro-

pe experimenta tot annorum, totus quamvis medicorum exercitus mihi obstreperet, nullum relinquunt dubitandi locum. Ad inchoandam pro Abiponibus coloniam a Rosario dictam cum Regio Gubernatore profectus Nardi, brassicæque plantas ex urbe Assumptionis attuli: Hanc parturientium: Illam a serpente ictorum medicamen certissimum. Verum brassica paulo post a bobus devorata Artemisiâ (Quam Herbam Regiam, olus Reginam, cingulum S. Joannis, Beyfus, Himmelkehr &c. appellant Botanici) aqua, vel vino coctam parturientibus bibendam exitu optatissimo, præbui. Herba hæc alias quoque saluberrima in Campis passim, oppidorumque foris sponte sua nascitur eadem, qua apud nos urtica, frequentia. Hæc parturientium remedia ut Historicus refero, non ut medicus propino.

Partu defunctæ Abiponum mulieres, ut naves in portu, extra discrimen sunt fere. Molestias, incommodaque, quæ mox a partu hujatibus accidere toties, quin & occidere eas non raro solent, rarissime experiuntur. Fœtu exoneratæ ad amnem, stagnumve propinquius recedunt, prolem, seque ipsas ablaturæ. Vix interjecta tantisper quiete quotidiana domus officia resumunt, nullo se onere eximunt, nullas aeris injurias reformidant, ad campum, & quò quò sibi visum, concedunt. Carnibus tamen abstinent aliquamdiu, & pomulis quibusdam, quæ humilibus in dumetis proveniunt, ad sanguinis, ut sibi persvadent, refrigerationem vescuntur interea. Ridet Europæas matronas, quæ aliquot a partu hebdomadibus postquam domesticos intra parietes, mollesque intra culcitra sepultæ latuerant, veluti ad vitam revocatæ in forum prodeunt denique.

Quo

Quo minus negotii partus facessit puerperis, eo plus illarum maritis. Misèramne, an risu, & quidem decumano dignam eorum conditionem dicam, nescio. Vix audis prolem in lucem editam a fœmina, videbis illico ejus maritum Abiponem in lecto cubantem storeis, pelibusque, ne asperior illi officiat aura, circumdatum, jejunantem, publico, dapibusque quibusdā religiose dies aliquot abstinentem; Illum peperisse, jures. Idem alii quoque de aliis Americæ populis scripsere. Hoc legi olim, risi, nunquam, ut tantam insaniam crederem, induci potui. Facetè magis, quam vere ritum hunc barbarorum referri, identidem suspicabar, dum denique meis apud Abipones oculis illum usu receptum spectarem. Et vero avitam hanc consuetudinem, quamvis sibi molestam, eo lubentius, diligentiusque observant, quod sibi omnino persuadeant, Patrum sobrietatem, ac quietem ad prolium recens natarum incolumitatem plurimum conferre, quin & necessariam esse. Istius rei confirmationem, quæso, auscultata. Franciscus Barreda, Regii Tucumanix Gubernatoris, in territorio Jacobopolitano Vicarius novam Conceptionis Coloniam invisit. Ad hunc, necum in foro dum obambulat, salutandum accurrit Malakin Caziquius, relicto tantisper cubili, cui eum uxoris partus nuperrimus affixerat. Barreda & mihi & astanti Caziquio tabacæ Hispanensis pulveres propinat, quos cum a Barbaro præter morem recusari videt, hunc alieno a se animo esse suspicatur; Noverat enim has narium cupedias avidissime semper alias ab illo prensari. Causam abstinentiæ ut percontarer, abs me petit. Interrogatus Abiponica lingua (Hanc enim Barreda ignoravit, ut & Caziquius Hispanicam) ecur tabacam hodie respueret? An nescis reposuit, meam heri peperisse

conjugem? quidni supersedendum mihi narium irri-
tamento propterea? sternuntando equidem in quan-
tum discrimen filiolum conjicerem meum! Nec
plura. Ad suum se, confestim decubiturus, recepit
tugurium, ne, si diutius sub dio nobiscum persiste-
ret, quid detrimenti tener patiatur infantulus.
Quamvis enim patris intemperiem in prolem re-
centem influere, credunt, ob naturalem utriusque
nexum, & sympathiam. Hinc si præcoci fato ex-
tinguatur infans, mors patris intemperantiæ tribui-
tur a fœminis universis alia, atque alia causantibus;
Jam quod mulso non abstinuerit: Quod porci aqua-
tilis carnibus stomachum onerarit: Quod aere fri-
gidiusculo flumen nando transmiserit: Jam quod lon-
giora dudum supercilia radere neglexerit: Quod mel
subterraneum, apibus pede contritis, vorarit: Jam
quod equitatione ad sudorem se se defatigarit. Id
genus deliramentis fœminarum vulgus patrem mortis
authorem impune criminatur, & quantumvis inno-
xium diris devovere consuevit maritum. Stolidissi-
mas opiniones, insanas consuetudines, quia vetula-
rum oracula, avorumque documenta, pugnacissime
tuentur. Explodêris, si te opponas. Si contrarium
doceantur a nobis: Patres ista haud intelligere, nec
didicisse unquam, impudenter reponunt. Quorum-
cunque, quæ ad religionem pertinent, rerum fidem
ab istis impetrabis citius, quam superstitionum, qui-
bus a pueritia imbuti sunt, ridiculissimarum repu-
diationem.

Corollarii loco adjicio: Aliquot post partum
horis accersunt vetulam, vetulumve ex eorum nu-
mero, quos magicæ artis peritos illi, nos vetera-
tores dicimus. Illius manu capilli pauculi in infan-
tis (Mas sit, an fœmina, nil refert) sincipite,
rese-

refecantur, ut calvitii species appareat, quod per omnem ætatem conservatur, ceu nationis suæ tessera, ac *nalemrî* vocatur, uti capite tertio memoravi. In eam rem forficulæ, si suppetant, adhibentur, quarum loco palometæ piscis mandibulâ, vel concha ad lapidem exacuta quondam usi fuere. Neque, qui primas comas resciderit infantuli, sine præmio dimittendus. Hanc secandi infantium Crinis ceremoniam Hebrææ Circumcisionis seu vestigium aliquod, seu supplementum suspicabantur non nulli, qui observatis curiose Americanorum rebus illorum ab Hebræis originem arguunt, quod a suilla carne omnino abhorreant, quod Hispani Americam primum ingressi Judæorum nomina apud Indosprehenderint, ut: *Michol, Ester &c.* Abiponem Yaaukanigam, qui Cain vocabatur, ipse novi. Verum hanc istorum conjecturam criticis discutiendam relinquo.

CAPUT XXII.

Ludi Genethliaci ob natalem masculæ
prolis Caziquii.

Insitus omnium Gentium animis adversus Principem suum amor nunquam se prodit luculentius, quam dum de nato filio, sceptri subinde hærede, laureati adsunt nuncii. Festi ignes, theatrales ludi, faustæ acclamationes, symphonicorum modulata Carmina, superbæ pictorum, sculptorumque moles, Choreæ elegantes, epulæ exquisitæ, & quæ non alia? publicam hilaritatem significant. Hanc Europæorum morem Abipones barbari, ac bellicosi pro modulo suo imitantur. Publicas diebus aliquot communis lætitiæ significationes edunt, de nato recens Caziquii sui filiolo redditi certiores. Genethliaca ut artificiosæ inventionis nihil, sic nativæ, sinceræque oblectationis plurimum habent, quin tamen petulantix, obscœnitatisve quidquam iis aspergatur. Ut primum de nato Caziquii filio rumor percrebuit, universum puellarum agmen, ramospalmarum manu gestantium festivas inter acclamationes ad infantis domum accurrit; Hujus tectum, lateraque longo circumcursantes ordine palmarum frondibus concutiunt singulæ, qua quidem percussione, natum puerum bello clarum, hostiumque fore mastigem feliciter ominantur. Ad hoc significandum palmæ usus, & reliquæ, quæ consequuntur, Cerimonix pertinent.

Fæ.

Fœmina omnium robustissima struthionum plumis longioribus, veluti semicinctio a Lumbis ad suras usque contegitur, ut araneam referat. Inde festiva hæc functio *Hawali*, aranea ab illis nuncupatur. Illi fœminæ plurimum quotidie est negotii. Nam comitantibus puellis universis tuguria percurfat omnia, ac Corio in Clavæ Herculis figuram complicato viros, quotquot singulis in domibus invenerit, verberat, fugat, insectatur, quos per viam deprehensos puellæ palmarum ramis strenne flagellant. Hac concursatione inter virorum vapulantium Cachinnos prima conteritur dies. Altero, qui proxime sequitur, die, puellis in manipulos distributis, singulæ cum singulis in foro sola brachiorum contentione luctantur. Pueri a puellis sejuncti idem facitiant. Has enim cum illis sociari, luctarive haud ferunt Barbari, de decore, verecundiaque semper solliciti. Tertio die hinc pueri, illinc puellæ ad choreas evocantur. Alter alteri porrigit manus, quibus, ut catena annulis, connexi circulum efficiunt, Vetula chorearum moderatrice crepitantem manu cucurbitam circumagente; Dumque motu turbinis celerrimo in orbem rotæ instar rapiuntur saltando, vertigine correpti per intervalla conquiescunt, interjectisque facetiis, ac cachinnis saltationem identidem repetunt, quæ quidem præter spectantium, saltantiumque patientiam nihil omnino habet admiratione dignum, artificii prorsus nihil. Quarto die fœmina, quæ aranæ refert speciem, puellis omnibus stipata totum percurrit oppidum, & quam in singulis ædibus robustissimam, lacertosissimamque mulierem putaverit, ad luctamen secum ineundum provocat in foro, dumque jam sternit, jam sternitur, concurrentis ad spectaculum populi risum ciet. Reliquis diebus (Nam per octiduum Ludicra hæc certamina durare solent)

vel

vel priora resumuntur, vel viri computationi publicæ alternos inter cantus tympanis identidem con-
strepentibus læti indulgent, quibus utique magis vo-
lupe, dulci potu irrigare guttura, quam oculos lu-
stantium muliercularum aspectu pascere, semper
fuit. De ludis aliis, dum Capitanei nomine initia-
tur illorum quispiam, dum victoriæ insignioris me-
moriam celebratur, dum funebria post nobilioris cu-
juscunque obitum fiunt, vel defunctorum ossa alium
transferuntur in locum, dum viduus tondetur &c.
alibi differemus. Illud mihi exploratissimum, Abi-
pones Nakaiketergehes, seu sylvestres præ aliis ri-
tuum, cerimoniarumque gentilitiarum multo studio-
siores esse, atque observantiores. Multas ejusmodi
nec viderit unquam, neque audiverit, qui Abipones
Rūkahes vel Yaaukanigas inter duntaxat est versatus.
Apud istos triennium, apud Nakaiketergehes qua-
driennium cum consumpserim, & ab ipsis colonia-
rum, quæ his Barbaris condebantur, primordiis bar-
baros eorum ritus coram spectaverim, quidni, dum
ista refero, fide dignus videbor? Incredibile, quam
improbo labore, quanto tempore nobis constiterit,
patrios nationis ferocissimæ ritus, majorum exem-
plo illi venerabiles, tandem evertere. Idem olim
Apostolis, Apostolicisque viris labor in traducendis ad
Romana sacra Hebræis, idololatriisque, & in avitis
eorum superstitionibus, cerimoniisque demum eli-
minandis. Haud uno equidem ictu secularis sterni-
tur quercus, quæ altas dudum egit radices. Ast
jam a nuptiis, ludisque genethliacis ad tristitia tran-
simus, de morbis, medicis, & medicinis acturi. Plu-
ribus ista capitibus, singula scilicet singulis, comple-
ctemur.

CAPUT XXIII.

De Morbis, Medicis, & Medicinis
Abiponum.

Vivaces esse Abipones, lacertosos, vegetis, succi plenis, Cœli cujusque ac laborum patientissimis corporibus gaudere, dudum asserui, & , nisi meus me fallitanius, liquidissime probavi capite 7. Morbi, qui in Europa domos infirmis, tumulos cadaveribus implent, plerique ab illis ignorantur. Epilepsia, podagra, lethargus, phrenesis, icterus, arthritis, maculæ nigræ, dolores nephritici, iliaci, elephantiasis &c. quam horrenda, quam antiqua Europæis, quam peregrina, quam inaudita Abiponibus nomina! Aliquem istorum feбри calida, pleuritide, hæctica extingui vix singulis trienniis audias. Ægrotatio rarior apud illos, quam aurora Borealis apud nos, vel eclipsis. Qui ex dentibus laboraret, neminem novi, præter vetulam, quæ aliquot aceti guttulis dolorem mox omnem absterfit. Haud equidem miror, tam vulgari apud alios dentium cruciatu immunes vivere barbaros, cum tabacæ folia sale, salivaque Vetularum permixta, & in unguenti formam redacta mandere identidem a pueris soleant. Nec abs re tabacam *noerâ* medicinam appellant suam; Nam mel quotidie & potant & esitant, quod certissima, ut omnes nôrunt medici, dentium est strages, ut adeo Indos aut semper vexari a dentibus, aut iis
 mox

mox destitui oporteret, ni tabacæ, salisque acrimonia utrumque impediret. Qui tabacæ vel folia mandit, vel fumum haurit quotidie, næ! is dentium incolumitati certissime consultum ibit, teste experientia. Verum enimvero, queis meliore luto finxit præcordia Titan, malunt isti ejulare, malunt Chirurgi forcipe laniari, quam nautico hoc, ut ajunt, præsidio contra dentium dolores præmuniri. Nobiliores vidi in Paraquaria Hispanos, qui tabacæ folia vel sicca, vel fumantia ore versant suo identidem, atque adeo veluti certissimum tuendæ valetudinis adjumentum in deliciis habent. Centurio, meus per ducentas facile leucas comes, tabaca ob itineris per solitudines diurnitatem consumpta, arborum folia arida ejus loco accendit, quærentique mihi: quorsum id ageret: reposuit: Enimvero vita carere mihi videor, ni tabacam, vel hac deficiente, quidquid aliud circa nasum meum videam fumare. sed en! tabacam averfantibus aliud adversus dentium molestias remedium, Paraquariensibus familiare. Fabæ aliquot arboris Cacão (ex quibus subinde totis Chocolate conficitur) vino cremato per horas aliquot immerguntur. Isto liquore imbutum Gossypium denti male affecto imponitur; si concavus non sit, vino illo cremato aliquamdiu ore detento liberaliter, irrigatur. Quam industriam si iterum, iterumque repetas, & tumor & dolor sive ex frigido, sive calido ex rheumate ortus sensum evanescet. Medicinæ nobilis efficacitatem frequens ut mea, sic aliorum experientia docuit, celebravitque Europæo etiam in solo. Hunc infinem Cacão fabas, quantum fieri possit, recentiores, succosioresque deligere oportebit; Annosæ enim, cariosæque, quippe olei expertes, quam, quæso, virtutem communicabunt? Cremato utendum est poculento, ac mitiori,
non

non illo ardentissimo, quod spiritum vini cremati Chymici appellant. Alii gingivam ægro denti adjacentem compungunt spina piscis, qui raya dicitur, & elicit demum sanguine dolorem sedant. Sunt, qui tigridis unguem, & alumen carbonum ardentium ope in calcem primum, mox in pulverem redactum & probe permixtum dentis erosi, vel aliunde dolentis Cavernæ imponunt. Hac ratione non dolorem modo, sed & causam doloris penitus extinguunt ita, ut nunquam porro reviviscat, præter me plures alii sunt experti. Hoc nobis remedium Hispanus agricola, socii mei e dentibus cruciatum miseratus, detexit. Haud equidem me latet, dentium medicamenta plerumque talia esse, ut decem aliquando vicibus laboranti egregie proficiant, undecima vice fors efficacitate careant, omnemque fallant expectationem, quin sæpe dolores exasperent magis. Frequens Europæorum in Paraquaria, & intolerabilis calamitas odontalgia ob Chirurgorum penuriam, ineptiamque. Dentem morbidum Forcipula eradicaturi gingivam circum omnem cultello fodiunt, revelluntque, qui laniatus dolorem adfert acerrimum, cum multa sanguinis effusione conjunctum. Tortorum ejusmodi opera quod nunquam egeant Abipones, felicitatis pars est profecto invidendæ. Perpetua siquidem dentium tranquillitate fruuntur, ac incolumitate. Edentulum nusquam vidi. Dentes, quibus per omnem ætatem strenue usi sunt, omnes tumulto inferunt plerique.

Si quando invaletudine tentari se sentiant, quamvis in pede, vel cubito vis morbi resideat, cor sibi dolere interrogantibus respondent: *Yeevèr yauèl.* quataniorum idem mos. Quid tibi dolet? quid sentis? si ex ægro quæras, *Mbaèpá haçi ndebes!*

Mbaè

Mbaë panga erenandu curi? Confestim; *Chepiapë*, in meo Córde, ingemiscens reponit. Ut adeo arduum sit, morbi genus, sedemque ex Indis expiscari, ni aliis se prodat indiciiis. Cibi perbreve fastidium pro evidentissimo infirmitatis signo habent. Hinc si quis suorum, onerato fors, jamque nimium referto stomacho, solitis dapibus tantisper abstineat, pessima quæque illi mox ominantur fœminæ, lamentandi finem non faciunt, illudque suum: *Chik rkene* non comedit, cum gemitu pronunciant identidem, jamque de ejus vita conclamatum, suspicantur. Ut primum æger vel tantillum cibi receperit, morbo licet necdum profligato, jam de superato periculo triumphum canunt adeo, ut *La rkene* jam comedit, & *Láyamini*, *Là nataréuge* jam convaluit, jam revixit illis synonyma esse videantur. Cæterum ut rarissime ægrotant Abipones, sic paucissimi eorum, qui ægrotaverint, morbo extinguuntur. Cum crebræ illis sint cum hostibus, tigridibusque dimicationes, harum unguibus, illorum telis non nullos quot annis succumbere, occumbereque, haud inficior. Reliquis plerisque ultima senectus & morbus & mors esse consuevit. Dicam paucis: Abiponum plurimum denique mortem oppetunt, cum vitæ satietas eos tenet, cum ætate fessi mortem ceu quietem, vitæque miseræ solamen sibi peroptant. Ex quo certe experimento enatus est communis error, ut nunquam omnino morituros se se credant, si Hispani, præstigiatoresque venefici America abessent, horum enim artificiiis, illorum armis quacunque suorum mortem tribuere solent. Vulnus hasta inflictum quamvis tanto sæpe pateat hiatu, ut & fugienti animæ exitum, & morti ingressuræ aditum amplissimum præbeat undique, quod si tamen sauciatus emoriatur, non ferro, sed præstigiis lethalibus extinctus ab infan-

nien-

niente plebecula putatur. Sanguine propinqui omnem movent lapidem, ut in maleficiis, mortisque authorem non indagetur solum diligenter, sed etiam animadvertatur crudeliter. Persvadent sibi, ejusmodi præstigiatores e vivis mox eliminandum, mortemque illatam morte luiturum sua, si cor, linguamque emortui, quæ e calenti adhuc ejus corpore evellunt, ad ignem cocta cani devoranda objecerint. Tot linguæ, tot cordibus, quæ cani porrexerant, devoratis neminem præstigiatorum tunc obiisse quamvis observaverint, maxima tamen cum religione e majorum suorum instituto & adulatorum, & infantium, cujuscunque demum sexus sint, cor, & linguam secant, ut primum illos expirasse, opinantur. Insana hæc opinatio: Præstigiis duntaxat homines necari, quantum in Barbarorum animis inveteraverit, ex factis, quorum spectator fui, jam argue. Ex novo conceptionis oppido rusticatum iverant Abiponum aliquot. Venatu, parataque ex siliquis Græcis potione in campis otium fallunt. Exorta temulentos inter de equo, ut solet, altercatio arreptis demum hastis decidunt. Alter quispiam a somnolatione semper alienissimus, placidæque indolis juvenis pacificator accurrit, dumque aliena impediturus vulnera dimicantibus duobus obstat, ipse periculose vulneratur. Mense Januario, qui maximis Cœli caloribus æstuat, id actum. Brachium hasta transverberatum, soleque ardente horrendum intumescens, cum nil medicæ opis, in campo scilicet, ad manum esset, cor ipsum petit, ac biduo spatio opprimit infelicem. Hastam vulneris. vulnus necis causam extitisse quis nostrum negabit? Negarunt id Abipones, ac contubernalem suum magicis artibus extinctum palam vociferabantur. Habitis ultro, citroque ad cædis disquisitionem consultationibus

bus in vetulam ejusmodi artificii insignem suspicio recidit. Negatus illi nuper a recens vita functo aquatilis pepo suspicionis fundamentum, & robur fuit. Adversus istam omnium animi exarsere. Ad vindicandum facinus quæ non tentata, excogitataque? Terribilem visu animum totius corporis jactatione rotæ instar se circumagentem in foro conspexi, cumque delirare eam crederem, parum abfuit, quin ad illam alloquendam properarem. Ast Abipones circumstantes: Cave mi Pater, verbulo bonam hanc interpellas mulierem, mihi ajebant: Ista equidem gyris, quos conficit, rotisque mactabit vetulam, quæ juveni nuperrime vita functo mortem acceleravit. Apage, subiratus reposui, aniles has fabulas, vobis decipiendis duntaxat, non interimendis præstigiatoribus idoneas. Sed frustra hæc. A' barbaris ceu mysteriorum suorum rudis explodebar. Ita qui maxime insaniunt, præ cæteris sapere sibi videntur. Ad ejusdem argumenti confirmationem audi jam funestiora.

In S. Ferdinandi colonia Yaaukanigarum quispiam tum profapia, tum militari fama apud suos clarus, & ad quidvis audendum vel ideo projectissimus filiolarum suarum mortem præcocem acerbissime tulit. Noverat equidem prolem hanc suam imbecillam, morbidamque in lucem prodiiisse; Totus tamen in eo fuit, ut ejus mortis authorem veneficum rescisceret. Indam alienigenam, sed Abiponi nuptam veneficii patrati ream esse e vetulis eidem infernis audit, creditque. Dolore injuriæ furens, vindictæque desiderio sui impos nocte appetente in innoxiam, & nil insidiarum metuentem foeminam irruit. Illius scapulæ, dum foco humi assidens fila duceret, eo impetu hastam infixit, ut per mediam mammam ter-

ferreus mucro emergeret, simul prolem lactentem materno sanguine funestaret. Mediocri erat ætate mulier, corpore ante alias plerasque obeso, ubere amplissimo. Cruori innatabat suo, qui quot e venulis, totidem e fontibus scaturiit uberrimus. Vulneris atrocitate mortem certam minitante, religionis nostræ capitibus, quæ jam catechumena novit, in memoriam breviter revocatis sacro fonte rite præparata tingitur, & de venia sicario imperiendi monetur. Procurato, ut poterat, miseræ animo, ad mortem ejus retardandam curas omnes convertimus; vitæ enim servandæ medicinam quamvis imparem fore arbitrabamur. Absterfo, qui lacti mixtus affatim manavit, sanguine, vulnere, vino calente loto, adeps Gallinaceus calens item illinitur. Maximi fiebant ad lachrymabile spectaculum concursus. Turbæ immixtus aderat præstigiator medicus; Hic cornu bubulum marito sauciatae mulieris porrigit: In illud vesicam ut exoneret suam, imperat, impetratque confestim. Obeditur liberaliter. Mox lotium calens uxori ebibendum præbet. Neque in hac tergiversatio ulla. Exhaustit ad ultimam guttulam. Ad socium subinde meum conversus præstigiator Hippocrates: Nostin', ecur lotii recentis potus a me imperatus sit? inquit. Scilicet, ut foemina sauciat a vomitu egerat sanguinem e vulnere ad corporis interiora stillantem, qui putrescens subinde putrefaceret pulmonem, aliaque. Dictis eventus respondit. Vomitu perpurgata mulier est. Vulnus ingens adipe Gallinæ sæpius quotidie perunctum, applicatis etiam, ne inflammaretur, brassicæ (quam caules dulces vocamus) foliis paucos intra dies ita coalnit, ut præter cicatricem nil prorsus incommodi, molestiæ, dolorisve superesset. Quidni ridebunt nostrates Chirurghi adipis gallinacei

Q 2

usum,

usum, illiusque in confanandis vulneribus virtutem in dubium revocabunt præterea? Rideant, irrideant, dubitent, aspernentur, per me licet. Illorum risui, dubitationique mea, quæ hisce usurpavi oculis, experimenta confidenter oppono. Brachium meum sagitta quinque uncis horrida a Barbaris Nátakebit transfixum omnino, nervus simul, qui medium gubernat digitum, Læsus hoc solo medicamine dierum quatuordecim intervallo feliciter confanuit. Eodem adipe alios sagitta, hasta alios sauciatos curavi; Abiponensem item fœminam, cui securi forte impacta gravissime vulnerata tibia, indeque, cum diebus aliquot medicinam omnem neglexerit, pes miserandum in modum totus intumuit, eodem prorsus remedio perfanavi. Infinitus sim, si cæteros, quibus adeps gallinæ saluti fuit, recenserem. Certiora Europæis in pharmacopœis suppetere medicamenta, & unguenta, haud equidem ausim ambigere; In illis tamen Americæ solitudinibus obviam, quam providum Numen miseris Indis suppeditat, herbulam citius, certiusque morbis quibuscunque mederi, scio, quam pharmaca humanis ingeniis elaborata, multoque argento coemenda, quæ ægro corpori sæpe inutilia, crumenis ægrotantium semper pernicio-sa cheu! experimur.

Ut mortium, sic morborum exitium architecti Præstigiatores vulgo putantur, quibus e medio sublati ægri Abipones mox e morbo recreandos se se, confidunt. Stolidam persuasionem, eventus sane tragicus tibi reddet indubitam. In Sancti Hieronymi oppido Abiponum aliquis (Ychoháke dicebatur) facinorum suorum memoria, fratrisque sui Ychoalay Caziqúi celebritate inflatus lenta tabe sensum conficiebatur. Nunquam isti in mentem vene-

venerat noxios, quæ scatebat, humores accusare. Quisnam præstigatorum ægritudinem sibi afflaverit, id unum ancipiti animo diu, noctuque volvebat. Consultæ hac super re ab illo vetulæ Napakainchin origine Tobam morbi authorem pronunciant. Nec mora: Huic mortem decernit æger, vitæ, ut putaverat, consulturus suæ. Concubia nocte dormitantem suo in tentorio armatus opprimit. Hastæ mucronem ferreum, quatuor facile digitos latum, altissime ejus corpori immergit, sinistrum latus transverberat ictu valido, costis duabus fractis, humerum acinace findit præterea. Ad consauciati voces concurritur, sicario jam dilapso. Evocamur ad opem misero ferendam. Sanguini innatantem, ternisque vulneribus perfossam conspicati expiraturum illico, putamus. Nî nostras in ædes transferamus saucium, a percussore mox redituro novis vulneribus contrucidandum denique, circumstantes monent. Istorum itaque e consilio ad domum nostram deportatur. Per viam bajulorum manibus elapsus, novo, maximoque vitæ periculo, terræ alliditur; vasti enim erat corporis, ponderisque tantæ moli respondentis. Locus, ubi apud nos collocatus, quod repagulis, januaque careret, Abiponum opera taurinis pellibus undique præmunitur, ne ad eadem consummandam redituro Ychohake accessus pateret. Et vero, ut ominabantur Indi, post semihoram adfuit acinace instructus, morientis scilicet mortem acceleraturus, Verum ab obvio Patre Josepho Brigniel, cujus ego tum socius, strenue repulsus re infecta discessit. Saucius (Catechumenus erat id temporis) & linguæ, & animi semper compos citra moram sacro fonte lustratus, nostrisque curis, ac medicamentis (Gallinaceus adeps primum obtinuit locum) hebdomadam aliquot spatio felicissime con-

valuit. *Ecquisnam Chirurgorum Europæorum ad hæc sensus? Napakainchin* Maritum suum Christianorum sacris initiatum conjux cum liberis imitata est libenter. *Universa paulopost familia*, cum nova sibi ab eodem *Ychokake* discrimina metueret, ad vicinum *Sancti Xaverii* oppidum commigravit, ubi *Mocobies* neophytos inter Christiana disciplina mi-rifice jam vige-bat, Liceat huic tragœdiæ *Corollarium* adjicere. Idem *Napakainchin* anno superiore, dum fervente compotatione, nescio, quid discordiæ enatum est, *Abiponem* sibi assidentem, atque infestum cultro confodit misere. Pro morte illata pœnas dedisse videtur vindici Deo. Quamvis illud vindictæ genus beneficii maximi instar, ac salutare fuit reo, cum impacta ejus corpori vulnera opportunitatem præbuerint, ut suis cum domesticis Christianorum Cœtui tempestive adjungeretur, plures fortassis annos prospera semper fortuna tergiversatus, certe cunctaturus.

Neque finitam existimes de ægro, deliroque *Ychokake* historiam. Iisdem morbi molestiis, novisque semper de veneficio sibi illato suspicionibus conflictatus aliquot post menses fœminam de magica scientia suspectam invaletudinis suæ causam putare Cœpit. Sub meridiem hanc sui securam per insidias invadit, conatusque caput illius findere declinante tantisper acinace sinistram illi maxillam secat, quæ cum aure cuti adhærente defluens pectus, pectorique incubantem prolem sanguine perfundit copiose. Ab accurrente populo retractus percussor. Vix lacrymas tenui ad crudele spectaculum. Plectere impium, qui injuriam intulit, minime licuit; Ad opitulandum injuriam passæ animum, curasque omnes converti. *Æthiops* nobis erat chirurgica scien-

scientia non nihil tinctus. Illius manibus pendentem cum aure maxillam capiti assui tribus in locis, mandavi, acûs, qua filum traducebatur, puncta sine gemitu ferente fœmina, reliquis ad ejus aspectum cohorrentibus. Vulnus, quantum erat, calente vino lotum, adipe gallinaceo perunctum, telaque coctis aliquot herbulis imbuta lenissime constrictum est. Fasciæ, quibus tela alligaretur, cum præsto non essent, cingulum, quo præcingebar, adhibui. Toto illo, quo hæc patrata sunt, vespere, nocteque subsecuta per fidos Abipones fœminæ securitati, me jubente, invigilatum fuit solerter, ne quid detrimenti rursus pateretur. Indus enim ille ut suam valetudinem, sic illius fœminæ occisionem votis, viribusque omnibus identidem anhelabat. Ast periculum, quod latere miseram nequiquam potuit, prævertit, persanato spe nostra citius vulnere, ad S. Ferdinandi oppidum clam digressa. Divino consilio fugam cepisse videbatur; Nam Ychoalay Caziquius, qui id temporis ab oppido aberat, de fratris sui Ychohake atrocitate a nobis certior factus, rogatusque, ut ad illum coercendum quamprimum rediret; Propediem adfuturum se, respondit, non ad fratrem suum cohibendum, sed ad illam fœminam mox trucidandam, quippe quam magicis artibus infamem, omnibusque pertimescendam dudum existimabat. Et vero, quod comminabatur, propositi sui semper alias tenax haud dubie fuerat executurus, si eam in oppido fœminam reperisset. Annis equidem superioribus, dum per campos sparsi huc illuc oberrabant, contubernio exclusit suo quascunque venefici artificii suspitione asperfas mulieres, earumque complures, ne cui fraudi essent porro, forsan innoxias omnino hasta confodit, nimis ut credulitatis, sic crudelitatis

tis sæpe damnatus. En fratrem fratri, Ychoalay ychohake, ut ovum ovo, similem!

Verum cruenta toties tragœdia lætissimam habuit catastrophem. Ille tot sollicitudinumstrarum, tot vulnerum causa Indus Ychohake ægritudine animi, quam corporis inferior vivere simul, simul timeri tandem desit, & quod mireris, qui ægotans tamdiu insaniebat veneficorum suspicione, jam jam moriturus sapuit. Tempestive sacro baptismo, quod ultro expetiit, ablutus, dum fatalem sibi instare horam senserat, Sacerdotis præsentia delectabatur plurimum, cui, dum is prima nocte coram adesset, quiesceret domi suæ tantisper, suadet, se, dum propinquiorem sibi mortem adverterit, protinus significaturum, ait. Stetit promissis. Patre salutaria quæque moribundo suggerente, collachrymantibus propinquis placide expiravit ipsa, quæ Divinæ Triadi sacrum diem præcedit, nocte; Pluribus sane, quod ad beatam immortalitatem transierit, argumentis convictos nos bene sperare iussit. Complorantium enim domesticorum lamentis indignatus: Ad rerum omnium conditoris, summi Patris, maximi illius Capitanei magnam domum transferendum se, meminert, aiebat. Propitiando Numini usque intentus tot Christianorum, aliorumque a se patratis cædes, tot rapinas acerbo animo, poenitentique detestabatur. Conjugi suæ, ne majorum ritu equos suum ad tumulum, neu oves mactaret suas, semel, iterumque edixit: Has, & quidquid suum esset, filiolæ se suæ relinquere. Ex omnibus patuit, illum avitas superstitiones execratum, Romanaque sacra toto animo fuisse amplexum. Hæc eo fine retuli, ut omnem morborum, mortiumque infelicitatem ab Abipone præstigiatorum artibus assignari intelligas, quos

quos tamen eosdem sospitales, divinos medicos, soterer, servatoresque suos veneratur alias, quod alio capite docebo. De morbis jam plura, quæ ab Europæis ignorari nefas sit, dicenda restant.

C A P U T XXIV.

De morbo quodam Abiponibus peculiari.

Fruges ubique terrarum nullo discrimine nascuntur aliæ; Aliæ alicubi tantum proveniunt. Neque enim omnis fert omnia tellus. Eadem videtur morborum conditio. Aliqui gentes, provinciasque omnes promiscue afficiunt; Aliqui aliquas duntaxat. Suos scilicet quisque patitur manes. Elephantiasim vernaculum Ægypti morbum vocat Lucretius. Podagram Athenis, Ophtalmiam Achaïæ familiariorem alii affirmant. Leucophlegmatiam (Hydropis genus, quod anasarca dicitur) in Delo insula, ceu nativo in solo, deprehendi, Æschines poeta refert Philocrati. Cruentam capillorum concretionem in Polonia, sudorem mortiferum in Angliâ, Strumas, morbosque alios aliis in provinciis patrios diffuse enumerant medici. Lustratis per duodecennia Paraquari æterris, populisque morbi genus deprehendi apud Abipones Nakaiketergehès, cæteris omnibus omnino incognitum. Agritudo hæc animum, quam corpus afficit potius, etfi

ex hoc male temperato in illum derivari existimem. Delirare incipiunt aliquando, & lymphaticorum instar furere. A credulo, ac superstitionum tenaci vulgo magicis præstigatorum artibus ad insaniam redacti putantur, & *Loaparaika* audiunt. Istiusmodi atræ bilis, ut opinor, intemperiiis agitati, oppressoque rerum funestiarum imagine cerebro, sole in occasum vergente potissimum, delirationem produnt suam quotidie, febricitantium more, qui accessiones febris discessionisque certis horis definitas patiuntur. E' suis repente prosiliunt tentoriis fanatici, peditesque per campum excurrunt rectissimo ad suorum sepulchra ire, quæ propinquo in nemore habere consueverunt. Cursus celeritate vel struthiones æquant, & perniciosissimi equites, qui insequuntur, ægerrime dum assequi illos, & e fuga domum retrahere vix possunt. Noctu furiis jactati patranda, ubi ubi possent, cædis cupiditate ardent; Arma, quæ in promptu sunt, eum in finem arripiunt. Hinc ut primum de ejusmodi delirante per oppidum percubuit rumor, hastæ omnes obviis in latebris ab unoquoque abduntur. Contubernales dum furiosum noctu nec sedare, neque domi continere porro queunt, illum bacillo instructum in forum prodire sinunt, & quotquot possunt, comitantur. Concurrente ad optatum sibi spectaculum puerorum globo per oppidi plateas omnes fit circuitus. Delirans tectum, storemque singulorum tentoriorum bacillo suo iterum, iterumque pulsat, nemine eorum, qui sub illis latent, vel hircere, vel musitare auso. Si quando aut oscitantibus excubitoribus, aut delusis armorum compotem se faciat delirans, superi boni! quanta omnium trepidatio! Nec ad scæminas solum, puerosve imbelles, sed ad ipsos, qui heroes sibi videntur singuli, viros is terror pertinet, quippe qui dicere soleant: Rationi absonum, sibi-

sibi que indecorum videri, adversus amentes armis uti. Hinc ad aream nostræ domus sudibus contra Barbarorum assultus munitam cum prolibus suis scemina turmatim advolant, ibique delirantis metu non horas modo, sed noctes integras hærent. Alaykin conceptionis oppidi Caziquius princeps suam dum intra hæc septa conjugem latere cum aliis, terroribusque furiosi, qui armatus per forum cursitabat, exanimari intellexerat, illum astu captum funibus constringi imperavit.

Hac infania correpti vix aliquid cibi, somnive capiunt, & tum inedia, tum mærore pallidi obambulant; Crederes illos novum aliquod de figura telluris systema meditari, vel quadraturæ circuli studere. Interdiu tamen nullum prope alienatæ mentis indicium præbent. Neque timendi ante vespærum. Horum aliquis, noctibus singulis turbulentus, me invisit sub meridiem. Familiari in colloquio interrogavi hominem: Equisnam esset ille, quo nomine vocaretur, qui furibundus noctu perturbare solet cæteros? Nescire se, serena fronte mihi reposuit. A me digressum conspicatus Socius meus Hispanus: En, ajebat, quem nosse dudum percupisti. Ipsus est, qui noctu furit. Adeo nihil, quod amentiam indicaret, ex vultu ejus, ac sermone collegeram. Alter ejusmodi, quem furibundum novi, eques equitanti mihi per campum obviam factus comitem se adjunxit. Ego vero, timendo ut me socio liberarem ocyus, negotium causatus, admotis equo calcaribus domum properavi. Semel, iterumque, dum areæ nostræ portam noctu clauderem, alias dum equum in campo pascendum stipiti alligarem, a furioso jam jam opprimendus fueram, ni suppetias mihi venientes alii periculum avertissent. Nonnunquam sub idem tempus plures tum viri, tum

mu-

mulieres insanire ceperant; Aliquando unicus; Sæpe nullus. Egritudo ista delirantium ad octo interdum, alias ad quatuordecim, quin plures etiam dies producebatur, dum denique quies illis, ac mens rediret. Quotquot hunc in modum delirare vidi usquam Abipones, ad unum omnes ingenio subtristi, melancholica, vel cholericâ intemperie semper turbidos, semper minaci obtutu truculentiores observavi. Accedente jam aeris, jam potus immodici injuria, jam eventu votis, expectationique contrario concitatam bilem in amentiam, ac rabiem definere denique, nec rarum, nec mirum cuiquam videatur. Stupidi solum ac rudissimi magicis id artibus tribuere solent, quod seu vitio, seu virtute naturæ fieri consuevit.

De hoc Abiponum furore scribens opportune memini illius, quod apud Plutarchum libro de claris mulieribus cap. II. dudum legeram: Virgines scilicet Milesias, nescio, quo furore ætas mortis desiderio se se strangulasse. Magnopere invaluit illa puellarum rabies, & mors una omnibus erat in votis. Nil parentum lacrymæ, nil custodum vigilantia, nil artes medicorum potuerunt. Adhibitis in cassum remediis, senatus Mileti hanc sanxit, præconisque voce divulgavit legem: Si qua virgo se se porro interemerit, nuda per medium forum efferatur. Ignominia metus furorem, & insanam moriendi lubidinem extinxit. Nostra quoque ætate virgarum metu, quotquot insaniunt, validissime coercentur. Mortis metu inhibitam vidimus delirandi licentiam apud Abipones. Paucos intra dies præter morem insanientium numerus accrevit. Illorum aliquis provecta jam, sed illustri nocte per septa eluctatus in nostras ædes irrepere videbatur, sed ab accurrentibus tempestive retractus, nostræque consultum fuit incolumitati. De nostro periculo certior
sa-

factus Alaykin oppidi princeps Caziquius, postridie evocatis ad forum omnibus minaci voce edixit: Si quis deinceps in delirationem inciderit, se foeminas praestigiatrices omnes, ipsosque adeo insanientes ex templo Contrucidaturum.] Hæc comminatio amentibus pro helleboro, cæteris, ne insanirent, pro freno fuit. Nihil dein de furibundorum tumultibus auditum a me, visum nihil, etsi eodem in loco eadem cum gente mentes adhuc complures sim versatus. Quotquot quocunque impulsu turlari sibi cerebrum senserant, necis intentata metu se continuisse mihi videbantur. Quid si horum aliqui, quod a contubernalibus cæteris timeri, digitis monstrari, ac suspici gauderent, furorem prius simulassent? Quamvis enim vix homines sint cætera, humanum nihil ab illis alienum puto. Simulatione quid homines inter frequentius? Magicum carmen deliramenti causam fuisse cum vulgo barbaro ut crederem, nunquam profecto poteram induci.

CAPUT XXV.

De Variolis, morbillis, lueque pecorum.

Rodericus Fonseca medicus in libro de sanitate tuenda ait: *Apud Indos tam Orientalis, quam Occidentalis Indiæ nunquam visa fuit pestis; scimus tamen non multis abhinc annis in America, ac nova Hispania Centena decem millia Indorum ex Variolis extincta fuisse, cum nullus Hispanus eo malo correptus fuisset. Fuit illis hic morbus novus a quodam æthiope delatus. Hæc medici verba momenti suis ponderanda mihi, atque enucleanda sunt breviter. De Indiis, quæ solem orientem spectant, nil discutio, quia istic peregrinus. Pestem, quæ venenato Cœli afflatu mortales conficit, nullam usquam in America sæviisse nemine, quod sciam, repugnante omnes consentiunt. Quod si tamen contrarium apud historicos legeris aliquando, memineris, catarrhum, febres tertianas, diarrheam &c. Si diutius, si latius grassentur, ab Hispanorum vulgo pestem vocari, maxime, si complures illo morbo intereant. Variolæ item, morbillique, quia Americanis admodum pestilentes, ab Indis haud abs re pestis appellantur passim. Luem pecorum, quæ ab uno territorio latissime serpebat per Paraquariam, iterum, iterumque experti sumus maxima bouum, equorum, & cum primis mulorum jactura. Nec tamen pestilente aeris halitu inducta hæc strages, sed pabuli vel malignitate, vel aquæ*

aquæ penuria, postquam vel per diutinam Cœli siccitatem exaruerè campi, vel pertinacioribus nimbis corrupti gramen noxium præbuere, unicum in Paraguarâ pecorum alimentum. Id pabulorum virus muli potissimum, veluti spongiæ, intimis hausere fibris. Paucos intra menses in territorio urbis Assumptionis multa illorum millia interierunt. Cadaverum struem, qua qua mihi iter fuit, per vias, camposque omnes deprehendi. Illud morbi genus jure contagium dixeris; Nam corporum jam languentium, vel cadaverum solo contactu obviis quibusque bestiis mortifera, ut cum medicis loquar, miasmata infundebantur. Capitis tumor, stillans e naribus sanguis certissimi luis jam dominantis indices exstiterunt. Eadem animantium a serpente ictorum signa esse solent. Auris mutilata, secta pedis anterioris vena adversus morbi illius venenum præsentissima, & prope unica mulis medicina fuit, maxime, si sal lingendus quotidie illis porrigebatur. Enimvero his remediis non arceri modo a bestiis pestiferum illum calorem, verum restinqui etiam, si haustus jam fuerit, magno rei familiaris emolumento didicimus. Boum, qui ad Indos alendos mactantur quotidie, abdomina, gramine semî digesto, facibusque resecta patentem in locum rejiciuntur cum visceribus; Ad hunc, ceu ad publicam mensam, quotquot circa oppidum paſcuntur, equi, mulique, turmatim confluunt semper, & avidissime lingunt non fæces tantum, sed & ipsum, cui incumbunt, solum, ubi ex bubulo sanguine, & rejectaneis cæteris salis, nitrique species nasci solet, quod bestię incredibiliter appetunt, ac mellis intar absumunt. His suis dum veicuntur cupediis, nemini mortalium, ni equorum, mulorumque calcibus, ni dentibus discerpi velit, fas est propinquare; Quid quod invidia stimulante moru, calcibusque mutuis

con-

concertant brutissimi hi rivaies, dum quisque sibi totum affectat. Sæviente igitur atrocissima mulorum Lue nostris in finibus, illas bubuli abdominis quisquilias sale conspersimus quotidie, ut, quod cibus erat alias, jam medicamentum mulorum foret. Enimvero fuit; Cum emorientibus alibi per vicina prædia quam plurimis apud nos in S. Joachimi oppido paucissimi ægrotarent, plerique convalescerent. Quod quidem ad commendandam salis salubritatam luculenter facit. Sed jam cætera, quæ e Fonseca medico adnotavi, persequamur.

Variolas certam, verissimamque Americanorum pestem dici oportere, ac ab advenis tum Europæis, tum Afris recens tunc illatam Americæ fuisse, extra controversiam est. Inde faceta, sed æquissima Indorum querela originem duxit suam: Belli sane homines, ajunt, Europæi! Auri, argentique infinitatem, quam a nobis abstulerant, exitiali, quam nobis reliquerunt, variolarum peste liberaliter pensarunt. Enimvero jam inde a Caroli quinti Cæsaris ævo per bina dein sæcula adhanc usque ætatem Indorum multitudinem tantam Variolis interiisse, ut fidem, ac prope numerum excedat, certissimum utique, ac nemini non exploratum est. Strages in reliquis Americæ provinciis editas haud memoro, quippe ab aliis historicis dudum deploratas. In solis triginta tunc Quaranicæ nationis oppidis, in quibus id temporis ad Centum quadraginta capitum millia censebantur, pestis variolarum anno 1734. atrociter sæviens triginta aliquot hominum millia absumpsit. Ut adeo, cur universum per Americam diminutus sit magnopere Indorum numerus, Variolis tribuamus, sed non iolis. Nos equidem, qui diutius novum orbem circumspeximus, alias præterea causas deteximus, quas tamen, cum
veri-

veritas odium pariat, consulto reticemus, ne acerbioribus non unius gentis odiis implicari nos videamus.

Hispanos, ceterosque Europæos Variolarum immunitate in America gaudere, fabulosum; Indos vero illis corripere citius, certiusque confici, indubitatum est. Cur variolæ Americanis pestilentialiores, Europæis in America degentibus magis propitiæ sint, discrimen, ne falcem alienæ messi iniecisse videar, medicorum sagacitati investigandum committō. Illorum tamen pace, dicam, quod sentio. Ipsam Americanorum corporum habitudinem minus habere firmitatis ad virus illud seu repellendum, seu superandum, puto. Carne semieruda plerumque, sale raro utuntur. Nudis semper incedunt pedibus, sæpiissime aperto capite. Aqua sola, festivas aliquot per annum comotationes si excipias, & fere non optima sitim relinquunt suam. Inde stomachi imbecillitas. Salaces, & ad libidines effuse propensi nativum pessundant vigorem. Solis effervescentis æstu, triticique, quod Turcicum dicunt, esu quotidiano sanguis ebullit, & accedente variolarum contagio tantum in illis concitat fermentum, cui, cum ferendo non sint, frequentissime succumbunt. Hæc de nationibus Indorum pedestribus dicta a me, intelligas. Abipones enim, ceterique Indi equites, natura sua firmiores, cum magna ex parte illis seu vitiis, seu miseriis careant, quæ pedes laborare dixi, variolas illi præ istis mitiores sibi, benignioresque frequentius experiuntur.

Anno 1765. hæc pestis Hispanorum per Colonias magnam sane hominum vim enecuit. Totam subinde, quæ latissime patet, provinciam turbinis instar pervagata in duobus supra triginta Quaraniarum op-

pidis duodecim circiter millia extinxit. In remotissima denique Barbarorum per Chacum latibula irrepserat; Et si Lue illa correpti sint plerique omnes, pauci tamen, pro infirmorum numero, occubuerunt. De equitibus loquor, quibus corporum firmitas praesidio fuit. In oppido, quod paucos ante menses Abiponibus in Timbò condideram, qui variolas evaderet, praeter unam foeminam nemo fuit. Quamvis plures aegrotantium centurias a quartadecima Maji ad finem Octobris usque numerarem, duo tantum supra viginti funera extuli. Quantum negotii per sex illos menses mihi fuerit, cui soli & corporum, & animorum cura incubuit, alius erit dicendi locus.

Per annos saepe plurimos nulla apud Indos variolarum mentio, vestigium nullum; sed hæc malicia imminentis procellæ index est certissimus. Falci, quæ diu conguievit otiosa, plura dein, quæ metat, obtingunt. Experientia item didicimus, Variolas in Hispanorum semper coloniis nasci, indeque ad Indorum, quamvis longissime absint, stativa per ultro, citroque commeantes derivari. Quo magis Hispanorum a solo recedunt, eo majorem indies stragem edunt, fluviorum more, qui quanto longius a fonte procurrunt suo, tanto minaciores semper evadunt. Ad solum de variolis rumorem metu propemodum exanimantur Indi; Hunc enim morbum mortem suam dici oportere, ex majorum suorum tumulis, sermonibusque didicere. Cumque Indi vitam præ patrio solo expetendam sibi existiment, ut primum variolarum suspicio eminens injecta est, a contubernalibus suis divisi alii alio fuga præcipiti dilabuntur. Sed eni stolidi illorum ingenia! Variolarum metu in fugam effusi non via recta, sed per mæandros, variosque flexus iter faciunt. Hoc equidem astu a se se assequendis

dis pestem impediri, eludique, opinantur. Hunc morem Lules, Ilistines, Vilelas, Homoampas, ac Chunipies superstitione observare, mihi retulerant Patres, qui diu inter illos versati. Contagii timore patres ægros filios, filii patres destituunt. Cantharo aquæ pleno, granis tritici Turcici tostis pro ægrotantis levamine ad ejus lectum relictis ipsi fuga sibi consulunt. Vita exui dum metuunt, lapidis, ferarumque crudelium naturam induuntur, incolumitati caventes suæ, de consanguineorum vita nil anxii. Injurius sim Abiponibus, si eos illorum imitatores dixerō. Terga quidem vertunt loco, ubi vulgata jam pestis, & ut cuique visum, per sylvarum latebras turmatim sparguntur. Recto tamen itinere, ut alias, ad locum destinatum proficiscuntur, neque suorum, quibuscum sibi aliqua sanguinis, vel amicitie necessitudo, curam abjiciunt unquam, quin mutua humanitatis officia sibi impendunt persudiose. Ut commendanda Abiponum in suos benevolentia variolis grassantibus, sic molestiarum, dolorumque tolerantia. Neminem, malignis caloribus dum æstuat maxime, aut muliebriter ejulantem, aut conquerentem usquam audiui. Vel gemitum tenuem sibi probro ducunt, & ne intrepidorum famam deperdant, morbi acerbitates silentio concoquere, nituntur.

Haud supervacaneum fuerit nonnulla, quæ Variolarum contagio durante observaveram, hoc loco adnotare. Viris ingenita tristitia, atra bili, provectiore ætate affectis, sceminis uterum gerentibus hunc morbum periculosiorem, & fere mortiferum expertus sum. Abiponenſis mulier variolis scatens partus doloribus per biduum excruciatâ prolem masculam, sed variolis pariter circumfluentem, enixa est, cui, salutari baptismate a me lustratâ, eadem, qua lucem

R 2 aspe-

aspexit, dies & prima, & postrema fuit. Mater tamen, quamvis tardius, convaluit. Quibus post calorem febrilem cunctanter eruperunt variolæ, aut nigrescentes, confertæ, depressæ, nigris in medio maculis distinctæ, vel purpureis permixtæ, sanie unum in locum confluentes, næ! Istis ingens discrimen, propinquum exitium præfagebam, eventu funestis omnibus plerumque respondente. Si variolæ, & qui illas comitabatur, tumor confestim evanuerant, spes quoque de illorum valetudine recuperanda omnes evanuerunt. Quibus ingenium hilare, candidior vultus, ætasque florentior erat, parum molestiæ, minus periculi a variolis creatum, identidem observavi. Gutturis ardor ob enatas illic variolas, tussisque inde orta, ac quoddam anginiæ genus (quod Quarani Yucuahaba dicunt) Indis quibusque maxime periculosum, & præcipua mortis origo. Hinc aqua saccharo & mali citrei succo temperata suavissime recreantur ægrotantes. Aqua item cum foliis plantaginis (quæ in locis humidis, & ad amnium ripas nascitur) cocta pro gutture perluendo, oculisque crebrius lavandis quotidiano usui, luculentæque utilitati fuit semper. Ex medicorum veterum documento variolis obnoxii aerem frigidiusculum declinare, sub tecto, sub stragulis latitare jubentur, ne maculæ jam jam emerfuræ ad præcordia repellantur. Audi Josephum Jakson Anglum in Enchiridio suo medico Matriri anno 1734. typis dato, his verbis caventem: *Quam primum symptomata febrilia se se produnt, æger aeri frigido non est exponendus; Frigus enim variolarum eruptionem inhibet. Sed etiam a nimio calore cavendum est; Hic enim ebullitionem nimiam concitaret. Gradus itaque caloris, & frigoris moderati esse debent, & naturalem statum non transgredientes &c.* Ita ad litteram capite nono & trigésimo. Folio mihi 139. Abipones, neglecto hoc

hoc medicorum veterum consilio, variolis jam infecti sub dio sæpe, sæpe sub tentoriis semi apertis, aut undique hiantibus in tuguriis dies, noctesque egerunt. Latebras, more suo, fugitabant. Auram, etsi rigidiorem interdum, toto corpore hauserunt. Quid si eam esse causam dicamus, cur e tanto agrorum numero pauci admodum variolis sint extincti? Ex America in Europam redux equidem intellexi, e medicorum recentiorum sententia patentem aerem præ cubiculo calore variolas patientibus magis expedire, passimque svaderi. Et vero hisce vidi oculis, illustrissimi generis adolescentes Theresiani collegii Vindobonæ alumnos, quibus novo artificio variolæ sunt insitæ, a meridie Cælo quamvis pluvio, aere rigido, jussu medici, mecum colloquentis, per hortum deambulare, fructu, qui optari poterat, maximo. Jam nil miror, Quaraniarum tot sæpe millia variolarum peste fuisse consumpta; Hac enim afflati clauso in cubiculo, ut limaces sua in concha, jacuerant semper; Laneis stragulis tegebantur anxie, & tantum non opprimebantur; Reti, ex quo suspensi cubare solent, focus subjiciebatur præterea ad frigus omne arcendum; vel momento pedem domo efferre, naribus auram rigidiusculam captare, lethale putabatur, ac morte piandum nil cunctatura. Variolis grassantibus contrarii erant Abiponum mores, ac vel ideo mortes pauciores. Eventum, qui ad ista confirmanda aliquid ponderis adjiciet, medicis meditandum, admirandumque proponam.

Abiponum meorum quispiam febrili calore, Variolarum iminentium prodromo, exæstuans equos binos advenæ Hispano clam vendiderat: Cornu bubulum, vino cremato plenum, quod pretii loco acceperat, ad ultimum mox exhaustit guttulam. Temulentus, linquæ,

mentis, pedumque impos, furens animis ægre in equum eluctatus sum obscura nocte fluvium natando trajecit. Leucam unam, & mediam emensus ad campum, ubi contubernales cæteri peris metu versabantur, incolumis pervenit. — De his certior redditus timebam enimvero imprudentis barbari mortem proximam. Nec dum enim is talis fuerat, ut extra mortis periculum sacro lustrari fonte potuisset. Hinc & animo, & corpori illius, quantum fas esset, consulturus, accurri. Latissima præter omnium spem nunciantur. Eadem nocte, qua dormiens crapulam exhalaverat, variolæ nec confertæ, nec malignæ eruperunt. Post dies pauculos absterfo morbo sospes, qua lubuit, obequitavit. Annum circiter tricesimum agebat, mentis vividæ, viribus integerrimis, & ob demessa prius Hispanorum capita apud suos clari nominis. Calor pestilens per intimas Barbari fibras ebulliens tanta cremati vini copia auctus lethale corporis incendium excitaturus, putabatur; Sed ignem igne sopitum fuisse, exitus docuit. Neque id novum: Ignis enim e fulmine ortus ardente titione felicissime restinguitur, ut mos Hispanorum communis in Paraquaria obtinet. Propior tamen sum, ut nocturnam hominis temulenti per gelidum flumen natationem refrigerato sanguini salutarem fuisse, crederem. Quid sentiendum, quid vero similis, viderint medici. Pro rei, quam narravi, veritate lubens vadem ago. Illud quoque hoc loco memorandum: Americanos variolis genuinis defunctos perinde, ut Europæi experiuntur, earum reditum, contagiumque porro haud timere. Id cæterorum omnium & mea ipsius experientia certum. Quinque annos natus puer variolas vix denis plures numeravi, vix biduum æger decubui. Sed per brevem hanc ægrotationem naturæ legibus factum esse satis tum denique credidi, dum multis mensibus diu noctu-

noctaque inter Indos hac peste correptos impune ver-
atus illa semper immunis perstiti, & quamvis quoti-
die defatigatus, undique tamen incolumis.

De morbillis (quos Hispani Serampion, Germa-
ni Masern, vel Flecken appellant) idem propemodum,
quod de variolis sentiendum. Grassantur per inter-
valla, propagantur, stragesque Americanis inferunt in-
credibiles. Dum in S. Joachimi oppido agerem, ex
duobus Indorum millibus tot hac peste infecti decu-
buere, ut, qui ægris cibum, aquam, lignum. medi-
camenta ministrarent, qui nobis ad aram operantibus
de more assisterent, sæpe reliqui non essent. Patrem
Josephum Fleischauer Parochum, meque tunc ejus so-
cium, mox successorem officia, quæ ægrotantium seu
animis, seu corporibus debentur, diu, nocturne ali-
quot mensibus occupatos tenuere. Ingravescente in
horas mortifera Lue, funerumque numero indies au-
gescente, svasore, nescio, quo Hispanum vetulum ac-
cessivimus, qui apud suos medicandi famam aliquam
obtinuerat. Scilicet in cæcorum regione coclitem Re-
gem esse, verissime vetus affirmat adagium Hispano-
rum. Experti hoc medicalstro præsentem multo plures,
quam ante ejus adventum, Indos emori, eum res sibi
suas habere, domumque festinare jussimus, ubi mulis
curandis felicius operam navaret suam. Ducentos
prope illa nobis pestis eripuit, sacris ad mortem præ-
sidiis rite munitos omnes. Ex horum numero infan-
tes paucissimi, senior vix ullus, plerique annis floren-
tes, iique potissimum, qui paulo ante connubium ini-
erunt. Febris tertiana contagionis ritu visa grassari
non nunquam Indos inter, sed molestia, quam strage
majori. Id iis solum in locis observatum, ubi aqua
putris ex stagno hausta, dulci omni deficiente, quoti-
die potabatur. Eadem de causa in multis Hispano-
rum,

rum, Tucumanorum maxime, oppidis tertianæ febres frequentissimæ. In conceptionis colonia ad ripas amnis Inespin (Abiponibus Narahagem) collocata primum, qui dulcem, saluberrimamque aquam suppeditaverat incolis, nemo ullus tertianis tentatus est unquam. In S. Ferdinandi, & Rosarii Coloniis, quæ paludibus, lacubusque cinctæ aqua fluviatili destituebantur, rarissima vacatio febrium Abiponibus est concessa. In Rosarii colonia mensium aliquot spatium adeo invaluit tertiana febris, ut eximium faceret neminem, neque mihi parceret denique, quamvis sæpe alias in medio febricitantium incolumi. Ne quis barbarorum sacro fonte non expiatus e vivis abiret repente, ad singulos ægrotantes invisit quotidie, ac demum, quod mireris, febrem quotidianam contraxi, cum tertiana duntaxat Indi omnes laborarent. Sole in occasum præcipitante quotidie febris accessit, & frigore, caloreque succedentibus non nisi cum nocte recessit. Hæc jactatio febrilis ad octavum & vicesimum diem producta desuit quidem, sed in tertianam, quæ tamen binis duntaxat vicibus repetita, ac fausto, quod mihi nil tale expectanti repente allatum, nuncio penitus profligata fuit. Quanta passus in illa rerum omnium penuria, quantum periclitatus sum, hoc tua nihil refert,

Istud de morbis contagione serpentibus argumentum jam jam clausuro mihi in mentem venit quidpiam memoratu dignum, quid & si critico examine medicorum. In Cordubensi nostro S. Catharinæ prædio rusticantes nocte appetente meteorum igneum, quod trabis latissimæ speciem referebat, & per medium cœlum coruscans undique ad oppositum horizontemolvebatur, attoniti spectavimus. Hispani advenæ, lucem illam omni late provinciæ spectabilem fuisse, nun-

nunciarunt dein', ac portentosam judicarunt. Nos philosophiam saniores docti subitum illum splendorem ceu festivum ignem sereno obtutu vidimus, qui re tamen ipsa mæstus, quia seu causa, seu indicium, certe principium catarrhi lethalis fuit, quo Tucumaniam omnem pervagante per biennium ingens Hispanorum, æthiopumque numerus erat consumptus. Eodem prorsus, quo ignea exhalatio visa, tempore morbus hic, ut ajunt, epidemicus caput. E prædio enim quatrIduo post cordubam redux Collegii nostri socios plerosque lecto jam affixos deprehendi, vix pauculis, qui academix, templique munia obirent, superstitis. Urbes quamvis promiscue omnes periculosa hæc lues funestaverit, in prædiis tamen insolentius videbatur debacchari. Corduba ad urbem sanctæ fidei iter faciens turmas Hispanorum equitantium obvias habui, quorum quisque cornu bubulum ægrotantium lotio plenum manu gestabat, ut scilicet medicaltri cordubenses (Medico enim, vere medico provincia caret) illo inspecto opportuna norint medicamenta designare. Incredibile enim, quantum fiducia in Lotii inspectione, contemplationeque collo-
cet Hispanorum vulgus, quantumque fallatur.

CAPUT XXVI.

De Abiponum medicis, ac medicamentis.

Risum comprime, lector amice, dum medicum *Keebèt* honoris gratia ab Abiponibus appellari, audis. Idem enim vocabulum *Keebèt* malum dæmonem, medicum, augurem, maleficum præstigiatores significat. Ex quo planum fit, quam late pateat apud illas gentes medici officium, & quantam rerum variarum cognitionem complectatur. Dæmonem *Keebèt*, vel *Aba'aigichi* ab Abiponibus dici; Avum quoque suum *Groáperikie'* suavissime compellari, dudum memoravi. Illum morborum juxta, ac sanitatis auctorem jam metuunt, jam aliquomodo venerantur, & nescio, quid divinitatis ridiculæ habere somniant, etsi de ejus origine, natura, proprietatibus nihil prorsus noverint præterea, ut supra retuli. Medicos itaque suos Avi sui vicarios, ac interpretes colunt, ab Avo suo virtute morborum expultrice instructos credunt, atque adeo Avi sui honorifico nomine *Keebèt* dignantur. Enimvero istos humanis viribus majora posse, supra cæteros sapere, sibi persuadent, quippe quibus familiare cum Avo illo suo colloquium indulgeri, morbi cujuslibet & profligandi, & si lubuerit, accersendi, pluvix, procellæ pro arbitrio ciendæ, manuum ad futura resciscenda evocandorum, in feras semet transformandi potestatem, rerum absentium, ac futu-

futurarum scientiam inesse, pervicaciter contendunt. Tam insanis cæcati opinionibus medicos suos ceu Divinos quosdam homines, ceu terrestres Deos venerunt maximopere, ac reverentur. Qua quidem re a veterum moribus, & exemplis non abludunt. Nam

Unus homo medicus multis æquandus honore est. Homerus Iliade λ canit. Hippocrati, si lampridio fides, aram posuere antiqui cum epigraphe: *Deo viæ*. Chironem, Machaona, Podalirium, Hippocratem delubris, divinisque honoribus cultos olim, Cælius, Pliniusque testantur. Æsculapium Deorum numero adscripsere, quod Hippolytum, & Androgeum Minois filium per invidiam ab Atheniensibus trucidatum ad vitam (ut quidem fabulabantur) revocarit, id quod Q. serenus samonicus annuit his versibus:

Tuque potens artis, reduces qui tradere vitas
Nosti, atque in Cælum manes revocare sepultos,
Qui colis Ægæas, qui Pergama, quique Epidaurum.

Antoninus Pius Cæsar, postquam Gemmas duodecim novem millionibus æstimatas pro lethali morbo depellendo frustra hausisset, a Galeno denique percuratus est feliciter. Illi sospes jam Cæsar diadema suum dono dederat, adjecta hac sententia: *Antoninus Imperator Romanorum: Galenus morborum*. Sic Radau in Oratore extempor. P. 2. C. 7. folio mihi 329. Alii Galenum anagrammate *Angelum*; *Medicorum Sigillum* dixere alii, quasi ultimam medicinz manum imposuisset.

Ut

Ut medicos Divos, medicinas rem Divinam compellarunt antiqui. Philon illustris medicus medicamenta, quæ paraverat, alexipharmaca, exquisitissimaque vocaverat *Manus Deorum* *Θεῶν χεῖρες*. Et in Avicennæ monumentis medicaminis genus ali- quod: *Donum Dei*, inscribitur. Et vero jure tanti facienda est medicina, quanti sanitas. Hæc quantis- cunque cræsi opibus potior, fluxarumque, quæ in homines cadunt, felicitatum maxima censetur. Medicina equidem valetudinem afflictam restituit, tur- batam recreat, animam ægri jam jam fugientem si- sistit, atque remoratur. Neque obest, eam quando- que morborum esse pertinaciam, ut medicamento- rum omnium virtutem, medicorum artem excedant. Hinc falluntur, qui in illorum esse arbitrio putant, semper curetur ut æger. Qui, dum medico venam explorandam porrigunt, & imperato medicamine vix dum usi, morbum protinus a corpore propulsatum volunt. Si cui medicorum fas sit dicere: *Veni. Vi- di. Vici*. Illum profecto præ ipso Julio Cæsare sus- picendum autumarem; Hic equidem aspectabili semper cum hoste congressus est; Illis plerumque latente cum morbo pugnandum, quem nec oculis cernere, nec conjectura quidem, vel acutissimæ men- tis sagacitate deprehendere interdum liceat. Quodsi antiquitas aris dignos putavit medicos suos, ætas no- stra potiori jure in Fernelium, Cardanum, Mercu- riales, Falopium, Vesalium, Gesnerum, Sydenhami- um, magnum Boerhaviū, ejusque commentatio- ne Clarissimum Van Switenium, aliosque non pau- cos, ceu terrestria quædam Numia oculos defigit, qui toto vertice, & humeris extra præcos illos eminent, & dum saluberrimæ artis inventiones a majoribus re- lictas novis indies accessionibus locupletarunt, morta- les omnes novo sibi, immortalique beneficio ob- strin-

strinxere. Quam lubens ego hic in laudes recentiorum quorundam, quibus urbs hæc nostra, quibus Europa cætera plaudit hodie, excurrerem, nisi antiquitas in suis celebrandis totam, quanta est, Rhetoricam dudum consumpsisset.

Verum quanta ego admiratione prosequendos Europæ medicos, tanto risu explodendos, aspernandosque Abiponum medicastro palam pronuncio, qui scientiæ medicæ fundum, neque superficiem quidem viderint, qui ejus scholam ne a limine quidem salutarerint, qui pharmaceutica, botanica, anatomica, prognostica artis mysteria ne extimis quidem labris unquam delibarent. Et hos miserum barbarorum vulgus medicos, servatores *ουτρηγο* suos adorant. Re enim ipsa veteratores, versipellesque illos in cute novimus, dignos sane, qui ab iratissimo Galeno vapulent quotidie, ab Æsculapio, Hippocrate, totoque medicorum cœtu liberaliter conspuantur. Fraudes equidem pro medicinis, verba pro rebus male credulis Abiponibus obtrudunt, perindeque ignorant morbos ab ægris depellere corporibus, ac sanis accersere, tam in pharmaco papando, quam in veneficio inferendo rudēs, dolos nectere, quam dolores minuere, scientiores. Incredibile tamen, quantum barbari avitæ superstitionis erroribus a pueritia imbuti in præstigatorum suorum peritiā acquiescant, dum ægotaverint, quantum, ne magico illorum carmine afflati ægrotent, sibi usque metuant. Verum enimvero & fiducia, & metu indignos hos nebulones palam, semperque affirmavimus; Quin ad hanc veritatem audientium animis altius imprimendam, ut, quam jactant, corporibus nocendi scientiam omnem adversus nos libere expromerent, ultro, impuneque præstigiatores omnes, ac præstigiatrices provocavimus. Hos e fraudibus,

bus, ac fallaciis confutos veteratores ut oculis fugiant, auribus respuant, recordatione ipsa perhorrescant, lingua mordaci explodant, ac toto animo aspernentur, Abipones nostros iterum, iterumque adhortati sumus. Ad quem contemptum vindicandum scientia nocendi, si quæ in illis resedisset, omni adversus nos usi fuissent utique præstigiatores, bipedum omnium nequissimi.

Apud Ægyptios, Herodoto teste L. 2. folio mihi 134. morbis singulis singuli medici præferunt, ut eo certius ægrotantibus profint: uni enim scientiæ intentos facilius illa excellere posse, quam pluribus occupatos, existimarunt. Apud Abiponenses medicos id singulare, quod omne morborum genus, (interni sint, an externi, nihil interest) singuli eadem prorsus curent medicina. Videamus illorum methodum, ac rideamus. Male affectam corporis partem applicatis fortiter labiis exsugunt, postque singulos suctus pinguissime expuunt. Per intervalla hausto ex intimo pectore spiritu, buccis turgentibus perflant illam, quæ dolet, corporis regionem. Flamen illud, illeque suctus alternis repetuntur. Si totum lanqueat corpus, si maligno calore æstuet, si variolis, vel morbillis tentari incipiat, quaterni, sæpe quini medici, Harpyarum instar, advolant ad totum corpus eodem tempore exsugendum, perflandumque ita, ut hic brachio, ille lateri, tertius, quartusque pedibus labia affigat sua. Totidem hirudines ex agro suspensas crederes. Si uber recusat infans, si lacrymatur, in promptu remedium est, a matre præstigiatori traditur liberaliter sugendus. Ipsissima hæc ægris mendendi methodus apud omnes, quod sciam, Paraguariz, Brazilizque Barbaros usu recepta est, & apud Indos Galibes quoque viget, uti Pater Joannes Grillet

let noster in suo per provinciam Guianam itinere refert. Neque ausim dubitare, hunc fugendi morem a plerisque Americae populis civitate donatum, & aperte superstitiosum censendum esse, cum a solis illis præstigiatoribus, superstitionis magistris exerceatur, in quorum labiis duntaxat medicam latere virtutem rudes Indi arbitrantur. Haud equidem mihi persvaserim, ejusmodi suctum, afflatumque naturali quadam vi ad salutem corporum seu servandam, seu restituendam promiscue quidquam conferre. Arbitrium penes medicos Europæos esto.

Novi, pus ex ulcere, sanguinem ex vulnere fugi utiliter, corruptionis secuturae materies ut exhauriatur. Cataplasma ulceri applicatum quidni humorem depravatum extrahit, illoque humescit? Cucurbitulae, vel hirudines carni affixae noxii, superfluique sanguinis sorbent portionem. Quoties digitum acu, vel cultello cruentamus, stillantem inde sanguinem aut labiis exugere, aut manu exprimere, satagimus. Bestiae, Canes præprimis, vulnus seu proprium, seu alienum lingendo persanant. Lingua illis pro pharmaco, quin præ quovis pharmacopoeo est. Isti a serpente Hispani, Indive Christiani ab amico benevolò membrum læsum fugi curant, ut suctu validiore lethale virus, antequam per artus diffundat se se, ocyus expungatur. Sugens, ne sibi officiat, ori folium tabacæ immittit suo, ac ad suctus singulos expuit sollicitè, ne veneno, quo alium liberat, deglutito semet inficiat, interficiatque. Usitatum sæpius in subita trepidatione hoc remedium, novi; Sed quia semper cum aliquo fugentis periculo conjunctum, non temere svadendum, nisi extrema necessitate urgente, dum medicaminis alterius haud est copia. Frequenter id usuvenit per Americae vastas solitudi-

tudines iter agentibus, quæ ut serpentibus mortiferis scatent passim, sic medicis, medicamentisque omnino destituuntur.

Apud priscos Germanos matres filiorum, conjuges maritorum vulnera suxisse, Tacitus memorat : *Ad matres, ad conjuges Vulnera ferunt; Nec illa numerare, aut exfugere plagas pavent.* Vulnusquoque Menelai a Machaone medico suctum fuisse, canit Homerus *Iliade* 8 :

*Sed postquam vidit Vulnus, quo inciderat amara sagitta,
Sanguinem exfugens lenia medicamina sciens
Insperpsit &c.*

Quod si itaque Abipones vulnera, ulcera, serpentium ictus &c. Cuicunque demum mortalium exlugendos præberent, neutiquam illos criminandos putarem. Ast enim superstitionis luculentæ convinctur imprimis, quod a solis præstigiatoribus id sibi præstari velint, quibus non a natura, neque ab arte, sed ab avo illo suo medendi facultatem concessam stultissime credunt. Quamvis una sibi perivadeant, alterum alteri halitus, labiorumque salubritate, ac medendi efficacitate plurimum præstare. Dum brachium meum, ut dixi, barbarorum telo transverberatum, ut illud a Pazanoir in Abipone, præ reliquis eminente exfugi protinus sinerem, turmatim in foro accurrentes fœminæ mihi svaferant, curationem celerissimam pleno ore pollicentes. Audivi consilium stupidum, risi, &, ne illarum superstitionibus tribuere aliquid videar, cum indignatione rejeci. Alterum, ex quo damnandus hic barbarorum suctus, caput est, quod illum universale adversus quosvis morbos remedium,

dium, Panaceam, & , ut vocant, alexipharmacum existi-
 ment. Novi in Paraquaria Europæum rei medicæ
 plerisque aliis scientiorem, qui, quod herbam fuma-
 riam bibendam agris pluribus feliciter imperarit, Do-
 ctor fumaria ab Hispanis appellabatur. Indum, in-
 firmorum curatorem, in Quaránico oppido S. Tho-
 mæ habui, qui, qualem medicinam huic, illive agro
 porrexerit? interrogatus mihi semper respondit: Ver-
 benam illi præbui, mi Pater. Expertus is, hanc her-
 bam uni quondam profuisse, quibuscunque infirmis,
 quocunque morbo laborantibus, sine discrimine por-
 rigendam, profuturamque stupide putavit. Hoc stu-
 pidiores Abipones, sugendo, sufflandoque extermina-
 ri e corpore credunt, quidquid demum sit, quod
 dolorem, calorem, tumorem, molestiamve adfert
 ægrotanti. Hanc rudium credulitatem fraudibus iden-
 tidem novis alunt præstigiatores callidi, confirmant-
 que. Dum enim agro sugendo se accingunt, spinas,
 scarabæos, vermes &c. ori suo clanculum injiciunt, &
 istas quisquillas post suctum quemlibet expuentes: In,
 inquiunt agro, ægritudinis tuæ causam, simul ver-
 mem, spinamve ore ejectam intento indice common-
 strant. Quo viso in spem erigitur infirmus, & mæ-
 rore absterfo reviviscit aliquando, dum exulare jam,
 a quo cruciabatur, pessimum hospitem opinatur. O-
 pinio sola ut ægritudinis sæpe, sic sanitatis origo sæ-
 pissime fuit. Tantum corpus in animum, animus in
 corpus potest. Luce meridiana id clarius, experi-
 mentis quotidianis, trecentis historiis confirmatum.
 Adhæc nil mirum est, si post repetitos diebus aliquot
 suctus dolor tandem extinguitur, qui sponte sua, so-
 liusque temporis beneficio, nulla etiam medicina ac-
 cedente, erat desiturus. Haud inficior, Abipones
 plerumque convalescere, nativo id debent robori, non
 præstigatoris, qui eos suxerat, operæ. Illi tamen,

ceu Soteri, ac Archiatro suo, instauratae valetudinis gloriam, mercedemque religiosissime tribuunt, equos, arma, penulas, sphaerulas vitreas, & siquid praeterea in convalescentium est penu. Neque grati animi instinctu, metu potius id facit. Ea siquidem illorum mentibus insidet persuasio: Morbum suctu depulsum subito rediturum, suos nisi medicos pro viribus confestim remunerentur, fustuario, quam praemio digniores, quippe non raro nocentissimos. Vidimus cheu toties infantes teneros exangues, pallidos, languidos, moriturentes, & paulo post mortuos, postquam illi veteratores repetitis per diem suctibus illorum corpuscula defatigarunt, melius dixerō, exhausterunt. Anticyram profecto mittendae matres Barbarae, quae post tot suorum funera nondum sapere.

Apud barbarissimos Payaguas lege publica cautum, sancitumque e majorum instituto est, ut, siquis suorum morbo extingatur, medicus (Pay dicitur) qui ejus curationem suscepit, universi populi telis illico trucidetur. Et vero, ut sunt vindictae studiosissimi, crudelissimae legi crudeliter obediunt omnes. In urbe Assumptionis, ubi tunc versabar, ad Paraquayi fluminis litora infelix medicus infirmi mortem morte sua luit, hastis, sagittisque contubernalium suorum misere confectus. Quod si atrox Payaquarum lex apud Abipones quoque extaret, nae! pauciores illorum Galeni se se nepotes mentirentur; Recusarent enimvero, formidarentque periculosam medicandi professionem, medicique fungorum instar una nocte crescere illic desinerent. Certissimum equidem mihi, in singulis Abiponum contuberniis infirmis plures semper medicos numerari, qui nullo famae, vitaeque periculo, lucro utique certissimo aegrotantium lectulos obsident, corpora illorum, ac vires nullo morbi di-

scri-

serimine exsugunt. De ægri periculo interrogati, latissima quæque ominantur. Si prognosticis contraria eveniant, si æger occumbat, in promptu excusatio est: Mœrbum lethalem fuisse. Venefica alterius arte virtutem medicinæ suæ esse impeditam, superatamve. Et hac statur sententia. Nefas sit Præstigiatoris excusationes in dubium revocare.

Quamvis ille præstigiatorum suctus præcipuum sit apud Abipones medicamentum, & fere unicum, habent tamen aliquas, ut somniantes de rebus habere solent, de remediis nostris ideas. Interdum, fatigatos æstu solis, vel calore maligno accensos sedum persentiscunt, aliquid sanguinis sibi detrahunt cultro quocunque vel brachio, vel suræ infixio. sunt, qui spina piscis (Raya is dicitur ab Hispano: *Eparauik* ab Abipone) pro scalpello phlebotomou, venam non infeliciter secant. Herbarum salutarium, quarum incredibilis istic multitudo, virtusque multiplex, vix nomina aliquot callent, videri tamen appetunt mysteriorum naturæ scientissimi. Hinc non tam sanitatis alienæ, quam famæ suæ studio ægrotantibus hæc, illave arborum folia, plantæ parum cognitæ radiculam pro medicamine propinant aliquando, cui pharmacopœus tuto inscribat: *Quid pro quo*, cum plerumque ejus naturæ sint ejusmodi remedia, ut obesse queant certius, quam prodesse. Molesto itinere defunctus in conceptionis oppido invaletudine tentabar aliqua. Adest vetula primi ob scientiam medicam nominis. Radicem vastam atricoloris mihi porrigit, salutis anchoram fore spondet, si in aqua percoctam sumpsero. Exhorruui sane ad talem medicinam, sed vehementius ad medicam, Megæræ imaginem.

Ut Abiponensis lingua caret, sic Quaránica abundat plantarum salubrium vocabulis, earumque usum præclare nōrunt Quaraniarum non pauci. In oppido S. Joachimi sane Indum Ignatium Yariçà infirmorum curatorem per octennium novi, ac ut rem fatear, non potui non demirari ejus dexteritatem, felicitatemque. Is equidem ossa brachii, pedisve contracta, suo loco reposita, tabellis arundineis firmata quatuor herbularum ope brevissimo tempore sapius persanavit, nullo prorsus claudicationis vitio remanente. Est & hederæ genus in sylvis Americanis obvium, quod funis instar, digiti minimi magnitudine, colore subviridi ad fuscum accedente, arboribus adnascitur, varioque truncum complectens flexu serpit. Ab Hispanis suelda con suelda dicitur; In Europa num proestet, quo nomine appelletur, doleo, me nescire, post longam rei indagationem. Planta hæc minutim concisa, cum aqua excocta, linteoli ope sæpius applicata crus, brachiumve comminutum prompte consolidat, feliciterque. Complures me vidente hoc remedio per sanati fidem rei faciunt certissimam. In urbe correntina matronæ Hispanæ caniculi pelle recenti recens fractum pedem circumligant, & remediis aliis omnibus exclusis perfectissime sanant. Medicamentorum, quæ ad purgandam alvum, ad ciendos sudores, ad bilem abigendam, aut ad humores noxios depellendos faciunt, nullus omnino apud Abipones usus est, cognitio nulla. Clysteris ne mentionem quidem ferunt. In S. Hieronymi oppido Hispanus miles e medicastrosum numero quispiam rogatus a Patre Brigniel, ut Abiponi ægrotanti mederetur, enemate opus esse, pronunciavit. Syringem admove-
veri vix sensit ægrotans, e lecto profiliit furibundus, arreptaque hasta stravisset militem medicum, nī fuga cele-

celerrima sibi consulisset. Terrore subito in furiam converso Hispanus senex nobis cachinnantibus, quidquid usquam conviciorum, ac maledictorum est, in ægrum ingratum evomit; Ex inferno potius, aiebat, evocate, Patres mei, dæmoniorum pessimum ad hanc bestiam curandam. Hem! medicinam offerenti mihi necem intentat barbarus, syringi hastam opponit. Armis tam imparibus æquis certamen ineat? Hæc, & plura alia ille. Neque a Quaraniis, ut Clystere utantur infirmi, unquam impetrabis. Tabacæ Hispanicæ, quæ Hispali conficitur, pulveres, quos naribus injicimus Europæi, Indi passim auribus medicandis inferciunt, dum eas scilicet Cœli pluvii, ventive acrioris injuria male affectas advertunt. Quamvis ex iisdem tabacæ pulveribus per nares attractis voluptatem experiri se se, minime inficientur. Et vero a nobis identidem eos petiere. Concubia sæpe nocte adfuerant Abipones, mihi que expergefacto: *Da mihi tabacam Tachkané yabogè*, Clamitabant. Surrexi. Dedi, quod petiere. Insentium instar sunt barbari, & fiducia erga patrem, & audacia ad petendum, quidquid in mentem venerit, plenissimi. Si repulsam ferant, irritantur, beneficiis dein pluribus vix tandem placabiles.

Præstigiatores, ut morborum dominium, donumque sanitatis penes se esse, significant, verba sola, medicamentis omnibus exclusis, ad ægros quosvis persanandos sufficere, magnifica ostentatione affirmant. Ad infirmi lectulum confidentes arbitraria carmina, ceu magicum quid, decantant jam ad Avum suum dæmonem ægro placandum, jam ad manes ex inferis evocandos, quorum opera infirmas, exterminandasque spondent quantascunque infirmitates. Hinc, etsi superos flectere nequeant,

Acherontā movere posse miris artificiis, veteratores isti a stolido vulgo creduntur. Sed venia digni videntur creduli barbari, cum viri cætera sapientes medicam virtutem solis verbis concesserint. Plinius l. 28. c. 2. refert ex Homero: Ulyssē sauciatae fœminæ sanguinem carmine inhibuisse Theophrastus ischiacos: Varro podagricos: Cato membris luxatos versiculis quibusdam juvari, affirmant. Quid quod Theophrastus Paracelsus l. 1. phil. Sagac. c. 6. ausus sit dicere: Naturam vires suas in verba imponere, sicut in herbas, & radices. Ast apage aniles fabulas, nugas superstitionas, nigro dudum notatas calculo, papyro candida indignas. Abiponum medici, tot fallaciarum architecti, quam parum suis ipsi artibus confidant, tum denique palam faciunt, cum morbo correpti non a collegis suis, sui similibus, sed a quovis potius Europæo Consilium, remediumque sibi deposcunt. Malunt ægrotantes medicæ artis, quam sani jactabant, ignorantiam fateri, quam morbo succumbere. Ea tempestate, qua inter Abipones egeram, medicæ artis fama præ cæteris claruit Pariekaikin, præstigiatorum princeps, Hic Pleuritidis quadam specie tentatus, immodicisque caloribus æstuans non Collegarum suorum aliquem, me potius, ut sibi mederer, accersivit. Pulveres cornucervi calcinati cum aqua hordei cocta illi sanitatem, mihi apud Abipones contubernales medici famam attulere. Sed maluissem esse, quam putari medicus. Nulla equidem re citius barbarorum tibi devincies animos, quam medendi dextertate. Putant nil ignorare illum, qui morborum naturas, remediaque noverit. Fidem habebunt in rebus, quæ ad religionem pertinent, atque adeo morigeros se, ac faciles præbebunt. Divinus ipse servator, cum in terris ageret, in sui admirationem

rapuit mortales, quod non animis duntaxat, sed & corporibus humanis mederetur. Illius imitatione quotquot Barbarorum institutioni operam dedimus, medicorum, Chirurgorum, pharmacopœorum penuriam maxima, qua potuimus, virium contentione, remediis parabilibus, librorum medicorum lectione, aliis quibusque industriis supplere conabamur, ut miseram illam, avitisque superstitionibus cæcatam plebeculam a præstigiatorum sinu abstraheremus, quos religionis sanctæ præcipuos obices ubique gentium sumus experti.

Incredibilis est, quæ Quaranicis in oppidis gerebatur, ægrotantium cura. Pleraque illorum quatuor, aliqua sex, vel septem incolarum millia numerant. Pro multitudine, vel paucitate istorum plures, paucioresve Indi ægris curandis designantur, herbarum, remediorumque familiarium cognitione aliqua imbuti, quamvis iis haud liceat Missionario non consulto, arbitrarias medicinas adhibere. Baculum altum cruce insignitum manu semper circumferunt, & Curuzuyà seu crucem gerentes vocantur propterea. Illorum est sub auroram per plateas unicuique assignatas totum obire oppidum, ægros lustrare, & si quis recens in morbum inciderit, resciscere. De his omnibus Missionarius, antequam sole exoriente præsentibus omnibus sacrificet, edocetur, & quibus remediis utendum, quæ Sacramenta cuivis ministranda, significat. Ipso meridie ex illius culina Caro elixa cum pane ex flore farinæ triticæ candidissimo ad ægrorum singulorum (Triginta interdum, aliquando plures, vel pauciores decumbunt) domos mittitur. Ægri singuli semel quotidie, & pro morbi periculo sæpius visitantur a Missionario, quem bini minimum pueri semper comitari

solent. Nihil prorsus, quod ægrorum seu animis, seu corporibus conduceret, desiderari passi sumus unquam. Quibus industriis id sane impetratum, ut plurimi convalescerent; Cæteri vero, quorum morbus medicinæ vires superaverat, sacris ad beatam mortem præfidiis tempestive muniti, nobisque præsentibus vivere desinerent. Explodendus itaque hoc rursus loco notissimus Bougainvillius, qui in urbe Boni aeris per homines vel nobis malevolos, vel ignorantes misere toties circumventus scribere ausus est: Quarantos plerosque morbo, in quem inciderint, extinguere, paucissimos e morbo recreari. De variolis, morbillisque duntaxat id verissime affirmasset. Causas alio jam Capite adnotavi. Ad hæc noveris, per Quarantium oppida ternos, certe binos fratres nostros laicos Chirurgos Europæos, in re medica commode versatos non Missionariis modo, sed & Indis ægrotantibus utilissimam sæpe operam navasse, quamvis ob longissima terrarum intervalla, quibus oppida fere sejunguntur, haud semper ope sua indigentibus præsto esse potuerunt.

In nos itaque, quorum intererat Indorum animos curare, corporum ægrorum curatio recidit. Et vero propitio Numini in acceptis referendum semper putavimus, si quando remediis minimis maximi sæpe morbi profligabantur; curtissima enim supellectili pharmaceutica nostræ ædes pollebant. Sulphur, alumen, sal, tabaca, saccharum, piper varium, adeps gallinarum, tigridum, boum, cervorum, ovium &c pulvis pyrius quam multiplicem utilitatem ægris præstant! vix abit dies, quo istorum aliquid ab Indis non peteretur. In promptu esse oportet tres cucurbitas totidem unguentis instructas. Viride est unum (Mohâ hobi dicitur) ex sebo, & tri-

triginta aliquot herbis conflatum. Alterum nigrum (Mohâ hû) flavum tertium (Mohâ yû) Quodlibet horum, ut ex alia constat materia, sic aliis, aliisque, quos Indi experientia nôrunt, usibus destinatur. Herbas item saluberrimas, quæ vel sponte sua passim nascuntur, vel ab Europæis plantatæ, in promptu habemus, quales sunt: Borrageo plantago, fumaria, verbena, salvia, Malva, Buglossum, virga aurea, origanum, seu Mayorana, mentha, absinthium, nardus, &c. &c. Rorismarini, rutæ, artemisiæ sylvas apud Quararios, deprehendas. His adde arborum nobilissimarum jam cortices medica virtute insignes, & Europæis in pharmacopoliis pretiosissimos. Quis nescit, lignum sanctum, Quajacan, corticem Peruvianum, Quina Quina dictum ex arbore, quam Indi nostri Chiquiti pizdès vocant, Rhabarbarum (Alexandrino persimile) sassafràs, sarsaparillan, Mechoacan, jalapam, tamarindos, cupaiba, aliaque multi usus balsama, zingiber, sanguinem draconis, & quæ non alia magni nominis medicamenta in Paraquaria seu nasci, seu parari, Taceo, varia lapidum, quos piedras Bezàr Hispani vocant, quique seu in huanacorum, seu in alcium stomachis passim reperiuntur. Tot pisces, tot amphibia, tot feræ campestres, sylvestresque medicos in usus aliqua sui parte egregie Americanis servant. Aguaraquazû canis aquatilis auri instar flavescens nigra per medium tergi linea distincta pellis corpori applicata dolores ischiadicos (vulgò sciaticos) mirifice sedat, & adversus ventris tormina, me teste, ingens adfert levamen, præsertim colicam patientibus. Pellem ejusmodi ob perspectas ejus utilitates ex America attuli, sed in navi furto mihi sublatam doleo etiamnum. In flumine Parana inter Quaranica oppida Virginis Lauretanæ, & Corporis Christi pis-

eis (nomen memoria excidit) reperitur, cujus ossiculum quoddam in pulveres redactum, & cum aqua potatum stranguria laborantibus prompte opitulatur, quibus alias crocus noster Europæus (quantum pollice, & indice capi possit) vino coctus, haustusque præsentissimum remedium, me svasore, spectatoreque sæpissime fuit. Quin & feræ cæterum noxiæ medicinas suppeditant Americanis. Attingam paucula Cataplasma ex crocodili adipe confectum plagas per sanat. Ejusdem stomachus siccatus, & in pulveres comminutus, si bibatur cum aqua, calculi dolores comprimere dicitur. Crocodili dentem e collo, vel brachio suspensum passim gestant & Hispani, & Indi, creduntque se hoc præsidio contra serpentium ictus defendi. Icti a serpente pulverem e crocodili dente cultro abradunt, & aquæ immistum bibunt. Ab Indis id factitari ipse vidi, quamvis certiora, præsentioraque remedia vulneratis a serpente alio loco patefaciam. Lapilli, qui in crocodili stomacho inveniuntur, in pulveres contriti, potatique dolores calculi, qui in renibus sentiuntur, levant. Tigris ungues calcinati, cum alumine pariter calcinato, permixti, & in pulveres soluti si denti exeso, molestoque imponantur, dolorem, ut jam alias dixeram, omnem extinguunt penitus. Et mea, & plurimorum Europæorum experientia probatum sane remedium. Adeps tigrinus momento vermes expellit ex capite, vel quavis corporis parte, si illi loco, unde egredi ob multitudinem, locique angustias tentant, illinatur. Muscæ vulgares, ac domesticæ, hujatibus nil omnino dissimiles, sæpe per interdiu dormientium nares, buccamve in caput irrepunt, ibique excremento suo, veluti seminio quodam producunt vermes in medio obesos, utrinque in acumen rubrum desinentes, cætera candidos; longitudi-

ne-

ne annularis digiti unguem æquant, circulisque, veluti annulis quibusdam ambiuntur. Pauca intra horas plus, quam vel comprehendi, vel credi possit, augefcunt numero, partemque, quam infederant, capitis corrodunt. Multitudine nimia conferti jam, compressique, & seu cavernæ suæ angustias pertæsi, seu deficiente sensim alimento exitum moliantur, tentantque, qua qua possint, erumpere. In extrema cute punctulum rubicundum eruptionis, quam cupiunt indicium est. Non ipsum illud punctulum, sed ejus peripheria ungenda est adipe tigrino, ejus fætorem teterrimum haud ferentes vermes duplicata virium contentione ossa, carnemque obstantem pertundunt denique, &, qua facta via, erumpunt ad unum omnes. Obstupui profecto, steteruntque comæ, meisque vix fidem habui oculis, dum ex capite Indi Gregorii Piriporî in S. Joachimi oppido tantum Vermium acervum prodiisse conspexi, quos petasus meus neutiquam caperet; Necdum assequor, qua ratione hominis caput tantæ vermium multitudini seu recipiendæ, seu alendæ par fuerit. Ex hoc tamen incredibilem tantillo in spatio compressionem vermium licet arguere. In summitate, seu fastigio nasi supercilliis interjecto portam sibi cavarunt, sed adeo angustam, ut non nisi singulis exitus pateret nunquam interrupto ordine sibi avidè succedentibus. Vulnus tenue protinus coaluit, carnis tamen modico hiatu cicatricis instar remanente. Indus quoque edacissimorum hospitem exercitu innumerabili liberatus adipi tigrino, quo sæpè alias, semperque pari felicitate alios persanavi, recuperatam valetudinem tribuere nil dubitavit. Sed audi majora. Illud tintinnabulum, quod serpens veneno mortifero plenissimus caudæ adnexum circumfert, nobile medicamen est. In pulveres enim redactum dentibusque exesis injectum

etum illos emollit, ut sponte sua citra omnem doloris sensum sensum excidant. In aliis quoque morbis locum habet. En! ut nocentissimæ cæterum, venenatæque bellæ ægrotantibus Americanis non raro medentur. Thomas Falconer noster, in Anglia natus, quem medica, herbariaque scientia eminentem & Paraquaria & Hispania suspexit, fassus est: Pharmacopoliis Europæis facile, lubenterque carere Paraquarios, quibus ipsa natura plantas, herbas, radices, arbores saluberrimas suppeditat, morbis quibuscunque profligandis paræ.

Ut & morborum & plantarum medicarum naturam disceremus, medicorum, herbariorumque libros impigre consulimus. Bibliothecæ medicæ instar nobis omnibus fuit *Florilegium medicum*, Castellano sermone scriptum, in Hispania iterum iterumque typis datum, medicorum Matritensium laudibus egregiis, & publica utilitate mirifice commendatum, atque adeo per Americam, qua Hispanicæ ditionis est, ubique expetitur. Joannes Steinheffer silesius, frater noster, Chirurgiæ peritissimus, medicorum voluminum lectione, & multi temporis experientia, Dum in Novi Regni Granatensis coloniis Indicis versaretur ægrorum curator, perpolitus librum hunc vastæ molis Missionariorum commodò elucubratus est, ut hoc subsidio adjuti curandis Indis ægrotantibus aliquantulum aptarentur, cum per immensa terrarum spatia medici, pharmacopæi, Chirurgi, ne umbram quidem deprehendas. Istorum supplementum illud profecto volumen est, cum non modo morborum accuratam cognitionem, sed & facilem medicamentorum præparationem ex iis, quæ in America suppetunt, rebus perdiligenter, & intento veluti digito commonstret. Quibus industriis cum
uti-

utilem ægris operam identidem navaverimus; id denique impetravimus, ut Abipones, quoties invaletudo se illis insinuabat, neglectis illis suis præstigatoribus spes suas omnes in nostra ope collocarent, nostraque medicamina superstitiosis illis quam longissime præferrent. Mihi diffidens, deque aliorum vita anxius nunquam præcipiti manu medicinam ægrotantibus obtrusi. Adversus aeris injurias ut defenderentur; A' noxiis escis, potibusque ut abstinere, prima hæc mihi, ac princeps cura. Dapes salutare, quas potui, mea e penu præbui. Diæta nil proficiente medicamentum denique longo usu exploratum, quod si prodesset nihil, nihil certe obesset, porrexi. Nostra comitate, beneficentiaque deliniti ægrotantes barbari sacro se tingi latice patiebantur; Prius equidem, ut primum morbo tentati sunt, baptismi metu in sylvarum latebras vel refugerunt ipsi, vel a suis deportandos se curabant. Annis posterioribus summa voluntatum inclinatione, fiducia pari in nos propendebant plerique omnes, & si qua se medicina a nobis recreatos aliquando meminerant, eandem contubernalibus suis morbo ingruente adhibendam poposcere. Ex uno conjectura sit de cæteris. Fructus, figura ac dulcedine amygdalæ par in calidiori septentrionem versus Paraquaria nascitur, a Quaraniis Mandubiquazû, ab Hispanis Piñon del Paraguay, a medicis Ricinus Americanus, ficus infernalis, Nux cathartica appellatur, quod comestus simul vomitum ciet, simul alvum promptissime purgat. Primos, qui in Paraquariam olim venerant, Hispanos festive decepit. Dulcedine capti hunc fructum esitarunt avide, & quem cibum putarunt, maximo omnium risu medicamen experti sunt, quod armis duplicibus humanum oppugnat corpus, humoresque seu superfluos,

seu



seu noxios via duplici citra cunctationem expellere consuevit. Ejusmodi nuces ternæ, quaternæ Abiponibus, quibus purgatio necessaria videbatur, a nobis datæ sunt. Luculentum ex earum usu levamen nemo non capiebat. Inde factum, ut, quotquot stomachi gravitatem sensere, hanc sibi medicinam a nobis ipsi flagitarent. Idem de aliis remediis sentiendum. Prisci moris tenaces vetulæ passim fremuere, dum suas aliis medicinas risui jam esse, quasi-que sui fontem exaruisse animadverterant. Præstigiatores, qui ægrorum prius & corpora & facultates exfluxerant, ceu fuci inertes vulgo spernebantur.

Infinitus sum, si cæteros, quibus Americani populi utuntur, medicandi ritus persequar, quorum alii Europæorum risum mereantur, indignationem, admirationemque alii. Strictim, veluti per transennam memorabo aliquos. Patagones, & qui Australes Magallanici territorii plagas pervagantur, cæteri barbari ægrotantis corpus a malo dæmone insidendi, putant. Illorum medici tympana, in quibus terribiles visu formæ depictæ, circumferunt; Hæc ægro assidentes, vociferatione adjecta, pulsant identidem, dæmonem de morbi genere vel consulturi, vel ex ægri corpore ejecturi. Si quis morbo occumbat, illius cognati medicum diris modis insectantur, ceu mortis authorem. Si quis optimatum Cazi- quiorumve moriatur, medicos omnes, in fuga præcipiti dilabantur alio, contrucidant. Stulta commiseratione ducti moribundos, necdum mortuos, sepe- liunt interdum. Horum aliquem adhuc spirantem e tumultu protraxit Pater Mathias Strobl, ultra decennium Australes inter Barbaros versatus. Mbaya- rum, seu Quaycurus ferocissima natio medicos suos
Nigie-

Nigienigis appellat. Cucurbita ingens fructuum variorum, ut manu exagitata sonitum edat, seminibus duris plena, umbella item ex fuscis struthionum plumis contexta illorum & præcipua insignia, & artis medicæ instrumenta sunt, quæ quaquaversus, ut noscantur, circumferre manibus solent. Imperare mihi haud possum, ut Chiquitorum medicos taceam. Rifu digna sunt, quæ in historia Chiquitorum veteranus illorum Missionarius Joannes Patritius Fernandez scripsit. Præstigiator medicus ægri curationem jam jam aggressurus exquisitis dapibus, pullis, gallinis, perdicibus stomachum refecit suum, ut ad perslandum, sugendumque ejus corpus anhelitum & robustiorem, & salubriorem sibi procuret. Medico liberaliter epulante ægrotanti triticum turcicum inspidum, ac semi coctum objicitur. Si illud fastidium, nemo mortalium est, qui ad cibum sumendum hortetur miserum, ut adeo inedia, quam morbus plures conficiat. Primo accessu trecentis interrogationibus ægrotantem medicus fatigat: Quibus in locis, quærît ex illo, heri versatus es? Quas vias traversisti? Everso cantharo potum ex tritico turcico paratum fors temere humi fudisti? Quid? Si testudinis, cervi, apri, aut alterius feræ carnem canibus devorandam imprudenter objecisses? Fateatur horum aliquid æger, bene est. reponit medicus, morbi causam tenemus. Illius feræ anima ad vindicandam injuriam corpus ingressa tuum te jam excruciat, cheu! Hæc dolorum, quos sentis, origo est. Delphica hoc dictum ex tripode a barbaris putatur. Nec mora. Curationem orditur. Partem corporis afflictam exsugit iterum, iterumque, ac tertio. Mox triste Carmen deblaterans loci, ubi æger decumbit, solum omne clava quatit, ut minitabundo strepitu perterrita feræ illius, cujus carnem cani objecit, anima

anima ex ægroti corpore discedat. Stupide id a versipelle medico spondetur, supidius ab ægro expectatur, vivida tamen, quæ imaginario in remedio collocatur, ægri fiducia interdum obtinetur, morbo aliis de causis evanescente. Crudelior ægri curandi consuetudo apud Chiquitos eosdem grassabatur.

Uxorem ægotantis mariti trucidarunt; Hanc, cum maritus decumbat, causam esse, rati. Hac e vivis sublata illum protinus convaliturum, perperam credidere. Sæpe alias, quænam præstigiaticum ægotanti morbum accersiverit, medicos consulebant suos. Hi jam vindictæ, jam utilitatis suæ studio abrepti illam, istamve, ut lubuit, ream pronunciarunt. Nec opus erat argumentis ad hoc probandum. Præstigiatoris sententia & oraculum & classicum genti credulæ fuit. Armati concurrunt undique ad miseram misere necandam. Tales olim erant Chiquiti adhuc sacrorum nostrorum expertes. His nostra dein sub disciplina imbuti tum ob virtutis christianæ, bellicæque exempla, tum ob eximiam artium plurimarum cognitionem Hispanis admirationi dudum, & adversus alios barbaros auxilio semper fuere. Rudes animulæ, quemadmodum noxii humoris intemperies in corpora possit influere, haud intellexerant, neque quantum alvi purgatio, sanguinisve detractio ad restituendam valetudinem conferret, unquam perspicere. Ast nostris aggregati coloniis, experimentoque suo conviæti quotidie præstigiatorum fallacias aspernantur. Hac demum ratione mulierum securitati cautum est, quarum vita seu marito, seu quocunque alio ægotante pro medicorum versipellium arbitrato identidem periclitabatur. Hactenus de morbis, medicis, & medicinis Abiponum; Jam, quæ mortis ratio, dispiciendum.

CAPUT XXVII.

De ritibus, qui Abiponum mortem comitantur, qui consequuntur.

Mors mortalibus plerisque formidolosa: Abiponibus universis formidolosissima. Mortis ne memoriam quidem ferunt, minus morientis aspectum. Hinc sicubi de cujuspian vita conclamatum est, ex illis actutum ædibus aut fugiunt ultro contubernales, aut per remanentes ad ægri curationem vetulas fugantur, ne ex lugubri morientis spectaculo mœrorem animis haurirent, mortisque metu, dum dimicandum cum hostibus, vitæ discrimina posthac recusarent. Idcirco suis extorres contuberniis vel alieno in tentorio, vel sub dio, quod sæpius videram, noctes agunt complures. Cum rarissima sit apud istos naturali morte defungentium experientia, mortis jam jam imminuentis prognostica ignorant. E tantilla cibi abstinencia, ex silentio ægri pertinacior, vel insomnio vitæ occasum proximum animo prælagire, seque, suosque fallere consueverunt. Nam: *La' chig reët. La chig rkenne, là ygà Jam non loquitur. Jam non comedit. Jam moritur*, idem his barbaris significare videtur. Ut primum de moribundo percrescit rumor, vetulæ seu propinquitæ generis affines, seu medica arte conspicuæ ad ejus confluunt domum. Passis capillis, retractaque ab humeris veste decumbentis stipant latus. Hinc atque hinc longo ordine ejus circumstant le-

Pars II. T ctum.

etum, Dextra cucurbitam, suum illud crepitaculum, continenter exagitant, & ad illius tristes modulos violento pedum motu, brachiorum jactatione, vocisque contentione maxima lamentantur. Quæ vel ætate, vel artis medicæ fama præcellit reliquas, morientis capiti proxima tympanum militare ingens, horrendum, horrendo cum murmure reboare facit identidem. Altera, rerum omnium, quæ ægro accidunt, speculatrix per intervalla corium bubulum, quo æger tegitur, removet, ejus vultum observat, & si quidem spirare adhuc videatur, aqua frigida liberaliter perfundit, quem in finem pelvis aqua plenus sub lecto collocatur. Hæc dum primum videram, ægrotantis scilicet miserabar sortem, quem si non morbi violentia, at certe intolerabili scæminarum ejulatu, tympanique perpetuo strepitu extinguendum metuebam, vel corii bubuli durissimi pondere opprimendum. Noveris equidem totum, quantum est, corpus a capite ad calcem bubula illa pelle velari, quæ tabulæ crassitudinem æquat, gravitatem superat non raro, Commiserationis obtentu tanta in animam agentes crudelitate utuntur, ne scilicet illorum angustias in extremo vitæ articulo videre, ne gemitus exaudire circumstantes scæminæ cogerentur. Sæviunt, ut sibi parcant. Affligunt, ne affligantur. Enimvero dum in nostram se tradidere disciplinam, quamvis a nobis admoniti frequenter, rogatique Barbari a barbaris his ritibus ne latum quidem unguem discessere, quod tamen progressu temporis impetratum denique præsertim ab Abiponibus Riikahè; Nakaikötergehe enim Cerimoniarum veterum multo sunt tenaciores.

Nisi moribundi respiratio, ut follis in Vulcani officina, eminus exaudiatur; Si quando ejus anheli-

tus

tus vel tantisper interquiescat, jam animam exhalasse miserum, stentoria voce proclamant. Magni fiunt undique concursus. Omnium ore repetitur: *Chikaka, Lahaui Non est amplius. Mortuus est.* Confessum quotquot nuptæ in oppido mulieres, vel viduæ eo, quo prius dixi, habitu conveniunt ad commune lamentum. Plangore incondito, cucurbitarum crepitu, strepituque cillarum, quas damularum pelle obductas ceu tympana minora pulsant, dum complent forum longo ordine procedentes, extortisque lacrymis se fatigant, sæpe repentina personat vociferatio, quæ illum, qui mortuus lugetur, revixisse nunciat. Festiva exclamatione: *La nataréuge jam revixit*, omnium ora, auresque occupante, lugubris foeminarum ululatus conquiescit subito, quarum aliæ domum, aliæ ad agrum in vitæ, mortisque confinio versantem properant, illumque ferali ejulatu tandiu excruciant, dum denique e vivis exturbent. Primum a morte Princepsque circumstantibus negotium est, vi-ta functi cor, linguamque radicitus evellere, cum aqua ad ignem coquere, canique obvio devoranda objicere, ut & ille, qui mortis author fuerit, quamprimum moriatur. Id superius jam exposui. Cadaver adhuc calens more patrio vestitum, pelle bubula circumvolutum loris coriaceis constringitur. Caput singulari strophio, vel quacunque, quæ ad manum est, lacinia obnubunt; Quem morem apud Hebræos viguisse tum ex historia lazari a servatore ad vitam revocati, tum aliunde liquet. Quaranicis Christianis etiamnum solenne est, eodem, quo cadaver, linteo caput velare haud aliam ob causam, quam ne patens omnium oculis demortui facies novum spectantium animis mærorem offundat, tristemque illius, qui aperto in sarcophago ad tumulum effertur, refricet recordationem. Ut morientem spectare, sic

mortuum domi tolerare, recusant feri Abipones. Nusquam tanta cum festinatione dapes ex culina ad mensam, ne per cunctationem bajulorum frigescant, adferuntur, quanta illi ad sepulchrum efferunt suorum cadavera; Hæc adhuc tepentia præparatis ad id equis deportantur illico humanda. Prævolant pernicipibus bucephalis, quæ tumulum cavent, funusque lamentis illustrent, lætæ mulieres. Quid si tibi in mentem veniat cogitare: Abiponum plures sepeliri, quia mortui putantur, re tamen ipsa mori, quia sepeliuntur. Miseros illos bubula pelle, qua arētissime circumligantur, aut terra, qua obruuntur, suffocatos tum denique exspirasse haud absimile vero est. Verum, cum cor evellant, linguamque e mortui corpore, dum sepeliuntur, de morte illorum nil porro dubitandum. Id tamen vehementissime suspicor, cor secari interdum semivivorum, qui sibi reddendi essent forsitan, ni necessario vitæ instrumento præpropere spoliarentur. Barbari, cum suorum tantopere ipsi accelerent sepulturam, nobis succensere ausi sunt, quod Christianis sacris initiatos Indos post obitum tot horarum spatio extra tumulum cunctabundi detineamus. Id tamen & legibus sacris, civilibusque, & prudentiæ maxime consentaneum. Ne, ut loquitur Andreas Quenstedius, *præpropere efferatur funus, videndum est; Nimia enim acceleratio quandoque vivos pro mortuis sepelivit.* Varius pro varietate gentium, morborum, temporumque hac in re fuit usus. Antiquissimo ævo non nisi quarto ab obitu die corpora humabantur, quod ex Apollon. Argonaut. II. patet:

At vero ornantes supremo funus honore
Tres totos condunt lugubri murmure soles,
Magnifice tumulant quarto — —

Con-

Contrahebatur id tempus, si funus immaturum, puta, si filius tener, si puella Patri chara efferenda esset; *Hoc enim casu*, ut Tacitus annal. 13. *festinationem exequiarum edicto cæsar defendit, id a majoribus institutum referens, subtrahere oculis acerba funera, neque laudatione, aut pompa detinere.* Verum talis exceptio cultis gentibus neutiquam probatur hodie, apud quas legibus præfixa sunt differendi funeris tempora.

Antiqui jam in antrorum cavernis, interdum ad vias publicas, vel in montibus, sæpissime intra urbes, quin intra ædes suas mortuos sepelivere. Abipones sylvas, lucosque pro sepulchretis amant a loco, quem insident, tantillum remotos, ne, si omnium oculis quotidie observaretur, mortis acerbam memoriam identidem sibi ingererent, neve auram noxiis putrescentium corporum vaporibus prægnantem vivi haurirent. Hanc forte ob causam apud sicyonios olim nefas intra urbis mœnia quempiam tumulare, ut refert, Plutarchus in Arato - Idem in variis Europæ provinciis nuper interdictum. Id tamen lycurgi legibus non vetabatur, quod is spartiatas suos a pueritia funeribus spectandis, ne viri mortem in acie paverent, assivesactos desideraret. Eximie genus felicitatis autumant Abipones in sylva humari, & arborum sub umbra. Contra eorum vices dolent, queis subtecto sacre ædiculæ sepulchrum obtigit, tales equidam Patris Captivos appellant. Ejusmodi sepultura metu baptismum refugere initio. Scrobum porro, ubi cadaver collocandum, exigue altitudinis fodiunt, ne terræ aggestæ nimio pondere prematur, Tumuli superficiem arborum ramis spinosioribus implent, ut his aculeis tigrides, cadaverum quorumcunque appetentes, arceantur. In sepulchri summitate ollam inversam pro coronide statuunt, ne, si aquam mortuus

sibi velit, vas desit. Ex arbore tumulo propinqua vestem suspendunt, qua, si prodire e tumulo lubeat, indueretur. En fatuam stupidæ, sed benevolæ gentis providentiam! Viris hastam præterea juxta tumulum defigunt, ut venationis, bellicque instrumentum illis in promptu esset. Caziquiis suis, aut militari fama clarioribus equos eundem in finem, non sine Cerimonia occisos, ad sepulchri margines collocant; Qui mos plerisque Barbaris equitibus in Paraquaria communis. Nostri, qui (quod alias memoravi) fretum Magallanicum versus Regia in navi missi, exsensione facta trium Indorum equitum cadavera, equos totidem penes illos sudibus affixos deprehenderunt. Equi plerumque præstantissimi, ui mortuo, dum viveret, maxime in usu, atque deliciis fuerant, ad tumulum mactari solent. Hoc sane ridiculum, fateor, sed illud intolerabile, quod Scythæ Taurici suis cum Regibus illos una sepeliebant, qui iis in vita amicissimi, jucundissimique fuerunt, quibus in pignus amoris Reges ipsi auriculas abscindere solebant, ut Alexander Ab Alexandris L. 1. cap. 6. refert, Crudeliores illi Asiatici, qui conjuges vivas cum maritis mortuis contumularunt, tumuli perinde, ac thalami focias. Neque temere id factum. Uxores ad mortem invisi mariti accelerandam non raro venenum porrexere. Nunquam, certe rarius id audebit scæmina, si marito mortuo sibi perinde noverit mox moriendum.

Sepulchrales Abiponum ritus risu liberali prosequaris, per me licet; At enim haud inficiaberis eos argumentum esse, quo animorum immortalitatem illos credere, probatur. Naturæ ipsius monitu impref-

pressum sibi habent, persuasumque, extincto corpore non una animum extinguere. Nōrunt, aliquid sui post fata superstes fore, quod duret semper, nunquam intereat. Res illa immortalis, quam nos animam dicimus, illi *Loakāl*, vel *Lkigibī* imaginem, umbram, Echo appellant, per mortem a corpore sejuncta quo deveniat, in quæ loca deferatur, num deliciis fruitura sit, mulctandane suppliciis, id indagare haud solent. Magallanicæ regionis Barbari mortuos sub terra vivere, tentoria habere, venationi operam dare, struthiones mortuos ad eandem secum sub terra stationem descendere credunt. Istiusmodi deliramentorum expertes Abipones exanimato corpore superesse sui aliquid, esse alicubi opinantur; locum tamen, cæteraque se nescire, plenō ore consentunt. Defunctorum manes, vel umbras *mehelenkachiè* vocant, timent, & viventibus, dum ad res futuras expiscandas magico carmine evocantur, spectabiles fieri, ajunt, præstigatorum scilicet artibus, astibusque circumventi. Me ad Paranzæ ripas subdio, ut moris istic, pernoctante dum Abipones viæ Comites Voces suas adversi litoris arboribus, anfractibusque impactas repeti audirent, id manibus, spiritibusque corpore vacuis, ac per illas solitudines errantibus tribuerunt, dum denique, quid echo sit, a me docerentur. Anaticulas noctu turmatim volantes, ac triste quid sibilantes (*Ruilili* vocantur) pro hominum umbris habent, & *mehelenkachiè* manes appellant. Ex his, aliisque, quæ alio loco attuli, animorum immortalitatem ab Abiponibus, etsi cætera rudissimis, credi, prudens conjectura est. Mirum sane, ac prorsus intolerabile illam a viris, qui supra vulgus sibi sapere videntur, in dubium vocari. sepulchris apponi ollam, vestes, arma, equos, veluti vita exutis usui futuros, aut necesarios, barbarorum deliramentum est,

est, sed ignoscendum. Nam & his affinia apud cultissimos Romanos usitata legimus. Urnis ollam vel amphoram, interdum plures, adjecerunt. Tumulo vinum, lac, mel, flores, mulsam, & quæ non? inspersere; Quin cœnam justam apposuerunt sepulchro a Manibus, ut somniaverant, absumentem, teste Ovidio fastorum II.

Nunc animæ tenues, & corpora functa sepulchris
Errant, nunc posito pascitur umbra cibo.

Incredibile, quanta religione sepulchri honorem suis procurent Abipones. Si quem sociorum in acie vident occubuisse, exanime corpus mediis ex hostibus rapiunt, patrio in solo rite humandum. Oneris tamen levandi gratia viam ingressi Carne nudant ossa: Illam, ubi ubi possunt, humi defodiunt: Hæc corio inclusa per ducentas sæpe leucas equo domum asportant, ubi demum iusta funebria peraguntur. Quodsi hoste premente relinquendum in acie Cadaver, de investigandis primo quoque tempore ossibus solliciti nullam Capiunt quietis partem cognati, dum quantovis demum labore, ac periculo illa inveniant. Hæc maxima dein celebritate, ut sequenti Capite dicam, ad suos equo revehere solent, patrioque in monumento locare. Eadem sane Veterum erat sollicitudo, ut peregre mortuorum seu cineres, seu ossa in patriam referrentur. Agrippina certe Germanici cineres Romam deportari fecit, quod Tacitus Annal. 3. memorat. Idem Ovidii exulis votum ex l. tristium 3, liquet:

Ossa tamen facito parva referantur in urna ;

Sic ego non etiam mortuus exul ero.

A' communi hoc cæterorum more nec Lacedæmonios abluisse docet Plutarchius in Agefilao: *Cum vero mos laconibus esset aliorum quidem peregre morientium cadavera illic funerata relinquere ; Regum autem domum referre. Spartani, qui aderant, cum mel ad manum non esset, cera liquefacta, Cadaverique circumfusa Lacedæmonem abduxerunt.*

Nec quocunque sepulchro contenti Abipones, ut Patres cum filiis, conjuges cum maritis, Nepotes cum avis, ac proavis eodem in tumultu quiescant, quævis familia sepulchretum ut habeat suum, id anxie curant. *Vetustate sanctiora fieri sepulchra*, ait Cicero Philipp. 9. Hæc natio cum terras olim infederit Septentrionibus propiores, in Boreali scilicet fluvii grandis Inatè ripa, istis majorum suorum extare monumenta nōrunt, & ceu divinum quid venerantur. Popularium suorum, qui ubi ubi demum perpetuas inter peregrinationes sepulti latuere, ossa ossibus avorum adjungere solent, ac liquidissima cum voluptate commiscere. Inde est, quod illa toties refodiant, toties transferant, perque immensa terrarum spatia circumferant, dum denique in generis sui avito, Sylvestrique Mausoleo conquiescant ; Quod quidem non per epitaphia, cum literis careant, sed per notas quasdam arboribus incisas, aliaque a majoribus accepta documenta discernere solent. Jam inde a priscis illis, primisque seculis ad hæc usque tempora viris illustrioribus cordi fuit gentilitia sepulchra condere, quæ sibi, soboli, posteritatiue dicarunt suæ. Talia Romani requietoria, vel familia-

ria, quia uni familiæ propria, dixerunt. Id sacra quoque confirmat historia pluribus in locis. Abraham speluncam agri juxta urbem Hebron emerat ab Ephron Hethæo quadringentis siclis *in possessionem* monumenti, ubi primum uxor ejus Sara, dein ipse Abraham, Isaac, Rebecca, & Lia, ac denique Jacob sepulti, qui infimis id a filio suo Joseph precibus flagitavit. Inspice libri Genes. Capita 47. 49. & 50. Adnotare hæc ex historia tum sacra, tum profana visum est, ut pateat, Abipones pleraque, quæ de sepulchralibus eorum institutis recensui, antiquorum exemplo fecisse, & quamvis cætera insigniter barbaros, præ aliis gentibus hoc in genere plus humanitatis, pietatisque in mortuos exhibere.

Fidem superant equidem inhumanitatis, quam varii per orbem populi in vita functos exercuere, exempla. De multis paucissima delibo. Hyrcanicanes alebant, a quibus ipsi jam mortui discerperentur, ut Strabo l. II. refert. Scytharum alii, puta, Massagetæ, Derbices, Essedones humana cadavera pecudum carnibus commixta devorarunt; Alii ex arboribus suspenderunt. Æthiopes non nulli in mare deturbarunt. Persæ, ut Agatheus l. II. meminit, carnibus nudant ossa, utrumque per campos spargunt; Putant enim nefas mortuos in arca, vel urna condere, vel terra obruere. Si ad carnes hominum temere in campo abjectas non illico advolassent aves, illos fuisse improbis moribus, judicabant. Brachmanes vulturibus, Pœones piseibus, Parthi quibuscunque avibus, canibusve vita functorum carnes objecere, ossa tamen tumulo servarunt. His humaniores Æthiopum aliqui, queis sepulchra vitrea in usu. Babylonii dulciores, nam melle corpus exanime contegunt, si Herodoto fides. Magi Cera
invo-

Involutum cadaver tumularunt. *Ægyptiis* mos fuit, suorum corpora aloe, myrrha, cedro, melle, sale, cera, bitumine, resina, odoribus, & unguentis solenter condita, suisque clausa oculis domi suæ afferre. Hæc mumiarum *Ægyptiacarum* sen materies, seu origo, ut *Plinius*, *Pomponius Mela*, *Stobæus*, *Silius Italicus*, alijque testantur. Sed meam miror patientiam in recensendis sepulturæ varietatibus, quas apud antiquitatum scriptores passim deprehendas. Eum in finem hæc adnotavi, ne sepulchrales *Abiponum* ritus rideas, cum magis ridiculos nationibus aliis fuisse, intellexeris. In *Americam* redeamus. *Brasili*, & *Quaranii*, gens *Paraguariz* citra controversiam omnium numerosissima, uti confinium vicinitate, sic linguæ, ac morum similitudine conjunctissimi fodiendis pro sepultura serobibus fatigari noluerant quondam. Quotquot fatis cesserunt, eorum carnes sua intra viscera famelici condidere anthropophagi. Humanam equidem carnem tanta esuriebant aviditate, ut præ illa perdices, damas, apros, & quidquid cupediarum est, aspernerentur. Ad venandos homines excurrabant propterea. Captivorum, quos domi diligenter saginaverant, cædes publici convivii non titulus modo, sed pars nobilissima fuit. Carnibus devoratis ossa referabantur, quæ in farinam redacta novis epulis materiem, novas palato barbarorum delicias præbuere. Matres embrionem, quem immaturum abortione ejecerant, suavissime, quis invidet? esitarunt. Fatendum tamen, *Quaranios* subinde, avis suis humaniores, suorum cadavera in cantharis ex argilla fictis collocasse eo fere situ, quo fœtus materno in utero quiescit. Barbaros in *Mbae* vera quæsiturus medias intra sylvas in campum, excisis nempe arboribus, arte factum incidi, ibique tres ejusmodi

can-

cantharos, qui singuli hominem caperent, inveni, sed vacuos, fors morituris præparatos. Cantharorum fundus Cælum, bucca solum spectabat. Mortalium nemo, ne umbra quidem, aut vestigium istic deprehensum a nobis, quamvis omnes sylvarum recessus longe, lateque perscrutatis. Sed a sepulchris ad exequias, aliaque, quæ funeri succedunt, properemus.

C A P U T XXVIII.

De Luctu, exequiis, funeralibusque Cerimoniis Abiponum.

Quæ ad luctus contestationem recepto a majoribus more faciunt Abipones, alia ad defuncti memoriam abolendam, ad perpetuandam alia pertinere videntur. Quidquid utensilium fuit recens defuncto, excitato hunc in finem rogo palam crematur. Præter equos honoris causa ad ejus tumulum confossos minutas aliquando, si quas habuit, pecudes contrucidant. Ædes, quas incoluit, ex limo, & materia non inscite structas convellunt, diruuntque penitus. Vidua, proles, contubernales cæteri alio migrant; Illis, cum domo careant propria, in aliena sæpe, sæpe sub storeis miserrime aliquamdiu est latitandum. Malunt tamen Cœli injurias tolerare, quam contra gentilitias leges domum habitare commodam, sed chari capitis interitu funestam. Nuper defuncti

nomen pronunciaſſe, crimen apud Abipones eſt nefarium, colaphis ſæpe mulctatum, ſæpe vulneribus, ac multo ſanguine piandum. Temulentos inter rixarum aliquando cruentiſſimarum ſemen id fuiſſe, commemini. Si tamen res ferat, ut de mortuo injicienda ſit mentio: *Vir, qui jam non exiſtit. Jealè, eknām Chirkaeca*, inquiunt, ejusque, quem volunt, nomen pluribus verbis circumſcribunt. Quodſi deſuncti nomen derivatum ſit ex vocabulo, ut grammatici ajunt, appellativo, quod ſcilicet animal, vel quidquid aliud ſignificet, illud vocabulum per præconem publicum mox antiquari, novumque a Vetula quacunque inventum ei ſubſtitui jam alias dixi, dum de Abiponum lingua diſſerui. Hinc novæ quot annis voces, ut fungi nocte una, ex ipſis Indorum moribus naſcuntur. Intra ſeptennium, quod apud Abipones conſumpſi, ter tigridis nomen mutatum eſt: Primum *Nihîrenak*, dein *Apâñgebak*, dèum *Lapri-rèræ* ideſt, *maculoſa, verſicolor* dicebatur. Hiſpanum olim *Kaamelk*, mox *Rikil*. Crocodilum *Pèèuè* antea, poſt *Kaeperbak* vocarunt. Penes vetulas cerimonia- rum antiſtitas eſt nova, quæ ſomniaverint, vocabula veteribus abrogatis ſufficere. Anus rancidæ, quod mireris, arbitrio tota natio acquieſcit. Nemo unus eſt arrogantiffimorum Abiponum, qui morem non gerat. Nova rebus indita nomina per latiffime ſparſa illius gentis contubernia celerrime vulgantur, tantaque cum tenacitate ſingulorum cerebro inhærent, ut vel lingua, vel memoria fallente longo uſu receptas, nuper proſcriptas voces nemini excidere, jure admireris.

Quotquot cum deſuncto vel ſanguinis, vel amicitia vinculo conjuncti ſuis, quæ geſſere, nominibus privantur, novis inſigniuntur. In S. Caroli,

ac Rosarii nova colonia e variolis decessit Caziqui principis Coniux. Ille prius Reváchigi, mox Oahari appellatus est. Ejus matri quoque, fratri, captivo, defunctæ item fratribus nova singulis nomina trecentas inter ceremonias imponebantur. Caziqui mater senicula melampum strigosum, & vel ipso, quem hausit, aere indignum in deliciis habuit. Facta hac nominum mutatione, quale demum nomen melampo illi suo obtigerit, ex senicula quæsi, ut scilicet absurdos eorum ritus a nobis explodi intelligeret, cum impediri id temporis necdum possent. Ob prolis parvulæ obitum pluribus sæpe familiis nova nomina induntur. Caziquio occumbente viri, qui illi suberant, omnes prolixam comam attondent in mæroris significationem. Id quod a me visum, dum Ychamenaikin, Debayakaikin, Alaykin Abiponice gentis primates non eodem quidem die, ac loco, sed eadem fortitudine præliantes in acie occubuerunt. Marito viduatis mulieribus pariter crines tondentur, & quoddam pallioli genus, e Caraquata atro, rubroque colore tincta contextum imponitur, quod cuculli instar caput tegit, & ab humeris ad pectus defluit. Hoc palliolo per omnem vitam viduabus utendum, ni forte novi conjugii opportunitas tristissima perpetui luctus lege eas solvisset. Sacerdotem e Divi Francisci cœtu, cui ab observantia nomen, hospitem habui. Viso ejus cucullo: Nunquid hic quoque Hispanus conjugem luget suam? Abiponenses ex me fœminæ quærebanit. Caput rasum, & cucullus illis interrogandi, nobis ridendi occasionem dedit. Abipon maritus conjugem viduatus, attonsis pariter capillis galericulum retis instar e Lana textum mæroris seu testandi, seu fingendi gratia gestare consuevit, quam a Cerimoniarum magistra vetula, fœminis Cæteris ejulantibus, viris compo-

tan-

tantibus palam recipit, rejicitque, ut primum coma
 sucreverit. Hæc sunt Abiponibus funebris luctus
 officia, indiciaque. Ecquis in historia mediocriter
 versatus pleraque hæc apud Romanos, Græcos, He-
 bræosque vgnisse, ignorat? Certe, quod funerum
 occasione crines suos totonderint, insperferintque tu-
 mulis, Homerus, Catullus, & quis non poetarum
 meminit? unum pro omnibus audi Ovidium in epi-
 stola Canaces:

Non mihi te licuit lacrymis perfundere justis;
 In tua nec tonsas ferre sepulchra comas.

Quod fœminæ attonso capillo; vestitu lugubri
 luctum professæ sint, liquet ex Accii Amphitruo-
 ne: — — *Sed quam hæc est mulier funesta veste,
 tonsu lugubri?* Ex illo etiam Virgillii Æneidos 9.

Evolat infelix, & fœmineo ululatu
 Scissa comas — —

Quod viduæ olim Capita velaverint, patet ex
 Luctu Cornelix Pompeji nxoris, de quo Luca-
 nus l. 9.

Sic ubi facta, Caput ferali obnubit amictu,
 Decevitque pati tenebras —

Quidni, amabo, obnubendi capitis ritus seculo-
 rum usu confirmatus apud Europæas quoque viduas
 passim Civitate donatus hodie? circumspectis omni-
 bus velum capitis minus moleste ferunt, quam ca-
 pillorum jacturam fœminæ, quibus magnopere or-
 nari



nari se nōrunt. Affirmat stobæus in suis collectaneis: Ignominia notandas ob flagitium Regio iussu in Indiis tonderi. In Quaranicis Coloniis profecto supplicii instar est Crinium tonsura, qua procaces, & pudoris oblitæ fœminæ mulctantur, aliis corrigi modis nō queant. Eadem in nonnullis Europæ provinciis consuetudo. Quanta, quæ ad hoc argumentum pertinent, ex divino Codice, ex profanis historicis depromi possent! Copia rerum obvia silentium svadet.

Verum illud denique videamus, quod quantumcunque de alienis mortibus mærorem Abiponibus abstergit, ipsamque adeo lugendi necessitatem reddit suavissimam. Epulum funebre antiquis, si quid aliud solenne. Hoc latini silicernium, & Cicerō (Grenovio teste) circumpotationem vocavit. Nolunt ab hoc priscorum more vel latum unguem recedere. Cæteros, qui ad funus pertinent, ritus inviti exequuntur, istum volentissimi. Cadaveris tumultuandi, lamentandique curam fœminis ultro relinquunt; Ipsi vero mel in sylvis conquirunt, compositionis publicæ materiam futurum, ad quam sole occumbente convolant universi. Dumque isti potando, vociferandoque occupantur, fœminarum longo ordine circumstantium chorus lamentando se fatigat. Cum nihil ciborum inferatur, epulum hoc funebre non convivium, sed combibium, vel cum Cicerone circumpotationem rectius dicemus. Nox omnis postquam bibendo consumpta abiit, tum enim vero luctus tristioris videas principium, cum illo suo nectare ad ultimam stillam exhausto, quod porro biberent, superest nihil. Fœminarum quoque lamenta novus, isque sincerior sæpe excipit dolor, dum maritos suos aut pugnis combibonum lividos, aut, quæ

quæ computationum corollaria, vulnere eruentos
domum reducant.

Ad quemvis certe de Abiponis morte rumo-
rem, fœminarum nos miseratio incessit semper, in
quas scilicet exequiarum inolestiæ, funeris cura, tu-
muli, lessique faciundi labor recidere solent. Præ-
terquam enim, quod ab his uno agmine, unoque ore
pertinaciter complorantibus efferendum, humandum-
que cadaver, tendendi vidui, viduæ obnubendæ, mu-
tanda mortui cognatorum nomina, celebranda funera-
lis computatio, demoliendæ ædes; lisdem lamentatio-
nis publicæ novem diebus continuandæ fastidium est
exhauriendum. Illa duplex est omnino. Altera,
quæ per forum interdium habetur ab omnibus, si
calibes excipias, mulieribus: Quæ assignatis lu-
ctui ædibus noctu suscipitur ab aliquibus, altera.
Ad hanc non confluent, nisi invitatz. Si poetæ epi-
ci, dum tantum auspicantur, Calliopem invocant,
ab æpelle petendus mihi foret penicillus, & colo-
res, ad exprimendam rite spectaculi funebris imagi-
nem; Huic equidem exprimendæ totum cum Musis
omnibus Parnassum, ipsumque cum universis suis
vocalibus Calëpinum imparem existimo, nisi &
characteres musicos in subsidium vocaverit. Statis
& ante & post meridiem horis in foro adsunt,
quotquot in oppido, mulieres. Sparsis per humeros
Crinibus, pectore, scapulisque nudatis, pelle, vel
lacerna e lumbo pendente, Vultus, oculorumque
conformatio mærorisne, an terroris, plus spirat,
nescio. Maculosa stigmatibus facies ad utramque
confert plurimum. Mœnades tibi finge animo, vel
furias stygias, quales pinxit antiquitas, & rem acu
tetigisti. Neque eodem lamentantur in loco inter-
dium. Forum omne circumcursant supplicantium ritu,



non binæ, sed singulæ, uno tamen agmine, longissimoque ambulantes. Ad ducentas quandoque numeres. Incedunt ranarum instar saltitando. Pedum motus brachiorum jactatio continua comitatur. Cucurbitam injectis variis seminibus crepitantem & dextra præferunt singulæ, & ad vocis modulos agitant. Illas excipe, quæ cucurbitæ loco ollam damulæ membrana clausam tympani instar bacillo tereti pulsant, strepitu, quam credere possis, absurdiori. Ternis, quaternisve cucurbitis singula ejus formæ tympanidia respondent. Quod maxime aures terret, vociferatio est una ejulantium. Cantillantium instar vocem modulate inflectunt, crispant, singultibus miscent. At vero id omne quis cantum dixerit? Tolerabilius, nisi plane fallor, lupi hujates ululant. Cantatis in hunc modum lugubribus strophis per intervalla conticescunt omnes, ac voce a summo ad imum præcipitante sibilum repente edunt acutissimum. Illarum cervicibus pugionem subito infigi, jurares, Qua quidem repentina ejulatione furore se percelli significant, dira omnia imprecantur mortis, quam lugent, auctori, quisquis ille demum fuerit. Interdum cantu intermisso, aliquid recitantium tono, paucos versus deblaterant, quibus demortui dotes, facinoraque extollunt, ac querula voce commiserationem, vindictamque superstitum ciere conantur. Sæpe alias planctui lacrimas admiscunt non dolore, sed consuetudine, lamentique impatientia extortas, dum utique mallet tandem conquiescere, quam repetito per plures horas itu, ac reditu fatigari, & diuturna gutturis contentione ad ravim usque clamitare. Pleræque defuncti munusculum, ceu memnosinon, aliquod, puta, struthionum plumas, globulos vitreos, cultrum, acinacem, & alia id genus circumferunt. Quædam

parentis sui, quem lugebat, femoralia (Gubernatoris Hispani quondam munus) manu gestabat per forum; Hæc Canis, cui vociferans nimium propinquaverat, facto in eam impetu rapuit. Abipones, puerorum, puellarumque turba publicos hos planctus, quos spectare sine risu Europæus nequeat, ceu religiosam functionem considerant, modestia, ac silentio reverentur. Nefas sit, fœminis lamentantibus illudere. Hæc interdiu per forum plangendi ratio. Sed noctes diebus nectunt. Tantus lamentandi furor. Juvat & planctum nocturnum strictim memorare.

Vesperascente Cœlo in tugurio parentalibus destinato congregantur, quæ invitæ fuerint, fœminæ, quibus præstigiatrix vetula præest; Hæc Cantum, hæc ritus cæteros moderatur. Illius est duo militaria majoris formæ tympana alternis quassare ictibus, voceque lachrymabili funestum carmen decantare, reliquis eadem vocis mensura prosequentibus. Stygium hoc elegiarum genus, cucurbitarum crepitus, tympanorum boatui associatus ad Auroram usque producitur quotidie. Funebri hic planctus nulla re variatus ipsum durat octiduum. Nona demum nocte, si quam fœminam lugeant, ollæ, quæ illi usui fuere, non sine cerimoniis confringuntur. Cæterum jam non lessus tragicus, ut superioribus noctibus, sed ode festivior decantatur, quam anus tympanistria pleno rictu, voce profundiori, ac veluti minitante identidem interrumpit, sociasque cantatrices ad hilaritatem, vocisque majorem contentionem adhortari videtur. Id notis musicis clarius utique, quam verbis expressum planius intelliges. Nocturnis his lamentis per dies novem sol occumbens principium, oriens finem dare confvevit. Stupenda sane fœmi-

narum tolerantia, tot noctes infomnium; sed virorum magis, qui aëre inconditis vocibus, tympanis, cucurbitisque perstrepente quamvis, in utramque tamen aurē dormitantes rhonchos edunt. Scilicet ut columbæ turrium incolæ æris campani tinnitu quantocunque nil terrentur; sic Abipones a pueris foeminarum planctibus assveti ad nocturnos strepitus dudum obsurdere. Mihi vero ad stagni ripam coaxantes inter ranas somnum capere facilius erat, quam foemineos inter ululatus. Præ his tamen, fateor, tympanidion illud absurdissimum aures insolentius excruciauit.

Nec solis funeribus hac ratione semel parentatur. Anniversaria sacra majorum suorum manibus eodem cum strepitu, atque apparatu faciunt religiose. Defunctæ matris recordatio mentem subeat foeminae. Nec mora: crines solvit, cucurbitam arripit, & cum aliquot in luctus societatem adscitis mulieribus forum percurfat, Cælum implet lamentis. Quotidianum prope hoc spectaculum. Paucae abeunt noctes, quæ hinc, atque illinc per tuguria plangentes non exaudias. Hæc mariti: Illa filii: Alia patris, matrisve morti illachrymatur. Stantes id præstant, & ad plagam, ubi ille sepultus, converso corpore, cucurbitaque planctui semper consonante. Incredibilis illarum flendi lubido, promptitudo, par. Seneca consolatur ad Albinam C. 15. Scripsit: *Sexui muliebri pene concessum est, imo datum in lachrymas jus, non immensum tamen, & ideo Majores decem mensium spatium viros lugendi dederunt.* Abiponenses foeminae hac Romanorum lege haud patiuntur luctum suum limitari. Lugent, dum vivunt. Plorant, quoties, & quamdiu volunt. Facilius equidem mulieribus flere, quam tacere. Hinc rarissima noctis silentia.

Fre-

Frequentior tamen semper die appetente plangentium
vociferatio. Uno oscitante oscitare adstantes experimur;
Haud secus una suorum aliquem lamentante altera quo-
que lamentatur: Hæc tertiam admonet: Ista quartam.
Ut denique sub auroram lamentantium major, quam
dormientium numerus esse videatur. Illis in oppidis
lamentatrices plures, ubi plures viduæ. Verum dum
ob Abiponis cuiuspiam obitum.

Lamentis, gemituque, & fœmineo ululatu

Tecta fremunt, resonat magnis plangoribus

æther. Virgil. l. 4. Æneid.

Neuquam otiantur viri. Luctum, quem la-
chrymis, vociferationibusque profitentur fœminæ,
isti fundendo sanguinem hostilem, sæpe & suum,
contestantur. Qui enim sanguine propinquior vita
functo, alios, quot quot potest, commilitones con-
scribit actutum, atque in hostes externos, quorum
manibus cognatus periit, ducit. Illius est, primum
in mortis authores impetum facere, neque nisi mor-
te acriter vindicata ad suos redire; Quamvis votis
facta non usque respondeant, cum isti barbari heroes
inultis sæpe hostibus, ingloriique revertantur.



CAPUT XXIX.

De solenni ossium translatione.

Restat paucula de Cerimonis dicere, quibus ossa peregre mortuorum, dum patrum in solum, indeque ad familiaria sepulchreta transferuntur, prosequi consueverunt Abipones. Translationes hujusmodi plures a me visæ, ac risæ sunt. Referam in paucis celeberrimam Caziquii Ychamenraikin adhuc barbari a barbaris in acie cæsi. Locus pugne quadraginta facile leucas ab oppido S. Hieronymi aberat. Et Caziquium nostrum sagitta interemptum, & hostem profligatum ex advolante nuncio intelleximus. Conceptus animo mæror de chari Ychamenraikin obitu omnem lætitiæ sensum de luculenta victoria suppressit. Nemo erat unus, qui de epiniciis plausibus cogitaret. omnium animi in luctum, oculi in lachrymas, ora in lamentum solvebantur. Hoc illo temporis puncto a fœminis cæptum, dies, noctesque ingenti cum strepitu nec sine sinceris lachrymis continuatum est, quæ cum ex ipso illarum corde scaturirent, haud subito, ut alias, exaruerunt. Hunc Caziquium, non paucarum conjugum maritum, in oculis semper ferebat muliebris sexus. Sub hæc alter adest eques, qui postridie sub vesperum defuncti Ducis ossa oppido inferenda, nunciat. Hæc carne nudata, quam in campo terræ mandaverant socii, corio clausa equo ferebantur. Ad hæc igitur pro merito

rito recipienda a præstigiatorum principe Hanetfain, ejusque socio Lamamiñ facti apparatus, domus, ubi tristes exuviæ collocarentur, designata, riteque instructa. Universa mulierum cohors ad tres leucas Funeri obviam properaverat. Ad ipsum oppidi ingressum talis fuit funebris pompæ ordo: Lugubre agmen bini præstigiatores duxere, equo nolis undique resonante, stragulis, ac struthionum plumis ornatissimo sublimes. Hastam manu jactabant, cui tintinnabulum æneum affixum, ut, quoquo se verterent, audiri non minus, quam spectari ab omnibus possent. Hand enim reliquis immixti, nec lento gradu incescere. Cursu præcipiti jam velitantium ritu sursum, deorsum procurrere, jam invadentium specie in semitam regressi turbæ cæteræ ordinibus se jungere solebant. Sequebatur fœminarum illo, quo dixi alias, habitu lamentantium comitatus, ut numero, sic concinno ordine visendus, ast auribus intolerabilis. Tot cucurbitarum crepitus, tot variæ molis tympanorum murmur, tanta vocum inconditarum discordia ipsum adeo Cœlum fatigare videbatur. Plangentibus ea lachrymarum vis sponte sua profluxerat, ut non tam charo capiti parentare, quam hac transituris ejus exuviis viam rigare, molli- reque putarentur. Vestem elegantem quadrilateram tapetis instar pictam sex hastis illigatam umbellæ loco totidem Abipones gestarunt, sub qua funebris ossium sarcina a viris item bajulabatur. Agmen clausit reliquorum, qui parta quidem victoria ovan- tes, sed amisso Duce mæsti redivere, Abiponum e- questris turma. Equis ibant, hasta, arcu, phare- traque instructi singuli. Tonsis omnes crinibus, ut luctum profiterentur, qui in singulorum vultu legebatur. Hinc, atque illinc victorum tergo im- minebat puerorum, puellarum, mulierum, equis in-
U 4 fiden-


sidentium manipulus. Hi, Indis hostibus vel trucidatis, vel fuga elapsis, bello recens capti fuere. Ut adeo lugubre cætera spectaculum non tam fune-
ris, quam triumphi speciem referret. A' lateribus equorum, queis nullus sessor, ad pascua sua post militarem expeditionem properantium multitudo ingens visebatur. Vias omnes pueri, puellæque obsederunt, gemituum immemores, spectaculi novitate percussæ. Ossibus in præparata æde collocatis per dies novem iusta sunt peroluta. Diurnis planctibus nocturnos quoque pro more addiderunt. Ne lamentatio ullo unquam tempore conquiesceret, per præstigiatores, qui hastam tintinnabulo resonantem gestant, ædesque percurrant omnes, commoni-
tæ mulieres singulæ, ut, quibus unicuique horis lamentandum esset, nossent universæ. Compotatio funebris iterum, iterumque, ac pro defuncti Caziquii magnitudine magnifice, ut fieret, unica, & ad sopiendum mærorem aptissima virorum sollicitudo fuit interea. Et vero: Potaturne liberalius a viris, num pertinacius ploratum sit a fœminis, arduum fuerit statuere. His domi pro more actis ex utroque sexu delecti, qui dierum aliquot itinere ad gentilitium Ychamenraikin sepulchretum ossa comitarentur. patrioque humarent instituto. Ast noveris hæc acta fuisse a Barbaris, antequam sacris christianis initiarentur. Ad eum plane modum aliæ alibi celebratæ ossium translationes, nisi quod umbella abstinerint, quam Ducibus duntaxat suis deberi arbitrantur. Septem Abiponum per Hispanos trucidatorum ossa uno allata sunt die, e quibus solemter compositis totidem hominum simulacra finxere, petaso singulis calvariis imposito, vestibusque cuique aptatis. In tugurio vastiore structi ex arundinibus suggestus, in quorum apice collocata illa septem
see-

sceleta, novemque, diebus continuis hinc lamentando, inde potando colebantur; ad tumulos subinde suos transportata,

Fuerit per me Europæus aliquis, qui neglecta funeris sui cura cum Diogene flocci faciat sepulturam, illudque Virgilii repetat; *Facilis iactura sepulchri*, vel aliud ejusdem: *Cælo tegitur, qui non habet urnam*. Aliter profecto sentiunt Americani, quantumvis barbari. Inhumatum sub dio putrescere maximam autumant infelicitatem. Hinc vindicta ardentes hostium cadavera contemptim abiiciunt, ex eorumque tibiis lituos, fistulasque militares sibi conficiunt frequenter, Calvaria pro poculo utuntur. Amicorum vero vel tenue ossiculum honorifice, dum possunt, tumultant, incredibilique honoris significatione prosequi consueverunt. Novimus, Quaranos adhuc barbaros præstigiatorum suorum (Abapayè) exuvias, arculis custoditas, quoties migrandum fuit, circumtulisse quondam, & in illis, ceu sacris quibusdam præfidiis, spes omnes collocasse. Hæc superstitionis barbaræ monumenta, sanctæque religionis obices, Missionariorum nostrorum opera tandem detecta, ereptaque, eorum manibus rogo injecta spectantibus cunctis in fumum abierunt. E' sylvis ad nostras colonias recens translati Quaranii nulla recitius discunt Romana sacra suspicere, quam dum suos honorifico apparatu, Cantuque solenni vident a nobis sepeliri. Quidquid honoris impensum Cadaveribus, superstites sibi impendi existimant, majorique, quam credi possit, amore in religionem, ejusque magistros exardescunt. Undecim annorum, quos huic nationi erudiendæ insumpsi, experimento doctus id affirmo. Indorum meorum, qui in sylvas Mbaeverà euntem me comitabantur, senissimus

meam confirmavit sententiam. Is ut Caziquium sylvicolam ad amplectendam nostra in Colonia religionem impelleret, me præsente hæc illi dixerat: Frater mi, ajebat, isti sacerdotes ingenti studio res curant nostras. Incredibili benevolentia in nos feruntur, cumulantque nos beneficiis quotidianis. En! vivos nos erudiunt, alunt, vestiunt; Mortuos tela candida indutos sepeliunt, & quod stupeas, ad sepulchrum nobis cantant. Inter præcipua nostri in Indos amoris argumenta exequiarum honestatem sapienter connumeravit, quam scilicet ipsis Barbaris adeo cordi esse non ignorabat. Postquam de morbis, medicis, medicinis, mortibus, ac sepulturis Abiponum prolixè disseruimus, ab historiæ meæ cursu ecquis alienum putabit de serpentibus, insectisque noxiis agere, quæ mortem multis inferunt, omnibus minantur? Jucundum erit utique Europæis nosse præsidia, quibus Americani seu adversus serpentes se tueantur, seu inflicta ab iis vulera perferant, haustumque intimis fibris discutiant venenum.

APJCS



CAPUT XXX.

De serpentibus insignioribus.

Enucleatam, minutamque serpentum descriptionem a me ne expectaveris. Mihi equidem, dum in America agerem, major fuit eos fugitandi, quam numerandi, contemplandique cura. Adnotabo tamen memorabiliora, exploratioraque, quæ ad rem facere videbuntur. Haud enim serpentum, sed Abiponum historiam texere mei est instituti. Plura de hoc argumento nosse si aveas, Clarissimum Linnæum, Quilichium Pisonem, Marcgravium, aliosque, qui omne tulerunt punctum, consule. Quamvis, ausim spondere, non pauca ex me intelliges, quæ istorum nemo attigerit, fateberisque, sæpe etiam olitorem valde opportuna fuisse locutum. Multi multa scripserunt de serpentino genere, qui tamen serpentem, nisi pictum, fictumve, nusquam videre. Nos, quibus ætatis pars major effluxerat in America, omnis generis angues non modo passim obvios, sed eodem sub tecto domesticos habuimus, ac contubernales.

Serpentum, qui nomine, colore, mole, formaque corporis, ac veneno differunt, viginti admodum species numerat Paraquaria; Plures vicina Brasilia. Lexicon Quaranicum binis, si rite memini, foliis complectitur singulas, ac earum proprietates explanat. Notiores vulgo sunt: Mboÿtini, vel Mboÿchini. Qui-

Quiririo. Yacanina. Mboÿhobi. Mboÿquatia. Mboÿpe quazù, vel cucuruti. Mboÿpè miri. Yboya. Tareÿmboya. Mboÿquazù, vel Yboya. Mboÿroy. Curiyù. Ybiboboca. Yacapecoaya. Yararaca. Cacaboya &c. memorarem reliquos, sed quorsum? Nisi ut cum dentium periculo linguam defatiges tuam enunciando barbara Quaraniarum, Brasilorumque vocabula, quæ fere serpentis uniuscujusque colorem, proprietatemque singularem declarant. Serpentes generatim Mboÿ dicitur a Quaraniis. Enekaik ab Abiponibus. Vivora ab Hispanis. Cobra ab Lusitanis. Latini pro varietate serpentum variis nominibus utuntur; Sed quis illorum anguis, quis seps, quis cenchris, quis coluber, quis aspis &c. appellandus, maxima etiamnum grammaticorum, physicorumque est digladiatio. Ut adeo Americani serpentes, Europæ peregrini, quo nomine latino insigniendi sint, vix perspiciamus.

Primo utique loco memorandus venit serpens, quem venenum, & caudæ appendix tinnula a cæteris distinguit. Hunc Hispani vivora de Cascabel, vel tãnedor vocant; Galli serpent au Chaperon, vel serpent a sonettes. Germani die Klapperschlange. Quarani Mboÿchini. Brasili Mboÿçininga. Indi Mexicani Teuhtlacocauhqui, dominam serpentum dicunt. A latinis nomen videtur etiamnum expectare. A Lexici Gallici scriptore Choffin vocatur sepedon, vox latinis, quod quidem sciam, authoribus peregrina, Mallem a Græcis nomen mutuari, serpentemque hunc nolisserim Crotali, vel Crotalophori nomine insignire a vocabulo *κρόταλον*, quod crepitaculum significat, derivato. Terribilis visu, audituque bestia virilis brachii, uti prope cubitum est, crassitudinem æquat; Ad quinque non raro pedes longitudinis porrigitur. Linguam bisulcam, caput viperæ instar

complanatum, oculos parvos nigricantes, quatuor superiori e maxilla dentes, præter alios, & præ aliis acutos, incurvosque ostentat, e quibus, cavi enim sunt, venenum jaculantur in obvios. Dentes alii minores, rictu diducto, patent aspicienti. Color dorfi, quod lateribus multo eminentius, fuscus in flavum vergit, & lineis luteis in spina dorfi crucis instar se se interfecantibus variatur. Conchis fuscis crocodili instar, sed mollioribus, pellis horret. Venter squamis prope parallelogrammis grandioribus tantillum flavescit; Caudæ extremitati inhæret illud, a quo nomen accepit, crepitaculum ex materia glabra, arida, cinerei coloris, viri pollicem lata. Hinc atque illinc celulam habet concavam, membranula, ceu pariete, in medio divisam, huic inest globuli non omnino rotundissimi aliquid, quod serpentis motu quovis agitatum, suoque receptaculo illisum sonum, seu crepitum edit, qualem infantium crepitacula lignea (die Kinder rodeln) edere consueverunt. Annis singulis, ut in cervorum cornibus usuvenit, singuli crepitaculo accrescunt articuli, vertebri, ceu catenæ annuli, suis connexi. Ex tintinnabuli, seu crepitaculi articulis serpentis ætatem conjicias, ut cervi ex cornuum ramis. Hinc quo senior serpens, eo plus clangit, quia nolis pluribus instructus. Abiponum aliquis eodem meridie duos ejusmodi serpentes noliferos enecuit; Amborum tintinnabula mihi obtulit, quorum unus quatuor annorum erat, alter duodecim. Ex tintinnabuli articulis id patuit. Hic serpens irritatus se conspirat. Aggressionem meditans celerrime adrepat, ut prope volare videatur. Providentissimus universi author ejus caudæ tinniens illud crepitaculum adjecit, eo veluti monitore audiri ut possit, ac caveri. Venenum enim, quo turget, cæteris quibusque atrocius esse, ac præsentius Jure putatur. Remedia enim, quibus a quo-

quovis alio serpentum genere icti servantur, veneno noliferi hujus anguis afflatis nihil omnino proficere experti sumus. Tales mors certa, quamvis lenta manet. Lethifera equidem veneni vis ex inflictio vulnere per omnes paulatim artus grassatur. Pedis, brachii, auris, oculique usum ex illo, quod serpens invasit, latere adimit, moxque ad aliud transiens eandem sensibus stragem, continuum deliramentum, dolores acerrimos infert, maxime in pedum, manuumque extremitatibus, quas sanguis veneno frigidissimo torpescens destituit, palloreque cadaveribus proprio deformat. Quæ quidem omnia ipse observavi in binis adolescentibus Quaraniis a tinnulo serpente vulneratis. Neuter istorum duo de vicissimum attigit ætatis annum, uterque robustus, firmæque valetudinis. Per duodecim primus, alter per quatuordecim dies me spectante, dolenteque acerbissimis cum doloribus conflictabatur, dum denique ambo succubuissent, veneni dominantis robore meditaminum longo usu exploratorum virtutem eludente. Si quem ab ejusmodi serpente nolifero ictum, intellexi, eum illico, imminens delirium antevertens, sacris mysteriis Romano ritu ad mortem præmunivi. Indam ætate, ac viribus florentem ad extrema deduxit alias ejusdem serpentis morsus pestilens; Mortem, stupentibus univærsis, evasit quidem, sed membris omnibus capta vitam vixit tot annos quavis morre acerbior.

Ad confirmandam veneni, quod serpens nolifer circumfert, atrocitatem, efficacitatemque plurimum facere videtur epistola anno 1769. die 28. Septembris in Williamsburg Virginie oppido scripta, & subinde typis Vangelianis Viennæ in ephemeridibus Germanicis anni 1770. die 6. Januarii in lucem edita. Hæc ejus est summa: Mense Junio exeunte in Caroli-

na septentrionali comitatus Johnston serpens nola
sua crepitans nocte concubia in domum irrepsit, ubi
quatuor proles humi cubabant; Minimam feriit pri-
mum venenato dente. Ejulantis parvuli clamore ex-
pergesfactus pater accurrit opitulaturus. Serpentem
vidit simul, simul ejus ictum sensit. Interea, dum,
quo mortiferam bestiam trucidaret, instrumentum
circumspicit, alii tres filioli mordentur. Cum festi-
natione, diligentiaque maxima, quid quid medica-
mentorum suppetit, faucibus impensum, sed fructu
prorsus nullo. Postridie siquidem Pater quaternis
cum filiolis occubuit. Occubuisse omnes haud mi-
ror, miror plures dies non durasse illorum cruciatum,
ut in Paraquaria fieri assolet. Sed nempe provincia-
rum, aeris, temperamenti varietas quemadmodum
serpentum colores variat, sic virus eorum acuit, mi-
nuitve. Adhæc imbecilles parvulos seu veneni, seu
dolorum vehementia citius succubuisse ecquis mire-
tur? Illorum genitorem non venenato solum vulne-
re, sed & incredibili ob filiorum jacturam animi mæ-
rore extinctum mox fuisse, opinor, nisi mavis dicere,
ex serpente acrius forte irritato toxicum quoque no-
centius emanasse, quod tantopere miserorum mor-
tem acceleravit. Audi, quid Quilielmus Piso Batavus,
primi nominis medicus, & ad explorandam Brasiliæ
naturam a Batavis missus de nolisero serpente sentiat:
Articulus, seu extremitas caudæ (illius verba sunt) in
anum hominis immissa mortem infert confestim; Venenum
autem, quod ore, vel dentibus infert, multo lentius vitam
sollicit. Postremum hoc meis in Paraquaria experimen-
tis prorsus consentaneum; Primum rationi, & natu-
ræ; Venenum namque per viicera introductum ve-
luti via regia ad cor, vitæ sedem, expugnandum,
opprimendumque festinat. Nullumne ergo, quæres,
liberalis cæterum natura exitiali huic veneno prodi-
gan-

gando par remedium suppeditavit? suppeditaverit fors plura, quæ tamen humani ingenii sagacitas nondum detexit, Paraquariis certe ignota. Circumferuntur, hæud ignoro, in libellis passim, & jactantur veluti divinæ quædam in hunc finem medicinæ. Verum quotquot iis usi sunt, verba sibi data esse experiebantur. Ut adeo verissima Clarissimi Sydenhamii de ægrotantibus sententia: *Infirmi curantur in libris, moriuntur in lectis*, apud illos potissimum locum habeat, qui a nolisero serpente feriuntur. Ad hos curandos Brasili cucurbitulas applicant, quibus venenatum vulnus amplificetur, exsicceeturque. Interdum membrum a serpente læsum junco lacapè circumligant, ne venenum ulterius serpat. Aliquando cauterium parti vulneratæ adhibent. Antequam venenum ad eor pertingat, æger haustu Tipiocæ munitus ad sudandum impellitur. Quibusdam Indis sacræ instar anchoræ est serpentis noxii caput contusum, vulnerique applicatum, cui remedio addunt jejuni hominis salivam, qua pars a serpente offensa identidem mulcetur. Galenus ipse, Plinius, Scaliger, & alii ejusmodi salivæ non vulgarem adversus venenatos morsus virtutem tribuisse, scribuntur. Verum num his omnibus remediis vel unus a serpente hoc pestilentissimo afflictus mortem arcuerit, non ausim affirmare, ausim tamen dubitare. Nam probatissimæ medicinæ, quæ in Paraquaria contra cujusvis serpentis mortium profuere, Cassæ fuerunt semper, quoties a serpente tinnulo læsis adhibitæ. Dicant, scribant alii, quidquid lubuerit, ego experientia crebra confirmatus cum Georgio Marcgravio, qui in Brasilia aliquamdiu versatus in sua Rerum naturalium historia ait: *Serpens est (Noliger scilicet) apprimè venenatus, nec antidotum cognitum contra illud virus.* Verum quantumvis lethiferi sint hujus serpentis dentes, dum mordent, salutares tamen evadunt, dum medi-

cinæ

cina loco applicantur. Ferunt enim, Mexicanos his dentibus collum pungere, ac cervicem ad capitis dolores avertendos. Ejusdem anguis adipe lumbos, aliasque male affecti corporis partes, atque adeo tumores quosvis utiliter oblini, putant. Caput quoque hujus serpentis collo ægri alligatum gutturis doloribus mederi, dicitur. Nil repugno. Sed peregrinum nobis in Paraquaria id medicamenti genus.

Primum ab hoc locum qui meretur a nocendi facultate, est anguis duodecim, quandoque quindecim pedes longus, vastus corpore, colore cinerem imitans, atris, ut timeatur, punctulis variatus, sub ventre flavescens, & veneno peculiari, quod circumfert, infertque morsu, formidabilis. Brasili hunc Cucurucù, Quaranii Mboÿpè quazù vocant; Ex effectibus eundem esse conjicio, quem Plinius Hæmorrhœam dixit; Hæmorrhoida alii. Frequentior hic, ubi calor, cœlique humiditas, serpentum altrices, dominantur. Virus istius per ictum artubus humanis infusum accendit venas, ebullientemque sanguinem per buccam, nares, aures, oculos, digitorum ungues, verbo, ex omnibus corporis portis, ac poris expellit. Id, præter alios fide dignos scriptores, Pater Patricius Fernandez noster in sua Chiquitorum, apud quos annis pluribus commoratus est, historia memorat, asseritque, vix aliquem ab hoc serpente interimi, cum major veneni vis cum ipso sanguine effluat. Ego (meum in scribendo candorem suspice) nec ejusmodi serpentem, nec ab illo ictum quempiam deprehendi, quamvis in Brasilia mihi propinqua non infrequentes esse, intellexerim, ubi caput ejusdem serpentis Cataplasmatibus loco inflicto vulnere applicant Indi; Tabacæ item recentia folia obiter ustulata cauterii instar. Radices quoque ex Caapia, Jurepeba, Urucù, malvisco, jaboran-

randy ad ciendum sudorem præbentur. Carnem huius serpentis, capite, ubi maxima veneni portio refidet, amputato rite paratam a Brasiliis barbaris vorari, scribunt. In Paraquaria præter Mboÿpè quazu etiam Mboÿpè mihi visitur, quæ calami, quo scribimus, crassitudinem vix excedit. Quamvis minus corporis, plus tamen veneni habet, quam major huius nominis serpens. Talem pedibus meis insidiantem diu, cum alia arma ad manum mihi non essent, cultello jugulavi, periculo animos mihi inspirante. Resectum caput pro trophæo fuit.

Yacantinà majoribus utique serpentibus adnumeranda est, pericolosioribusque. Duas, interdum tres ulnas longa humani brachii crassitiem æquat. Ultimis caudæ vertebri innixa assurgit, ac volantis instar in obvios insilire consuevit. Quiririò ipso sui conspectu vel strenuissimos terret. Moles ingens corporis valde picti, & præsentissimum, quo pollet, venenum terroris causa. Hac, qua scribo, dextera binos ejusmodi in frustra concidi: In domus nostræ hortulo primum, Indis facem mihi præferentibus: In cubiculo meo alterum. Mboÿ hobi obscure viridis, maculis nigris distinctus, & sive longitudinem, sive latitudinem spectes, prægrandis, ac veneno nocentissimo prægnans campos passim insidet. E contrario Mboÿ quatia domesticos intra parietes potissimum deprehenditur. A venusta colorum varietate nomen habet. Mole est mediocris, sed veneno admodum atroci. In fluviis, lacubusque Hydri variæ figuræ, magnitudinisque monstrosæ quam plurimi oberrant. Veneno carere putantur, formidandi tamen natantibus. Nam horrendi illorum dentes, quod arripuerunt, haud dimittunt. Corporis sui voluminibus, seu circumplexu animalia compriment,

ac occidunt. Horum e numero Mboÿroÿ; Serpens frigidus a Quaraniis dicitur, quod stationes frigidiusculas, umbramque amet. Alter Curiyû octo, sæpe novem ulnas longus, crassitie tantæ longitudini respondente. Hic hydrus lautas Indis epulas præbet. Præ cæteris memorabilior est serpens mole vastissimus, natura innocentissimus, nullique mortalium timendus. Ab Hispanis Paraquariensibus Ampalaba (credo, lingua Peruviana, seu Quichua) vocatur. A Quaraniis Mboyquazu serpens magnus; a Brasiliis Yboÿa: Ab Abiponibus Achikelfal: A Lusitatis cobra de veado serpens dorcadum: Crassitudine viri pectus superat; Longitudine hydros omnes. Colore spadicæo, varioque arboris vastissimæ truncum exprimit, musco undique refertum. Dum per Jacobopolitanum territorium iter facerem. ad lacunæ fluvio dulci haud procul ab oppido Socconcho adsitæ ripas equus, quo vehebar, terrefactus repente ex via resiliit. Quid terroris occasio fuerit? Adolescens Hispanus Comes interrogatus mihi reposuit: Ecquid, mi Pater, ampalabam serpentem in litore procumbentem non vides? Vidi equidem, sed arboris truncum, credidi. Equi terrorem porro, meumque ex equo lapsum metuens haud subsistendum mihi putavi, quo monstri immanis scintillantes oculos, breves, sed acutissimos dentes, caput horrificum, varii coloris squamas contemplerer. Multis tamen post annis duos hujus generis serpentes in Timbo ad lacus marginem pedes attingente consideravi. Sub aquis degere solent, in litus tamen emergunt frequenter, quin & celsas arbores conscendunt aliquando. Nulli unquam hominum insidiantur, estque verisimillimum, illos veneno carere, saltem noxio. Uno tamen ore omnes & Hispani, & Indi affirmant, ampalabas Cuniculis, capreis, ac dorcadibus inhiare, quæ scilicet animalcula solo sibi at-



trahant halitu, rictuque patente, quin dentibus manderent, integra deglutiant; Quam ob rem hic serpens *cobra de Veado* serpens dorcadum a Lusitanis nuncupabatur. Ut vasto ad damas sorbendas gutturre, sic magna animi ad id credendum facilitate opus esse, cogitabis. Nunquam id a me visum, ingenue fateor; Non tamen ausim ejus rei veritatem in dubium vocare, cujus fidem idonei authores, testesque oculati faciunt. Ut alios taceam, Marcgravius Brasiliæ veteranus incola, ac solertissimus naturæ investigator: *Serpens hic (Ampalaba) vocatur a Brasiliensibus Mboý Guazù, id est, magnus; Nam vidi, qui integram capream deglutiverat ingenue affirmavit, cujus testimonio Hispani, Indique Paraquarienses consonant ad unum omnes.*



C A P U T XXXI.

Plura de eodem argumento, & aliis
infectis.

Quod si illam Ampalabæ serpentis magnitudinem fabulosam, exaggeratamque existimes, Væ illis authoribus, qui multo incredibilia de hoc scripsere. Lege, si vacat, Aldrovandi Librum primum de Serpentibus, paginam primam, & hæc illius verba perpende: *In reveria parte historiae Indiae Lusitanicæ* (suppono, de Brasilia sermonem esse) *legitur, quod ibi non longe a mari vasti reperiantur serpentes, fere semper in fluminibus degentes, quorum magnitudo a cibo arguenda est, quandoquidem cervos integros devorare dicuntur.* Lusitano historico consentit Hispanus Eusebius Nierenbergius noster in historia naturæ L. 12. cap. 17. ubi de angue stupido, Mexicanis *Canaucoatl*, quem eundem esse cum nostra Ampalaba ex sequentibus colligo. Juvat illius verba, quæ ad rem faciunt, excerpere: *Hominis æquat crassitudinem*, inquit, eundemque dupla longitudine excedit. Incolit saxa, antraque (fors ubi amnes, & stagna desunt) & occurrentibus animalibus, ad se tractis halitu, victitat. Accidit aliquando, ut indi iter agentes infederint ei, rati truncum esse (tanta est ejus vastitas, atque stupiditas) Nec intellexerint, quam instabili, terrificæque sedi institerint, donec angue sensim præterlabente perterriti surrexerint. Innocens tamen esse dicitur, ac nullo pene noxius morsu.

Inventus est tantus hic coluber, ut octo & decem milites confederint in illo, trabem aliquam esse putantes. Vocant Hispani hos angues culebras bobas, colubros stupidos. Cervis insidiantur occulta i frondibus circa vias, qua cervi solent transire. Cum prope accedit cervus, vi spiritus sui attrahit ad se, ut magnes ferrum, nequeunte cervo evadere avidum os colubri (carent hoc imperio in homines) detentum halitu cervum complectuntur, circum compressione extingunt, deinde adlambunt, & saliva sua linentes præparant, & condiunt, ut facilius glutiant, alioqui pilorum asperitas impedimento esset. Paulatim exsugunt illum integrum a pedibus usque ad caput, quod quidem propter cornua deglutire nequeunt, sed donec putrescat, in ore deferunt. Accidit interdum, ut formicæ patulum os ejus colubri subeant, eumque interimant, ulciscentes hoc modo cervicidam. Hoc genus venationis his stultis anguibus indulgit natura, alioqui nulla providentia esset tantæ ignaviæ. Totæ æconomia, & census hujus *anguis est Spiritus*. Ita ad literam Nierenbergius, qui, quod sciam, nunquam vidit Americam, sed quæ asseruit, ex historicis Americanis accepit. Multa sane, quæ dubiam facere possent ejus narrationem, atque incredibilem, in toto hoc paragrapho se offerunt, illis maxime, qui res novi orbis ex Europæarum aspectu metiri consueverunt, & quidquid cogitatione non assequuntur, id fidem, naturæque vires excedere pronunciant illico; Quamvis plurima alia seu ab elementis, seu a formicis, apibus, elephantis, cæterisque bestiis fieri quotidie videamus, quæ, qua ratione fiant, haud satis intelligimus, naturali tamen virtute citra prodigium facta ultro fatemur. Serpentem ampalabam, de quo nobis sermo, tum mole, tum colore truncum prægrandis arboris, referre, ipse spectavi toties; Ab illo dorcadæ, & id

genus animalcula ipso attrahi halitu, ablorberique, licet ipse viderim nunquam, semper ab aliis audacter affirmatur, quibus eandem prope, quam oculis meis, fidem me debere, existimavi. Quod si eadem bellua ipsos quoque cervos in Mexicanis terris glutiat, eandem illic eo grandiorem gigni, arbitror, quo majori Coelum illud præ Paraquariensi calore effervesceat, ob quem forsitan & Cervi minores, quam Borealibus, frigidisque in provinciis. Cæterum modo, quo cervus ab ampalaba deglutiri queat, investigando haud equidem cerebrum fatigabo meum; Hanc ego curam monstroso serpenti lubens relinquo. Neque illi, qui id totum fabulam putaverit, hitem movebo unquam.

Quæ tamen memorata hætenus, verisimillimè evadunt, si modo vera sint, quæ de portentosis serpentum magnitudinibus passim scribuntur. Aristoteles mentionem facit de vastissimis Africæ serpentibus, qui ad nautas devorandos triremem aggredi non timeant. Conspecta illic fuisse taurorum ossa, refert, quos ab iisdem hydrys consumptos, plerique opinabantur. Teste Plinio L. 8 cap. 14. in primo bello Punico Attilio Regulo Romanorum consule jubente apud Bagadram fluvium prope Africæ litus ballistis, tormentisque, ceu oppidum aliquod, oppugnatum, expugnatumque esse a militibus serpentem, cujus corium longum pedes viginti supra centum Romam allatum est, ut Gellius narrat. In Indiis, quæ solem orientem spectant, ad sternendos immanes colubros ducem cum copiis excurrisse, excubitores in speculis constitutos alios, alios, qui insidias tenderent, equites, peditesque missos, historici non spernendi referunt. Serpentum triginta cubitos longorum Pausanias meminit. Si straboni fides indorum Rex Porus

serpentem ad decem cubitos extensum Augusto Cæsari dono dedit. Carolus Clusius in Exoticis suis pellem serpentis peregrini novem pedum Romanorum describit; Aliam ejusdem prope longitudinis apud Magnum Ducem Hetruriæ sibi ostensam Aldrovandus ait. Alianus scribit, in novo orbe serpentium quorundam fauces tanto patere hiatu, ut capras deglutire integras possint, quin & tauros, Ravisio teste. Ex consalvi Ferdinandi Oviedo historia Generali constat, in Cuba Americæ septentrionalis opulenta insula nasci serpentes, qui latitudine femur virile, longitudine triginta pedes assequantur. In Uruquayo, uno ex tribus maximis Paraquariæ fluminibus, hydros spectari incredibilis magnitudinis, & in litore ambulantibus magnopere formidandos, novimus omnes, quotquot per illud flumen navigavimus. In Parana fluvio principe ingentes perinde hydros erectis capitibus, caudaque eminente natantes passim videas. Quaranijs quondam Apostolus, eximijque virtutibus conspicuus Pater Antonius Ruyz Montoya Indum piscationis gratia umbilicotenens aquis immersum & ab hydro ejusmodi absorptum vidit, ut ipse scribit, quem tamen subinde in litore totum evomuit, sed ossibus adeo contractis, ut molares inter lapides contrita viderentur. Plura, quæ mihi ad probandum argumentum in promptu sunt, in medium adferrem, tuum ni fastidium metuerem. Haud tamen silentio mihi prætereundus immanis anguis, quem Quaranijs Moñay vocant. Corporis amplitudine, hiantè rictu, fulgurantibus oculis, dentium minacium serie, maculosa, squamisque rigentibus obsita pelle draconis refert speciem, & vel ab intrepidissimo citra terrorem spectari haud potest, neque citra periculum. Pater Emanuel Guttierrez noster in nova sancti Stanislai Colonia tunc Missionarius dum per Tarumenses illas

solitudines iter faceret, Yuquirÿ fluvii ripas prætergressus horrendam hanc belluam cominus vidit. Hanc Indus quispiam illius Comes loro prælongo, quo ad capiendos equos uti solent, illaqueatam, mulaque, cui infederat, raptatam dextre, feliciterque suffocavit. Tantundem animorum Indis oppidi sancti Joachimi non fuit. Hi ad viam adventuro Gubernatori Regio paranda a me missi paulo post meridiem trepidantes domum rediere, quod in densissimo, ac inaccessio nemore ad rivuli ripas latentem anguem monay deprehenderint. Haustum animo timorem ipso prodebant vultu. Tanti terroris causam rogati, verbis tremulis pro colore usi, horrificum visu monstrum mihi depinxere. Abierant pauculi dies, dum eventu subito rem, ut erat, comprobata ipse vidi. Gubernatori, qui postridie adfuturus vano rumore nunciabatur, honoris causa cum Indis aliquot primoribus obviam processit. Equo, cui infidebam, semper alias morigero, placido, & ad quæque intrepidus sum usus. Idem tamen, dum illi rivulo, ubi conspectus nuper ille serpens, imminerem, subito furere, fugere, habenas negligere, calcitrare, extra viam me abripere cepit. Monstrum nempe illic sua in specu latitans odoratu percepit ex omnium, qui me comitabantur, Indorum sententia, qui & sibilum belluæ se sensisse, asserbant. Vix enim credat Europæus, quanta odorandi facultate polleant equi, mulique ad remotissima, quæ humanos sensus fugiunt, percipienda. Aquam, si siccant, tigrides, locios suos, & si quæ alia vel fugitant, vel appetunt, eminus præsentunt, ut sæpe sumus experti. Ferox hæc bellua monay nullas, certe rarissimas strages quod edat, ratio est, quoniam abstrusos plerumque intra lucos, solitaria litora, vel ab humanis conspectibus remotissimas speluncas delitescit. Interdum sibilo, formidabi-



li se prodit, Indosque venatui intentos de periculo commonet. Sibilar serpentes ex Ovidio quoque novimus, qui 3. Metamorphos: Longo caput extulit antro Cæruleus Serpens, horrendaque sibila misit.

Etsi omne serpentum genus hac illac vagetur, alii tamen sub aquis, in cespite, nemoribusque alii, alii intra ædium parietes duntaxat, ac loca concava latebras quærunt. Venustissime pictus, sed veneno violento turgidissimus Mboÿ quatiâ, de quo superius, murorum rimas, vel ruinas pro latibulo habere solet. Fors Cenchridis illi nomen quadrat, de qua Lucretius L. 9. *Pluribus ille notis variatam tingitur alvum*. In templo oppidi S. Joachimi quam plurimi id genus occisi, nunquam tamen aliis, aliisque subnascantibus eliminati sunt. Cum nusquam in tanta anguium colluvie securitas, per campos, sylvas, lacuum margines nunquam temere confidendum, svadeo, nisi loco undique lustrato, excussoque. Indi futurorum improvidi, periculorum fere immemores cum, ubi ubi in mentem venerit, humi se sternant, idcirco toties ab occulto serpente feriuntur. Fatigati molesto itinere, quod per sylvas Mbaeverâ mecum pedite pedites fecerant comites, sub vesperum in statione procubuerant, ubi palmarum stipites putridos, tuguriorum reliquias quaquaversus humi sparsas observavi. Circumspicerent iterum, iterumque solum, quod noctem acturi occuparent, monui; Truncatas palmas, insectorum pestilentium receptacula loco moverent suo, religioseque scrutarentur, vitæ suæ consulerent, hortabar. Hortatibus morem gerunt meis. Sub primo, quem removerant, stipite serpentem vastæ molis septemdecim ovis incubantem, & vel hoc nomine

mine periculosiorem me spectante detegunt. Mox alter, ac plures denique in conspectum se dedere. Ova tenui, candidaque pellicula, non cortice, constant, quernam nucem figura conica referunt, magnitudine superant. Sylvas illas, quæ Acaray, & Monday fluviis interjacent, cum calore, & humore abundant, serpentium pessimorum seminarium jure dixerò. Quoties istuc, barbaros investigaturus, iter feceram, fateor, plures uno die a me serpentes visos, quam alibi mensibus integris. Vix gressum tuto fiximus; Jam dextrorsum, jam sinistrorsum nobis imminuere.

Mirabar sæpe, ad arcendos serpentes a quibusdam antiquis ignem svaderi, quo eos maxime allicium expertus. Caloris desiderio illos foco adrepere, clausis, calidisque cubiculis se se clanculum insinuare, passim vidimus. *Frigidus, o pueri, fugite hinc, latex anguis in herba.* Sapienter Virgilius anguem frigidum dixit. Galenus equidem non uno in loco frigidum serpentibus temperamentum tribuit; Ideoque frigoris externi impatientes Aristoteles affirmavit. Causam frigoris modicam sanguinis portiunculam Plinius assignat. Eo certe acriori frigore laborant angues, quo copiosiori, violentiorique veneno turgescunt. Hinc a serpente ictis mox sanguis constringitur; Corporis extremitates, cum ad illas circulando non pertingat, rigent, frigentque. Ecce ova serpentina tenui, tenerimaque pellicula teguntur, nisi ob innatum serpentibus frigus? Gallinæ equidem, quoniam calore abundant, ova firmi corticis edunt. Frigere serpentes, calorigue inhiare, quotidiana nos id docuerunt experimenta. Per immensas Paraquariæ solitudines multis sæpe hebdomadibus sub dio agendæ noctes. Cælum nobis pro tecto, pro lecto
so-

solum est. Patente in campo pernoctaturi vixdum posito humi foco angues in propinquo latentes adrepere vidimus se se Calefaciendi studio. Si quando noctes Australi vento frigidiusculæ ingruant, sub equorum stragulis, ephippiisque humi abjectis se abdunt, quamvis, nisi laceasantur, citra ullius noxam, cum præter calorem sibi quærant nihil. Hispani milites dum sub Auroram mihi equum instraverant, sub ephippiis meis, quæ mihi dormienti pro cervicali semper fuere, serpentem immanem, viridem, nigerrimis maculis distinctum, & in spiram convolutumprehenderunt. Ad talis, qui meo sub capite dormiverat, socii conspectum quis mihi animus fuerit, pronum est conjicere. Observavimus, serpentes stragulis laneis equi sudore madentibus inhiare, quæ proin ad removendum periculum ab humanis corporibus longe removenda, Humo plusculum frigescente aplicationis, solisque captandi gratia tuguriorum, quin & sacræ ædiculæ tecta conscendunt serpentes, indeque aere noctu exasperato in cubicula maximo illic versantium periculo delabuntur. In recenti Conceptionis Divinæ Matris Colonia noctu dormiens sinistrum mihi pedem senseram constringi. Dolor experefactus serpentem suræ implexum adverti, qui tamen valida pedis agitatione excussus cum strepitu humum decedit. Cum mihi luminis copia haud esset, nec dormire porro ausus sum, nec lecto exire, majoris periculi metu; Nam, quo loco serpens ille jaceret, per cubiculi tenebras videre mihi non licuit. Interea socius meus Josephus Sanchez tenui pariete a me divisus, clamoribusque meis excitatus accurrit; Candelam ardentem manu gerens serpentem sub lecto meo conspicatus, illi mortiferum caput securi obvia demessuit. Hic nisi periculi mei oculatus testis extitisset, quidni tota hæc, ut est,

historia pro fabula, vel somnio habita fuisset. Quoties vesperi lumen infertur cubiculo, sollicitè claudenda fores; conspecta enim luce serpentes propinqui confestim ædibus irrepunt. Hi sæpe in cubiculis e latere cõcto, vel saxo structis. imbrice tectis, nulla rima fatiscentibus, portis, fenestrisque solertissime clausis comparent repente, ut, qua parte aditum invenerint, nemo unus vel divinando assequatur. Scilicet serpens callidior erat cunctis animantibus terræ, quæ fecerat Dominus Deus, ut divinus ait Historicus L. Genes. cap. 3. Id dudum expertus sociorum meorum aliquis tanto serpentum metu correptus est, ut nunquam somnum capere auderet, nisi postquam mensam, sedilia, lectum, omnes cubiculi sui angulos baculo excussisset diligenter. Risi sæpe anxiam boni senis, sed non supervacaneam sollicitudinem. Ubicunque enim versabatur, serpentes sibi propinquantes deprehendit. Ut hominum aliqui præ aliis culicibus, pulicibus, cimicibus, sic serpentium incursioni magis obnoxii videntur. Quid si calidioribus eorum exhalationibus venenata hæ, ac frigida bestia attrahantur, allicianturque? Istæ quamvis ambulantis, sedentibusve timendæ sint, plus tamen dormientibus, quos dum motus expertes sentiunt, minus timent, & nil tale veritos per insidias feriunt plerumque.


Neque tamen desiderantur angues audaculi, qui aperto Marte obvios sibi quosque incessunt, saliendo assequuntur, & nisi fuga elusi, vel armis strati, dentem ferociter infigunt. Plurimos variis in locis adversus me assilientes, hiante rictu, minaci lingua pedibus meis propinquantes, sæpius periculo, quam dexteritate majori, trucidavi. In ictus velocitate ad ejusmodi victorias plurimum est momenti. Procenturio Hispanus mihi affirmaverat, Ceutæ in Africa serpentem gran-

grandiorem in comilitonem suam Dymacham equo insidentem afflixisse noctu, infixisque ocreæ illius dentibus venenum, necemque misero attulisse. Id neutiquam incredibile mihi visum, postquam e scaligero didici, Circa Dertonam serpentem hasta fuisse interfectum, ejusque venenum per hastam ad intersectoris dexteram derivatum mortem illi, & cui insederat, equo accivisse. Affine huic experimentum de pastore Matthiolus recitat. Venenato bestię expirantis halitu afflatum equum, sessorem, pastoremque illum, verosimilius puto, Pomponii Melæ nixus autoritate, qui scribit: Circa Rhymdacum amnem Bithyniæ confinem angues gigni sævissimos, qui in campo apricantes hiant sæpius, & supra se volitantes aves anhelitu afflant tam pestilente, ut ex aere mox decident, avidisque subinde anguium faucibus glutiantur. Idem Petrus Maffei noster in Historiis Indicis confirmat, En illius verba Lib. 2. *In eadem regione (Cananoris in Indiis orientalibus) Serpentium, & anguium adeo reser, ac noxius est balitus, ut afflatu ipso necare perhibeantur.* Hæc ut ut verissima esse, permittamus, nunquam tamen dubitavero, venenato serpentum morsu plures, quam halitu perire. Mihi equidem Indis conquirendis, imbuendis, alendisque semper occupatissimo Serpentina secare corpora, eorum artus, structuramque curatius inspicere vacavit nunquam; Illi, quorum id erat negotium, asserunt, viperarum, serpentiumque dentes a radice concavos, curvosque esse, & in cuspidem bifidam desinere, e qua, dum irritantur, venenum ejaculantur, in illa dentium caninorum penes radices cavernula assevatum. Neque tamen id omnibus commune putes, velim. Innoxios enim, mitesque, quod de Hispaniola scripsit Ælianus, serpentes Paraquaria procreat, qui vel veneno carent, vel lubricitate nocendi, nisi a prætereunte offendantur,

Nam

Nam & muscis sua bilis inest. Homines iratos passim Teutonica lingua venenatos dicimus, bile scilicet ebulliente. Ex mente quidem Plinii venenum serpentis nil aliud est, quam fel, quod sensim per venas ad vesicas oris pervenit, ubi secus dentes continetur, iisque in obvios vibratur. Quod si enim per totum se se corpus effunderet, totum animal venenatum esse oporteret. Quod longe a vero est, cum serpentes plurimi capite, cauda, felle, ac visceribus rejectis pro cibo, imo pro cupediis habeantur ab Americanis plurimis, quibus equidem id non invidio.

Serpentes alias ova parere, alias foetus vivos edere, quis ignorat? De ovibus a me repertis paulo ante mentionem feci. Ex serpentinis cadaveribus sobolem serpentinam nasci, credunt Americani. Hinc angues quosvis a se interemptos ab ædibus longissime remonent suis, neque humi temere abijciunt, sed arbori, sepibusve appendunt, ut aere, solisque æstu siccati, ac terræ humore destituti aliorum seminarium nequeant fieri. In finitima Paraquariæ Brasilia duo e nostris focis anguem horrendum visu, sed jam exanimem ruri deprehenderant, cui anguis parvulus, sed vivus, adhæsit. Resumptis a primo terrore animis accedere propius, & exagitato baculis cadavere undecim anguiculi, inde scilicet nati, prorepserunt. Facti, quod mihi indubitatum, rationes physici discutiant. De serpentibus bicipitibus, coronatis, unicornibus, bicornibus &c. multa apud Albertum magnum, apud alios ejusdem ævi, quid si & apud recentiores quospiam, invenies, miranda potius, quam credenda. Ego quidem ejusmodi monstra nusquam deprehendi, nisi in veterum libris. Nolim tamen esse eorum ex numero, qui, quæ non videntur



rint ipsi, nusquam gentium existere impudenter affirmant. Quod enim nunquam vidit America, quotidianum forte, ac vulgare in Africa, Asiave. Non omnis equidem tellus fert omnia. Monstroforum tamen serpentium imagines, fabulosas, & in cerebro duntaxat hominum natas non possum non suspicari. Ut enim nonnullis lubuit historicis homines acephalos, in pectore solum oculos, vel struthionum pedibus instructos fabulari; Ecurr serpentibus jam coronas, jam cornua, jam plura capita affingere, appingereque non auderent? Noverant profecto historiae suae eo plus pretii, plaususque a credulo vulgo tribuendum, quo rariora, incredibiliaque narraverint. Sæpe ab oculis delusi suis falsa pro veris scripserunt. Exemplum unicum pro multis sit. Serpens, quem Cæciliam, vel amphibænam, germanica lingua Blindschleiche, Quarania Ybiyà dicimus, passim biceps ab authoribus fertur, ast perperam. In hunc errorem inducti sunt, tum quia & cauda, & lingua ictum venenatum infert; Tum quia caput, & cauda, quæ eiusdem sunt molis, ac formæ, vix discerni possunt, nisi obtutu fixo considerentur. Minutissima duo punctula habet pro oculis; Habet & anum sub caudæ extremitate. Corpus crassitudinem minimi digiti æquat; Longitudine palmum excedit. Coloris est vitrei candentis, annulis, lineisque ænei coloris eleganter variatur. Degit sub terra, formicisque alitur. Illius venenum magnopere formidandum.

Serpentigenum agmen claudant terna insecta ob venenum affinia. Scolopendra Hispanis Cientopies, Quaraniis Yapeuzà, Abiponibus Kapalkatai, corpus habet teres, ac Cylindricum, spithamam longum, geminum viri pollicem latum, cortice duriviculo, qui ad cartilaginem accedit, cinerei coloris tegitur, a capi-

capite ad caudam pedibus scatet, quos numerare nec volui, nec facile potui. Virus serpentino propemodum par alit, morfuque suo ut doloris, sic periculi multum creat. Post annos octodecim in Paraquaria jam exactos vidi denique, & sensi solo mihi nomine prius notam bestiam. Meridianem me meo in cubiculo momordit. Expergefactus intervallum, quod digitum minimum inter est, & annularem sinistrae manus rubere primum, mox & tumescere, & dolere adverti. Augescente in horas tumore, ardoreque a venenato animalculo ictum me, dubitare porro non licuit. Sub vesperum medicinam, de qua inferius plura, applicui. Prima nocte cubiculo inambulans fabrilia inter instrumenta sub scamno latentia clangorem edi insolitum, percepi. Adhibito lumine scolopendram, quae me feriit, deprehendi, maetavi, ac postdie in ambitu domus suspensam Indis exhibui; Isti hanc pestem per domos, per campos, ac fluminum ripas a se saepe videri, semper ob veneni perniciem reformidari uno omnes ore fatebantur. Scolopendram cum Onisco cave confundas. Hunc Quarani ambua dicunt. Vermis est fuscus, rotundus, digitos duos longus, pluma, qua scribitur, anseris vix crassior. Corpus pilis asperis, sed eleganter flavis vestitur. In capite maculae candidae hinc, & illinc duplici serie eminent. Octo pedibus curtis, sed crassis graditur. Quam corporis partem attigerit, inflammat vehementer, ut adeo veneni experts putari haud possit. Scorpions, Hispanis *Alacranes*, Quaraniis *Yapeuza* (quod nomen & Scolopendrae) Abiponibus *Kapalkarailare* Scoopendrae matres, ab Europaeis figura nil differre, veneno tamen esse mitiori, faciliorque curatu dicunt. In Paraquaria Scorpions rarissimos existere, opinor, cum plerisque provinciae angulis peragratis per duo decennia nullum usquam viderim, neminem unquam

ab illis læsum, intellexerim, Illud memini: In Conceptionis oppido, Hispanum pecorum custodem, dum ægrotaret, domi nostræ decumbentem a Scorpio, qui ex pariete semel, iterum, ac tertio caput exeruit, fuisse perterritum, ejusque metu noctem insomnem egisse, manu contra bestiam sibi minitantem semper cultro armatâ. Araneorum (Quaraniis *Nandu*, Abiponibus *aualini*) species, figuræque variæ ubique locorum se offerunt. Per parietes passim repentes videas, qui corpus tabulæ instar complanatum habent, & a Quaraniis *nandupe*, ab Hispanis *arañas çbaras* appellantur. Abundant veneno. Cane pejus, & angue fugiendi aranei prægrandes, quos Hispani *arañas peludas*, id est, hirsutas, Quaraniis *Nanduguazu* grandes appellant iidem fortassis, qui a latinis phalangia dicuntur. Illorum corpus tres circiter digitos longum e duabus partibus componitur. Anterior pars major est, duos prope digitos longa, sesquidigitum lata, ac non nihil compressa. Posterior ad figuram sphericam accedit magis, ac tum magnitudine, tum forma nucem muscatam exprimit. Tergus perforatum umbilici supplet vices. Exilia duo punctula ocelli sunt fulgurantes. Dentes longi, & peracuti ob eximiam pulchritudinem a variis auro clauduntur, ad dentes scalpendos, ad alios serviunt usus. Tota aranei hujus cutis pilis curtis nigricantibus vestitur, qui tamen adeo sèves, ac blandi, ut, si tangantur, serici videantur. Decem crura longa, pluribus, paucioribusve internodiis distincta, undique hirsuta numerat, quorum singula in forcipulam, qua cancri gaudent, desinunt. Hæc crura pedum, manuumque officio funguntur. Irritatus mordet obvios. Morsum, vix oculis spectabilem, humiditas quædam, lividus tumor, & qui inde consequitur, dolor acerrimus detegit. Aranei virus humanis corporibus ingestum non periculosum

modo, sed & lethale experti sumus; Remedia ad serpentinum vulnus perfanandum opportuna pluribus ab araneo grandi ictis vix demum vitam servarunt. Hoc araneorum genus in sepibus, arborum cavernis, murorumque ruinis, ubi reliquorum more telæ texendæ insudant, potissimum delitescunt. De aliis Paraquariæ insectis seu noxiis, seu molestis mox disseremus. Nunc ad remedia properandum. Nam ubi e veneno morbus, mora nulla periculo caret,

C A P U T XXXII.

De remediis contra venenatos insectorum ictus.

Quibus demum præsidii jam adversus lethifera insecta se se tueantur mortales, jam receptum virus e corporibus depellant suis, hoc loco explanandum venit. Vetusti codices liberaliter suggerunt modos arcendi serpentes, terrendique. Ast quis Americam aliquamdiu expertus illa veterum consilia pleraque non explodat? Quippe implendis librorum foliis utilia, nulli prætereā usui futura. Paucula adferam. Timeri a serpentibus hominem, veteres quidam asserunt. Isidorus L. 12. origin. cap. 4. Timeri quidem hominem, fatetur, a serpentibus, non tamen vestitum, sed nudum. Nam nudum duntaxat hominem dominum cognoscunt suum, ac verentur. Quod si ita, quis, amabo, ab anguium moribus liberior, quis immuniior nudissimis

mis barbaris? qui tamen mordentur frequentissime. Ego enimvero a capite ad calcem loricatus undique longe tutiorem me inter anguium insidias existimabo. Si quis dormiens a serpentibus sibi male metuit, ex Avicennæ consilio domi suæ alat pavones, Grues, Cycnos, vel Ciconias serpentini generis inimicas aves. Quod si has perinde, ut olim Capitolii anseres totis noctibus vigilaturas, novero, serpentes propinquos nec suspicabor, nec dormiens somniabo. Rutam, absinthium, artemisiā, abrotanum, libanotidem &c. infestas serpentibus herbas circa ædes plantandas, sudent alii. Morem gererem amicis monitis, nisi hac ratione vel lectus ad hortum, vel hortus ad lectum quotidie transferendus esset, quid si nullo operæ pretio? Nam serpentes plures, plures a serpentibus sauciatos nusquam vidi, quam in S. Joachimi oppido, cujus tamen forum, ac plateæ omnes artemisia ubique pullulante sylvescunt. Nullus, quod sciam, in triginta duobus Quaraniorum oppidis est hortus, qui ruta, roremarino, absinthio, & quibus non aliis herbis non abundaret; At sub his quot, quantique angues delitescunt! ut extra serpentum timorem tuto cubes, ignem tibi propinquum statue, alii hortantur. Jam dixi, serpentes natura frigidos calorem appetere, ad focum, ad lucem candere & properare. Galenus suffimentum ex radice lilii, aut ex foliis ore-gani imperat. Alii ex pelle, cornuve cervi, ex veteramentariorum coriis, ex cornu capreae, vel dorcadis, ex elephanti dente, vel pelle, ex nasturtio, sulphure, bitumine exustis fumum quorumcunque anguium terrorem ac exilium esse affirmant, confirmantque experimento Romanorum: Milites Catonis in Africa a serpentibus usque vexati accenso cubo, Galbano, centaurea, abrotano &c. periculo se, molestiaque priori expediverunt, Lucano teste L. 9. de bello Civili.

Con-

Concedamus, ejusmodi rerum fumantium exhalatione terribissima fugandos serpentes; Sed nos quoque ex ædibus eadem de causa fugituros, nemo dubitet; Equis enim nostrum nares mephiti tantæ pares sibi polliceatur? Ad hæc fumus operosum, & fluxum adversus serpentes remedium, fuerit. Durabit serpentium metus, ac absentia, dum fumus duraverit quovis auræ impulsu mox dissipandus. Ad perpetuandum fumum ignem alere perpetuum oportebit; Hic labor, hoc opus, & solis profecto vestalibus tolerabile. Num erit quispiam, qui in diuturnis per vastas solitudines itineribus has herbas, has, fumi scilicet materiam, quisquillas bajulare aut velit, aut possit? Ex Plinii, lucretiique mente jejuni hominis saliva serpenti mortifera est, si ejus faucibus injiciatur. Ita sit. Sed nunquid majus operæ compendium fuerit, tutiusque, serpentem stipite, vel quovis demum modo obtruncare, quam ejus, ut conspuere saliva possis, fauces aperire? Quis adeo intrepidus, vel potius adeo stupidus, ut id ausit? Adeo dexter, ut citra noxæ periculum id possit?

Dicam, quod sentio. Probantur mihi præ istis veterum industriis Americanorum adversus serpentes remedia, tum quia expeditiora, promptioraque, tum quia illorum utilitas longo usu explorata. Haud tamen hæc omnia semper tam certa pronuntiavero, ut illorum usus utentium expectationem, ac vota nunquam prorsus eludat, quæ quidem prærogativa neque exquisitissimis Europæorum concessa est medicamentis, ut quotidie experimur. Quarani Christiani, quoties ad Barbaros in sylvis conquirendos me comitabantur, allium recens, e cingulo suspensum gestabant. In tanta serpentium, quos spectavimus, frequentia nemo unus meorum læsus

ab iis fuit. Indorum exemplo allium e filo pendulum habui ad lectum semper, postquam, ut dixi, dormiens a serpente fueram invasus. Allii odorem serpentibus adversari, & veteres docuerunt, & rustici norunt, qui amphoris, in quibus lac asservant domi, alliorum succum affricant, ne serpentes, lactis avidissimi, clanculum irrepant. Hanc tamen de allii virtute a me conceptam fiduciam haud medio-criter imminuit sociorum meorum aliquis, qui serpentem plantæ allii inhærentem in horto conspexit. Sed nempe aliam virtutem plantæ folia, aliam ejus radix, ac fructus ipse passim habere consuevit. Quid si allium solum, non illius frondes serpens perhorrescat? Abipones, Mocobiique equites vel e collo, vel e brachio suspendunt Crocodili dentem, in signe, ut sibi pervadent, quorumcunque anquium terrificum. Hos barbaros non pauci Missionarii, Hispani plerique imitantur, dentesque ejus bestię non levi sæpe pretio mercari solent. Hispanos novi, qui dum cervinæ pellis segmen corpori admotum suo circumferunt, serpentinis se ictibus nunquam obnoxios, putant. Et vero cervos, dorcadesque innato odio in serpentes ferri, videmus. Cervorum, doreadumque seu pelle, seu cornibus serpentinos averti ictus humano a Corpore, omnis certe antiquitas opinabatur. Nec desunt, qui manus, pedesve suos raphiani succo perungunt, seque adversus venena munitos, credunt. Hæc vel singula, vel omnia aspernari non ausim, quia Americanorum sunt experimenta. Prosumt istis multa, quanvis eorum virtus necdum perspecta sagacissimis Europæis. Prudentis est, his Americanorum industriis, præfidiisque nunquam tantum confidere, ut cautus esse desinat, & periculi obliviscatur, quod a serpentibus ibi maxime, ubi nullum apparet.

Quapropter omnibus, ut circumspeditione pro viribus utantur, Americanis author esse. Si quando meridiandum in campo, pernoctandumve, stationem sibi deligant dumetis, arundinibus, cavernis vacuam, a stagnorum, amniumque ripis remotiorem. Circumferant oculos. Adultum gramen, truncos putridos, fruticum, rupiumque latebras iterum iterumque excutiant, sicubi confidere lubuerit, vel cubare. Hujus consilii fere immemores Indi serpentinis se se dentibus propinant frequenter. ut glans locum, quem e quercu decidens occupaverit, tenet; sic illi, ubi eos quiescendi libido inceperit, impropide se humi abjiciunt. Nulla serpentium aut cura, aut formidine in utramque dormiunt aurem, ac vel ideo serpentino ore sauciati cum ejulatu expergiscuntur persæpe. Iter nudis pedibus prosequentes oculos speculari per aerem avibus, summiisque in arbore ludentibus affigunt, dum periculosum, quod calcant, solum ad passus singulos contueri oportebat: Abipones, quia equites, quia circumspectores, rarius a serpentibus offenduntur. Quaranii, quia pedites plerumque, quia minus providi, frequentissime. In S. Joachimi oppido, ubi Cælum æstuat magis, tellus paludibus, rivis, sylvisque cingitur, copiosior venenatorum animalculorum progenies existit. Vix una hebdomas abiit, qua Indos aliquot a serpentibus læsos non videremus; Indas multo rarius, quia hæ domi occupatæ campos, sylvasque rarissime percurant, quia cautiores, timidiioresque; Nisi forte tibi in mentem veniat dicere: formidas præ maribus seu amari, seu formidari a serpentibus, atque idcirco rarius invadi. Toto, quod in dicto oppido egi, octennio a serpentibus variis isti sunt quam plurimi; sed, quod stupeas, præter juvenes duos ab angue nolihero enectos, nemo oc-

cubuit; omnes uno, eodemque remedio feliciter perſanati fuere. Aures jam, animumque adverte, dum Cœleſte illud, ac prodigio ſimillimum medicamen veneni mortem, vitamque veneno infectorum tibi patefacio, tam ignotum extra Paraquariam, quam ſalutare Paraquarienſibus. Flos eſt candidiſſimus Europæo lilio, ſi frondes, ſtipitem, folia, odorem conſideres, omnia ſimillimus, niſi quod iſto aliquantulum ſit minor. Ab Hiſpanis nardus dicitur. Quocunque in ſolo provenit; quavis anni parte viget, nec Cœli ſiccitate longiori, neque pruinis marceſcit. Hunc florem a ſerpente afflictiſ ſaluberriſimum nec in horto Europæo, neque in libris, qui de floribus agunt, uſpſam deprehendi. Quid, quod & herbariæ artis ſcientiſſimi a me toties rogati hunc florem penitiſſime ignorant. Omnes nardi ſpecies diligenter ſpeculatus nardum noſtram Paraquarienſem ad nullam illarum referri poſſe, perſpexi. Quid ſi eſſet nardus Celtica, ſeu ſpica nardi Italica, flos Sanctæ Magdalenz? De hac enim Joannes Woyts in Gazophylacio medico-phyſico affirmat, contra morſus venenatorum animalium, & febres peſtilentes eam plurimum conducere. Verum illius deſcriptio nardo noſtræ Paraquarienſi neutiquam convenit. Idem author mentionem facit de *Flore indico liliorum arbo-
reſcente*, quem D. Heſſe in Hollandia den Indi-
niſchen Blumenbaum appellari aſſerit. Dicitur candidiſ ſilibiſ ſimiles, & fragrantiffimi odoris flores habere, & hyeme juxta, ac ætate virere, ſed figura myrti arboris ſimilitudinem referre. Ex quo palam fit, hunc florem Indicum a nardo noſtra omnino diſſerre; cum qua nullam pariter affinitatem habet nardus Peruviana, quam ſereniſſimus, & omni ex parte celeberrimus Princeps Wenceslaus Liechtenſtein Viennæ Aulicæ, Liquori innatantem, ſuo in pala-
tio

tio mihi exhibuit. Clarissimus Nicolaus jacquin botanicæ in Vindobonensi Academia magister, ab Augustissimo Cæsare Francisco olim ad lustrandam Americam missus, quid demum nardus illa Paraquariæ celebris esset, ignorare se, candide fatebatur. Quamvis igitur, quo nomine appelletur ab Europæis populis nostra illa nardus, adhuc nesciam, illius usum explicabo. Radicem hujus floris siccata, recentemve in particulas tenues comminutam vino cremato aliquamdiu immergimus. Idem subinde liquor cum radice partim vulneri, quod serpens infixit, applicatur, partim, vulnerato bibendus porrigitur. Una vice id præstitisse sufficit plerumque. Quod si tamen idem iterum, ac tertio repetieris, veneni vis extinguitur, tumor evanescit, vulnus coit. Quo citius hoc remedium adhibueris, eo facilius, eo certius veneni progressum cohibebis. Constanti octodecim annorum experientia edoctus cæteris quibusque medicamentis hoc præferendum, affirmo. Hoc equidem de veneno cujusdemumcunque (Noligerum exceipio) serpentis semper triumphavit. Indorum, quos ista nardi radice persanavi, numerum inire haud possum; Possum tamen asseverantissime dicere, illius usum nunquam cassum, irritumque fuisse. Indum Quaranium humi cubantem ruri serpens momordit, dente natibus infixo. Ad oppidum meum ut adrepset miser, sacris a me præsidii ad mortem præparatus est, quam & vulneris intumescens atrocissimus dolor, & insolens, quem dolor extorsit, ægri ejulatus comminabatur. Non nisi paucæ vini cremati guttæ mihi supererant domi, has ergo cum nardi radice vulneri, vulneratoque adhibui primum. Mox, cum virus necdum e corpore exterminatum acerrimus dolor indicaret, radice cum vino simplici, quod

cremato substitui, denuo usus post triduum convalescere ægrum, vidi.

Neque tam parca fuit natura, ut præter nardum, quæ nec omnibus nota, nullum præterea adversus serpentum ictus remedium miseris mortalibus suppeditaret. Varia apud varias gentes sunt in usu. Ex plurimis paucula memorabo. Tabacæ folium eximia adversus serpentinos ictus virtute pollere, nemo unus inficiabitur. Quaranium cum fociis in itinere meridiantem binis in dextro pede ictibus anguis vulneravit. Medicinam rogor. Nardum utique, si ad manum fuisset, porrexissem. Multas ab oppido leucas absumimus. Consilium in arcna. Ut imposito ori tabacæ folio confestim exfugat, utrumque vulnus, vulnerati patrem seniculum, hortor. Is id a se jam præstitum, respondet. Tabacæ accensæ fumum ut inhalet vulneribus, iisdem mansam prius dentibus tabacam cataplasmatibus loco applicet; Vulneratus ipse tabacam ut mandat, ejus succum glutiat, ejusdem fumum arundine liberaliter hauriat, moneo. Phialam cremati vini (quod maximi ad curanda varia in itineribus est usus) potandam præbeo. His denique reculis compressum virus, vires ægro tantæ, ut baculo nixus, cætera incolumis, iter nobiscum ad oppidum prosequeretur. Vini cremati ardore pestilens veneni frigus retunditur, sanguinis, ac stomachi Calor mirum in modum restauratur; Ad utrumque certius impetrandum multiplex tabacæ usus plurimum confert. Nam, ut P. Josephus Gumilla expertus est, serpentes, si eorum faucibus tabacæ folium intrudatur, protinus emoriuntur. Ex eodem authore novimus, in novo regno Granatensi Americanos pulverem pyrium vino cremato admixtum ad curandos serpentum morsus bibere, ac cura-

curari. Nec mirum: Calidis frigidum venenum expelli. Abipones, Mocobii, Tobæ, equestres Paraguaræ populi, ut primum a serpente ictos se sentiunt, vulneri ceram virginem, nondum igne excoctam, admovent, quæ scilicet haustum corpore venenum sibi attrahere putatur. Alias illud a suis medicis exfugi, petunt. Interdum cultro Crocodili dentem radunt, scobemque illam cum aqua bibunt, simul patienti vulneri Crocodili dentem integrum arctissime adstringunt. Hoc se remedio affirmant conſanari. Eadem Hispanorum fiducia. Pharmacopæus noster cordubæ Tucumanorum istam Crocodili dentium virtutem experturus, eandem veneni atrocissimi portionem cum carnis bubulæ frusto binis canibus objecit. Horum unius collo Crocodili dentem alligavit, non item alterius. Hoc secundo post horas pauculas extincto primum superstitem ope dentis illius, salvumque extitisse, narrant. Istis tamen omnibus induci nunquam potui, ut spes meas in Crocodili celebrato dente collocarem. Canis a serpente tacti collo plumas struthionis circumdant Abipones, idque remedium a suis se accepisse majoribus mihi asseverarunt, meliora scilicet ignorantibus.

Magnis in Cœlum laudibus passim effertur Piedra de cobra lusitanis, seu lapis serpentinus cinerei, interdum nigri coloris, variæ magnitudinis. Magnes venenorum creditur; Nam ut ille ferrum sibi attrahit, sic lapis hic venenato vulneri applicitus virus omne absorbet. Eundem in finem porro servire ut queat, lacti immergitur, in quod venenum a lapide haustum effundi, ajunt. Mercium Indicarum nundinatores huic lapidi pretium ut adderent, illi patriam, originem, & nomenclationem affinxisse, videntur. Ajunt enim, illum in quibusdam solum Magni Mogo-

goris provinciis in serpentis, quem cobra de capello, appellant, visceribus inveniri. Re tamen ipsa clarissimo Kämpfero, aliisque videtur arte factus, & nil aliud, quam segmentum ossis cervini, vel bubuli seministi, aut calcinati esse, id quod ex illius poris vel obiter inspicienti patet. Ast nempe felem pro lepore, vitrum pro adamante, pruna siccā pro tamarindis vendi ignorantibus, neque novum, neque rarum est. Quidquid demum sit, quod piedra de cobra vulgo dicitur, illud cuti humanæ, & vulneri adhærescere, expertus sum. Num venenum exsugāt, adhuc ignoro. Neque etiam contendo, in aliqua orbis plaga serpentem existere non posse, e quo forsitan lapillus eruat, curandis serpentum vulneribus idoneus. Sicubi talis existat, vero est simile, a mercatoribus ad ejus imitationem quæstus gratia animalium ossa ope ignis concinnata, calcinataque, uti videmus, fuisse. Ejusmodi fraudibus quoties eheu circumveniuntur creduli Europæi! lapis, qui in stomacho hystricis reperitur aliquando, magni est in medicina usus, maximique in Europa pretii. Hystrix, quæ vulgo Porcospin, a Germanis Das stachel schwein, Porc-epic a Gallis vocatur, & herinaceorum instar aculeis in tergo tegitur, in Indiis orientalibus, ac præsertim in territoriis Malacæ est frequentior. In hujus stomacho, uti lapis Bezoardicus varius apud alces, huanacos, bicuñas, rupi-capras sæpe deprehenditur, lapis quidam pomi instar globosus variæ molis interdum procreari solet, qui reticulo ex filis aureis scite circumdatus, dum ex Indiis adfertur, trecentis, sæpe quadringentis florēis germanicis Ulyssipone venditur, quod, eadem in urbe dum anno 1748. per septem menses classē præstolatus versabar, ex viro illustri intellexeram, Idem mihi significavit, per homines Europæos, quæ-

quæstus avidos, in Indiis hystricis occisæ viscera sicca-
ri, comminui, & nescio, quibus admixtis, ita com-
poni, ut illa denique massa indurescat, ac pretiosi
lapidis, qui in hystricum stomachis coalescit, figu-
ram mentiatur, magnoque subinde pretio veneat
in Europa. Lapidis isti si non eandem, saltem ali-
quam ad curandos morbos virtutem habere putantur,
qua genuini, & naturales solent pollere. Viderint
emptores, viderint medici. Mihi profecto omnis
usus hujus lapidis (la piedra del porco) etiamnum
est peregrinus. Quis nescit, rerum Indicarum mer-
catores pari fraude, ac lucri aviditate tabellas atra-
menti sinensis sinensibus characteribus insignitas (quæ
architectis potissimum sunt usui, & a Gallis Encre
de la Chine, a Germanis Tusche vel chinesische
Dinte appellantur) frequentissime imitari, ac confin-
gere, sed a peritioribus facile dignosci a genuinis.
Putatur id atramenti genus ex terra nigra resinosa,
vel, ut celeberrimus Trigautius noster illarum gen-
tium Apostolus autumat, ex fuligine, & fumo olei
olivarum a sinensibus parari. Sed hem! la piedra
de cobra quantum me a via abduxit! Multos tamen
non pigebit hoc nosse.

Allium venenatis moribus insigniter mederi,
prisci medici existimarunt. Avicena fatetur illius uti-
litatem sibi dudum compertam. Matthioli quoque
allium esitandum, vinumque dilutum a serpente ictis
svadet. Vomitum procurare, theriacam aliquam su-
mere, vulnus frigida abluere, at demum regionem
vesicæ calentibus spongiis fovere tales jubet prætere-
a. Si Volaterrano credimus, quem Mizaldus Centuria
8. adfert; In rustici dormientis fauces, nescio, quis
anguis irrepsit; Ille somno excusso alliorum esu
convaleuit. Quantum adversus venena possit allium,

experimento id comprobatum meo accipe. Indus Quaranus, dum horti sepes componeret, a latente ibi araneo hirsuto, quem supra descripsi, morsus in pede est. Dolorem sensit, sed imprudens silentio conceoxit. Veneno vires exerente suas femur sibi magis magisque intumescere, ipsum jam torqueri stomachum advertit, ac periculum, quod erat, suspicatus denique a me opem poscit. Jusculum ex carne bubula, quam copioso cum allio coquendam jussi, exhaustum ab ægro virus, tumorem, doloremque cōfestim repressit. Neque Dioscoridis mihi improbatur consilium, qui a serpente violatis succum raphani potandum propinat. Eodem succo, ne quis serpentinis assultibus pateat, lavandas manus antiqui svaserunt. Nam & autoritate physicorum, & experientia constat, non succum modo, sed ipsum quoque raphani odorem serpentibus, Venenisque magnopere adversari. Columbam vivam incisam vulneri a serpente inflictō alligant aliqui, vel gallinam dissectam. Ab his absorberi venenum, credunt. Gallinæ hædum cultro divisum substituunt alii, vel capræ recens enectæ ventriculum. Nonnulli caprino lacte locum a serpente vulneratum mulcent, narrantque rusticum lacti caprino pedem a serpente ictum identidem immergendo, convalesse. Caseum caprinum vulneri applicatum tantundem valere, asserunt. Partem veneno infectam medulla cervi, vel fimo bubulo perlini vult Dioscorides. Galenus cornu cervi calcinatum, & in pulvere redactum cumque aceto mixtum applicat. Vegetus finum suillum recentem cum melle Attico, vino, lotioque humano subactum comendat, vulneri scilicet venenato illitum. His orbis veteris contra venenum remediis orbis novus, America, nova, medicinæ principibus magistris ignota quondam, remedia adjecit herbas,

bas, plantas, radices, olea, resinas, fructus arborum, animalium exuvias &c. Attingam Paraquariensibus notiora. Fructum Ananàs viridem (qui per campos passim obvius) contusum cataplasmatibus instar venenatis ictibus applicant. Herbam Taropè (quæ ab Hispanis contra yerba, vel higuerilla, parva ficus, dicitur, quia radices illius & odorem & lac ficus reddunt) edendam, bibendamve contra morsus insectorum noxiorum Indi præbent medici. Herbarum Mboÿcà folia manduntur ore, succusque glutitur, pars foliorum mansorum vulnere apponitur. Hinc nomen illius *Mboÿcà* herbam serpentum significat. Eundem in finem celebratur virtus herbarum Macângua-cà, id est, herba anatis macângua dicti. Hic alis suis pro scuto utens serpentes insectatur, rostroque interimit suo. Si pugnans a serpente sauciatur, hanc herbam ceu medicinam vorat. Yçipo moroti, el bejuco de Quayaquil idem præstant. Ad sudorem ciendum, quo virus expellatur, radix urucuy, jurepeba, jaborandi &c. mirum in modum conducit. Valida sint hæc adversus venenum remedia, nil repugno. Bona tamen medicorum seu veterum, seu recentium pace illam, quam paulo ante laudavi, nardi radicem medicamentis cæteris Americanorum præferendam putavi, prospero semper successu comprobata. Hæc non hominibus tantum innumeris, sed & bestiis saluti toties fuit. Cum enim equi, muli, boves, ovesque diebus perinde ac noctibus quavis anni parte in campis pascantur, a serpentibus, scolopendris, araneis punguntur non raro. Stillans e naribus sanguis venenatum ictum prodit. Crematum vinum cum nardi radice eorum faucibus tempestive infusum pariter profuit. Postquam enim virus artus, venasque brutorum omnes pervagatum est, sera plerumque, ac irrita quævis med.

medicina fuit. Hæc de venenatis ictibus, eorumque remediis eo animo scripsi historicus, ut, quid in Paraquaria moris sit, intelligant Europæi, non ut illis utantur. Medicis, Chirurgisque, si illorum copia fuerit, se ut permittant, iterum, iterumque hortor. Domestica enim illa, ut vocamus, vulgi remedia, cum importune sæpius adhibentur, morbis ipsis periculosiora evadunt frequenter. Si quæpiam a me scripta non probant medici, per me rideant, dummodo adferant meliora. Multa Europæ accomodata, quæ neutiquam Americæ, & Americanis, noverint. Plurima artis medicæ regulis consentanea nunquam patietur Abipon barbarus. Utatur medicus Europæus cucurbitulis ad scarificandam partem corporis veneno infectam, utatur scalpello, caustico, ferro candente, hirudinibus &c. his non proficientibus mors ægri consecuta non in serpentis venenum, sed in medicantis scævitiâ, ignorantiamque a barbaris rejicietur.



CAPUT XXXIII.

De aliis insectis noxiis, eorumque
remediis.

Totam Ægyptum cum universis, quæ vindex Deus congegnerat olim, insectis in Paraquariam immigrasse, jures. Quin plura & nocentiora, & molestiora hic invenias, quæ Ægyptiorum nemo usquam spectarit. Præ serpentibus, scorpiis, scolopendris, araneis hirsutis &c. muscas domesticas, hujatibus omnia similes, metuendas mihi, fugitandasque semper putavi. Cave, hyperbolen existimes. Ex animi mei sententia id prorsus affirmo. Muscarum ejusmodi agmina passim circumvolitant. Domi, foris-que famelicis his te bestiis obrui videbis. Centies repulsæ centies redeunt. Dormientibus per aures ad interiora capitis penetrant, lēdes mox excernunt innumeras, vermium innumerosam seminarium futuras. Hi utrinque acuti, rubeique, cæterum corpus candidi; In horas augescunt numero, & quid quid carnis, succique in capite, erodunt; Deliramentum denique ac mortem, ni medearis, certissimam sensim accersunt. Hispanum novi ludi publici magistrum, cui tota cum naribus consumpta facies, capitisque pars anterior cucurbitæ instar a vermibus excavata. Musca unica, quæ in dormientis nasum irrepsit, vermium erat origo, principiumque calamitatis. Neque rarum hoc, aut infrequens. Ver-


mes illita tigridis adipe e corpore expelli, illius medicaminis usum, sanationemque Indi Gregorii Piri-poti jam jam moribundi ex Capite quarto & vicesimo hujus historię jam intellexeris. Sed audi plura. In oppido Rosarii Abiponum aliquis vermibus miserandum in modum scatuit, qui tamen objectam sibi a me tigridis pinguedinem haud ferentes duplici, quam rodendo sibi aperuerant, via erupere omnes, simul æger a morbo recreatus vitam tigridis ferocissimæ adipi in acceptis referebat. Ejusdem beneficio a me curata est fœmina ab Hispanis bello capta, cujus caput glans plumbea raserat. Ad cruentam, laceramque non nihil cutem more suo advolarunt muscæ vermium genitrices, qui cuniculum ad capitis intima agentes ultimum miseræ discrimen minabantur. Adeps tigrina a me data voraces bestias suis e castris confestim ejecit. Eodem remedio, eadem felicitate alibi aliis auxiliati sumus. Medicamen hoc tanti momenti, tantique in tanto verminantium numero usus pharmaceutica in penu nunquam passus sum desiderari. Ad primum de occisa tigride rumorem accurri, eus adipem abstuli, & rite liquefactam in vasculo asservavi. Cruda equidem mox computresceret, tanto scilicet Cœli æstu. Quamvis vel recens tigridum pinguedo, uti & reliqua caro, odorem exhalat naribus gravissimum, ab Abiponibus tamen aquæ permixta, ceu vinum Creticum, bibitur certatim, avidissimeque appetitur. In nonnullis Quaraniarum Coloniis pomi Persicæ folia ad vermes, ex museis ortos, humanis ex artubus exterminandos adhibebantur. Fateor, istius remedii nullum unquam experimentum cepisse. Certo uti, quam minus mihi explorato, satius duxi, licet ab aliis dilaudato.

Hanc vermium periculosissimorum e muscis progeniem vix capiunt Boreali sub Cælo nati, vix credunt phyci. Americani illam quotidie oculis vident suis, atque adeo non sibi tantum, sed & bestiis exitialem suis sæpe plorant. Sub solis ortum bovem mactavimus, vel ovem. Ad recentem carnem muscarum examina vidimus convolare. Hanc albei quodam seminio undique conspersam mox deprehendimus. Sole occumbente putidam, vermibus fluctuantem, nulli porro usui futuram mirabamur. Qui illibatam carnem servare student, eam vel in tenuissima segmenta dissecant, aere siccandam, vel e fiscella, aut e reti suspendunt in umbra, ut aura quidem illam perficere possit, non tamen musca contingere. Equi dorsum seu ephippiorum duritie, seu diuturna sessione violatum est. Muscæ veluti ad epulas invitæ turmatim aderunt, innumerabilium mox vermium genitrices, qui equum dilaniant, paucosque intra dies conficere solent. Sanguis ex ulcere erumpens bestiam verminare significat. Medicaturi constrictis fune pedibus eam sternunt, virga terui vermes cum pure eruunt, ulceris cavernam tabacæ folio dentibus attrito, fimo bubulo recenti complent. Hæc industria diebus pluribus repetenda. Quod si lingere se se queat bestia, certior curatio est, promptiorque. Verum illa, quam dixi, medicandi ratio operosa cum sit, fastidiique, ac sæpe periculi plena, Indi, & qui Indis segniores, semihispani campum bestiarum cadaveribus stratum videre malunt, quam manus, pedesque defatigare suos. Pastorum, qui prædia curant, inertia multa quotannis equorum, boum, vitulorum, ovium, mulorumque millia per Paraquariam intereunt propterea. Vituli equidem, dum in lucem recens prodire, inspicendi essent quotidie, & a vermibus, quibus ple-

rique laborant, purgandi. Humidos enim eorum umbilicos confestim muscæ obsident, &, ut dixi, miserrime inficiunt. Quamobrem e decem vitulorum, qui per annum tuo nati in prædio, millibus si quater mille superstites numeraveris, habes profecto, quod tibi gratuleris magnopere, amplissimasque gratias tuis referas pastoribus, qui lupi rectius, quam pecorum custodes dicendi, qui, præterquam quod vitulos pinguiore elanculum devorent ipsi, alios innumerabiles socordia sua a tigridibus, feris canibus, vermibusque devorari sinunt. Certissimum id esse, quotquot rem familiarem in Paraquaria procurant, nequidquam lamentantur, quin tamen seu preces, seu minæ, exacuendæ illorum diligentia, ac fidelitati unquam suffecissent.

Nec silentio prætereundum aliud adversus vermes medicinae genus. Noster Martinus Szentivani in suo de rebus alodialibus opusculo oleum olivarum aquæ immiscendum, svadet, quam si potaverint lumbricis laborantes boves, eos confestim cum fimo excernent. Hæc legeram olim, & consilii memor in America oleo ad expellendos vermes e muscis oriundos prosperrime sum usus. Molossus mihi erat ingens, Anglicanae originis, coloris spadicei, buccæ nigricantis, forma, robore, agilitate, audacia conspicuus, meus domi, forisque custos, ac fidus excubitor, sed æquo rixosior. Inter Indorum canes, ut gigas inter pigmæos, eminebat. Hinc quotidianæ illi pugnae, certæque victoriæ. Numero tamen accurrentium Vertagorum oppressus, ac sauciatus est, semper alias victor. Muscarum accessu vermibus infectum vulnus adeo, ut, cum manibus tangi, curæque se neutiquam pateretur, de illius sanatione, ac vita nihil prope spei superesset. Adipis tigrinæ
vir-

virtus me latebat id temporis. Vix aliquot olei guttulis vulnere inspersis me spectante tota vermium latentium caterva emigravit; singulorum, ut primum prominebant e vulnere, Capita circino apprehensa eji. Interrupto vermium erumpentium ordine iterum iterumque oleum instillavi, dum denique nullus jam in vulnere caverna esset super. Hoc astu, quem Szentivaius me docuit, intra biduum convaluit optimus, quia, perinde ut miles, in hostes pessimus canis, cui Soldado nomen fuerat, cujus etiamnum mihi huiusmodi recordatio, quippe in tot itineribus periculosis optime de me meriti per annos complures. Multa, Iusti ipsius exemplo, in laudem illius possem adferre, Europæorum admiratione profecto dignissima; Verum satis, superque de hoc, cum de insectis, non de canibus jam scribere mihi sit propositum. Idem oleum ex olivis expressum nonnihil calefactum, quin potius tepidum auribus infunditur, ad culicem, pulicem, vel muscam, si quando irrepserint, inde exterminandam. Audi, & ride mecum terrorem, si quis unquam fuit, Panicum, qui mentem olim meam percussit, ac incredibiliter perturbavit. Sub auroram, dum me Vestivi, muscæ sibilum continuum perceperam adeo mihi propinquum, ut musca aurem, caputve meum penetrasse videretur. Ingentem mihi sollicitudinem hæc iniecit suspicio. Ad muscam expellendam nequidquam tentata omnia, perdurante semper ferali ejus cantu. Oleum denique in concha calefactum a puero auri meæ instillatum, quod cum nimio opere caleret, dolorem attulit acerrimum. At multo acrius mihi dolebat muscæ sibilos nihil dum remississe. Consternatus animo, vermesque in capite nascituros veritus nullam cepi, quietis partem. Agedum, aiebam puero, caput, auresque tuas propius mihi admove, & be-



stia infelicis susurros cominus ausculta diligenter. Aures. animumque tantisper attendit puer, & : salva res est, mi Pater, subridens dixit, non aurem tuam, quin togam potius musca infidet. Solutis actutum fibulis togam circa collum diduxi, indusii rugis compressa musca, atque idcirco ejulans, læta avolavit. Verba, quibus gestientis animi mei lætitiā de discusso periculo explicem, me deficient etiamnum. Accepti tamen terroris oblivisci diu hand poteram, pertinax enim ex calente oleo auris dolor muscæ captivæ memoriam identidem refricabat, identidem ad risum me concitabat. Ita periculorum opinio quam pericula, sæpius animos perturbat. Juvat hoc loco aliud remedium, minime spernendum, subungere. Si quando senseris insectum aliquod in aurem se se insinuassee tuam, in illam ab alio aquam frigidam cum impetu expui, facias. Humore enim oppressa animalcula vel exhibunt, vel peribunt illico. Et mihi & aliis id usus fuisse, commemini.

In quibusdam Paraquariæ locis, in Tarumentis cumprimis territorio alia muscarum species grassatur. Figura, & mole corporis a muscis nostris vulgaribus vix differunt, præterquam quod albo sint colore, aculeoque valeant formidabili, quem ut primum vel homini, vel bestię infixerint, uno ictu sanguineam eliciunt copiosum. In ædibus vix memini me eas vidisse; Vias potissimum insident, ubi equo iter facientibus molestias vix tolerabiles faceffunt. Tabanorum per campos sylvæ adjacentes maxima varietas est, & frequentia. Solas tamen bestias acumine compungunt suo, humani sanguinis contemptores. Nil miror finxisse poetas, Jo puellam tabano a Junone immisso in furorem incidisse. Equos certe, mulosque semper alias morigeros, dum a tabanis hiru-

hirudinum instar sibi inhærentibus torquentur, & sui
 impotes, & sessoris immemores in rabiem efferari,
 toties vidimus. Majus tamen per sylvas a vespis
 quibusdam majusculis periculum, quorum acumen
 ut perentiscunt equi, furunt doloris impatientia.
 Tortore crudeli ut se liberent, excussis habenis
 sessorē excutiunt sæpe, sæpe, qua qua possunt,
 abripiunt, humi se volutant. Hinc contractæ mul-
 torum tibiz, allisa arboribus, vel saxis capita, fusus
 per viam cruor. Mihi quoque eadem de causa,
 maniveto licet cætera mulo insiderem, pereundum
 fuerat, ni Indus pernici equo advolans opem tu-
 lisset, qui me mulo furioso, mulum vespa pertina-
 ci liberavit. Ipsos quoque homines insectantur
 vespæ. Fixo aculeo dolor vehemens, tumorque la-
 tissimus succedit. Parti læsæ glebam obvii cespitis
 recentem pro remedio applicant plerique. Mihi nun-
 quam profuit. Maxillam testor meam. Me absen-
 te in domus nostræ aream vespæ convolarunt innu-
 merabiles, & in modum pilæ grandioris conglobatæ
 stipiti inhæserant. Ne a transeuntibus territæ spar-
 gerentur, & in nostra se cubicula insinuarent, Ve-
 ritus, sclopum nitrato pulvere liberaliter fartum in
 vesparum globum exoneravi. Repentino tonitru
 percussæ diffugerunt omnes unica, quæ cæterarum
 nomine audaciam ulcisceretur meam, ad vultum
 meum advolante; Hic bestię spiculo confixus hor-
 rendum in modum intumuit. Tumori par dolor
 successit, noxque ob doloris vehementiam omnino
 infomnis. Conquerentem me postridie, & reme-
 dia, quibus usus sum, enumerantem placidissime ri-
 sit Abipon vetulus. Eccur, ajebat, Pater, adipe
 bubula tumorem non perungis tuum? vetus id no-
 bis, certumque est medicamentum. Morem gessi.
 Nec mora: Tumorque, dolorque eodem die eva-

nuerunt. Adverte, adipis bubulæ nomine non se-
vum, sed quæ butyri liquati loco cibis adhibetur in
Paraquaria, bouum pinguedinem intelligi. Quam sit
res plena periculi, crabrones irritare, sæpe alias in
itineribus experti sumus. Illorum nidum sub fron-
dibus latentem Indi, qui in sylva me præcedebant
peditem pedites, forte disturbaverant inviti, nec
impune. Non pauci a crabronibus dispersis icti sunt.
Plurimi crabronum sub meam se togam toto impe-
tu recipere, cutem, quanta est, omnem spiculis
exaraturi suis, ni vestitum interiorem Indorum ocu-
lis lustrandum, manibusque excutiendum tradidissem.
Taceo apum bellicosarum species, quæ dum alvea-
ria oppugnari sua, spoliarique vident, mel, ceram-
que auferentibus, quid quid domi acuminum est,
strenue opponunt, ac multo labore parta acerrime
tuentur. Ut adeo nemini invidenda mellis dulcedo,
quæ vulneribus emenda.

Culices Hispani mosquitos, Quaranii Natiù,
Abipones ayte, vel apataye vocant. Utroque voca-
bulo culicum frequentiam denotant. Vox ayte equi-
dem multos significat, ut alias dixi. Apataye à La-
parà derivatur, quod stoream, quæ pro tecto adhi-
betur, significat. Sane Culicibus, qui Paraquariam
vexant, dinumerandis ut nulla par arithmetica, sic
tolerandis quantacunque patientia impar esse videtur.
Quocunque te vertas, auditum clangore suo, acu-
leis corpus excruciantur tuum. Te totum circumfi-
debunt undique. Sanguinis cujuscunque sitientissimi
hi satellites te usque comitantur. Illis territandis
mille tibi brachia peroptabis. Aura rigente suis in
latebris fere conquiescunt. Coelo æstuante, aere tran-
quillo pabulatum evolant, nunquam, quam crepuscu-
lis, diluculisque propinquantibus, ferociore. Ubi
gra-

gramen adultius, ubi dumeta, stagnorum, amnium-
 ve ripæ, ubi paludes viciniore, ubi sylvæ, quæ
 aerem excludant, densiores, ibi serpentum, ibi culi-
 cum omnis generis colluviem patieris. Tali in sta-
 tione si pernoctandum tibi, de somno ne somniave-
 ris quidem. Postquam seu equitando per campos,
 seu ambulando per sylvas equis invias die integerri-
 mo pedes fatigaveras, noctu culicibus arcendis utram-
 que manum incassum fatigabis. Semper insomnis
 heu quoties solem, quod lento redeat pede, accu-
 savi! Equos itineris labore fractos, esurientesque
 una miserabar, qui culicum mordacium nube stipa-
 ti cum nec quiescere, nec gramen carpere queant,
 focum circumstunt, fumum captaturi. Hic acrior
 si fuerit, fugat quidem circumvolantes illos tubici-
 nes, sed tibi quoque prope humi cubanti lachry-
 mas ciebit, ac sudorem, maxime Cælo æstuoso.
 Finum bubulum fumantem culices non ferunt. Ast
 ne tu quidem feres, nî nares tibi stupidæ, & sine
 sensu. Verum demus tantam tibi adesse fœtoris to-
 lerantiam, finus bubulus per sylvas tibi deerit, ubi
 boum nec umbra. Qui per illas solitudines iter diu-
 turnum suscipiunt, annona, sæpe lignis ad focum
 excitandum necessariis, sæpe aqua, adeo onerantur,
 ut fimi bubuli, qui adversus culices sit remedium,
 sarcinas recusent. Æthiopis cujusdam mihi mire
 placuit seu industria, seu sagacitas. Is materiam
 aliquam resinofam ex ligno putrido acceptam, noctu
 semper gliscentem, ac lenissime citra narium mole-
 stiam fumantem dormiens a latere habuit in itinere,
 & quod ipse observavi, a Culicibus propterea in-
 tactus quievit. Nomen illius materiz mihi neutiquam
 invito dudum memoria excidit; operose enim per
 sylvas quærenda est, inventu difficilis, passim ignota,
 omnibus tamen peroptanda. Incredibilis equidem

in longo itinere culicum cruciatus. Dilaniati, vultum, manusque tumidi, fuso undique notati sanguine domum semper redivimus, nostrique adeo dissimiles alter alterum ut vix nosset. Certum tamen mihi, & exploratissimum, alios præ aliis pertinacius a culicibus affligi. Num sanguini dulciori, an acidiori plus inhient, quis indagavit? Vultui candido, quam fusco avidius, copiosiusque insidiari, ac insidere culices, observavi identidem. Ni tuis quoque in ædibus noctes agere insomnes velis, sole in occasum vergente cubiculi portam, fenestramve patere ne patiaris, maxime dum candellam accenderis. Ad lucem enim, quacunque rima patente, advolant gregatim. Culices alii ab Abiponibus Ychit, ab Hispanis Jejennes dicti, fors nomine a Gehenna derivato, veluti e Styge oriundi prioribus multo graciliores sunt, sed insolentiores. Quamvis enim molesto vocis clangore careant, per os, per aures, per nares turmatim irrepunt, acerrimeque, quam insederint corporis partem, compungunt.

Maximi apud Paraquayos nominis culex minimi est corporis. Mbarigué a Quaraniis vocatur. Ob exilitatem suam perspicacissimi oculi aciem fugit; Morfu tamen valet acerbissimo, prope sum, ut dicam, intolerabili. Ignita acu te pungi crederes. Per sylvas spissiores, & in rivorum litoribus grassantur frequentius, aere quieto, & sub vespere maxime formidandi. Aculeus illis mucronis instar, quo non nuda solum, sed & indumento tenui contexta corpora pertundunt. Sylvis diutius immorati tot punctulis rubicundi ad oppidum pervenimus, ut variolis laborasse videremur. Etsi ex tot aculeis ardeat entis, pruriat, ac intumescat, nequaquam frigida citra noxam conspergi potest, aut unguibus fricari. Verum contemneremus hæc quantacunque, ni cum periculo con-

conjungerentur. Ex repetitis enim culicis mbarigues
 ietibus vermes majusculi enascuntur persæpe, qui num
 suam originem pestilenti aculeo, num humori vene-
 nato, an, nescio, cui seminio relicto debeant, an ip-
 se culex, carne penetrata in vermem convertatur, ut
 Indi putant, non ausim decernere. Vermes uno in
 loco nunquam plures uno generari, id novi. Illius
 experimentum audi. Canem, meum in itinere co-
 mitem, custodemque, ejulare identidem, se se Scalpe-
 re, ac mire affligi adverteram. Consulti Indi socii
 vermibus illum icatere, respondent. Præsente me, &
 inspectante canem faucibus, pedibusque loro colliga-
 tis humi sternunt. Utraque manu, ubi tumor pro-
 minuit, carnem fortissime comprimunt, vermemque
 ibi latitantem magno impetu exilientem, ejiciunt.
 Decem & septem totidem e locis prodire albi colo-
 ris vermes, semine pomi crassiores, pollicis virilis
 unguem longi. Mihi rem ad id temporis incognitam
 oblituescenti; Sibi idem non raro evenire, Indi om-
 nes uno ore testantur. Quæ quidem res ejusmodi
 insectorum, præsertim curationis, metum non medi-
 ocrem mihi injecit. Et vero minutissimos vermicu-
 los, muscas, quas oculatissimus ægre videat, prorsus
 exiles pluribus exitiales fuisse, omnis novit Paragua-
 ria. Pater Felix Villagarzia, quem & novi in sanctæ
 Rosæ oppido, & pro merito colui, dum Ytatynguas
 Indos, sancti Joachimi Colonix subinde incolas, per
 Tarumenfia nemora diu, multumque conquereret,
 oculo laborare cepit, & ob fistulam, vermesque in-
 ibi identidem enascentes annis pluribus ad obitum
 usque dirissime excruciatu est; Cœli ardentissimi per
 saltus vento impervios æstum, varii generis culices
 tantorum dolorum originem existisse, nemo igno-
 ravit. Sed jam paulo majora canamus.

CAPUT XXXIV.

Ejusdem argumenti de infectis continuatio.

Vtraque America, qua æstuoso Cœlo torretur magis, vermiculum gignit, naturæ monstrum, multorum quotidie gemituum, non paucarum mortium occasi nculam. Pulicis, qui quidem cogitari possit, tenuissimi speciem refert, eumque subsiliendo imitatur; Hinc a Quaraniis Tû, vel Tûngay pulex malus dicitur. Ab Hispanis Pique, a Lusitanis bicho dos pes infectum pedum, a Mexicanis Nigua, ab Abiponibus Aagrani mordax vocatur. Tam exilis est, ut vel ab oculatissimo, nisi clarissima luce, percipi haud possit; Tam mordax, ut a quovis, ni saxeus, ni ferreus sit, debeat sentiri. Tam aculeato rostro armatus, ut calceos, ocreas, cothurnos, quaslibet vestes pertundat. Extimæ cuti inhæret tantisper, mordacissimo mox cum pruritu ipsam carnem penetrat; Illic veluti sub cuniculo latens sphærica, albescenteque vesicula se circummunit, quam ovulis, seu minutissimis lendibus implet. Hæc vesicula si plures dies sub carne toleratur, ad magnitudinem pisi nostri Grandescit. Vulgare hoc spectaculum. Quo diutius hæc vermiculi vesica humano corpori inhæserit, eo magis indies doloris sensus obtunditur, ac hebetatur. Ad hunc hostem sua e statione exturbandum pueri sane aptissimi. Hi enim eximia, qua pollent, oculorum acie punctulum rubens, vermiculi carnem ingressi, velli-

vestigium deprehendunt illico. Illius punctuli ambitum, seu peripheriam acicula fodicant, cutem, carnemque sensim aperiunt, & vesicam illam cum vermiculo suas intra lendes sepulto integram denique exsculpunt. Si hæc candelæ ardenti admoveatur, nitrati pulveris instar cum crepitu dissilit. Quod si puer acu carnem fodiens vesicam carni adhuc inhaerentem dirumpat, res malo sunt loco; Humor enim inde effusus, novi doloris, lendes dissipatæ novorum eodem in loco vermiculorum erunt origo. Americanum hunc pulicem venenata turgere materia, ex eo fit palam, quod ipsa caverna, e qua fuerat expunctus suis cum posteris, inflammari, tumescere, ac, ni prompte medearis, gangræna corripì soleat non raro. Ungues in pedum digitis, quos invadunt maxime, tabescunt, ac decidunt semper; Quin & ipsos pedum digitos ad vitam servandam rescicare oportuit quandoque. Tanta tantillæ bestię pestis! Minimis scilicet ex rebus maxima sæpe incommoda nascuntur, sæpe commoda.

Alienis docti periculis qui sibi cautum volunt, ædium suarum munditiæ impense student. Dicti enim vermiculi e pulveribus, e facibus, e qualicunque lotio ortum ducunt ardentiorè sub Cælo, & locis, quæ raro verruntur, quæ excluso etiam frigidiori aere dudum non habitata, accedente humore innasci consueverunt. Septa, in quibus oves, muli, equi interdum custodiantur, etsi sub dio sint, & absque tecto, hac scatent colluvie, atque adeo ingredientium custodum pedibus metuenda. In illis Paraquariæ tractibus, qui Austro imminent magis, auraque gaudent non calidissima, infaustum hoc insecti genus omnino nescitur. Nunquam illud seu in territoriis Boni aeris, seu Cordubæ Tucumanorum visum. Exa-

Et jam in Paraquaria Sexennio id de nomine duntaxat noveram. Delatus ad S. Ferdinandi recentem Coloniam & videre, & pati, & execrari hanc pestem cæpi. Abipones ipsi, quamdiu per Chacum sparsi pro arbitrio vagabantur, hos vermiculos ignorarunt, sed denique per Hispanos urbis Correntinæ, quam istorum pulicum metropolim jure dixeris, dictæ Coloniz conditores misere iis infecti sunt, allatamque sibi, ut olim variolas, calamitatem tantam lamentati. Qui in loco his infectis obnoxio versantur, quovis minimum biduo pedes puero cuiquam inspiciendos porrigant. Sæpe hi pulices cuti necdum perterebratæ insidentes citra molestiam intercipiuntur. Si recens carnem ingressi videantur, non illico acu expungendi; Timendum equidem, ne tenue pulicis corpusculum acu rumpatur, ejusque caput carni validissime infixum carni inhæreat, quod dolores incredibiles, pus, & ulcus certissimum adferet. Rerum peritiores diem integrum expectant, dum vermiculus vesica sua clausus tuto, totusque erui subinde queat. Id quod a meridie melius præstatur; Horis enim matutinis cum aura sit asperior, humidiorque, caro, quæ acu aperienda est, plus illa offenditur, dolor, & ulceris periculum semper augecit. Quotidiana pedum inspectio commodi habet plurimum, etsi & molestiæ non nihil, quam tamen insigniter cumulabis, si hanc tui curam in longius tempus rejeceris. Una sæpe sessione decem, viginti, plures ejusmodi vermiculos acerbissimo cum dolore idem tibi puer acu expunget; Digitis plerisque & unguibus perforatis, plantis laceris ægre gressum figes, pedibus pure manantibus tui neglectum, inspectionis dilationem tute accusabis, diuque lues. Novi complures multis hebdomadibus idcirco lecto affixos. Et me, & alios non nisi baculo innixos ambulare potuisse diebus plurimis,

rimis, eheu meministi! Vidi pedum usu omnino destitutos omni prorsus remedio caruisse.

Haud inficior: hos vermiculos pedibus potissimum insidiari. Sæpe alias tamen per cæterum corpus majori cum periculo serpunt, jam in brachio, jam in genibus, & ubi non? Nidum sibi parant. Plura tibi in aurem dicerem, quæ scribere, erubesco. Canibus, cum humi cubent semper, plus negotii faciunt hæc insecta. Dentibus suis pro acicula usi illæ dexterrime eruunt, vulnusque lingendo persanant. Aliquando tamen exesis pedibus & exulceratis claudicant diu. Sues, simii domestici, feles, capræ, ovesque ab iisdem pulcibus insolenter vexantur, haud tamen equi, muli, asini, boves, qui seu ungularum, seu pellis duritiæ adversus communem hostem se se defendunt. Illud Americanis curandum maximo opere, ut cavernam, quam pulicis excerpti Vesicula occupaverat, vel pulveribus Tabacæ Hispanensis, vel cinere, vel smigmate oppleant diligenter. Alii aut oleo ex olivis expresso, aut ex boum pedibus excocto, alii aliis reculis eum in finem utuntur. Periculosum est ejusmodi industrias negligere. Vulnus enim acutum, & infectum, quod expunctum fuit, veneno infectum exulcerabitur, pus concipiet, & si inflammatio, vel nimius pedum motus accesserit, in gangrænam denique, vel ignem S. Antonii definit. Adeps Gallinæ parti lætæ illita, alligatumque brassicæ folium ad ardorem temperandum, me teste, sæpius profuit. Experientia certum est, alios præ aliis frequentius ab hoc insecto vexari, difficiliusque quocunque demum remedio constanari; In vario sanguinis, humorumque temperamento discriminis hujus ratio fundatur. Scribum, Brasilienses ad vermiculos hos a se avertendos pedibus suis illinere oleum ex glan-

glandibus necdum maturis, quæ in arbore Acaju nascuntur, expressum. Nautæ nautica pice se ungunt eundem in finem. Nos hujus, aliorumque insectorum metu tibialibus ex ovilla pelle confutis utebamur omnes; Sed vana, imbecillaque hæc esse arma, experti sumus.

Pulices Europæ vulgares, ætheris instar per cæteros orbis tractus diffusi, in Paraquaria non adolefcunt tantum, sed velut nativo in solo impotentissime dominantur. Cum a canibus copiosissimi soleant procreari, Neteguink Loapakatè pediculi canis ab Abiponibus dicuntur. Illud singulare, quod alicubi ipse campus herbis undique vestitus affluat pulicibus. Per Paraquayum flumen navigantes si quando in litus meridiaturi, pernoctaturive excendant, quamvis in nitido cubent cespite, ubi nullum aut hominis, aut canis vestigium usquam fuit, pulicibus nigrescentes singuli ad navim redeunt aliquando. Idem a me in campis ad amnem Inespin, alibique observatum. Si hæc in viridi campo, in aridis cubiculorum pavimenti nec latere, nec lapide, nec tabula stratis quid expectabimus? Ejusmodi in cubiculis apud Abipones septem egi annos, ubi cum infinita pulicum colluvie diu, noctuque mihi consistendum fuit. Remedium adversus pulices ex America petis? Unicum, quod ubique gentium, suppetit, Patienria. Columella, Athanasius Kircherus, alique opinabantur equidem, herbis odoriferis quibuscunque cum aqua coctis, ac per solum effusis hos vermiculos non fugari modo, sed & enecari. Quaraniæ certe hunc in finem herbam, quam Caarè vocant, vehementissimi odoris, in aqua coquunt, eaque fervente rigatum cubiculum semel, ac iterum verrunt. Quod si hac industria pulices intereant, illorum stragem non herbarum odori violento, sed

sed aquæ ferventi, qua aduruntur, scopis, quibus exturbantur, tribuendam existimaverim. Sint ædes pulveribus, canibusque vacuæ, sint ventis crebris perviæ, in hoc adversus minutiora insecta plurimum est præsidii. Albis illis, queis a pedibus nomen, vermiculis extra capillos vix apud Abipones est locus. Indæ mulieres, dum per suorum eapita pediculos Venantur, quotquot capiunt, glutunt; Si pinguiorem ceperint, assidenti sibi fœminæ vorandum muneris instar propinant perinde, ut nos tabacæ pulverem alter alteri. Hunc Barbararum morem barbarum dicerem, nisi & ab Hispanis matronis plebejis idem factitari in Paraquaria, ipsius spectassem toties. Næ! Europæorum nemo Americanis has invidet cupedias!

Cimicum, quales in Europa, abunde est in Hispanorum coloniis; Per Indorum oppida nullum contpexi unquam. Ab Abiponibus Pata dicuntur. Cor dubæ, alibique per Tucumaniam cimices volantes, quos Binchuccas vocant, passim oberrant. Interdiu sub tectorum, arcarumque rimis quieti delitescunt, noctu Cælo fudo, ac tranquillo turmatim advolant bellum cruentum moturi dormientibus, e quibus tantum sanguinis exugunt, ut nemini dormire, ejulare omnibus libeat. Parti, cui insident, ardorem imprimunt intolerabilem, & cremare potius corpus, quam mordere videntur. Maculas purpureas, tolerati doloris indices, instrumento caustico inductas jurares. Quindecim dierum equestri, & per continuatam solitudinem, quotidianosque inter imbres arduo itinere fractus in S. Jacobi territorio oppidum salabina attingi; Enimvero quiescendi ea nocte non desiderium modo, sed & necessitas me tenebat. Verum extreme dormituri mihi nox illa omnis insomnis abiit. Artus omnes compungi, cruciari, ardereque senseram,

doloris tamen insoliti causam nec cogitando, nec palpando assequebar. Nemo unus, quem consulerem, in propinquo fuit. Orto demum die quotquot rubris pictum me maculis videre, vices miserati meas volantes cimices tortores fuisse meos, mihi significant. Alio in itinere dum apud Presbyterum nobilem pernoctarem, sumpta levi cænula ille mecum, suisque cum domesticis vicinum in campum dormiturus concessit. Id in illo terræ tractu more receptum, necessariumque. Negant enim æstuosis noctibus sub tecto cimicibus scatente somnum capi posse. Felices Abipones, Quaraniique, qui volucres has hirudines ignorant. Mihi equidem istic nulla earum visa. Melopepones, nisi, ut primum maturuerint, decerpantur, cimicum fetidissimorum seminarium evadunt illico, qui omnem late hortum depascuntur.

Perniciosa inter insecta haud infimum locum meretur bestiola, quæ ab Hispanis Garrapata, a Quaraniis Yatebû, ab Abiponibus òerel appellatur, & indubie ad ricini speciem aliqua ratione pertinet, qui a græcis *αγοτον*, a Gallis Morpion, a Germanis Zek dici solet. Garrapata Paraquariensis lentem magnitudine æquat, interdum superat; Forma testudinem terrestrem refert; In tergo clypeum gerit testudinum more, sed figura ad sphaericam propius accedit. Coloris est fulvi obscurioris, & in parte varii; Corpus illius compressum, octonis pedibus breviculis, capite quadrato prominente, ceu rostro instruitur. Hoc cuti, carni-que humanæ immergit simul, simul pedum uncinos affigit mordicus, & dum ex quacunque corporis regione sanguinem rostro sorbet, pruriginem ciet, ardoremque permolestum, quem tumor sequitur, ac sanies quatridduum sæpe, sæpe diutius manatura. Ulcus vero vix duas intra hebdomades perlanabitur. Cum

caput suum in carne altissime defigat, arduum est bestiolam integram avellere. Quod si caput a corpore avulsum in carne remanserit, pessimo loco res erunt tuæ; Non nisi post diutinam puris ex pruriente ulcere fluxionem virus illud tandem ejicies. Campi, & præ campis sylvæ ab hoc & homini, & bestiis infesto insecto infidentur. Ubi putrida arborum, & cumprimis arundinum folia, ibi seminaria hujus bestiolæ, ibi colluviem deprehendes. Totum, ut primum humi recubueris, obsideri corpus, totum prurire senties. Quo plus illud manu scalpseris, eo certius ulcera augebis, doloremque. Una nocte sexaginta aliquot tum recentia, tum inveterata toto in corpore me numerasse, memini. Dum Barbarorum contubernia detegendi studio iter per sylvas in tertiam hebdomadem a nobis productum sæpius, non tigrides, non serpentes, non fauni (seu, ut ab Hispanis vocantur diablos del monte, & a Quaraniis Caruguà) nobis curæ erant, noxiæ bestiolæ, quæ tum volando, tum rependo insidiantur obviis, sollicitudines nostras quotidie exacuerunt. Conquerebamus identidem nobis non satis oculorum esse ad insecta decimanda, neque satis digitorum ad eadem propulsanda. Noctes abstergendo sudori, reficiendo corpori post diurnam defatigationem necessariæ evellendis, quæ interdiu collegimus, Garrapatis, novisque repellendis vix suffecere. Hispani dum herbæ Paraquariensi parandæ in sylvis dant operam, ramorum ex arbore Caa fatcibus onusti, & Garrapatis referti ad suum quotidie redeunt tugurium. Deposito ramorum onere una omnes ad propinquum lacum, vel amnem abluturi se se feflinant. Mox, ut quisque nudus, alter alteri se inspiciendum offert, alter ex altero inhærentes cuti Garrapatas excerpit. Ni quotidiana hac sui cura uterentur, sanie, ulceribusque paucos intra dies perirent.

Cervi, damæ, simii, urfi formicarii, canes, & quidquid demum ferarum seu campus, seu sylva educat, ut pilis, sic Garraptis horrent semper. Allata mihi ab Indo paucorum dierum damula, hanc cum admoto capite incautius contrectarem, Garrapata ex illa ad me transfiliens recta in aurem irrepsit meam, cui rostro & cruribus tenaciter adeo affixa hæserat, ut non nisi filo ferreo unci in formam inflexo potuerit avelli. Ad avertendum hoc insecti genus vel ad curandos illius morsus haud scio equidem Americanis remedium suppetere. Ungues a scabendo vulnere abstinere, id enimvero tutissimum. Varro de re rustica L. 2. cap. 9. contra ricinos adfert remedium. *Quidam nucibus Græcis (amygdala intelligit) in aqua vitæ perungunt aurium, quod ricini soleant (si hoc unguine non sis usus) eas exulcerare.* Garrapatae minores majoribus multo intolerabiliores.

Formicarum tum repentium, tum volucrum ut plurimæ sunt species, sic incredibilis per Paraquariam omnem multitudo. Strictim memorabo præcipua, mihiq; magis comperta. Formicæ ab Abiponibus Ohega, a Quaraniis tahi nuncupantur, quamvis earum species singulas singulari quoque vocabulo distinguant. Formiculæ omnium minutissimæ, rubri coloris omnium sunt pessimæ, mordacissimæque. Ut magnes ferrum, sic illæ saccharum, mel, & quidquid dulce, appetunt, diripiuntque. Rerum ejusmodi penum adversus istas tueri ut queas, astu opus est, ac sæpe ingenio. Ex dulcium esu bilem augment suam, & veneno exquisito pollent. Cuti, ut primum insident, ictu acerbissimo pustulam imprimunt in plures dies cum dolore duraturam. Ex cucurbita, quæ herbæ Paraquariensis cum saccharo mixtæ poculum mihi erat quotidie, frigidam imprudens hau-

hausi, & cum illa formiculas innumeras cucurbitæ fundo inhærentes. Superi boni! quanto cruciatus haustus, quanto periculo mihi stetit! Tot periculis terra, marique defunctus nunquam morti me videram propiorem. Guttur totum tumefactis tonsillis subito exulceratum, inflammatum, tantisque constrictum angustis, micam, guttulamve transmittere per biduum ægerime ut possem. Adhæc reciprocandi spiritus difficultas maxima, nulla fandi, nulla somni copia fuit. Ipso assumptæ in Cælum Deiparæ festo ab altari mihi abstinendum. Plurima nequidquam tentavi, dum denique aqua cum hordeo cocta, melli sylvestri, acetoque admixta fauces identidem perluissem, collumque adipe Gallinacea unxissem aliquoties, gutturis tumor, ardorque evanuit, unaque, in quo versabar, periculum minime imaginarium. Ex iis vero, quas omnino deglutiveram, formiculis tanta pulmonum titillatio, tussisque exorta est, ut asthmaticorum instar nil prorsus somni, nisi sedens, caperem. Noctes sæpe integras tussiendo contrivi. Sulphur carbonibus candentibus injectum, haustusque ore sulphuris vapor unicum mihi levamen fuit; Ope hujus phlegmate ejecto tussis aliquamdiu sedabatur. Exeunte demum Septembri iter equo ingressus, postquam sub dio pernoctavi aliquoties, auræ liberioris beneficio convalui, & nocturna illa tussitatio penitus conquievit. Ut formicularum rubentium virus discas, ut ex poculo non prius inspecto bibere quidquam, caveas, hæc mea fata tibi significanda putavi.

Minimis his formicas, quas quidem videre mihi licuit, maximas subjungo. A Quaraniis Jzau vocantur, non humanis corporibus, sed ædificiis, quæ subruunt, formidandæ. Sub templis, sub domibus



quibusvis immuni labore cuniculos agunt; Per sinus
 osos mæandros terram altissime cavant, glebamque
 effossam, ut corpore, viribusque valent, foras eve-
 hunt. Alis subinde succrescentibus, quoties nimbos
 densiores præsentunt, quaquaversus turmatim avo-
 lant, sed eadem, qua Icarus olim, infelicitate, hoc
 tamen discrimine, quod hic in mare, illæ madefactis
 pluvia alis in terram decidunt, pereantque. Tollun-
 tur in altum, ut lapsu ruant graviore. Illa porro
 terræ spiramina, per quæ commeare prius formicæ
 consueverant, præcipientem ex imbre aquam admittunt;
 Hac formicarum specus inundantur, terra ædibus
 substans exeditur, pilæ lignæ, queis murus, tectum,
 trabesque sustentantur, labant primum, & nisi eas
 ædutum fulcias, cum domo procumbunt denique.
 Non rarum hoc Paraquariensibus spectaculum. To-
 tus collis, cui S. Joachimi oppidum incubuit, for-
 micarum seminariis, tumulisque horrebat, & sub-
 terraneis cuniculis undique suffodiebatur. Domus
 nostra, templumque illi adjacens multum molestiæ,
 tantundem periculi habuit propterea. Altare prin-
 ceptis in plures sæpe dies nulli ad sacrificandum erat
 usui; Cælo enim pluvio latentes formicæ ex antris
 suis longo agmine advolabant, & cum volatum
 diuturnum non ferant, in sacerdotem, aram, sacram
 supellectilem decidere, conspurcaruntque omnia. Ob-
 structis diligenter, per quas especubus suis eruperant,
 decem portis, postridie viginti alias sibi aperuere.
 Vespere quodam sævissima tempestas oborta. Hor-
 rendis ignibus micabat Cælum, tonitribusque re-
 mugiit. Nimbus strepitans auxit terrorem, domus-
 que nostræ aream declivem in lacum videbatur con-
 vertisse, cum ipse murus aquarum cursui obstaret.
 Socius meus in meum se recepit cubiculum. Adest
 interea Indus ædituus. Solum in templo dehiscere,

parietem findi, inclinarique, trepide nunciat. Arrepta lampade accurro. Vix extra cubiculi limen egressus terræ hiatum, conspikor. Nil tamen periculi mihi suspicans in ipso aræ principis loco terra ad magnam altitudinem desidente humerotenus demergor subito, sed eadem celeritate, cum ædituus manum mihi porrexerit, ex illa voragine eluctor. Sub ara enim maxima metropolim condidisse suam formicæ videbantur. Caverna illa multos cubitos alta longe, lateque excurrit, ut cellæ vinariæ speciem referret. Toties multo Indorum labore congesta terra ad illam implendam, toties a formicis denuo effossa est. In illa omnium trepidatione Indi, quotquot poterant, accersiti, qui dehiscentem templi parietem tignis, Trabibus, tubicinibusque suffulcirent. Et vero, ut sunt Quaranii egregia in Deum pietate, ac insigni in Patres suos observantia, strenuam per multas horas navarunt templo operam, hinc sudore, illinc imbre continuo perfusi. Verum pro discriminis magnitudine in quantiscunque industriis acquiesci prudenter haud potuit. Hinc eadem nocte, focii admonitu, meo me e cubiculo migrare oportebat, quod iisdem trabibus, ac tignis ita cum templo erat conjunctum, ut hoc ruente illius ruina vitari neutiquam posset. In insulis Quayanæ provinciæ finitimis rupes, montesque a formicis exesos, muros passim subrutos, incolas suis ex ædibus ejectos, legi. Facile inducor, ut hæc credam, similia his, quin & incredibilia expertus.

Quantum formicæ possint, in Paraquaria planissime didici. Imbecilles, & si cum plerisque aliis insectis conferas, exiles sunt singulæ; Verum numero, labore, ac concordia formidabiles evaserunt, seque ipsis fortiores. Minima quamvis, si multiplica-

ta, nunquam spernenda. Ipse Oceanus e Guttulis coalescens en quam minax, quam truculentus est! vidimus per campos, maxime, quos Parana flumen aluit, formicarum tumulos pyramidi Saxæ simillimos, ternas, pluresve ulnas altos, basi latissima, materia, quæ durite lapidem æquat, persolida; Hi domus annonariæ, hi formicarum turres sunt, e quarum culmine subitas eluviones despiciunt, ac fluitantia segnium bestiarum cadavera tutæ speculantur. Vidimus alibi immensam planitiem formicariis tumulis humilioribus ita consitam, ut spatium, ubi equus citra cespitationis periculum pedes figat, nusquam inveniat. Latissima sæpe formicarum semita in campo cernitur, Xerxis legiones illac transiisse, jurares. Tumulos illos pyramidales prius solerter Cavatos Hispani pro furno ad coquendum panem adhibent aliquando; Nonnunquam eos commolunt, ac in pulveres redigunt, qui aqua rite subacti ad pavimentandas domos egregie valent. Ejusmodi pavimenta lapidem referunt, lapidis instar durant, & pulicum, aliorumque insectorum procreationem impedire dicuntur. Sed formicarum, quas rei domesticæ inferunt, strages accipe. Longissimo, cujus finem frustra expectaveris, ac denso agmine ad saccos tritico refertos accurrunt, & continuato diebus, noctibusque (si illunes non sint) itinere modios aliquot sensim alportant. Fructiferas arbores, ni earum stipitem cauda vaccina circumplexes, ut ascensum impedias, foliis nudant omnibus. Segetes quascunque attendent, crederes falce demessas. Vinum permodicum, quod ad altaris usum vix sufficiat, cur per quadringentarum leucarum spatium chilensi e regno in Paraquariam advehendum? Formicæ innumerabiles vites, vineasque, cæterum latissimas, depascunt. Hispani certe nec vino insens, neque vinearum cul-

turam pertæsi sunt. Primo Americæ aditu colendis vitibus operam addixere suam, ast nullo operæ pretio in Paraquaria. Cum annuos conatus formicarum voracitate deludi viderent, tantusque sudor vineis impensus ne una quidem vini guttula pensaretur, omnem subinde de vitibus curam abjecere, eadem, qua anates, potione contenti, nisi illis crematum e saccharaceis cannis, vel vini aliquid chilensi e provincia allatum obtingat aliquando. Extra Cordubam, Riojam, & Catamarcam Tucumaniz colonias vix tantum racemorum suppetit, vinum confieri ut queat, quod pro sacrificio diebus etiam maxima religione celebribus sæpe desideratur in locis, ab urbe Boni aeris, & Tucumauia remotioribus. Plus aquæ lustralis Europæorum frontibus, quam vini Paraquariensium Gutturi aspergi, extra dubium est. Vini penuriam potu ex tritico turcico, vel fructibus parato Hispanorum vulgus interdum supplet. Si quando formicas assiduitate quotidiana e vineis exterminari contingat, Columbarum Sylvestrium, Vesparumque immensa agmina enascentes forte uvæ consumunt. Cæterum ut vineis, sic hortis exitiales esse solent formicæ varii generis. Quid quid oleris, aut leguminis severis, ad radicem usque depascuntur. Plantam teneram hodie terræ mandas, cras incassum quæres. Piperi tamen, quia acrioris saporis, parcunt. Carnem seu crudam, seu assam, si in cubiculo relinquant, mox formicarum gregibus nigrescentem invenes. Quidquid quisquiliarum est, mandunt, ipsa scarabeorum, bufonum, anguium cadavera. Aviculam cavæ inclusam, cui caro pro pabulo fuit, a formicis devoratam ad cubiculum rediens inveni. Neque dormientium corporibus abstinent. Te noctu in utramque aurem dormitante, nocte concubia, jam ex pariete, jam ex pavimento prodibit

formicarum exercitus, in lectum eluctabitur, teque, ni fugias ocyus, omni ex parte compunget. Experto mihi tuto credas. Id Quaraniorem in coloniis perfrequens. Hinc ardens tota nocte candela. Nam papyri folia accensa, formicarumque adventantium agmini injecta unicuique ad eas arcendas remedium putantur. Lusitani recepto dudum adagio formicas Brasiliæ reginas dictitant. Nos easdem Paraquariæ dominas sumus experti, Nicolao illo, quem Paraquariensem Regem finxerunt, utique potentiores. Plus negotii fore dixero in his, quam in barbaris omnibus sub jugum mittendis. Quidquid enim industriarum, astutiarumque excogitatum adhuc, ad illas fugandas tantisper, non ad eliminandas valuit. Conductis hunc in finem ingenti sumptu operis disturbatæ formicarum cavernæ jam injecto igne, jam egestis earum ovulis; Postridie novæ detectæ alibi eodem in horto. Fimo suillo, Calce, lotio, vel organo earum antris immisso recedunt equidem, sed in propinquo novas sibi fodiunt specus. Sulphur cæteris remediis præferendum. Illius usum, quem a lusitanis docti sumus, jam accipe. Latibulum formicarum, quas in horto, vel agro sentis tuo, præcipuum explora, Foramini majori, per quod terram subeunt, acerram cum accensis carbonibus immitte; folle admoto flammam excita, fumumque ingesto sulphure. Foramina cætera, unde fumum exire notaveris, limo recenti obstrue diligenter, fumo sulphureo exitus porro ne pateat. Tum quidquid sulphuris in promptu est, folliis ope inflamma, & fumo specum totam permeante formicas, quotquot illic latuerint, universas suffocari oportebit. Feliciter id a pluribus peractum in Paraquaria. Sed quid? si in illis solitudinibus desit sulphur? si desit patientia? Deerunt uvæ, arborum, camporumque fru-

fruges. Vastabunt somnia formicæ quascunque cultorum industrias eluluræ, solo sulphuris fumo internectione delendæ.

Plinius libro II. Capite 31. refert: In quibusdam Indiarum orientalium tractibus grassari formicas magnitudine lupis Ægyptiis, colore felibus similes, sed cornutas. Tales, tantasque nunquam vidit Paraquaria, fateor, quid si in historicorum fabulantium cerebro duntaxat natas, nusquam gentium visas? Haud equidem is sum, qui ausim in Plinii verba jurare, quippe cui familiare monstrosas magnitudines, parvitates, virtutes, formas rebus peregrinis affingere. Sed quamvis minutiora sint formicarum Paraquariensium corpuscula, viribus tamen, armisque abundant ad humanos artus laniandos, lacerandosque. Opportune mihi in mentem venit, quod Svetonius de Nerone ob flagitia nocturnis terroribus exagitato scripsit Numero 46. *Nunquam antea, ait, Somniare solius, occisa demum matre vidit per quietem, navem sibi regenti extortum gubernaculum: Trabique se ab Octavia uxore in ætissimas tenebras, Et modo pennatarum formicarum multitudine oppleri: Modo &c.* Haud abs re ceu Nygios tortores formicas somniavit Nero diu noctuque infestas, semperque intolerabiles. Quod Nero somniaverat, in Paraquaria eheu tot annos experti sumus. Nam seu domi, seu ruri agentes, a formicis identidem assilientibus pertinacissime vexabamur, maxime si irritentur. Ut enim nôrunt, aliena invadere, sic se, suaque solent strenue tueri. Arbor quædam ab Hispanis formicarja appellatur, ab Indis Chiquitis Auci n' occepez. Lignum illius molliissimum a formicis omni ex parte cribri instar pertrebratum, ac habitatum. Cave, hanc arborem vel eminus digito contingas. Nam infinitæ formicarum

cohortes veluti classico audito, qua data porta, ruent ad te miseris modis dilacerandum, nullam cutis tuæ partem relinquent intactam, adeo illarum multitudine, quod Nero somniaverat, opprimeris.

Verum injurius sim formicis, si, postquam earum noxas minutius, quam cogitaveram, exposui, beneficia, quæ præstant, reticerem. Aliquæ majoris molis in posteriore corporis parte globulum gestant pinguedine candidissima refertum, quam e multis collectam, & igne eliquatam butyri instar & Hispani & Indi cum voluptate edunt. Vidi sæpe, ast nunquam has cupedias invidi, nunquam appetii. Formicæ aliæ minuscule in arbutis, quæ fructus quabyrâ mihi fragrantissimus commendat, ceram deponunt natura candidissimam. Constat ex micis minutis, quæ colliguntur, & liquefactæ candelis, quæ aræ serviant, parandis adhibentur. Cera hæc accensa odorem exhalat quovis thure suaviores; quia vero mollior, cito liquefit, & quamvis quavis alia cera duplo pretiosior, præ quavis alia citius consumitur. Non desunt formicæ, quæ resinæ fragrantis particulas ad sua receptacula convehunt, thuris loco servituras. In quibusdam Asiæ tractibus auri micæ ex auriferis montibus a formicis colliguntur; Incolæ aurum rapturi illarum specus, thesauri scilicet arces, invadunt sole plurimum æstuante. Verum formicis opes suas acriter defendentibus vacuis sæpe manibus recedunt, atque adeo pedibus ad maturandam fugam magis expeditis. Quædam formicarum species urforum esca est, qui propterea urfi formicarii appellantur, & ab hujatibus omnino differunt. Verum de his plura alibi. Dudum mihi in mentem venerat optare, ut, qui in Europa philomelis, alaudisque pabulum suppeditant, in Americam navigarent,

rent, ovulis formicarum naves maximas oneraturi. Ingenti certe cum quæstu redirent, simul illis provinciis Americæ optime consultum irent.

Bufonum quoque prægrandium (Quaraniis Cururù, Abiponibus Hiymeya, Hispanis Zapo) incredibilis est frequentia desertis maxime in locis, vel recens habitatis. In oppido conceptionis ad fluminis falsi ripas ex anne Narahagem a nobis translato, sub vespere plateæ omnes a confertissimis bufonibus adeo erant obsessæ, ac lubricæ, ut non solum, sed glaciem ambulando calcare nobis videremur. Sacellum, nostra tuguria, verbo, omnia complebant. Ex tecto in pavementum, in lectum, in mensam decidere non raro. Per parietem reptare nòrunt, & muscarum ritu ascendere, descendereque. Cum focus culinarius non editiore in loco, sed humi, alatur, in ollas, ac lebetes quandoque irrepunt bufones. Ex vasculo æneo aquam ferventem in subiectam cucurbitam, quæ phialæ vices agit in Paraquaria, effundere cæpi, mox cum herba Paraquarica, & saccharo commiscendam. Aqua modica, & atrii coloris fluebat. Inspecto vasculo bufonem cum aqua coctum attonitus deprehendi, qui aquam tetro colore imbuat, & ex illa tantum intumuit, ut os vasculi angustius clausit omnino. In colonia Rosarii ad stagni majoris ripas a me condita eadem bufonum colluvies. Sacra ædícula, dum rem divinam facturus accesseram, bufonibus innumereis horrebat quotidie, & licet plurimi mactarentur horis singulis per biennium, eorum numerus non minui, quin augeri indies videbatur. Bufones alii, quos Hispani escuerzos vocant, Europæis altero tanto majores præter molestiam etiam periculum afferunt se offendentibus.

Vin-

Vindictæ enim studio vesicam mox exonerant, & lotium contra sibi infestos quam longissime ejaculantur, quo si vel tantulum oculus conspergatur, confestim excæcatur. Non lotio eorum duntaxat, sed & salivæ, & sanguini, & felli maxime virus nocentissimum inesse nemo unus dubitaverit. Ex authoribus idoneis novimus, a Barbaris Brasiliensibus bufones torreri, tostosque in pulveres redigi, quibus cibo, potuive inspersis mortem accersunt suis hostibus; Hi guttur inflammari, ficcarique suum paulatim sentiunt, vomitum, singultum, animi subitam defectionem, delirationem, articulorum, ventriculique acerrimos dolores, & nonnunquam, dysenteriam patiuntur. Talibus, si toxici vis medicinæ locum relinquat, alvi purgatione, vomituque utendum illico, repetita etiam ad sudorem ciendum deambulatione, vel balneo, quibus remediis veneni reliquias e corpore eliminari putant. Eundem in finem ægrotans furno mediocriter calido, vel bestię recens dissectæ injicitur aliquando. Præter hæc herbæ, radicesque variæ Veneno discutiendo idoneæ adhibentur. Has inter primum facile locum obtinet, herba Nhambi a Brasiliis dicta. Illius succus bufonis tergo, vel capiti aspersus (Hæ tamen partes tantisper humi perfricandæ sunt prius) momento temporis enecat pestilentem bestiam. Idem prorsus tabacæ pulveres ejus dorso impositi præstant, uti fide dignissimi testantur. Ex quo, quantum seu herba Nhambi seu tabaca ad id genus veneni repellendum valeat, licet arguere. Cæterum cinerei, vel spadicei coloris sunt bufones Americani, interdum versicolores, & verrucis asperi, quin & herinaceorum instar aculeati visuntur. Barbaros quosdam bufonum, nescio, qua specie vesci, legeram, quin tamen id unquam vidissem. Bufonum ficcatorum, & pharmacopœorum arte præparatorum pul-

pulveribus sudorem, urinamque cieri ad hydropem, pestem, febresque curandas, ex Europæis medicis intellexi, e quorum consilio bufo contusus cataplas-
matis loco circa renes dorso applicatur contra hy-
dropem. Oleum bufonum sturnis curandis utile di-
citur, si tamen Joanni woyts medico, qui ista ad-
fert, habenda fides. Adversus noxas e bufonum ve-
neno ortas cancri fluviales, cornu cervi, flores vi-
tis, & nescio, quæ alia ab eodem commendantur.
Ranarum (oërgetetè dicuntur ab Abiponibus) ut
mira varietas, sive colorem, magnitudinem, vocem
spectes, sic incredibilis ubique frequentia. Vocales,
ac garrulæ sunt, ut Europææ, & veterem in limo
cantare querelam solent habitantibus perinde, ac iter
agentibus permolestæ. Cæterum nec damno ulli
sunt, neque usui, etsi apud Europæos tum in me-
dicina, tum in mensa aliquem habeant locum. Ab
Americano quidquid impetrabis citius, quam rana-
rum esum, vel qualemcunque usum. Idem mihi
semper illarum horror. Ne bufonem pro rana, ut
selem pro lepore alibi, mihi obrudant, timeo. In-
tegræ per Europam nationes a ranarum usu abhor-
rent, ecquis id ignorat? Novi equidem, discrimina,
quibus rana a bufone dignoscitur, suppetere; Quid
si coquarum oculi hallucinentur, vel dormitent, ut
sæpe alias cicutam pro petroselino, fungos noxios
pro innoxiiis mensæ intulerunt, affinitate quadam re-
rum deceptæ, vel earum notis, e quibus ægre discer-
nuntur, oscitanter observatis?

Hirudines (Abiponibus ypicli) in stagnis,
quæ aqua pluvia duntaxat aluntur, nusquam desunt;
Hujatibus tamen magnitudine pares nunquam vidi.
Per quadriennium, variis in coloniis aqua mihi po-
tanda hirudinibus plena, quas in poculo cochleari
quo-

quotidie piscabar. Aliquando, dum otium fuit, aquam per linteum transmissi. Abiponibus, queis natare, lavari, ludere in stagnis quotidianum negotium, hirudines undique adhærescunt; Alter alterius manu, ut primum ex aquis emergunt, perpurgatur. Id mirum, nemini unquam has bestias per quoscunque demum meatus in corpus irrepisse. In oppido Rosarii post nimbium procellosum plateæ omnes hirudinibus refertæ videbantur. Quod spectaculum, quia nunquam alias nobis visum, admirationi omnibus, ac risui fuit. Abipones tamen, qui nudis semper incedunt pedibus, acerrime sunt conquesti, quod sibi, quoquo euntibus, hirudines mordaces tenaciter se affixerint. Verum exigui hic cruciatus temporis fuit. Nam post horæ unius intervallum molesti hospites ad unum omnes disparuere. Ad vicinum stagnum eos properasse, verisimillimum.

Vespertilioes, quos Quaranii Mbopi, Abipones Cahit appellant, prægrandes in rupium antris latent, permulti in campis, domibusque vagantur & incolis, & bestiis formidabiles. Ut Maffeus notus de rebus Indicis refert libro 2. folio mihi 35. in Cananore vespertilioes visuntur dentibus, & rostro vulpinis, milvii magnitudine, & exquisitoribus epulis accensetur. Quemadmodum vespertilioes in Cananore hominibus cibum, sic in Paraquaria homines potum præbent vespertilionibus. Hi equidem se cubiculis clanculum insinuant, & si quos bene sopitos, ac male tectos nanciscantur, jam ex eorum pedibus, jam e brachiis sanguinem exugunt, sed titillatione tam savi, ut mulcere potius dormientes, quam mordere videantur. Vulnus enim, quod dentibus inferunt, alarum agitatione refrigerant. Expergefacti ex sanguine stragulis asperso vespertilionis

su.

factum præcessisse intelligunt denique. Vulnus soli cuti inflictum ut dolore, sic periculo plerumque vacuum est, nisi a muscis humida captantibus occupetur. Vel hoc nomine vespertilionum morsus equis, mulisque fere sunt periculiosiores, cum enim eorum tergus saucium affilientibus identidem muscis pateat, vermibus ex illarum seminio enatis, &, quod ex his consequitur, profundo ulcere conficiuntur sæpe. Ad hæc vitanda recenti vespertilionum morsui calentes cineres actutum insperguntur.

Murium, gliriumque (quos Quaranius Angujā, Abipon Patagnik vocat) non seminarium modo, sed & campum elysium esse Paraquariam verissime quis dixerit. Ex quotidiana tot boum occisione tot carnis rejectanea ubique suppetunt, ut, si glires hujates ægre, quod rodant, inveniunt, istic epulas diu, noctuque in promptu habeant, quibus illos ali, & supra, quam credi possit, augeri, necesse est. In urbe Boni aeris sole occumbente glires scurris nostratibus majores e priscis parietibus in arcem turmatim prodire quotidie vidimus attoniti; Quingentis plures uno sæpe in agmine cum fociis ipse numeravi. Cordubæ Tucumanorum bos pelle, visceribusque exutus, cætera integer e trabe pendebat in seriniariorum officina. Hanc ingressi mane fratres Laici bovem, quantus erat, gliribus nigrescere eminus conspiciunt, quantumque carnis illa nocte consumperint, observaturi propius accedunt. Dilapsis metu innumeris, dum manu carnem contrectant, intra illam tot dentibus cavatam tricenoglires, ceu in cuniculo latitantes deprehendunt. Quo audito tanta me incescit carnis a gliribus erosæ nausea, ut biduum vomitus metu triclinio abstinere, pane contentus. Quod caro dein loco magis idoneo, mundiusque

servaretur, is abſtinentiæ mez fructus exſtitit non pœnitendus. Innumerabilis glirium exercitus ex Auſtralibus Boni aeris campis conferto ordine advenſans Tucumaniz agros, horrea, domicilia implevit, vaſtavitque omnia non raro. Amnes ſibi obſtantes citra trepidationem nando ſuperarunt. Immenſam camporum planitiem, per quam illis iter, veluti planſtris tritam, compreſſamque reliquere. Paraquarienſes ruricolæ glirium multitudine territi relictis tuguriis, omni ex parte patentibus, fugam malunt, quam arma capere. Adeo quantumvis imbellis, quantumvis imbecillis turba numero ſuo ſæpe evadit formidabilis. Neque putes, velim, glires Paraquarienſes bubulæ ſolum carni inhiare; Humanam quoque appetunt, videnturque anthropophagorum de genere. Nam in utramque aurem dormientes mordent non raro, & vero dente haud pigro. ſociorum novi aliquem, cui meridianti glis inſidiatus iterum, iterumque digitorum momorderat. Manum ſanguine manantem iſtius ipſe ſpectavi. Nihil præterea ſcrutorum, aut quiſquiliarum eſt, quod non corrodat, clepantque, ac ſua condant in penu vel nido ſerviturum, vel cibo. Sericeas ligulas e libro precum horariarum ſacerdotalium ſuffurati eas parandis ſuorum incunabulis impendere. Strophia, vittas, tibialia, lineam, laneamve cujuſcunque uſus ſupellectilem auſſerunt, ſuumque transferunt in latibulum, pro culcitra, ac ſtragulis ſibi ſubſternendam. Moleſti hi ſurunculi non damnum modo domeſticis, ſed & incendiis periculum domibus minantur quotidie. Nam candelas e ſeво ardentes noctu aſportare audent faucibus, & ad ſpecum ſuum properantes Hiſpanorum ruricularum mapalia accendunt ſæpe. Multum mihi propterea negotium faceſſivere in nova Roſarii colonia. Non uno nomine lux noctu
alen-

alenda fuit. Sevo deficiente, oleo ex boum pedibus excocto utebar hunc in finem. Laminam cum ellychnio ardente noctibus prope singulis glires e lampade humi locata abripuerant, frigescens mox oleum forbillaturi. Ad coercendam istiusmodi audaciam ellychnii Laminam catenula ænea adjecto ferri pondere lampadi adstringere dein oportuit. Contra fures jam viribus utendum, jam astu.

Frequentissima, & propemodum annua Paraquariæ calamitas sunt locustæ (Abiponibus Aorkaîi) visu horridæ, vastique corporis; Nam medium digitum longitudine excedunt. Infinito earum agmine propinquante terrificæ caligo ex ultimo horizonte erumpit, sol obnubitur, lux vel meridiana obscuratur, nubem atram, nimbo, turbine, fulminibus prægnantem imminere iurares. Sæpe Abipones mei correptis armis in acie constiterunt, quod eminens visæ locustæ speciem referebant pulverum, quos hostilis barbarorum equitatus effusissimo cursu advolans per viam excitare consuevit. Ubi ubi confederint locustæ, agros frugibus, arbores foliis, campum herbis, & quod inde consequitur, homines juxta ac bestias pabulo spoliant; soboles, quam relinquunt, numerosissima stragem alterum in annum continuat, miserasque auget. Adventans locustarum exercitus ne ad solum devolet, agrosque varia semente confitos depascit, tympanorum strepitu, vociferatione populi, sclopetorum fragore, ramorum per auram jactatione continua impeditur. Quo si arceri nequeant, Quaranicis in oppidis, quidquid hominum est, in illis humi colligendis, necandisque occupatur. Uno sæpe die multos modios his bestiis plenos læti vidimus, easque jam ad focum, jam ad aquam condemnavimus. Abipones malunt locustas

vorare, quam demergere, vel cremare. Hinc illas advolantes, quotquot possunt, ex aere humum deturbant virgulis longioribus, lisdemque ceu verubus affixas lento igne assant, vorantque eadem, qua nos perdices, vel ficedulas, aviditate, non promiscue tamen omnes, fœmellas siquidem solas pro esca sibi deligunt, masculis rejectis. Neque est, cur his barbaris succenseamus. Nam locusta levitici capite undecimo, versu secundo & vicesimo mundis volueribus adnumeratur. Hinc Judæis, Æthiopibus, Libyis, Parthis vel elixa, vel tosta, & in pollinem redacta, quin & sale ac fumo durata locusta pro cibo fuit, si fides habenda Diodoro siculo, l. 3. c. 3. Plinio l. 6. C. 30. & Divo Hieronymo l. 2. contra Jovinianum. Si tot populi *ἀνγιδόφῃ* locustarum edaces exstiterē, occur dubitemus, locustam, qua Divus Joannes Baptista in solitudine, ut sacer refert codex, vescebatur, veram locustam, non herbam quamdam sic dictam, non piscem, aut cancrum fuisse, uti quibusdam scriptoribus interpretari, opinarique visum, qui jam *ἄνγιδες*, jam *ἀνγιδες*, jam *ἔνγιδες*, jam *ἀνγιδες* legendum putarunt, cum in animum inducere suum haud possent, locustas usquam esculentas fuisse, quod ipse ego hisce oculis apud Barbaros spectavi. Infinitus sim, si cætera, queis Paraquaria scatet, insectorum genera persequar. Ex iis, quæ memoravi, conjectura sit de aliis, quæ brevitatis studio omitto. Molestior fere minutissimorum animalium, quam tigridum, leonum, crocodilorum infectatio; Hi aut fuga eludi, aut sterni armis queunt, non item illa, at certe rarius, difficilisque. Maxime ista nocent, quia minus videntur; Formidabiliora feris grandioribus, quia numerosiora, verius dixerō, quia innumerabilia. De infectis noxiis, quæ mortem, morbum, veldammum quod.

quodcunque accersunt, hoc loco scribere mihi fuit propositum. Quantus mihi campus pateret, si insecta quoque innoxia seu gradientia, seu aquatilia vel obiter enumeranda forent. Quanta, superi boni! muscarum, vermium, apum, crabronum, fucorum, cicadarum varietas, ac frequentia! Quam multiplex cinciodelarum diversitas noctu stellarum instar passim collucentium! Aliæ bruchi magnitudine alarum jactatione, aliæ solis ex oculis lucem vibrant, quæ libro legendo sufficiat. Quædam solis natibus splendorem edunt. Vermes quidam majusculi toto corpore coruscant. Ligna, arundines, arborum folia, plantarum radices, postquam computruere, in territoriis maxime humidis adamantum, pyroporum-smaragdorum, chrysolithorum, rubinorum &c. more lucem viridem, rubram, flavam, cæruleam noctu spargunt, mirumque in modum oculos oblectant. Quotidianum hoc nobis in sylvis, Mbae vera Acaray, & Monday fluvios inter sitis, spectaculum noctu fuit. Ejusmodi reculas, quas lucere observaveram, humi collectas ad oppidum asportavi meum, ubi tamdiu luxerant, quamdiu humidæ; Aqua affusa madefactæ splendorem recuperarunt pristinum, qui tamen aqua nil porro proficiente, desinit denique. Ejusmodi phosphoros nusquam deprehendi per reliquam Paraquariam. Ut flores campum, sic papilionum innumeri rivorum, sylvarumque margines æmanissima colorum varietate exornant. Verum de his, aliisque insectis & multi & accuratissimi libri prostant, ac in omnium manibus versantur. Nobis ad Abipones redeundum insecto quovis Paraquariæ recentiores. Postquam enim plerique omnes Barbarorum populi Hispanorum jugo cervicem submittere, Abipones indomiti refecandis Hispanorum cervicibus usque occupabantur, hoc præsertim, quod agimus,



mus, seculo. Totam equidem, qua patet, provinciam latrocinantium more quotidianis prope assultibus, cædibus, rapinis, incendiis vexarunt, magnamque ejus partem incolis, fortunis, pecoribusque exhaufere, magnanimitatis, astutiæ, dominationisque Hispanicæ superbi contemptores, ac libertatis avitæ defensores pertinacissimi. Latrones dicuntur ab Hispanis, & sicarii Abipones; Ast illi bellatores se se, heroesque jactant, jurene, an injuria, lectoribus arbitrandum permitto, quibus militarem eorum disciplinam, cæteraque, quæ ad bellum pertinent, exponere aggredior.



CAPUT XXXV.

De militari Abiponum ingenio.

Quibus jam coloribus militare Abiponum ingenium expingam, anceps hæreo. Imagini, quam diuturna Barbarorum istorum experientia mihi imprefferat, vox nulla omnium respondet, quibus latium abundat. Bellicosæ, impigri, prompti ad res gerendas Sunt Abipones, id equidem nemo vel Hispanorum negaverit. Magnanimos tamen eos, impavidosque dicere, vix audeo. Nam & ipse Cicero 2. Philipp. Strenuum a forti distinguit: *ut cognoscere te*, ait, *si minus fortem, attamen strenuum*. Historiam de Abiponibus scribere mihi est animus, non panegyricum. Historici est rem nudam sine fuco proponere; Oratori permittitur ea, quæ ad commendationem non pertinent, silentio præterire, jam coloribus uti, si res poscat, jam pallio ad tegendas, quæ laudibus obstarent, labes. Ingenuus sum, dicam more meo, quod sentio. Nollem profecto Divæ veritati, cui opellam sacravi meam, vel bilem movere, vel risum.

Bellicæ virtutis famam maximopere ambiunt Abipones. Totis ad arma animis aspirant. Hastam, arcum, omne telorum genus dexterrime vibrant. Equo, si quisquam alius, volare nōrunt. Belli asperitates, Cœli injurias, inedia, itinerum molestias nemo tolerat constantius. Metuenda nautis, navibus-

busque flumina nando trajiciunt intrepidi. Vulnere sua, ceu aliena, sine gemitu spectant fauciati. Omnia hæc nôrunt, quæ universi per Europam bellatores suspiciant, paucissimi imitentur. Unum id scilicet ignorant Abipones: Mortem aspernari, gloriam per pericula sibi conquirere. Mavortios jactant animos, sed purpuream vomere animam nimiope-re timent. Strenui sunt, fortes dici neutiquam possunt; Istorum enim est, etsi fractus illabatur or-bis, nil formidare, vincere, aut mori velle. Vin-cere quidem semper volunt Abipones, nolunt ta-men mori. Diris devovebunt victoriam vel unius suorum vita emptam. Respuunt epinicia, queis lessus misceri debeat. Triumphum recusant, quem vel unius viduæ, orphanive lugentis suspiria comi-tentur. *Pro patria sit dulce mori licet, atque decorum; Vivere pro patria dulcius esse putant cum Oveno poëta.* Americani hi bellatores perperam se se Martis pro-geniem jactant, quippe quibus adeo insolens mortis timor. Næ! ego illorum nomina heroum albo nunquam adscripserim. Plutarchus in Perseo Macedonum Rege *φιλοψυχίας* nimium vitæ amorem acriter reprehendit, morbumque minime Régium ap-pellat; Decet equidem magnos viros magno animo mortem contemnere. Fateor tamen ingentium no-bis vitæ servandæ studium haud culpari a sapienti-tibus, dummodo nimio ejus amore cæcati nil turpi-ter faciamus, patiamurve. Vitam spernat, qui vitæ pretium ignorat, vel vita uti nescierit. Tanti porro vita est, ut Tullius Cicero formicam pulcherrimæ urbi præferendam existimaverit, quod in urbe sensus sit nullus, in formica non modo sensus, sed etiam mens, ratio, memoria. Eadem ratione du-ctus Augustinus libro de a. anim. in Manichæos mus-cam quamlibet sole ipso præstantiorem affirmavit.

Et

Et Salomon Eccles. 9. v. 4: *Melior est canis vivus Leone mortuo*, edixit. Cum igitur maximi facere vitam suam quemque oporteat, excusandus videbatur historicis Pheres, qui pro filio suo Admeto Thessaliæ Rege mori recusaverat, illud forte Euripidis cum animo suo identidem reputans: *Longum apud inferos remus est. Hac autem vita brevis est quidem, sed dulcis. Neque duabus animabus, sed una vivimus. Chara lux hæc Dei, Chara!*

Ad vitam temere prodigendam præcipites nemo sane Abipones dixerit. Divam præ quovis Numine firmitatem, præliorum arbitram, adorant, quam nisi certe sibi propitiam nōrint, nunquam in arenam descendent. Martis aleam ancipitem, dum possunt, refugiunt. Semper minantur aliis, semper timent sibi. Nihil admodum fortunæ tribuunt. Hinc antequam expeditionem bellicam susceperint, loci naturam, hostium numerum, temporis rationem anxii de sua incolumitate iterum, iterumque circumspiciunt. Periculum quodvis, quin & periculi suspicio hastam illorum e manibus excutiet, ac quantumvis furorem protinus restingnet. Agis spartanorum Rex, ut Plutarchus in apophtegmatibus laconicis memorat, magnifice se jactabat: Milites suos Lacedæmonios bello fervente haud quærere, quotnam hostes, & quam fortes habeant, sed, ubi sint, rogare solitos, ut illos cominus invadere queant, & profligare. Nunquam tam cæco impetu in pugnas feruntur Abipones. Festinant lente, quia suspecta illis omnia. Neque classica canunt, nisi rebus omnibus diligenter exploratis. De securitate sua facti certiores fulminis more irruunt, jam Hanibalem callidum, jam Fabium cunctatorem imitantes. Nōrunt audaces a fortuna juvari quidem aliquando,

aliquando, si sagacitas provida periculorum desit, destitui. Idcirco, quemadmodum flumen minax equo transmissuri vadum tentamus, ne vorticibus abripiamur, sic illi non nisi post longas meditationes hostibus propinquat suis, ut impune victoria potiantur. Innata Americanis omnibus timiditas temeritatem existimat, quod magnanimitas apud Europæos audit. Sæpe, diuque cogitant, quod patrandum est semel. Ictum non vibrant, nisi meditatum, manu ad quemvis strepitum trepidante. Invadunt raro aperta fronte, plerumque per insidias. Parum audent contra audaces, qui frontem assilientibus obvertere, & excubare consueverint. Nunquam minus timent, quam dum timeri se, advertunt. Astu, & equorum velocitate funestiores edunt strages, quam viribus, Hunnis antiquis utique perquam similes. Juvat compendio dicere, quæ divus Hieronymus de illis ad Oceanum epistola trigesima, quæ epitaphium Fabiolæ inscribitur, olim scripserat: *Ecce subito, ait, discurrentibus nunciis oriens totus intremuit, ab ultima Mæotide inter Glacialem Tanaim, & Massagetarum immanes populos, ubi Caucaſi rupibus feras gentes Alexandri claustra cohibent, erupisse Hunnorum examina, quæ Pernicibus equis huc, illucque volitantia Cædis pariter, ac terroris cuncta complerent. . . . Insperati ubique aderant; Et famam celeritate vincentes non religioni, non dignitatibus, non ætati parcebant, non vagientis miserebantur infantia &c. Idem de Abiponibus Paraquariæ lamentum quondam fuit, cujus magnam partem annis superioribus ad incitas, ac desperationem redegere, antequam scilicet in coloniis collecti nos & religionis & morum magistros habuerunt. Cruentissimas strages, quas alibi ordine referam, Hispanis tum maxime intulerant, quando minime timebantur. Ne vel timeri possent, id equis, id artibus debent suis,*
quas

quas jam minutatim exponere oportebit. Quantumvis culpanda illorum timiditas, suspicienda tamen, & militiæ legibus consentanea est ejusmodi bellandi ratio, qua id fere consecuti sunt, ut vel nulla, vel exigua commilitonum suorum jactura demessis Hispanorum capitibus onusti domum redirent victores, & triumphantium ritu captivorum greges, abacta pecora, capta ex hoste spolia pro trophæis ostentarent plerumque. *Hæc ars*, ait Flav. Vegetius l. 3. c. 10. *Dimicaturis est necessaria, per quam vitam retineant, & victoriam consequantur.* Hunc certe in finem ipsi quoque heroes & clypeo, & ense utebantur. Hoc hostem offenderant: illo se defenderant. Abiponibus astutia, corporis agilitas, equi promptitudo pro clypeo, quin & præ clypeo est. Si alium, aliumque commilitonum in acie sterni videant, fuga protinus dilabuntur. In angustias redacti, si nullus superfit effugii locus, pertinacissime certant, metu in furem converso. Martialis poeta militem cum cane contulit, bonumque dixit, qui malus. *In cane*, ait Seneca, *Sagacitas prima est, si investigare debet feras; Cursus, si consequi; Audacia, si mordere, & invadere.* His canis boni dotibus, quæ & bonum reddunt militem, num Abipones polleant, ex dicendis porro arguet lector. Jam de eorum armis, exploratoribus, consiliis bellicis, militari commeatu, expeditionibus in hostes, varia præliandi ratione, victoriæ corollariis, demum de illatis provinciæ cladibus mihi agendum.

CAPUT XXXVI.

De Abiponum armis.

Nemo unus istorum claro apud suos nomine, nībellica virtute emineat. Hinc arma idonea, nitida, & dum res poscat, expedita ut sint, singulorum cura. Ad se se defendendos, offendendosque hostes arcu utuntur cumprimis, & hasta. Lignum illis nascitur patrio in solo, nusquam alibi per Paraquariam visum, purpurei, dum recens est, coloris. *Neterge* dicitur, & Chalybem duritie æquat. Arbo-rem illam findunt, frustumque oblongum inde exsectum cultro, vel si is desit, acuto lapide teres efficiunt. Crederes, torno a fabre elaboratum. Rectum porro ut evadat, ad ignem identidem calefactum duos inter stipites hac illac contorquetur. Hac methodo Abiponum hastæ confiunt, Sarissis Macedonicis vix minores. Nam quinas, senasve ulnas longitudine excedunt, utrinque in cuspidem desinentes eo fine, ut, si una hebescat extremitas hastæ, altera ad ictum supersit, utque etiam humo, dum in campo pernoctant, insigi possit. Quondam, dum illis peregrinum ferri nomen, ligneis pugnant hastis, interdum cervi cornu mucronis loco illis præfixere, Fennos, priscum Germaniæ populum, aliquomodo imitati, de quibus Tacitus: *Fennis sola in sagittis spes, quas, inopia ferri ossibus asperant.* Verum postquam ab Hispanis jam vi, jam pre-

pretio mucrones ferreos obtinere Abipones, eos hastis dexterrime inferunt, ac in illorum, a quibus acceperant, eadem abutuntur. Hastas ferro instructas illi Caplaàn, Hispani Lanzas appellant. Jam jam præliaturi mucronem sebo perungunt, ut altius, promptiusque corpori immergatur. Ad quatuor palmos hostili sanguine spumantes lanceas vidimus aliquando; Tanto eas nisu barbarorum coloniam nostram invadentium lateribus impegerunt Abipones. Istorum tentoria, tuguriaque cum fere humiliora sint, ad eorum limen lanceas defigunt suas, ut, quoties res ferat, sint in promptu. Quot lanceas videris, totidem bellatores noveris istis habitare. Ut Europæi interdum duces ad tegendam copiarum suarum paucitatem, supplendamque bellicæ suppellectilis penuriam tormenta e ligno ficta, pictaque in aggeribus collocarunt, quorum scilicet conspectu hostis numerosior terreretur; sic nos eodem militari astu usi hastas ex arundine, ex ligno obvio obiter paratas per Abiponum absentium ædes defiximus, quibus eminus conspectis hostium præcursores delusi oppidum præsidariis abundare suis nunciaverant, cum ex hastarum numero numerum virorum arguissent. Bellica hæc fraus barbaris ad assultum jam jam accinctis terrori, nobis salutis fuit non raro. Adeo ut Europæis in castris, sic Americanorum in tuguriis frequentius, feliciusque ingenio, quam manibus pugnatur. Pergama, quæ viribus non poterant, Græcorum dolo capta. Illud quoque laudi tribuendum Abiponibus, quod non modo in armis suis concinnandis mirifice solertes, sed & in iis ornandis, purgandis, poliendisque quotidiani, ac prope nimii sint. Hastarum mucrones adeo splendescunt semper, ut argenteos eos diceres. Pudit me sæpe Hispanorum, dum illos armis vilissimis, squalidis, inep.



ineptis instructos coram Abiponibus deprehendi, a quibus jam eorum paupertas, jam segnitie explodabatur. Arundinem, sudem rudissimam, stipitem nodosum, arboris ramum, lignum obvium undique tortuosum pro hasta plerique adhibent, pro illius mucrone gladii, cultrive fracti particulam loro circumligant. Opulentioribus duntaxat ignivomæ sunt fitulæ, ast plerumque vitiosæ, ac ad terrendos, quam necandos hostes utiliores. Ad hæc perpaucos invenias, qui sclopetis uti feliciter nōrint. Verum advertite, me hæcenus de agricolis Hispanis, qui contra Barbaros militare jubentur, disseruisse. Legionarios enim milites extra urbes Boni aeris, & Montevideo in amplissima Paraquaria nusquam videris.

Arcus sagittarii ex eadem arbore Netergè, uti hastæ, conficiuntur, justamque viri staturam æquare solent longitudine. Nervo enim relaxato, baculi instar rectissimi sunt, nullamque, quam Turcorum, Tartarorumque arcus habent, curvitem præferunt. Nervus, seu chorda arcus ex vulpis visceribus plerumque, aliquando ex filis, quæ palma quædam suppeditat, fortissimis textitur. Tela ejaculatori, ut arcus chordam validissime intendere queant citra manus dolorem, eam lignea, ut ita dicam, chirotheca præmuniunt. Pharetra e junco contexta laneo varii coloris filo ornatur. Sagittæ ulnam unam, & palmum longæ constant arundine, cui mucro vel ex osse, vel ligno durissimo, vel ferro præfigitur. Mucrones lignei præ ferreis terribiliores, ossei vero (ex vulpis tibia parantur) longe formidabilissimi; Dum enim evelluntur, vitri instar fere franguntur, parsque corpori inhærens tumorem generat, ulcusque acerbissimum, quod saucio nullam relinquit quietis partem. Lignum quodvis nativo quodam veneni genere imbu-

imbutum præ ferro plus adfert doloris, tumorisque. Expertus id scribo. Ligneæ ejusmodi sagitta, quæ brachium meum a Barbaris Natakebitis transverberatum, manus vulneratæ sudorem, veneni alias indicem, copiosum per horas aliquot induxit. Abipones vulnere meo, veluti suo, indolentes, quod telo ligneo, non osseo sim læsus, mihi pleno ore gratulabantur. Et vero sauciorum, quorum vulnera toties curavi, assidua tractatione sagittarum discrimen planissime didici. Ferreæ, utcunque sint, reliquis benigniores, innocentioresque vulgo putantur. Nullo unquam veneno suas inficiunt sagittas Abipones, quod apud complures Americæ populos usu receptum. Jam alias dixi, Chiquitos, bellicosam Paraquariæ nationem, formidari a finitimis Barbaris vel eo nomine, quod, si illorum sagitta extimam cuticulam feriat, sanguinisque guttulam eliciat, diffuso mox per omnes artus tumore paucas post horas sauciato moriendum sit nulla vulneris medicina, vitæque spe relicta. Venenum tam atrox, quod sagittæ mucroni illinunt, ex ignotæ nobis arboris cortice soli Chiquiti conficere norunt, reservato sibi ad hunc diem crudeli mysterio. Non fuisse unum aliquem, hoc qui arcanum artificium ex illis seu extorqueret, seu eblandiretur, sæpe mirabar. Etiam dum venantur, telis eodem veneno tinctis feras quasunque necant, & resecta solum, quæ vulnerata est, corporis parte impune comedunt, quemadmodum & Indi Quaranii bobus, vitulisque lethifero serpentum morfu extinctis citra noxam, ac formidinem Vesce consuevere, sola, illa, quæ serpentis dente violata est, particula rejecta. Barbari quoque fluminis Urinoco accolæ præsentissimum virus a se paratum sagittis adspargunt suis, ut Pater Josephus Gumilla prolixè refert in sua historia. Apud Part-

hos,

hos, Scythasque tela venenata in usu fuisse, constat. Sic Ovidius l. 3. trist. elegia 10. Canit de Getis: *Pars cadit hamatis misere confixa sagittis; Nam volucris ferro tinctile virus inest.* Horatius irem: *Veneraris gravidam sagittis pharetram dixit.* Quibus ex rebus toxicum confecerint, Baricellus ex Langio, Plinio, & Aristotele nos docuit. Verum religione factus pestilens artificium, ne quis eo abuteretur, reticendum putavi.

Plumæ, quæ sagittarum promovent volatum, ex alis corvorum sumuntur, quos venaturi dum excurrunt Abipones, bellum præ foribus esse, intelleximus; Ad hoc enim sagittas fabricando se præparant. Plumæ singulæ arundinis extremitati fibra fili tenuissimi utrinque alligantur. Vilelas, seu, ut ab Abiponibus vocantur, Rasegransaik insignes Paraguaris sagittarios nemo non suspicit. Isti plumas non filo, sed glutine, quod ex vesica piscis Vagre parant, scitissime affigunt, mucronem vero levissime inserunt arundini, qua industria periculosissimæ evadunt illorum sagittæ; Nam dum arundo ex vulnerati carne evellitur, mucro solus carni remanet infixus. Quarani minus superstitiosi jam psittacorum, jam aliarum avium plumas applicant sagittis. Dum ad propositam metam quadringentis plures eodem temporis puncto eas ejaculantur, humumque delapsas, vel tabulæ infixas mox colligunt, ex plumarum colore suam quisque cognoscit. Quævis denique natio in arcubus, telisque formandis methodum observat propriam. Breviores sagittæ longioribus sunt periculosiores; Cum enim in velitatione difficilius videantur, difficilius vitantur. Longioribus ea videtur esse prærogativa, quod vi majore, & ad scopum multo remotiorem pertingant. Abipones in sagittis vibrandis esse ver-

satif-

fatissimos uti certum, ita neutiquam mirum est; Nam a pueris arcui assuescunt, & adhuc dum infantes volentem aviculam sternere norunt. Ludicro in certamine, proposito victoribus singulis præmio, pomum citrinum longissime distans meta fuit. Pro tanto sagittariorum numero sane paucissimi aberrarunt, stupentibus, qui spectatores aderant, tantam peritiam Hispanis. Etiam Quarantos inter ejusdem artis scientissimos invenias. Carolus Morphy Regius Paraquariæ Gubernator, Hybernius origine, Lutetiæ Parisiorum omni scientiarum, artiumque liberalium genere liberaliter imbutus, apud Hispanos militari virtute dudum conspicuus, victoriarum, quas celeberrimus Petrus Zeballos a Lusitanis reportaverat, omnium particeps, vir morum suavitate, integritateque eximius ad me in S. Joachimi oppido invilerat anno 1767. quatrimum meis in ædibus commoratus. Ad fallendum a meridie tempus militari hospiti militare certamen publico in foro exhibui. Nongenti aliquot sagittarii Barbari equo insidentis simulacrum ligneum pro scopo habuere. Incredibile, quam destinato ietu plerique caput, vel pectus attigerint, longissimo quamvis multorum passuum spatio a meta distantes. Plurimi equites cursu effusissimo advolantes idem seu hasta, seu sagitta præstiterunt. Tanta admiratione, tantisque laudibus Indorum meorum dexteritatem prosecutus est Gubernator, ut jucundissimum illi spectaculum postridie iterum iterumque fuerit repetendum. Ipse victoribus singulis manu sua porrexit munuscula, quæ ego e domestica oppidi penu suppeditaveram, scilicet cultros, forciculas, globulorum vitreorum fascēs, cruculas deauratas, telam variam, & alia ejusmodi. Mihi equidem certum, exploratumque, Indos sagittarios præ quovis jaculatore sclopetario certius, feliciusque collineare. Quo-

tidiana venatione ad arcum dexterrime tractandum erudiuntur, qui illis adhucdum sylvicolis escam subministrabat. Næ! inepto sagittario, epulantibus cæteris, & sæpe, & multum foret esuriendum. Fames & optimum cibi condimentum, sed & optima artium variarum magistra. Hinc Indi ut sunt voracissimi, sic & sagittarii insignes. Simios in summo Celsissimarum arborum culmine lusitantes, psittacos, & quidquid avium, vel ferarum fiebat illis obviam, toties me præsentē uno ictu stravere, quin & pisces flumini diaphano innantes.

Multa sagittarum varietas. Aliæ aliis sunt longiores, crassioresque, feris scilicet majoribus necandis destinatæ. Mucronum item multiplex forma. Alii plani, & rectæ cuspidis: Hamati alii vel uno ex latere, vel utrinque, quidam quadruplici hamorum serie aculeati. Ejusmodi sagittarum genus non ab Americanis inventum, sed Getis, aliisque per orbem antiquum populis fuisse usitatum ex versu illo Ovidii paulo ante allato liquet: *Pars cadit hamatis misere confixa sagittis*. Sagittam quomodocunque hamatam e carne nunquam extricaveris, ni illam prius utraque manu circumagas ea fere ratione, qua liquor Choccolaticus tereti lignello ad spumam exagitur. Quæ quidem sagittæ circumvolutione viam aperies ad hamos e carne extrahendos, sed quanto doloris sensu! Horreo equidem meminisse. Hamo enim triplici, quo vulneratum me dixi, telum horruit. Quod si mucronis contracti vel minutissima particula carni in hæserit, chirurgicis instrumentis deficientibus, tum enimvero summa calamitas sauciatum manet. Si quando sagittæ reliquias stationem corporis carnosorem uti femur, brachium &c. occupare viderint Abipones, vulgari cultro frustum carnis cum inhirente

particula ipsi refecant; Sæviunt in se, sibi mederi dum cupiunt; Nam vulnus vulnere curant, medicina, quæ ipso morbo acerbior, utuntur. Celeberrimus Cazi-quius Ychoalay, cujus frequens recurret mentio, cum veterano æmulo Oaherkaikin acerrime dimicans periculose sauciatus est, sagitta ossea ossi occipitis prope cervicem impacta. Illius, dum extrahebatur, contractæ pars magna occipiti clavi instar alte infixæ remansit. Augescente in dies dolore nobis authoribus ex S. Hieronymi oppido ad urbem sanctæ fidei sexaginta leucas distantem equo profectus miser curandum se stitit Chirurgo Lusitano ex sancti Francisci familia laico. Curationi incisio præmittenda fuit, ut ossis sagittæ mucro in occipitis osse latens forcipe chirurgico apprehendi posset, ac evelli. Feliciter res omnis peracta est, quamvis non sine acerbissimo dolore. Cruentissimum laniatum non modo, quin vel gemitu ederet, aut doloris indicium, magno animo toleravit Indus, sed & chirurgum cruciatus nimii metu cunctantem, tergiversantemque identidem hortatus est: videris mihi, ajebat, timere? Nil timeas, quæso, feca, terebra, age pro arbitrio omnia confiderenter. Hastis, sagittis, sclopetis vulneratus toties doloribus dudum assævi. Extracto demum osseo mucrone vis sanguinis ingens, veluti aperto epistomio, defluxit. Spectaverat hoc serena fronte Indus, & liberatori suo gratias, quas potuit, maximas egit. In ædibus, ac conspectu Hispani nobilis hæc gesta sunt, qui Ychoalay sibi dudum amicissimi & tolerantiam stupuit, & sanitatem incredibili cum voluptate aspexit.

Aciem ingressuri, aggressurique hostem sagittas aliquot, sibi maxime probatas, a reliquis sejungunt iætui, qui majoris momenti videatur, subinde im-

pendendas. Priscarum is gentium mos quoque fuit. Ad hunc alludens Ilias dixerat: *Posuit me sicut sagittam electam: In pharetra sua abscondit me.* cap. 49. v. 2. Scilicet ut nautæ providi anchoram cæteris firmiorem sacram appellant, urgentique reservant periculo, sic bellatores Americani unam aliquam, exploratissimæ virtutis, sagittam in promptu habent, data occasione jam ad se tuendos, jam ad alium, cujus mortem cumprimis optant, trucidandum feliciter explodendam. Dum aves, aliasque minores feras non interimere, sed vivas capere volunt, sagittis utuntur, quibus pro cuspidi globulus vel ligneus sit, vel cereus; Hoc feræ tunduntur quidem, sternunturque, haud tamen necantur. Si quando via recta telum ad designatum scopum dirigere nequeant ob quaecunque, quod medium intercedat, obstaculum, id arcuatim, ictu nempe in arcum curvato ejaculantur, uti quandoque in castrorum oppugnatione pyrotechnici jacere solent e mortariis pilas igneas. Istis profecto ad incendendas ædes neutiquam indigent Abipones. Hi enim Gossypium, aut aliud stupæ genus ardens sagittarum cuspidi affixum contra testam ligneam, vel stramineam evibrant, & quidquid voluerint, etsi longissime distans, protinus inflammant. Plura Hispanorum oppida tristi hoc artificio in cineres abierunt. In oppido Rosarii, quod Abiponibus condidi, ædes meas straminibus limo denso liberaliter circumvestitis tegendas curavi, quæ scilicet flammam vicinorum Barbarorum sagittis injiciendam respuerent. Speculam ligneam, e qua hostium identidem affilientium motus tempestive observari possent, eundem in finem coriis bubulis contexi. Neque is conatus spes meas delusit.

Hastam, & arcum præcipua dixi Abiponum arma, sed non sola. Nam præter hæc tres globos lapideos corio vestitos totidem loris in unum denique cœuntibus illigatos dextro circumagunt brachio, moxque istu certissimo vibrant, quorum impactu & homines & feræ vel enecantur, vel certe sic illaqueantur, movere se porro ut nequeant, hasta, cultrove mox contrucidandæ. Formidable hoc armorum genus (Hispani *Las bolas*, Abipones *Noabarbarancatê* appellant) apud Australes Magallanici territorii Barbaros locum habet præcipuum, ut superius in libro prodromo fufius scripsi. Hispanorum vulgus, quin & Indi, ac æthiopes promiscue omnes, quoties equo in campum excurrunt, hoc globorum lapideorum instrumento jam ex ephippiis, jam e cingulo suo pendente armati passim videntur. Et vero magno omnibus est usui. De clava lignea, quam Hispani *Macana*, Abipones *Yuele* vel *Hepiginrankatê* vocant, & jam domi pro ludo, jam foris, dum bello, venatuique dant operam, pro cædibus patrandis adhibent, capite septimo: *Cur Abipones tam vegeti, & vivaces?* uberius egi. Fundam, cujus peritia egregia in Quaraniis commendatur, nihili faciunt Abipones. Pueri duntaxat ad terrendas, sternendasque aviculas illa utuntur aliquando. Isti & arcum habent, cui pro chorda tela est tres digitos lata, ex materia cannabi simillima contexta, hæc manu intenditur, & globuli ex argilla ficti sagittæ instar excutiuntur ad aves, feræve minutiores cædendas. Tubus ille ligneus (Germanis *Blasrohr*) ex quo globuli, vel clavi filis sericeis, vel lineis ad volatum juvandum instructi ore effiantur, ne de nomine quidem Abiponibus est notus; Usitatus tamen, ut audio, Indis quibusdam Peruvianis apud Moxos, ac Baures degentibus. Isti, clavis ferreis cum destituantur, spinas crassiores, succo ve-

nenato tinctas, tubo ligneo injiciunt, flatuque oris valido adversus feras, hostesque suos expellunt eo successu, ut exanimis videantur aliquamdiu, & impune a jaculatoribus interficiantur illico. Id sane non spinæ debilis, sed, quo imbuta fuit, veneni viribus tribuendum.

Clypeos, scutaque, quæ adversus hostes se tueantur, ignorant Abipones; Majorem tamen corporis partem thorace muniunt pugnaturi. Hic ex alcis corio non macerato paratus, tigridis pelle vel extrinsecus vel intrinsecus assuta horridus dalmaticæ vestis speciem refert; Apertus in medio, caput transmitti ut possit, utrinque ad cubitos & umbilicum usque porrigitur: Sagittis vulgaribus fere impenetrabilis, non item hastis, plumbeisque glandibus, etsi & istarum vim retundat aliquando, imminuatque. Thoraci cingulum palmo uno latius ex eodem alcis (quam Hispani *la gran bestia*, Abipones *Alalek*, Quarani *Mborebi*, vulgus Paraquariæ Antà appellat) corio concinnatum addere cæperunt, dum ducum suorum principem Debayakaykin circa ventrem hasta sauciatum videre. Hac armatura, quoties illis cum aliis Indis configendum, utuntur. Quam plurimi tamen corpus omnino nudum hostilibus telis exponunt, tantoque sibi videntur securiores, quanto ad fatales ictus declinandos fuerint expeditiores. Thorax ille siquidem quantum crassitudine sua defendit corpus, tantum pondere suo, ac duritie obest agilitati, in qua, ut apud istos fert pugnandi ratio, plurimum certe ad tuendam incolumitatem est momenti. Si contra Hispanos illis res fuerit, arcum, thoracemque suum negligunt adversus glandes plumbeas vix profuturum. In hasta firma, in equo celeri, in insidiarum astutia spem omnem victoriæ collocant; Raro

pedites, nisi necessitate compulsi, cum illis congregiuntur. Eminus malunt, quam cominus hostem invadere, cum vitæ suæ identidem timeant, caveantque. Punctim crebrius, quam cæsim feriunt. Quamvis plurimi enses habeant seu ab Hispanis emptos, seu bello ereptos, paucissimi tamen illis in velitatione utuntur. Postquam Abiponum armamentarium inspeximus, haud pigebit, opinor, eruditos audire, quibus nominibus illi arma sua, & cætera, quæ ad rem militarem pertinent, insigniverint.

Arcus. Netelranfè. Eodem nomine vocant sclopum. Derivatum videtur a *Nere*, quod tempestatem significat.

Arcus chorda. Netelranfè Lkacfhè.

Sagitta. Lanafhà. Idem nomen tribuunt glandi plumbeæ, quam etiam *Lpetà* vocant, quod granum significat.

Pulvis pyrius. Netelranfè leenfa, quod farinam sclopi denotat.

Hasta lignea sine ferreo mucrone, quæ Dardo dicitur ab Hispanis, Netergè, quæ vox reipsa arborem exprimit, ex qua hasta conficitur. Eadem hasta lignea etiam Lohetè ab illis appellatur.

Hasta cum ferreo mucrone. Catlaàn. Hæc vox etiam mucronem ferreum solum notat.

Culter. Latařan. *Illius cuspis,* Lapachik. *Acies illius.* Yleřà. *Manubrium seu capulus* Lay.

Ensis, vulgo *franea*, Kategaïk.

Bolas, seu tres globi lapidei Noaharhaï ankate,

Funda Kepakinianiät,

Macana, seu clava lignea. Yüelë vel Hepiginï ankate.

Thorax militaris. Loachimä,

Cingulum. Nalegë vel Naataïkië.

Galericulus globulis vitreis, plumisque ornatus, quo pugnaturi plerique caput tegunt, Letapehë, vel Ratahë.

Pluma avium elegantes Galericulti Laäkatë,

Fucus nigri, rubri, vel albi Celoris, quo pugnaturi vultum inficiunt Namenkä.

Tibiæ, cornua, variae Lituorum bellicorum species Lahaure.

Bellum. Anegla vel Nahamatfëk, vel Noelakiefëk. Nuichirierä.

Bellator, rixosus. Oelakiraïk.

Magnanimus. Yapöt, vel Ehoafäik.

Victor Oagenraïk.

Explorator, Speculator, Emissarius, Praecursor. Namalatenfaniäik, vel Ealraïk.

Miles Hispanus. Nauachèk.

Sagittarius Nainfanak. *Sagittarius peritus* Uychàk
Imperitus Patenfaik.

Locus pugnae Nahamatřalatè, vel Naloatřalatè,
vel Kimitřalatè.

Pugna Sagittariorum. Noàtärečk,

Pugna bastatarum. Nahamatřek, vel Noaarařanřek.

Pugna ebriorum, qui colapbis mutuis certant. Ne-
margetřek.

Bello captus. Loàk,

Timidus, *fugax*. Netachkaik. Natergèk. Yakalò.
Nematanřaik.

Belli dux Nelařeyřat,

Internecio, *strages* Lanamichiriñ Yoaliripì.

Spolia Retapřankatè, vel Auarařankatè.

Tympanum militare. Lamelgè.

CAPUT XXXVII.

De speculatoribus, consiliique bellicis
Abiponum.

Belli, ratio apud illos pro hostium varietate varia est. Dum adversus Hispanos militant, alia, alia, dum contra Barbaros sui similes, uti consuevere. Id tamen universum dici potest, eos præcipiti consilio nemini unquam bellum inferre solitos. Nisi spe victoriam devoraverint, arma capiunt nunquam. Quamvis, quod & Europæis toties usu venit ducibus, fallantur persæpe. Ubi lauros expectaverant, ferales cupressos messuerunt. Lanam quasituri (ut Hispanorum fert adagium) abiverant, sed tonsi redivere. Anceps semper belli fortuna. Priusquam expeditionem in alios hostilem decernant, solenne illis, speculatores præmittere, qui viam, qua eundum, stationem, ad quam affiliendum, penitissime explorent; Qui de incolarum, & qui his suppetias venire possint, vicinorum frequentia, de ædium accessu omnia cognoscant; Qui situm insidiis opportuniorem, loca, per quæ clanculum propinquare, ac si necessitas ferret, tuto se recipere queant; Qui pecorum pascua, custodum numerum, & cætera id genus minutissime speculentur. Et vero tam versute emissarii munere funguntur suo, ut, dum omnia viderint, a nemine videantur.

Equis vel per inaccessible fluminis litus, vel per
 sylvarum latebras tantisper relictis, ne sui indicium
 faciant, jam manibus, pedibusque ferarum instar rep-
 tantes, jam dumeta inter, jam arborum inter ramos
 latitantes eminus, cominusque observant omnia.
 Quid quod noctis obscuritate tecti ipsis quandoque
 Hispanorum ædibus propinquant, intusque colloquen-
 tium sermonem auscultando excipiunt aliquamdiu.
 Et si Hispanicæ linguæ nescii, saltem num viri, num
 foeminae complures istuc commorentur, ex verborum
 pronuntiatione conjectant. Per sua se vestigia ne
 prodant, assultusque hostilis ingerant suspicionem,
 pellium segmenta pedibus affigunt suis, qua quidem
 astutia humani gressus notæ aut dissimulantur, aut
 abolentur. Sæpe, ut res procul positas perspiciant,
 jam arboribus, jam dorso equi, ceu scabello, pedibus
 insistant. Raro unicus, bini plerumque, sæpe terni
 exploratores emittuntur. Hi noctu in varias se se
 vias distribuunt: Hac ille, iste illac excurrit. De
 statione, de tempore, quo rursus conveniant, pa-
 cisuntur. Stare pactis ut possint certius, jam avis,
 jam feræ alicujus voces e condito imitantur, e qui-
 bus alius alium agnoscit, ac denique deprehendit.
 Ast & hoc astu astute utendum; Si enim nocturnis
 horis vocem avis imitentur, quæ interdum duntaxat,
 non item noctu audiri solet, fictam esse a Barbaro-
 rum speculatoribus, experientia norunt Hispani, atque
 adeo tempestivis cautionibus hostilem subinde assul-
 tum eludent; Quin, si equus in promptu iis sit, ani-
 musque intrepidus, speculatores pedites nullo nego-
 tio assequantur. Id, quamvis perraro, accidisse, me-
 mini. Sæpe alias ramis arborum confractis, grami-
 ne altiori varios in nodos colligato se se jam ante-
 gressum socius socio significat. Nemo sane felicius,
 faciliusque exploratorum partes agit, quam Abi-
 po-

pones illi, qui olim pueri ab Hispanis bello capti, educatique fuere, quique adulti aut heri sui venia, aut fuga clam elapsi ad gentiles suos demum rediere. Præterquam enim quod ægriore in Hispanos sint animo, ac vindictæ sitientes, pro ea, quam nacti sunt, locorum, linguæque Hispanicæ peritia, impune in ipsis Hispanorum oppidis versantur, illorum amicos se se mentiuntur, quin, cum eorum lingua, amictuque uti soleant, pro Hispanis passim habentur. Hoc artificio securi vel in ipso meridie, publico in foro circumspectant omnia, omnia, quæ ad propositum facere putaverint, expiscantur; viros militares negotiorum causa absentes, vel ad iter propediem expeditos, plaustra copiosa mercibus onusta vident, quorum deducenda sint, audiunt, quæ subinde per immensas illas solitudines ab accurrentibus ad prædam barbaris facile diripiuntur, nemine aurigarum, custodumque cædem impediende; His parum armorum, minus animorum esse solet plerumque. Quantarum eladium instrumenta fuerint seu Abipones captivi ab Hispanis transfugæ, seu Hispani ab Abiponibus capti, nemo unus est, qui id ignoret.

Itinere defuncti exploratores postquam visa, compertaque rite suis nunciaverint, bellica consultatio simul, simul compotatio de more indicitur universis; Siccis equidem faucibus ad recte deliberandum haud satis sapere sibi videntur Abipones. *In vino*, ut Strabo de Persis affirmat, *de rebus gravissimis deliberant, & hæc firmiora putant, quam quæ jejuni statuerunt.* Eundem compotandi morem a cretensibus, Græcisque omnibus de belli, pacisve negotio consultantibus receptum fuisse, Iustus Lipsius testatur. Expeditionis suscipiendæ author Caziquius pocula inter sententiam promittit suam, cæterorumque hac super re opiniones

exquirat. Tum majorum exemplo, tum proposita
 Gloriæ, ac prædarum spe luculenta ad rem strenue
 gerendam excitat sibi assidentes. Propinato iterum,
 iterumque haustu ut corpora, sic Animos circum
 potantium mirifice accendit. Mulsum enim, quod
 ex melle, vel siliguis græcis admixta aqua conficiunt,
 vix primoribus labris delibatum vini meracissimi in-
 star caput petit, quod temulentorum vociferatione,
 cantu, tympani, cucurbitæque consonantis strepitu
 incredibiliter efferatur, & propemodum in furias agi-
 tur. Heroa avorum facinora, obtentæ olim victoriæ
 barbari carminis fere sunt argumentum. Cachinnis,
 si quod aliud usquam, dignum profecto spectaculum.
 Quot Abipones, totidem belli fulmina aspiceres.
 Quisque sibi Hector, Epaminondas, Hanibal videtur.
 Credique tales possent ab omnibus, qui eorum vul-
 tus sanguineis notis ad terrorem pictos, brachia, pectusque
 cicatricibus compunctum, oculos minaces
 aspexerint, truculenta, cædemque spirantia verba audie-
 rint. Quod si vero illorum pectora inspicere possent,
 videremus utique eos foris apparere aliud, aliud in-
 tus esse. Corticem sine nucleo, sub Leonis pelle
 Gallinas, sub verbis fulminantibus ignes fatuos, va-
 nas denique sine viribus iras detegeremus. Etsi sui
 impotes per solum repant temulenti, in Cælum juf-
 feris, ibunt. Orbis cardines convellent. Humanam
 gentem, quanta est, una si ei cervix foret, ictu uno
 cum caligula jugulabunt illico. Si, quantum illis mi-
 narum, dum potant, tantundem animorum esset,
 dum conflagunt, dudum, quotquot in America, Hi-
 spanos internecione delevisset. Sed nempe ebrui
 thrasones boni tubicines, ut quidam ait, mali mili-
 tes. Vox sunt, nil præterea. Inter pocula, & cho-
 reas Leones impavidi, in prælio leporibus fugacio-
 res.



Si quis Abiponum hostili occumbat manu, ut ardens est apud Americanos vindictæ studium, atque adeo legis instar, sanguinis propinquitate cum demortuo maxime conjunctus mortem ulcisci solet. Illius est vel populares, ac contubernales suos invitare, vel externos quoque ad armorum societatem vocare, in hostem ducere, & dum aggressio facienda, primum in aciem prodire. Sic filios Patrum, Patres filiorum vel nepotum necem vindicasse, vidimus. Ut opem ferre amicis nationibus, sic ab illis petere interdum solent, seu dum bellum parant ipsi, seu dum ab aliis metuunt, quibus se solos impares existimaverint. Verum enimvero, quod Europa experitur toties, parum sane roboris est, ac fiduciæ auxiliariis in copiis. Indorum maxime desultoria esse solet, ac fluxa amicitia. Cum enim, quæ cum vicinis iniverunt, fœdera utilitate metiantur, repente amicissimis terga vertunt, quavis emolumenti tenuissimi spe præponderante.



CAPUT XXXVIII.

De profectiōe in hostem, commeatu,
& castris Abiponum.

Illud memoratu dignum, expeditiones bellicas, quas temulenti statuerunt, a sobriis statō tempore executioni dari fideliter, quin eas vel procrastinandas putent, vel accelerandas, nisi forte casus subitus moram imperet, aut ponderosa ratio svadeat celeritatem. Ut ephemeridibus, sic dierum, mensiumque nominibus desituantur. Norunt tamen citra erroris periculum, quo die luna nascatur, quo adolescat, quo deficiat. His lunæ vicissitudinibus, ceu mensura temporis utuntur ad definiendas expeditiones, ut adeo, etsi multorum dierum itinere a se distent expeditionis focii, statuto confluant die, quin & ipsa, quam sibi præfixerant, hora eodem in loco jungantur. Quamvis enim horarum nominibus careant, ac instrumento earum indice, id digitis suppleant, quibus eam Cœli regionem commonstrant, quam id temporis vel sol, vel nocturnum aliquod sidus occupare consuevit. Dum exiguo jam cornu fulget senescens luna, id fere itineri opportunum judicant tempus, ut scilicet tenebrarum præsidio tutiores proficiscantur, observenturque difficilius. Pro reditu, si forte acceleranda fuga, noctes sibi luna crescente illustres præoptant. Adeo quid quid ad securitatem procurandam pertinet, acutissime provident, & ambabus manibus amplectuntur. Sub ipsum fere meridiem, sole plurimum

mum æstuante iter ingrediuntur, non uno agmine juncti, sed sparsi. Sub vesperum tamen in statione, quam condixerant, eadem conjunguntur.

In Europa bellum suscepturo Principi haud sufficiet plumbi, ferrique supellex; opus est auro, argentoque, quo commeatus, annonaria penus, copiarum stipendia procurentur. Nihil equidem istorum summo Abiponum Stratego curandum. Illorum quivis equis copiosis, hasta formidabili, arcu, sagittarum falce nunquam non instructus est. Unica hæc illis belli instrumenta. Demessa Hispanorum capita, abducta eorum ex prædiis equorum, mulorumque plura millia, rapti matrum e sinu filii, & quæ inde ad illos redit, clari apud suos nominis gloria Abiponibus militantibus pro stipendio simul, simul pro trophæis sunt. Etsi colonia, cujus aggressionem meditantur, leucas ducentis plures absit, binos duntaxat equos quisque præ se agit, tertio vehitur ita, ut alternis & laborent & quiescant singuli. Alienum a se putant annona onustos quantamcunque viam ingredi. Quod ad cibum, potumve faciat, asportant nihil. Olim assos cuniculos pro viatico habuisse dicuntur, necdum scilicet in venatione tam exercitati, & equis minus tunc instructi. Hac ætate hasta, quam manu gestat Abipon, feras, queis vescatur, obvias sternit. Si sylva fructus arborum neget, campus struthiones, struthionum uno in cumulo congesta ova innumera, apros, cuniculos, damas, cervos, leones, tigrides, radices edules, perdices, & quid non? Suppeditabit. Aer avibus, rivi, lacusque vario anatum genere, porcis aquatilibus &c. abundant. Tela in promptu sint barbaro, dapes nusquam deerunt. Solæ palmæ, quibus solum omne superbit, variam præbent cicam. Ut expeditior cuique venatus,

ttis, prædaque locupletior obtingat, nunquam turmatim incedunt, sed solutis ordinibus, ni propinqui hostis suspicio id dissuadeat, late per campum sparguntur, eodem rursus, ubi seu meridiandum, seu per noctandum, in loco colligendi. Norunt equidem stationes suas, ubi scilicet aquationis, lignationisque pro foco alendo opportunitas, &, quod præcipuum, ubi citra insidiarum periculum tuto delitescant.

Cucurbitas, taurina cornua, quæ in Paraquaria jam lagenæ, jam scyphi vices agere solent, superfluum sibi onus existimant. Aquam enim vel cavis manibus haurire, vel admotis labiis vertagorum more sorbere malunt, & si quidem dulcis fuerit, pro salerno potabunt. Sæpe stagna præsto sunt, & vasti gurgitis flumina, sed quorum unda sale prægnans, interdum sefe amarior stomacho torquendo, quam mactandæ fiti aptior, & ne ipsis quidem bestiis tolerabilis. Cultrum ferreum necessarium sibi itineris instrumentum putant, lapillum item pro illo exacuendo, bina adhæc lignella, quorum affricu mutuo vel equo insidentes ignem promptissime eliciunt. Solent enim campos accendere, ut feræ adulto sub gramine latitantes ignis metu profiliant, & ab illis cæsæ, assæque jam cœnam, jam prandium subministrent. Cotem, binaque lignella suis sub ephippiis abdita circumferre solent. En! his reculis Abiponum suppellex omnis definitur. Felices profecto, qui carere sciunt tot Sarcinis, tot plaustris, quæ in Europa ut ærarii hirudines, sic exercituum impedimenta & vocantur, & sunt haud dubie; Incredibile enim, quantum militem impediunt sive, dum assequendus, insequendusque hostis, sive dum fugiendus. Abipones nostri sub dio dies, noctesque agunt. Jam Cœli æstu torrentur, jam nimbis plures in dies productis lavantur. Nudum caput

ardentissimo soli obijciunt. Veste, quæ vel ex ovium vellere, vel lustrarum e pelliculis, humeros, pectus, brachiaque nudant, maluntque cruentis culicum morfibus semper excruciaci, quam aere caloribus exæstuante sudore diffluere. Cespes illis noctu pro culcitra est, ephippia pro pulvinari, Cœlum ipsum pro tecto. Splendidiusne usquam ullum belli imperatorem tentorium textit? Quisque suus sibi famulus. Neque ipse Ductor seu in apparando cibo, seu in equo infernendo aliena utitur opera. Si latissima, & quæ Istrum utique excedunt, flumina, si vasti lacus trajiciendi, haud illis ponte, haud cymba opus est. Vado desinente ex equis in aquam defiliunt; Nudi manu sinistra simul vestem suam, simul hastam sublimem gestant; Dextra, quæ equi pone natantis habenas gubernant, pro remo usi in adversum litus nando, confabulandoque eluctantur. Quod si rapida undarum vi abripi se patiatur equus, colaphis iterum iterumque impactis in viam reducitur, unde ripam humiliorem, cœni, ac arborum expertem, quæ exscensionem offert promptiorem, incolumes attingant. Si quando natandi diuturnitate fatigari se sentiant, arrepta equi cauda levantur. Peregrina hæc omnia Europæis, & quæ admirationem magis, quam fidem mereri videantur; Sed nobis, qui toties ea coram spectavimus, exploratissima omnino.

Ut primum iter auspicantur, speculatores quaque versus præmittunt quotidie, qui, si quod peregrinæ gentis vestigium, si quod insidiarum indiciumprehenderint, actutum denunciant compulittonibus. Stationem, ubi noctem agant, eam fere deligunt, quæ a tergo, a lateribus palude, flumine, vel sylva densiori præclusa accessum reddat difficilem hostibus,
ubi

ubi circumveniri non possint, possint tamen pauci multos repellere, certe, si id arduum, fuga eludere. Eo decumbunt ordine, ut semicirculum efficiant. Hastam humi defixam ad caput quisque suum, focum ardentem quaterni, vel quini in medio habent, nisi hostium metu latere malint, tenebrasque sibi præ luce plus expédire arbitrentur. sæpe ignibus nocturnis superfedendum diligenter, ne vel fulgore, vel fumo detegantur. Quamvis sæpe alias ad fallendos hostes profuit multiplicare focos; Ex horum enim numero pernoctantium istic hominum numerus sollet conjectari. Hoc certe astu clarissimus Cortesius, si rite memini, Mexicanis Barbaris scribitur imposuisse. Somno indulgentibus aliis alii designati excubitores campo late obequitant interea, tum ut equorum huc illuc per pascua vagantium, & jam culices, jam tigrides fugientium agmen coerceant, tum ut, si quid periculi ingruat, litui militaris clangore moneant, expergeficiantque commilitones, qui excubantium fidei, ac vigilantie vitam, incolumitatemque suam crediderunt. Et vero obstupui frequenter nostris in coloniis, quam impigre, quam fideliter excubitorum partes omnes impleverint. Noctes integras Cælo sæpe turbulentissimo adjacentes oppido campos percursarunt equites, quoties de adventante hoste vel leves rumusculi percubuerunt. Cornuum, tibiæque militarium stridore formidabili vigilare se se significabant identidem, ex quo cum hostes proditos se jam intelligerent, meditato assultu abstinerunt. Namque, ut Barbarorum mos fert, non nisi in imparatos, sui que securos audent aliquid. Toto, quod Abiponibus impendi, septennio expertus sum, quoties armati noctes insomnes transigimus hostium metu, ne umbram quidem hostium comparuisse; Nemine nostrum hostile quid suspici-

cante, Barbarorum examen formidabile coloniis nostris incubuisse. Nunquam plus timendus hostis, quam dum minime timetur.

C A P U T XXXIX.

De assultu, & quæ hunc præcedunt, industriis.

Suspiciendæ sunt, quas aggressioni præmittunt, anxie cautiones. Minutatim, quidquid accidere sibi posset, præmeditantur. Opinionibus ne fallantur suis, præstigiatorum suorum aliquem itineris socium, expeditionisque moderatorem sibi adsciscere consueverunt. Hunc, quippe quem & rerum futurarum præscium, & absentium conscium putant, identidem consulunt, ad insaniam usque creduli ceu Apollinem Delphicum venerantur. Ab ejus ore pendent omnes, ejus nutibus morem gerunt summi, ac infimi Romanis veteribus supersticiosiores, qui auguribus, aruspibusque non consultis nunquam ausi bellum auspicari. Præstigiatoris Prædictionibus eventus si haud responderit, nemo unus erit, qui illi succenseat, vel porro diffidat. Hallucinetur quotidie, luculenta spoliolorum portio, qua ejus mendacia Abipones remunerantur, illi obtinget domi. Si postridie facienda sit aggressio, centum oculis, quo loco res sint, circumspiciant, nec, nisi postquam periculo vacare omnia compererint, ad propositi executionem.

entionem animos adjiciunt denique. Loco extra hominum conspectum posito superfluum equorum agmen, ephippia item cum frenis relinquunt, adjectis eorum custodibus. Vultum vario ad terrorem colore inficiunt, ritu apud priscos Teutones, & plerosque Americae populos recepto. Ad augendam, ut illi quidem sibi persvadent, hostium trepidationem coronam e psittacorum plumis textam alii, alii gale-riculum e lana rubrum globulis vitreis, vel e lima-cum concha fictis relucens, nonnulli prægrandem alam vulturis capiti imponunt suo. Abiponem novi, qui pellem cervini Capitis cornibus horrentem suis cassidis instar vertici accommodabat suo, quoties pugnandum. Quidam rostrum avis Tunka concavum, & spithamam longum naribus suis illigaverat dimicaturus. Minus animorum illis inesse semper adverti, quos de adsciscendis formæ terribilis magis sollicitos observabam. Maxime intrepidi his neglectis nudi omnino, quamvis fucata semper facie, hostium tela expectant. Id tamen mos fert omnium, quod equo, quem quisque probatissimum habuerit, nudo seminudi insideant, frenique loco lorum ejus faucibus adstringant, pro habenis servitutum. Pondus, & quidquid equi retardare possit pernicitatem, rejiciunt, ut ad impetum seu faciendum, seu declinandum se videant expeditiores.

Tempus aggressioni suscipiendæ opportunissimum putant illud. quod, vel principium diei, vel extremum ita tamen, ut lucis tantum affulgeat, quantum ad res omnes oculo discernendas suffecerit. Sole enim aut recedente, aut jam jam redeunte domi plures, quos scilicet obtruncant, inveniunt, eosque somno fere oppressos, cum interdiu negotiorum causa, ubi ubi demum, extra ædes suas pleri-

que versantur. At enim alienis cædibus sub Auroram, vel vespere peractis cautiore denique Hispani periculosa habere ea tempora cæperunt, ac vigilantia cura Barbarorum prævertere molitiones. Qua re perspecta Abipones novo ut astu eos deluderent, de more, institutoque suo decedendum quandoque sibi putarunt, & sæpe sub meridiem nil tale suspicatos oppresserunt, quoties rei e voto gerendæ spes affulserat. Abiponum exemplo idem Mocobii, Tobæ, cæterique barbari præstitere adeo, ut in Abiponum coloniis quoque nullam diei partem eorum insidiis, vel insidiarum suspicionibus vacuam porro numeraremus. Horis tamen nocturnis vix audent invadere quempiam; Timent equidem tenebricosis in locis unum aliquem, a quo conficerentur, latere. Meum forte cubiculum, lumine destitutum noctu amice ingressi terrebantur illico, & : Quam nigra est tua domus *Kemen nenegin Greërigi*, vel *La naà!* *nenekáuvági* pavidum exclamarunt. Patente tamen in campo tenebras haud reformidant, dum equos abigere, excubare, campum speculari, &, quidquid sit, aliud agere illis collubatum. Ferocissimis Barbaris *oækakolòt*, quos vulgo Quaycurus, vel Linguas appellant Hispani, id peculiare est, quod præter aliorum morem noctu plerumque in colonias irrepant, sæviantque. Præmittere solent suorum aliquot, qui fudes ad loci securitatem terræ infixas evellant clanculum, ut cætero subinde agmini pateat accessus, incolis somno oppressis, nihilque minus quam eadem suis cervicibus impendentem somniantibus. Vel hoc nomine equestris hæc natio late sparsit terrorem. In nostris certe coloniis idcirco noctes innumeras est vigilatum. Arii, bellicosissima quondam Germaniæ natio, noctu

Et quoque præliari solebant, ut Tacitus refert: *Arii super vires, quibus enumeratos paulo ante populos anteceddunt, truces, instæ feritati arse, ac tempore lenocinantur. Nigra scuta, tincta corpora, atra ad prælia noctes legunt, ipsaque formidine, atque umbra feralis exercitus terrorem inferunt, nullo hostium sustinente novum, ac velut infernum aspectum; Nam primi in omnibus præliis oculi vincuntur.* Aggressionem porro non eodem semper modo exequuntur Abipones. Si colonia Christianorum invadenda, clanculum, viis incognitis, ac citra strepitum propinquant. Multiplici equitum ordine vias cingunt omnes, nullus ut relinquatur in colis effugii locus. Pedites alii contuberniorum portas perfringunt. Quod si id periculosum sibi existiment, eminus sagittis, quæ ardens Gossippium, aliudve stupæ genus præfixum, magno numero vibratis accendunt ædes, quæ, si stramento, vel materie tectæ, illico exardescunt, flammisque incolas involvunt. Quotquot incendii terrore extra tecta prosiliunt, hastis, telisque conficiuntur, certe, nisi pueri, ac puellæ, captivitatem non effugiunt. Qui domesticos intra parietes barbarorum metu se continent, misere cremantur. Certum, ut ut incredibile, barbarorum manus præ igne formidari magis. In oppido Jacobi Sanchez, urbi Correntinæ propinquo templum cum Sacerdote ad aram operante, Indisque fœminis, prolibus, ac viris pauculis (Cæteri enim rure occupati aberant) in cineres abiisse a Barbaris accensum, omnes novimus. Locum, ubi hæc olim peracta tragœdia, ipse, dum iter facerem, spectavi. Præter diruti oppidi vestigia & arbores manu confitas nil jam restat. Plures alii per Tucumanæ, Assumptionisque tractus coloni igne sagittis Barbarorum injecto, quam eorundem hastis consumi maluerunt. Obtruncatis, captisque omni-

bus, quidquid usui esse possit, abripiunt alias Abipones; Quin & plurima, quorum usum ignorant, ne Christianis porro prodesse, asportant vel confringenda mox, vel flumini injicienda. Memorabiliores strages, quibus universam prope provinciam annis superioribus funestaverant, loco suo dein' recensendas, hic prætermitto.

Si quando Hispanorum phalanges adoriri visum Abiponibus, equites hi præcipiti in illos cursu invaduntur non condensatis Europæorum more ordinibus, sed ita laxis, ut in varios divisi globos simul a fronte, simul a tergo, & lateribus eodem tempore contrarios premant, & protensa supra equi verticem hasta obvium quemque contrucidant. Vibrant ictum, sed ne recipiant, eadem, qua affiliere, velocitate resiliunt, mox resumptis animis in aciem iterum, iterumque redituri. Quisque sibi dux. Suum quisque sequitur impetum. Equum varios in gyros celerissime circumagere nōrunt, sibi que incredibiliter morigerum habent. Corpus suum ex equi tergo pedibus suspensum schœnobatis instar hac illac contorquent, jam, ne feriantur, sub equi ventre abdunt penitus. Hoc potissimum astu plumbeas eludunt glandes. Nam Hispani sclopo ictum destinantis oculos continua situs variatione fallunt, fatigantque. Statariam Europæi militis pugnam damnant omnes, illumque insanire dicunt, qui eadem in statione quietus persistat, pectusque suum, veluti metam, advolantibus globis ultro objectet. Suam in affiliendo, resiliendoque promptitudinem saluberrimum bellicæ artis documentum, pleno ore affirmant. Barbarorum volubilitatem, ac ingenium qui rite noverit, nunquam in illos sclopum exonerabit, spes nisi certa alicujus feriendi appareat; Postquam enim

enim innocens sclopi tonitru citra ullius suorum stragem audierint, excusso armorum Europæorum metu plus audebunt scilicet. Quamdiu te sclopo intento minitantem sibi aspexerint, male sibi metuent, de se servandis, quam de necandis alijs magis solliciti.

Præproperam, temerariamque in sclopo explodendo festinationem multis exitio, circumspiciam, providamque cunctationem salutis fuisse plurimis, nostræ ætatis exempla docent. Iuvat aliqua horum perstringere. In Sancti Jacobi de floreæ territorio Abipones sub auroram ex rupe præcipiti, ac salebrosa, quam nullus unquam pes hominis, nullus equi calcaverit, equites repente delapsi Hispanorum oppidum (las barrancas appellant) invaserant, neque arduum illis fuit negotium, dormitantes incolas jugulare. Hilarius centurio, mihi paucis post annis perfamiliaris, tum Barbarorum ululatu, tum ejulatu lugubri morientium expergefactus domus suæ limen occupat, sclopo in hostiles manipulos semper directo. Nemo unus omnium ausus est illi imminere. Vel hac sola fulminis comminatione se, suamque servavit filiulam, tot inter vicinorum funera superstites. Stationem, ubi hæc acta, idem centurio transeunti mihi commonstravit. Hispanus alter in agro urbis Correntinæ dum aream domus suæ sudibus obiter munitam Abiponum agmine cingi videt, sclopum illis (quid si pulvere nitrato vacuum?) obvertit, jam his, jam illis minitans. Ad frustrandum, quem destinaverant Barbari, assaultum, satis id, superque fuit. Centurionem novi, cui Gorosito nomen, Jacobopolitanos inter milites optime meritum. Sclopo is utebatur, e quo scintillam

nunquam expectaveris. Cur illius reparationem non illico mandaret? roganti socio: Haud sibi necessariam videri, reposuit. Satis est, ajebat, sclopo et si inutilem ostentari Barbaris, quippe qui solo ejus aspectu terreantur. Neque enim illum vitio laborare, intelligunt. Se inutili hoc sclopo instructum velitationibus non paucis & impune & gloriose interfuisse. Neque opus est mihi alienis experimentis, testimoniisque. Ipse ego sclopo armatus, quin eum vel semel exproserim, irruentium Barbarorum turmam toties per septennium absterrui adeo, ut sacra ædiculæ, Domusque meæ sepibus ne propinquare quidem audent, minus vim inferre.

E contrario quam res sit plena periculi, sclopos inconsulto exonerare, tum sæpe alibi, tum potissimum, me in Paraquaria agente, in recenti quadam Indorum colonia, ubi pauci milites præsidarii ob crebras Barbarorum incursiones Tucumanæ finibus invigilaverant, experti sumus. Oppidulum hoc Mataguayi rebelles omni telorum genere sub vespertum invasere. Milites in subita trepidatione, quidquid fistularum ignivomarum fuit, adversus Barbarum agmen exonerarunt, at suo, non hostium damno; Hi enim, nullo ad onerandos porro sclopos spatio concesso, inflammatis stupæ ardente sagittis domos accenderant, militesque inde in aream profugos hamatis telis confixere, præcisa undique effugii opportunitate. Bini Sacerdotes nostri, qui sacra ibi curaverant, Franciscus Ugalde Cantaber, & Romanus Harto Navarrus, florentissimæ ambo ætatis, mei quondam Cordubæ contubernales, dum & morientium militum salutem, & vitæ suæ consultum ibant, eadem inter domus septa Barbarorum furorem senserunt. Primus equidem telis lethalibus saucius, moxque con-

conflagrantis sacrae ædiculae ruinis sepultus in cineres
 omnino abiit unico ejus officulo superstite, cui sub-
 inde alibi in templo parentatum; In Cœlum quoque
 abiisse visus est omnibus, qui eximiam ejus religio-
 nem, suavissimamque morum integritatem semper
 suspexerant. vitæ illius historia Matriti typis edita,
 Viennæ Austriæ in latinam linguam traducta est.
 P. Romanus Harto primi socius. (Eadem mecum
 navi Ulyssipone in Paraquariam translatus) duabus
 licet sagittis lateri alte inhærentibus vulneratus noctis sub-
 sidio e domus sepibus in propinquam sylvam reptans
 & barbarorum oculos, & mortem evasit. Sanguini
 innatans suo, vulnere dolore, & quæ inde enascitur,
 siti acerbissima excruciatu noctem arbores inter
 sub dio egit, fœdissima tempestate, nimbo, turbine,
 tonitribusque horrendam. Qui opem ferret, nemo
 unus mortalium præsto fuit. Albescente Cœlo in
 campum prorepens militem, qui pridie equo pro-
 fugerat, Numinis singulari beneficio conspexit, a
 quo equite ad Hispanos, longissime distantes tandem
 deportatus, persanatusque fuit. Quznam, amabo,
 tot funerum causa, tantæque tragœdiæ origo exstite-
 rat? Militum pauculorum in sclopiis vacuandis in-
 tempestiva festinatio. Inanis strepitus solum aerem
 feriebat, Indisque animos addidit, ut seposito me-
 tu audacius irruerent, Hispanisque tempus ad sclopos
 implendos necessarium negarent. Pluribus pulvis
 nitratus, quo uterentur jam, defuisse, dicebatur præ-
 terea, omnibus animus, subito Barbarorum adventu,
 habitationum incendio, ac tot funerum subinde aspe-
 ctu incredibiliter consternatis. Prompte, sed
 provide Barbarorum impetus est reprimendus. Uten-
 dum celeriter armis, sed reservandum semper ali-
 quid, quod subitis belli casibus subsidio esse queat.
 Indi enim in omnem nocendi occasionem intenti
 nullo

nullo negotio opprimunt seu inermes seu armis perperam utentes. Hinc si triginta milites catapultarii stationis defensionem suscipiant, in tres dividantur classes, oportet ita, ut decem catapultas in hostem irruentem exonerent suas, decem onerent, totidem alii oneratas reservent. Qua ratione si alii aliis jaculando successerint, illis implendi catapultas tempus semper suppetet, & Indis nunquam deerit causa metuendi. Id si sibi cordi sumpserint documentum, nã? triceni catapultarii trecentis Americanis fugandis, fundendisque pares se experientur. Quod si trecenti jaculatores eodem omnes tempore sine aliqua hostium strage catapultas solverint, a triginta barbaris superabuntur, ni forte in destinando ictu feliciores illorum aliquot stravissent. Abipones equidem, ut cæteri Americani plerique, visa sociorum aliquantula cæde, qua qua possunt, elabuntur. Provincia, quanta est, illis fugientibus angusta videtur. Adversus avium arbori incumbentium catervam glaudes plumbeas vibra. Si modo binas, ternasve straveris, satis est. Avolabunt cæteræ. Sic uno, alterove Barbaro occumbente, reliqui omnes exterri pedem referent actutum. Adeo vitam suam præ quavis victoria pluris faciunt. Quid igitur causæ esse, putem, cur passim ab exteris metuantur? Dicam,

CAPUT XL.

Quibus modis formidabiles se reddant
Abipones, & quando jure formidandi sint.

Natura meticolosi cum sint, arte formidabiles se reddunt. Innatam aliis magnanimitatem Barbari jam strepitu buccinarum, jam insidiarum astutia, jam incredibili velocitate, jam fucata ad terrorem facie, jam hirsuto versicoloribus plumis capite supplere conantur. Abipones certe, ut sæpius memini, sive invasuri alios, sive ab aliis invadendi his artibus uti consuevere, quas illi hostis territandi instrumenta existimant, ego rectius nativi eorum timoris argumenta sum interpretatus. Variarum avium plumis jam cristæ instar erectis, jam coronæ speciem referentibus caput insigniunt, ad pugnam, veluti ad nuptias ituri, & jam de victoria certissimi, qua quidem fiducia observata hostem animos desponsorum arbitrantur. Hæc plumis ornandi capitis consuetudo ut antiquissima, sic populis prope omnibus communis est. Galearum apicem plumis varii coloris veluti cristatum passim videmus. Hinc illud Virgilii 12. l. Æneidos: *Tum Galeam Messapi habilem, Cristisque decoram induit*. Et aliud alterius poetæ: *Galeam quassabant rubra minitantem vulnera Crista*. Quid quod Cymbri. Teutonæque præter volucrum pennas hiantes, belluarum ferocium fauces galearum suarum cono adjecerint, ut

ut in acie truculentiores viderentur. Hunc sane in finem pyrobolarii Europæi, flos peditatus, mitram ursina pelle horrentem; Equites quoque petasum plumarum fasciculo insignem gestare solent etiamnum. Si Jovio historico credimus: *Cassanus Bassa* (qui quindecim millium Turcarum ductor Austriam superiorem est depopulatus) erat inter omnes insigni *Crista* conspicuus. Fuit ea ab aurea vagina in fronte exsurgens ala vulturis, quæ ut ab omnibus nosceretur &c. Ab aliis historicis non *Cassan*, sed *Hassan Bassa* appellatur.

Plumis fucum adjiciunt dimicaturi Abipones. Nam vultum jam albo, jam purpureo colore inficiunt, sed plerumque atro: Fuligo, quam ex ollis, cacabisque radunt, id præstat officium. In itinere, nulla ubi fuliginis copia, ignem excitant, ejusque fumo, ac carbone comminuto ad se tingendos utuntur. Fructus arboris, quam urucuÿ dicunt Quararii, rubrum colorem præbet, etiam lanæ tingendæ utilem. Materia, qua subitis in casibus se pingerent, deficiente, linguam spina pertundunt, sanguineque ubertim profluente faciem imbuunt suam. Haud eadem omnibus figura. Hi solam frontem, illi unam maxillam, alii utramque infuscant. Sunt, qui retortis in spiram ductibus totum, quantus est, vultum exarant. Nonnulli oculos duntaxat duplici circulo insigniunt. Aliqui atrata penitus facie æthiops mentiuntur. Larvas stygias illos putares, & Plutonis ex aula. Vel quotidiana consuetudine mihi familiarissimos haud agnoveram, dum propinquantem oppido hostem repulsuri tanta colorum varietate se contaminavere. Hic quoque mos populis cæteris Paraquariæ, maxime equestribus quotidianus, imo & præscis Germanis, quod ex verbis, quæ superio-

rioni capite, recitaveram, Taciti liquet, qui ait: Arios noctu præliari, nigris scutis uti, corpora sua coloribus tingere, ipsaque formidine atque umbra feralis exercitus terrorem inferre, nullo hostium sustinente novum, ac velut infernalem aspectum. Nam primi in omnibus præliis oculi vincuntur.

Non oculis modo hostium, sed & auribus terribiles se reddunt Abipones. Velitationibus equidem lituis, tibiis, cornibus, buccinis ut sono, sic materia, figuraque discrepantibus præludunt. Corneæ remugiant, clangunt lignæ, osseæ, ex tibia majuscularum avium, vel bestiarum quodrupedum paratæ, acutissime sibilant. Arundinæ absurdum edunt stridorem. Facti ex cauda animalis (quod Hispani *armadillo*, Quaranii *Tazû*, Abipones *Yauiklaip*, vel Katoisfaik, vulgus Paraquariæ *Kirikinschû* vocant) undique Cataphracti, præfixa arundine litui militares non aures modo, sed omnem latissime auram complent fragore horribili. Verba me deficiunt buccinarum singularum fabricam, usumque explanare cupientem. Illud certissimum, quot milites, totidem buccinatores Abiponum in acie numerari. Horrifonis his classicis ululatum consociant Barbarum, quem admota labiis, celeriterque identidem retracta manu ciere nôrunt. Huic affine videtur, quod Tacitus de Germanis præliantibus memorat: *Affectatur præcipue asperitas soni, & fractum murmur objectis ad os scutis, quo plenior, & gravior vox percussu intumescat.* Audi & Ammianum Marcellinum libro 16: *Cornuti, & Braccati usu præliorum diuturno firmati eos jam gestu terrentes barritum civere vel maximum; qui clamor ipso fervore certaminum a tenui susurro exorians, paulatimque adolescens extollitur ritu fluctuum cautibus illis.* Ab utroque authore ululatus ille militaris commode ex-

pri-

primitur, quem Abipones oris iterata percussione edere consueverunt. Cæterum fervente pugna vociferatio cunctis prope nationibus solennis fuerat. Polybius: L 15. *Romanos more patrio in prælio simul vociferari, & gladiis ad scuta allissi strepitum edere, testatur.* Huic consonat Cæsar 7. de bello Gallico: *Hostes committunt prælium utrinque clamore sublato.* Turcæ etiamnum inconditis clamoribus illud suum: *Allaba Schikir* laudetur Deus, repetunt, in oppositam sibi aciem quoties incursant. Timentur a novitio milite, a veterano, qui arti militari, & experientiæ suæ confidit, ride tur. Abipones turmatim irruentes elata voce clamitare solent: *Labaràlk! Labaràlk.* Eamus, Eamus, uti Quaranii ad strenue agendum se se hortantes. *Yabà! yaba.* Mokobii: *Zokolák! Zokolak!* Hispani: *Vamos,* vel *Vamonos!* idem aliis vocibus repetunt hostem aggressuri. Galli: *Allons! Agite.* Euge iterum, iterumque pronunciant pleno ore. Quamdiu configunt Abipones, tum ad declinanda, tum ad destinanda tela oculos in omnem partem circumferunt, raucoque gutture, crispata veluti voce minitabundi illud identidem pronunciant: *Hò-Hò-Hò-*quo hostem provocare, seque ipsos ad iram accendere, contendunt. Europæis etiam in castris tubarum, tibiarumque clangorem, tympanorum boatum ad animandum, gubernandumque exercitum simul, simul ad hostem terrandum adhiberi, extra dubium est. Plures tamen victorias silentio, quam strepitu partas fuisse, ut nostra ætate, sic olim, nemo unus inficiabitur. Hoc utinam sibi cordi fumerent Hispani Paraquarienses, quibus perinde, ut Barbaris, solenne est, vociferando assultum auspicari. Franciscus Barreda Hispanus in provincia Bætica natus, Regii Tucumanie Gubernatoris in S. Jacobii territorio triginta circiter annos vicarius, vir
rebus

rebus præclare gestis clarissimus mihi crebro conquestus est: Nunquam se a suis impetrasse militibus, ut Barbarorum contubernia invadentes Vociferatione abastinerent, iisque taciti per insidias imminerent, ne vel fugam capere possint, vel arma, dum imparati opprimuntur.

Bellator prudens hostilem strepitum, qui pugnam vel præcedit, vel comitatur, serena excipit frontē, spernitque, probe gnarus, tubarum, tympanorumque quamvis horrifico sonitu aures duntaxat, non corpora feriri. Dolendum maximopere, atque adeo mirandum est, Abiponum terribiles visu formas, ac vociferationem inconditam sic formidari a barbatis etiam Paraquariæ colonis. Non solum eorum oculos, auresque percelli, sed & animos adeo turbari, sæpe vidimus, ut jam sui impotēs non de præfidiis cogitent, quibus vim vi repellere, sed opportunitatem, qua fugam tuto capere possint, anxii circumspectent; Qua quidem ratione vitæ interdum consulunt suæ, famæ, ac securitati non item. Tanto enim audentiores indies evadunt Barbari, quanto impudentius formidantur, fugiunturque. In ipsis toties urbibus trepidatum est, dum Abipones atrata facie truculentos, toto corporis habitu terribiles, equis pernicious advolare, ferales inter buccinarum stridores vociferari, dextra immanem jactare hastam, sagittarum fascibus onerari, eadem anhelare, spirare incendia, trecentas mortes, captivitatem, vulneraque ferocibus oculis minari vago solum rumore, & sæpe vano intellexerant incolæ. Vidisses ultro, citroque concursantium greges, & proximam sibi mortem lamentantium hoste, a quo trucidentur, necdum vel eminus conspecto. Non imbellis modo sexus, sed viri etiam militaribus titulis insignes ad

templa lapidea, abstrusissimas in latebras convolarunt, qui si frontem, sclopumque hosti obvertissent, terror omnis Panicus, fugatis levi negotio barbaris, in risum erat desiturus utique. Sola interdum de Barbarorum vicinitate fama trepidationis publicæ origo fuit. Ante annos haud plurimos in Boni aeris metropoli forte vulgabatur sub meridiem die Dominico, Barbarorum Australium, quos ibi Serranos, Aucas, vel Pampas vocant, numerosum agmen in urbis, nescio, quam plateam irruisse. Conceptus ex falso rumore timor adeo animos omnium occupaverat, ut prope alienata mente, obcæati terrore, delirantium instar calles omnes percusserint, impleverintque mæsto clamore. Barbarum enses eorum cervici jam admotum, de vita conclamatum esse, jurasses. Nonnulli ad loca tutiora properantes ob violentam cursitationem capillitii, petasi, pallii jacturam fecere. Hæc inter equites præsidarii, qui urbem omnem lustrarent, missi Barbarorum nec umbram, neque ullum extare vestigium, renunciarunt. Quo audio turbatis incolarum mentibus serenitas rediit, nemineque fuit omnium, quem vani terroris non pudeisset, poenituisseque. Ejusmodi spectacula, Barbaris impune per provinciam Grassantibus, in sanctæ fidei, Cordubæ, Assumptionis, salta &c. urbibus quotidiana, certe frequentissima fuerunt. Vulgus enim timidum, quidquid rumor incertus afflavit, pro certo habet, & ubi tuta omnia, periculum suspicatur. Illud, quod in correntina urbecula accidit, præ aliis memorabile, ac risu dignum. Abiponum catervam irruisse, ac in platea, cui a rosis nomen, cædibus jam jam occupari, sub vesperum repente fama percubuit. Nec mora: Maximi ad templum nostrum, muris saæxis validum, fiebant undique concursus. Ipse (cognomen illius, ac filios novi) supremus armorum præ-

præfectus, sed jam vetulus, vetularum complorantium turbæ immixtus gemitibus illic, ac precibus indulgebat. Hic, hic, aiebat, in divinis ædibus, in Jesu Christi præsentia moriendum est nobis. Has militis minime militares voces indignatus Presbyter sæcularis, qui forte advenerat, homo ætate florens, & strenuus: Juro per Christum, reposuit, haud quam nobis moriendum est. Quærendi sunt hostes, & mactandi. Hæc ait, & fulminis Ocyor alis in obvium equum infilit, sclopo armatus ad eam urbis stationem, ubi Abipones sævire jam dicebantur, excurrit opis ferendæ studio. Ast en! universos illic incolas pacatos, quietos, alte dormientes, nihil de Abiponibus somniantes deprehendit, rumorisque terrifici falsitatem trepidantibus adhuc in templo cæteris subinde detexit. Viden', quantum sæpe terrorem Abiponum non forma modo, ac præsentia, sed etiam fama Paraquariensibus injecerit, obscuris licet authoribus sparsa.

Duo, mihi longo rerum usu exploratissima, omnium animis alte impressa vehementer cuperem: Indos nunquam formidandos minus, quam dum maxime terribiles, majorique cum strepitu spectandos se se præbent. Horrificus enim ille, dum affiliunt, Barbarorum apparatus eorum timiditatem prodit. Virtuti suæ, viribus, armisque diffusi fucum varii coloris, avium plumas, buccinas, vociferationem, aliaque, quæ sibi adsciscunt, terricula victoriæ adjumentum fore, opinantur. Verum vel mediocriter animosus quisque, & obiter armatus illa omnia metu dedignatur suo, & cœu futilem umbram intrepidus contemnit. Id primum. Nunquam plus timendos Indos, quam dum nobis timere videntur, id alterum quod affirmo, documentum. Latent quandoque,



tacent, nullum sui indicium præbent. Hoc silentium, ut malacia imminentis procellæ in Oceano, agressionis proximæ prognosticon esse solet. Præsto erunt propediem, & sui securos repente oppriment. Mortem, cujus ministri sunt, imitantur. Adiunt, quando minime expectantur. Hinc suspectiora semper illa tempora, locaque, quæ omni vacare periculo videntur. Fervente pugna in præcipitem se sæpe fugam effundunt Abipones eo potissimum consilio, ut Hispanos ad sui insectationem pelliciant, & quo integris non poterant, turbatis mox ordinibus divisos contrucident. Inde factum non raro, ut qui victores sibi videbantur, victi fugitivis succumberent. Rationem hujus assignat Vegetius L. 3. cap. 22. *Quia adversus fugientes major audacia, & minor cura est. Necessario autem amplior securitas gravius habere solet discrimen.* Cautissime igitur premenda Abiponum fugientium vestigia. Qui terga vertere, iidem protinus frontem, hastamque se insectantibus obvertent Parthorum more, de quibus Justinus L. 41. *Cominus in acie praeliari nesciunt, obsessasque expugnare urbes. Pugnant aut procurrentibus equis, aut terga dantibus. Sæpe etiam fugam simulant, ut incautiores adversus sua vulnera insequentes habeant.* - - - *Nec pugnare diu possunt. Cæterum intolerandi forent, si quantus his impetus est, vis tanta, & perseverantia esset.* Plerumque in ipso ardore certaminis prælia deserunt, ac paulo post pugnam ex fuga repetunt, & cum maxime vicisse te putes, tunc tibi discrimen subeundum sit. Justinus de Parthis scribens bellissimam Abiponum dimicantium imaginem efformavit, qui sane Hispanis multo periculosiores, dum fugiunt, quam dum in acie configunt. Ad paludes, ad sylvas, ad viarum anfractus, ad montium fauces, ad saxeta, vel dumeta fugiunt, quæ quidem loca equorum habilitate confusi, nandi, equitandique eximia peri-

peritia adjuti promptissime transmittunt, ubi Hispani insequentes, dum vestibus, sarcinulisque suis impediti, equis idoneis sæpe destituti cum aqua, cœno, aliisque viæ salebrosæ asperitatibus luctantur, in manipulos divisi nullo prorsus negotio hastis confodiuntur. Non raro, ut alios taceam illorum astus, edita jam strage, ædibus jam spoliatis, cæsisque incolis abitum fingunt Abipones, fugamque accelerare videntur. Dum multas eos abesse leucas credideris, assultum repetunt, superflites Hispanos, qui periculo se defunctos putaverant, repente opprimunt, & quotquot possunt, obtruncant. Ut adeo certissimum sit: Nunquam plus timendos Barbaros, quam dum timere videntur. Et meo toties, & aliorum experimento doctus id usque affirmo.

Hispanis ut ut plurimis pauculi Abipones metuendi sunt, si in angustias redigantur, clausi undique, effugium illis nullum ut supersit; Tum enim vero ad se se tuendos extrema audent. Quidquid præ manibus, in arma convertunt. Mortis timor in furorem, sanguis in bilem abit. Trepidatio sagacitatem inspirat, animosque, & hinc præ quantavis magnanimitate reformidanda. Nolunt inglorii, neque sine multorum mortibus mortem oppetere. Rectissime sentit Vegetius L. 3. cap. 22. *Clausis ex desperatione crescit audacia, & cum spei nihil est, sumit arma formido.* Ad id comprobandum plura mihi in promptu sunt experimenta; ed tria commemorasse sufficiet. Abiponum quispiam, cui adstans conjux sagittas, & his consumptis, obvios stipites ministrabat identidem, a Jacobopolitanorum militum corona cinctus tantum negotium facessiverat unus omnibus, ut non nisi post accepta, inflictaque multis multa vulnera eadem in statione persistens tandem occubuerit, Hispanis, qui



qui sauciati fuerant, ipsis Barbari constantiam mire prædicantibus. Per Paraquariæ colonias late sui nominis terrorem sparsit Nachiralafin Abiponum Yaukanigarum ductor, Hispanorum Cæde quam genere apud suos illustrior. Illius assecclas seu contubernales a Cæzio, vel Glauco oculorum colore *Los Sarcos* (Retius dixissent *Los Garzos*) vulgus appellabat. Istorum caterva stipatus Nachiralafin cordubensem, santafesinum, Correntinum, Paraquayensem agrum per annos complures cædibus, latrociniiisque vexavit, dum denique ad Tebiquarÿ litora a ducentis circiter ex Assumptionis urbe militibus deprehensus & mactare, & vivere desit. Quatuordecim cum sociis Abiponibus in sylva clausus, obsessusque Hispano agimini ea se se per tinacia objecerat, ut non nisi post horarum aliquot certamen succumberet, occumberetque. Impediri tamen haud potuit, quin commilitones illius aliquot fuga elaberentur. Hanc qualemcumque victoriam ab iis, qui velitationi interfuerant, verbis magnificis toties, quamvis nunquam sine nausea, celebrari audiveram; De cruentis ad lacum Thrasumenum, ad Furcas caudinas, ad Höchstadium, ad Nördlingam &c. præliis eos sermonem habere, dixisses, Certe Fulgentius de Yegros reliquorum Dux & fausta illa expeditione incredibilem nominis celebritatem consecutus, ad summos subinde in militia honores, & ad ipsius provinciæ præfecturam est evectus. His adde: Viceni Abipones sylvestres, dum in patente campo ob patrata latrocinia a trecentis partim Mocobiis Christianis, partim Abiponibus adhuc catechumenis invadebantur, vitam, quam stationem suam deferere maluerunt, vel ex acie pedem referre. Fidem superat, quanta pertinacia a paucissimis contra multos fuerit decertatum. Locum, quem sub velitationis principium ceperant, mortui ad unum omnes occu-

parunt. Ychameniaikin, quantum nomen apud Abipones! totius agminis ductor prima mox aggressionem sagitta vulneratus victoriam morte sua funestavit. Ex quo palam fit, paucos licet, licet numero, armis, ac viribus inferiores, multitudini timendos esse, si a circumstante agmine cincti, locorum angustis ita compressi fuerint, nullus ad fugam exitus ut pateat. Cum moriendum sibi esse videant, desperatione rabidi nolunt inulti mori. Vindictæ ardens studium e timidis audaces reddit, illisque pro armis est. Hinc vitam, cujus spem abiecere, non nisi multorum mortibus venalem offerunt hosti. Ipsæ adeo tigrides, dum illarum fuga intercluditur, sæviunt atrocius. Sapienter existimavit scipio: Hosti fugienti viam esse indulgendam. Huic monito morem gerunt plerumque Hispani Paraquarienses, sæpeque liberalius, quam conveniat, Barbaris effugii libertatem concedunt, indignantibus quamvis eorum tribunis. Franciscus Barreda, paulo ante a me laudatus, in tricenis, quibus dux præfuit, in Barbaros Abipones, Mocobiosque expeditionibus id expertus fuit. Hi locorum, ubi sua habeant contubernia, opportunitatem captant sagaciter. Fere situm deligunt, ubi vicinam sylvam a tergo, lacum, rivum, vel paludem a fronte, campum pro equorum pacis a lateribus videant, Ejusmodi Abiponum contubernia quoties invadenda fuerant, imperasse se suis (Ajebat mihi dictus Barreda) ut illa ex ea parte, qua sylvam respiciunt, cingerent, ne suam ibi securitatem Barbari more suo invenirent; Ast milites suo impetui nunquam paruisse, querebatur, probe gnaros, sublata fugiendi opportunitate periculosissimam sibi cum hoc hostium genere dimicationem, victoriamque admodum dubiam fore.

CAPUT XLI.

Quinam Hispanorum militum nomine.
veniant in Paraquaria.

Quoties militum Paraquariensium mentionem facio, de militibus legionariis, & bellica disciplina imbutis me loqui, cave, existimes. Tales enim seu pedites seu dimachæ ad litora solum fluminis argentei stativa habent sua, castrorum Boni aeris, & Montevideo urbium præfidiarii. Equites ad Barbaros Australes arcendos, coercendosque sæpius excurrere jubentur, Pedites navibus impositi clandestinam ventarum mercium nundinationem argenteo in flumine impediunt. In cæteris amplissimæ Paraquariæ coloniis coloni ipsi militare solent, dum hostiles Barbarorum incursiones vel detinendæ, vel in eosdem suscipiendæ fuerint. Quodvis territorium singulorum urbium aliquot tumultuarii militis centurias, centuriones, ac procenturiones numerat, quibus singulis Magister campi (Maestre de campo) & summus excubiarum præfectus (sargento mayor) præest. Omnium moderator, & archistrategus est Gubernatoris vicarius, qui pariter summus iudex, quod Hispani his verbis exprimunt: *Theniente de Governador, justicia mayor, y Capitán a guerra*. In quavis præterea urbe centuria est, quam centuriam centurionum emeritorum *la compañía de Los Capitanes reformados* appellant. Istorum est Gubernatoris vicarium, quoties

expe-

expeditioni interest, comitari, ejusque veluti prætoriani milites reputantur. Multi horum honorarii sunt solum, quia centurionum, imo nec militum partibus unquam functi. Hunc sibi titulum emunt, ut eximantur belli oneribus. Nam solum, dum Gubernatoris vicarius ad bellum proficiscitur, excurrere debent. Cæteri quique vel a Regio Gubernatore, vel ab ejus vices agente ad expeditiones bellicas evocantur. Nullum illis a Rege stipendium, aut vestimentum. Suis quisque armis, equis, ac cibariis instructus militat, quoties, & quamdiu præfectis visum.

Hispanos militari virtute præstantes, semper strenuos, acerrimosque bellatores omnis ætas, omnis provincia experta est. Qui veteris, novique orbis historias pervolverit, eximia eorum facinora ignorare haud potest. Hispanis heroibus enumerandis nulla arithmetica, celebrandis nulla rhetorica par esse videtur. Ingenio prompti, manu strenui, ad belli labores impigri, in periculis terra, marique intrepidi, cæli cujuscunque, ærumnarumque patientissimi, animi magnitudine nemini secundi ea ubique terrarum patrarunt, quæ majorum expectationem, posteritatis fidem, & prope humanas vires excedere videantur. Nil exaggero Hispanorum laudes, vel merita. Tot illa sunt, tantaque, ut verbis a me æquari neutiquam posse, potius doleam. Reportatæ de bellicosissimis nationibus victoriæ, subactæ bello provinciæ, amplissima, opulentissimaque Americæ portio sub jugum missa Hispanæ fortitudinis testimonia, monumenta, & ut verbo dicam, trophæa sunt luculentissima. Invadere ista vicinæ gentes poterunt, negare nunquam, nec eripere. Injurius sit nobilissimæ, & militaris rei gloria florentissimæ nationi, qui secus sentiat. Binis, & quod excurrit, decenniis Hispanos inter in America sum

versatus ; Annis totidem eorum strenuitatem, sagacitatemque suspexi. Ne per ea, quæ de Paraquariensi militia optima fide scripsero, Hispano nomini labes aspergeretur, pauca hæc præfari visum est.

Haud omnes, qui in Paraquaria Hispanam originem jactant, Hispanorumque honorifico nomine gloriantur, re ipsa Hispanos esse, quis ignorat? In tanta gentium variarum colluvie permulti sane ex æthiopibus, Mauris, Indis, matreque Hispana, aut vicissim prognati, aut mixto ex iis omnibus sanguine oriundi Hispano nomine abutuntur, factis tamen ab Hispana strenuitate alienissimis ad aliud hominum genus se se pertinere identidem produnt. Flavescens, obscuriorve vultus color, imberbe mentum, crinium lanefcentium cacabo nigriores cincinni originis vel Africanæ vel Americanæ multos certissimo argumento convincunt. Hispani Europæi alteri in Paraquaria nato indignantes per contemptum dicere consueverunt: *O es del Ynga, o del Mandinga*. Ortus est ex majoribus vel Indis, vel Afris. *Ynga* enim Peruvianorum Rex appellabatur quondam. *Mandinga* Nigritiæ in Africa trans flumen Nigrum provincia est. Innumeri se pro Hispanis genuinis pleno ore venditant, quibus si venas omnes scalpello pertuderis, exhaustisque, ne unicam quidem Hispani sanguinis guttam toto in corpore invenias. Ad Historicos Americæ planius intelligendos, operæ pretium fuerit hoc loco varia hominum ex diversæ nationis parentibus procreatorum nomina adnotare. Ex utroque parente Europæo in America natos vocant Criollos. Ex variis Africæ provinciis maxime ex Angola, Congo, Loango, Mandinga, Madagascar seu insula sancti Laurentii, ex insulis, quas olim Hesperides, nunc promontorium viride appellant, aliisque ex locis, ut
man-

mancipiorum instar serviant, advectos, & ex illis in America subinde progenitos Hispani, Lusitanique *Los negros* nigros vocant. Nomine ex atro illorum colore deducto. Istos germani Mauros (die Mohren) perperam appellamus. Haud equidem Mauri in Barbaria, seu Mauritania Tingitana nati atra omnes sunt facie, neque lanæ instar crispis crinibus. Algiriensi enim in urbe (olim Julia Cæsarea, vel Ruscuno) nati, educatique Mauri indigenæ eo sunt vultus candore, ac elegantia, ut in Anglia geniti videantur. Id ex tribus sacerdotibus Germanis Carmelitis alterum in annum istic captivis Ulyssipone intellexi. Quamvis Algirienses cæteri, qui ruri agunt, ferventissimi solis æstu non mediocriter fuscentur. Nemo tamen illorum, ut plerique alii nigricantes Afri, simis, sursum versus repandis naribus, laneis capillis, labris turgentibus ab Europæo distinguitur. Incredibilem Cœli Algiriensis ardorem ipsi mense Februario anni 1748. rigidissima per vicinam Italiam hyeme experti sumus; dum navi ob malaciam detenta diem integrum Algiriensem prope portum nobis subsistendum, sudandumque fuit. Neque vocabulo *Æthiops* ad quemcunque Afrum nigri coloris significandum rite utimur. Hoc enim solos *Æthiopiæ* incolas denotat. Nam licet *Æthiopes* sint nigri, non omnes nigri sunt *Æthiopes*, sed ex diversis Africæ regionibus oriundi. Mihi tamen eodem vocabulo, quod apud latinos scriptores civitate donatum, ad nigros quoscunque significandos porro utendum putavi, ne a recepto more discederem. Hispanorum nomine apud Indos veniunt Europæi omnes. Indi dicuntur, qui ex parentibus Indis orti. Cum igitur diversæ hæ nationes, Europæi scilicet, Indi, & Africani per connubia permisceantur, Nati ex illis filii pro varietate permissionis varia nomina acquirunt. Sic;

Ex Europæo & Inda natos vocant	Mestizos.
Ex Europæo & Mestiza	Quarterones.
Ex Europæo & Quarterona	Ochavones.
Ex Europæo & Ochavona	Puchueles.
Ex Indo & Puchuela	reputantur jam Hispani, seu Europæi.
Ex Europæo, & Nigra	Multos.
Ex Europæo & Mulata	Quarterones.
Ex Quarterone & Europæ	Saltatràs.
Ex Mulato & Inda	Calpan mulatos.
Ex Calpan mulato & Inda	Chinos.

Ex sanguine Indico, & Æthiopico qualitercunque oriundos etiam Zambos, vel Zambaigos dicere solent.

Ex Europæo & Inda, vel Mulata nivei interdum coloris, & Hispanis quibusdam candidiores nascuntur proles, ut adeo Virgilii monitum sæpe locum habeat: *Nimum ne crede colori*. Superi boni! quanta gentium genio, ingenio, colore, forma, moribus, lingua, religione a se discrepantium permistio! Quam diversa, absurdaque nomina! Sed quid vetat, omnes istos cum diversis nationibus permistos uno nomine hybridas appellare. Sic Svetonius in Augusti vita Themasinum quemdam Epicardum hybridam vocavit, quod ex patre Partho, matre Romana prognatus esset.

Ex tot hominum generibus militares copiae conflantur in Paraquaria. Cum plurimi eorum, Hispano

no quamvis cognomine superbiant, ut ab Hispania, sic ab Hispanorum intrepida pugnacitate longissime absint, quid mirum, si imbelles, imberbesque hi milites, adoptivi Bellonæ filii a ferocibus Barbaris nefrendulorum instar toties jugulentur. At vero digni sunt venia, quin & commiseratione. Præterquam enim quod eorum manibus arma plerumque idonea defunt; Certe ea tractandi peritia destituuntur. Præter natandi, equitandique scientiam, omnibus prope Americanis in Paraquaria communem, belli leges, militaremque disciplinam omnino ignorant. Quid quod milites Cordubenses ne natandi quidem usum habeant. Quam plurimi, dum in Barbaros eundum, pro hastis nodosas, rudēsque, quas obvia sylva offert, fudes adferunt, quibus si pugionis, cultrive fracti reliquias, vel ferreum mucronem præfixerint, tum enimvero præ Hercule, præ Marte insigniter armati sibi videntur. Extemporaneos hos, maleque personatos bellatores risum movisse Abiponibus, quos territuri venerant, toties, nunquam sine rubore, ipsi vidimus. Sclopi non nisi opulentioribus suppetunt, quod magno fere pretio veneant, sæpe nusquam venales prostant. In urbe Boni aeris sclopi, quos equites adhibent, & Carabinas vocant, singuli viginti quinque scutis Hispaniensibus, seu quinquaginta florenis Germanicis, me præsentē, vendebantur, nuperrime ex Hispania advecti. Quo remotiores ab emporio Boni aeris Colonia, eo plus eorum, uti cæterarum mercium, solet pretium accrescere. In urbibus certe sancti Jacobi, Assumptionis, Corrientes &c. quadraginta, imo & sexaginta scutis sclopos non elegantissimos venisse, ex ipsis emporiis intellexi. Quodsi pars sclopi aliqua vitietur, fabrum, a quo reparetur, raro invenias. Hinc sclopi, quos milites non pauci circumferunt, tales sunt sæpe.



ut ex pumice aquam extundas citius, quam ex illis vel ignis scintillam. Vitiis aliis, atque aliis laborant; Nam in diuturnis itineribus jam stipiti, jam saxo aliduntur, jam madefiunt, jam alio labefactantur modo; Sub dio semper, Cœlo sæpe pluvio, noctes agenda, natatu transmittenda ingentia flumina, equitandum per paludes, per sylvas salebrosas, per rupes. Inde scloporum haud optime custoditorum ruina. His adde suppellestilis varia, quæ ad sclopos onerandos, exonerandosque pertinet, jam penuriam, jam corruptionem his militibus perfrequentem esse. Verum etsi omnes sclopi partes sint numeris omnibus absolutæ, ac vitii expertes, ignarius lapis decies chalybi allisus decies jaculatoris fallit expectationem. Silices ad scloporum usum peridoneos varii coloris passim profert Paraquaria; Nigerrimi, rubicundissimique, quia igniculis pluribus prægnantes, cæteris præstant etiam Europæis; Ast hominem, qui ignivomos hos lapides rite scindere norit, ac scloporum usibus aptare, nusquam illic reperias. Sic aliis quoque in rebus liberalem frustra naturam experitur Paraquaria, multis tamen, quibus carere vix possit, semper eget, quia arte, artificibusque destituitur. Variis in Colonia milites hostis adventuri rumore perculsi turmatim ad nostras confluerent ædes, lapidesque igniarios, qui nobis quoque rari, & pretiosi, infimis precibus mendicant. Centurionem itineris comitem integro mense habui. Quoties seu meridiaturi, seu pernoctaturi ad focum confedimus, sclopo suo coriaceis funiculis ligando occupabatur, quibus trochleas ferreas, clavis firmamenta, dudum perditas supplebat.

Quoties vel nostra ætate trecenti milites, dum fulmina minitantes Barbarorum stativa aggrediebantur,

tur, vel Chalybe rubiginoso ignem negante, vel nitro pulvere humido flammam recusante sclopos explodere vix pauci poterant, a Barbaris egregie explosi omnes, multi hastis confossi fuere. Folia implerem notis, quas deploravimus, ejus generis historiis. Binas, quippe recentiores, adfero. Per S. Jacobi territoria Abiponum manipulus grassabatur. Triceni, qui eorum motus observarent, milites missi, sed sub auroram per insidias ab irruentibus repente Barbaris oppressi, & ad unum omnes misere obtruncati sunt. Sub dio noctem egerant. Sclopi male custoditis copiosa roris humiditas pulveres pyrios adeo corruptit, ut accendendis iis ne ipse quidem Vesuvius sufficeret. Hæc cladis origo a viginti Abiponibus juvenculis illata. Ducenti ex Assumptionis urbe milites Tobarum ferocium contubernia invaserant Fulgentio de Yegros ductore. Ab hac expeditione ad oppidum Rosarii reduces militum præfectos lamentantes alios, alios publico in foro me audiente per jocos gloriantes, obstupui, quod ipso in assultu Barbarorum sclopos suos sibi refractarios, ac prorsus inutiles sint experti, scilicet vel rubigine obductos, vel madidos. Maximam noctis partem in sylva arbores inter rore plurimo stillantes in equis consumpserunt, ut albescere mox Cælo non observati hostium stativis incumberent. De hac expeditione plura alibi. Ex stragibus Provinciæ per Abipones identidem illatis, quas dein ordine referam, argues & arma militibus, & milites armis plerumque deesse.

Tumultuarios, & extemporales Paraquariæ belatores armis vel servandis, vel tractandis neutiquam assuevisse uti exploratum nobis, sic mirandum nemini. Idem nostratibus ruricolis, imo & civibus, dum

pente in milites transformantur, usuvenire experimur. Aliis equidem seu artibus, seu operibus per omnem ætatem distinentur. Militaris institutio nisi præcefferit, militem idoneum quis in castris speret? Bellicæ disciplinæ expers multitudo campum numero implebit quidem, sed una penum vacuabit annonariam, nullo hostium damno, nullo patriæ emolumento. Multi sæpe adversus Barbaros excurrunt, sed solo nomine milites, solo nomine Hispani. Si quando pinguioris fortunæ, locoque meliore nati Coloni, quibus arma, armorumque scientia, ad excursions bellicas evocentur, alios, quos ære conducunt, sæpe ineptissimos sibi substituere consueverunt. Alii, ne tantisper conjugis amplexu carere, ne hostilibus telis exponi debeant, militares præfectos præmiis corumpunt; Quo fit, ut armorum egentissimi, ignorantissimique, qui inermes ruri degunt, belli onera potissimum sentiant, Barbarisque pugnacissimis, obijciantur luculento provinciæ damno, & Hispani nominis dedecore. Plebeji cum pauperes sint, militare jubentur opulentioribus ad rei familiaris curam domi relictis. Cumque illi iterum iterumque excurrere, pluresque subinde menses extra ædes suas consumere cogantur, se ipsis pauperiores evadunt quotidie, suaque cum familia miseris conficiuntur.

Si ab expeditionis duce sclopis instruantur aliquando, eos finita expeditione, quin vel culicem mactassent, labefactatos reddunt plerumque. Hunc certe in finem ab Assumptionis urbe ducenti sclopi insignes, cum suo quisque pugione, ærarii publici sumptibus procurati sunt. Vix triennium abiit, ex ducentis soli sex, qui porro usui essent, restabant, destructis cæteris. Pugiones aut deerant, aut, quia assandis carnibus, secandisque lignis in itinere adhibiti,

ti, igne emolliti, fractive. Cordubensium præfectus Regius ad flumen tertium forte excurrit, de Barbaris Pampis hostile quid suspicatus. Collectis rure militibus sex pyrii pulveris portiones papyro clausas, & singulas singulis sclopi ictibus destinatas porrexit. Heroum istorum quispiam confestim omnibus his sex portionibus sclopum farcit suum, & dum ad summum ejus tubum haud impletum esse videt, haud satis sibi pulveris pyrii datum, sclopi sui fistulam nondum plenam, Præfecto suo queritur. Miles alter Paraquayensi ex territorio tres pulveris pyrii portiones sclopo intrusit, cumque papyrus, qua clauderetur, obstruxerit forameu fistulæ, per quod flamma ingreditur, tentatis nequidquam ictibus explodi haud potuit; observato per socium errore Martius ille Dameta me adstante liberaliter a commilitonibus explodebatur. Plerique, cum theca sclopetaria careant, illas pulveris nitrati portiones papyro discretas pessime custodiunt, rumpunt, conterunt, madefaciunt, & non raro humi effundunt. Plurimi, dum suo se more armant, bubulo in cornu nitratum pulverem, alio in marsupio globos plumbeos, vel plumbi frustra circumferunt. Papyri loco, quæ pulveri, globoque stipando adhibetur, Gossipio utuntur alii, alii musco, vel stupa, aut quidquid demum præ manibus, injiciunt. Plerique hunc in usum lanam ex laneo ephippiorum siragulo evelunt. Tota hæc rerum necessariorum supellex cum tot servetur in locis, ut singulæ alibi, atque alibi sint conquirendæ, incredibile est, quantum temporis spatium in sclopo onerando absument. Tantæ cunctationi cum exigua in collineando dexteritas accedat, id denique impetratum est cheu! ut ignifera Europhæorum arma eo liberius indies ab Abiponibus spernantur, quo plus olim timebantur. Magnifice se

circumspiciunt innocui hi milites, faustos se, fortunatosque putant, dum, quod prodigio simile, sclopum suum fumantem viderint, tonantem audiverint, etsi, ne pilo quidem hostium læso, solum aerem attigerint. Mihi indubitatum prorsus, Paraquarienses equo strenuo infidentes hasta, enseque plus posse, quam sclopo. Si quæ Barbaris illata strages, hanc ferro, non plumbo tribuendam, e vulneribus patuit.

Eccur igitur, quæret aliquis, rudes hi coloni ad armorum tractationem non erudiuntur? Dudum id a bonis omnibus optatum, sæpe, sed casso labore, tentatum, sperandum nunquam. In vanum cecidere multi multorum conatus. Jam, qui belli artes docere possint, jam, qui doceri velint, desiderabantur. Me illic agente jussu Regio Franciscus Gonzalez equitum protribunus cum aliis præfectis militaribus ex Hispania missus est ad Boni aeris urbem, ut numerosissimos illius agri colonos bellicis disciplinis institueret. At enim, qui discipuli esse vellent, magistris defuere. Hispani opulentiores, qui in urbibus, coloniisque honestioribus degunt, militiæ asperitates fere recusant; Cæteri per prædia remotissima sparsi pecoribus tuendis, augendisque dant operam; Hæc enim præcipuæ sunt Paraquariæ opes, & cum metallorum fodinis, sæpe etiam commercio destituantur, unicæ. Tantis leucarum spatiis distant, jam fluminibus, jam sylvis, jam immensa camporum planitie a se divisos in unum, ubi bellicas artes edoceantur, locum cogere, arduum est, & centum difficultatibus implicatum negotium. Prima vice ad militarem scholam evocati aderunt complures, novitate Europæorum, quos ridere solent, equitum allecti, non discendi animo. Altero die exsatiata scilicet videndi curiositate multo pauciores numerabis

Tertio demum vix decadem. Jubeantur Regio nomine institutioni bellicæ interesse, imperio minas licet admisceas, nihil admodum proficies. Absentiam alii alio ex capite excusabunt. Hic vel suum, vel suæ conjugis, aut prolis morbum causabitur; Iste vias, imbrem, fluviumve, quod cælo procelloso transitum negaverint, accusabit; Ille itineris, negotiive, quod differri nequeat, obtendet necessitatem. Alii denique sibi haud collubitum fuisse, proterve fatebuntur. Hæc ita esse Franciscus Gonzalez, mihi familiaris diu, in urbe Boni aeris comperit, ubi otiosus dudum, sed otium pertæsus, desidebat cum suis.

Quid si, inquis, ad coercendos Barbaros Legionarii ex Hispania milites singulis in Coloniis excubarent? Neque id quidem probavero. Provinciæ latissime, longissimeque patenti vel justus exercitus vix sufficeret, & in tot partes divisus quid tandem contra hostium multitudinem poterit? Ejus generis milites jaculandi, pugnandique scientia Americanos superabunt, sed, quia Europæi, ab his natandi, equitandi peritia, itinerum, æstus, sitis, inediæque tolerantia longissime superabuntur. Tentoriis, plaustris, cymbis, vel pontonibus, quibus isti carere non possunt, impediti circumvolitantes equites Barbaros non assequuntur, minus illorum contubernia, quæ ducentas leucas ab urbibus absunt interdum. Sane Hispani dimachæ, Boni aeris præsidarii, perinviti adversus Australes Indos excurrabant, quippe a quibus vulnera sæpius, quam victoriam retulerunt. Legionarios pedites urbi sanctæ fidei ab Abiponibus, Mocobiisque olim propemodum oppressæ suppetias missos nihil admodum profuisse, nemo ignorat, Barbaris scilicet statariam pugnam cum pedite callide subterfugientibus. Haud nego, Pizarro, Cortesio ducibus ab Eu-



ropæo milite Indos innumerabiles Cæsos, fugatos, sub jugum missos, sed Indos adhuc pedites. Si Abipones, Mocobios, Tobas, Quaicurues, Serranos, Chiriguanos, aliosque Paraquariæ equestres populos oppugnaturi redirent hodie iidem heroes, plus certe negotii, minus Gloriæ illis ausim polliceri. Primos illos, qui Americam attigerant, Hispanos equo sublimes, ferro indutos, ensibus fulgurantes, ignivomis fistulis tonantes, mystacibus hirsutos imberbes Indi, nudi, inermes, aut solo ligno armati, novum hominum, qui mori nescirent, genus rati vel fuga declinarunt, vel, si fugere haud licuit, obsequio sibi devinxerunt. Qui hodie bellum movent Hispanis Barbari, quotidie illos vinci, ac mori posse vident, hastis ferreis, equis pernicibus ad eorum impetus eludendos, quin ad eos, dum lubet, impetendos sagacissime uti norunt. Persequuntur illos, & assequuntur; jam fugant sibi infestos, jam fugiunt. Fulminatrices illas scloporum fistulas, quas sæpius nec tonare, sæpius, casto fulmine, nil præter innoxium crepitum edere experti sunt, jam raro sibi periculosas, metuque suo indignas credere paulatim incipiunt. Usque adeo tempus ut res cæteras, sic belli rationem, nationum mores, institutum, animos immutat. Centum Indos a decem olim Europæis profligatos, fugatosve, legimus; Hac ætate decem Indis affilientibus centum Europæos fugisse, toties vidimus. Neque id rarum esse spectaculum, quamvis incredibile videatur, ex iis, quæ porro mihi scribenda restant, planissime cognoscet.

Ego quidem, longo rerum Paraquariensium usu edoctus, sic existimo: Homines Americanos, si bellicis artibus, armis idoneis, suppellectili necessaria instructentur, ob nativam equitandi, natandi, cæli, belli-
que

que asperitates tolerandi habilitatem præ Europæo in lite utiliorem adversus Barbarorum incursiones operam navaturos. Per universam Paraquariam passim videas adolescentes & origine, & nomine, & animo vere Hispanos, Sagaces, agiles, intrepidus, robore, ac proceritate conspicuos, equites, si qui uspiam, ad stuporem dexterrimos, e quibus si quovis in territorio una conflaretur centuria, & a Præfectis strenuis gubernata stabili gauderet stipendio, næ! Indos hostes ad frugem, ad Hispanorum amicitiam facile revocandos, amicos in officio retinendos, colonias a vexationibus respiraturas existimavero. Quod si ex quaternis, vel quinis ejusmodi centuriis, quoties periculum urget, conjunctis agmen conflaretur, nulla Barbarorum, quamvis numerosissima, stativa illi inexpugnabilia forent, dummodo exploratæ virtutis, experientiaque dux præfuerit expeditioni. Quinquaginta circiter ejusmodi Equites, quos sanctæ Fidei civitas ære suo aluit, & Blandenges vocavit, rem sæpe præclare gesserunt. Petrus Cevallos clarissimus Hispaniensium copiarum Dux delectos ex Paraquariæ Coloniis equites in illo contra Lusitanos bello sibi magno usui fuisse, iterum, iterumque palam affirmavit. Eorum in equitando celeritatem, in trajicendis sine navi fluminibus promptitudinem, incredibilem in omnibus alacritatem Marchioni Valdelirios me adstante magnopere dilaudavit in Quaranico S. Borgiæ oppido. Ejusmodi equites, qui in singulis Hispanorum excubarent coloniis, partim ex ærario Regio, partim opulentiorum Hispanorum sumptibus facile sustentarentur, quorum maxime interest prædiorum, commerciique securitatem a Barbarorum incursionibus sartam, testamque conservari.

CAPUT XLII.

Quæ Cæſorum fors apud Abipones
victores.

U^t primum haſta a ſe ſauciatum quempiam procumbere ſenſerint Abipones, prima illis cura eſt, morientis caput amputare. Incredibili id præſtant celeritate. Anatomes experientiſſimis magiſtris certe palam præriperent. Non jugulo, ſed cervici cultrum inſigunt, ictu certo, brevifſimoque. Quamdiu ferro omni caruerant, concha, piſcis Palometæ maxilla, fiſſa arundo, lapis ſolenter exacutus illis pro cultro fuere. Noſtra quoque ætate cultello ſæpe tenuiſſimo caput, velut ſi papaveris eſſet, reſecare norunt ea promptitudine, quam vel Europæis in carnificibus, licet enſe inſtructis, raro deprehendas. Longo uſu, exercitatione quotidiana hanc ſibi dexteritatem Barbari compararunt. Quotquot enim hoſtes trucidant, totidem fere capita domum aſportant vel ephippiis ſuis, vel cingulo crinibus alligata. In tutiora poſtquam loca ab hoſtium ſuſpicionem remoti ſe receperant, allata capita pelle nudant. Ab una aure ad alteram infra naſum cutem incidunt, eamque una cum capillis ſcitiffime, citiſſimeque avellunt. Abſtractam ſic a calvaria pellem ſicco gramine farciunt, quæ aere paulatim exſiccata capilliſſi arte facti imaginem reſert, ac trophæi inſtar a ſingulis conſervatur eadem ſollicitudine, qua Europæi crepta hoſtibus ſigna ad perennem

vi-

viſtoriae memoriam ſacris in ædibus poſteritati ſolent oſtentare. Cuicumque Abiporum plures ejusmodi pelles domi, is militaris gloriæ fama reliquos præcellit.

Cranium quoque caſi hoſtis, os illud ſcilicet verticis, quod calvam dicunt, aſſervant aliquando, feſtivilis in compotationibus pro poculo adhibendum more apud alias quoque gentes paſſim recepto, ut ex hiſtoricis compluribus liquet. Inde forſitan Ambroſius Calepinus occaſionem nactus eſt dicendi in verbo *Cranium*: *Eſt calva capitis, & poculi genus, calvæ figuram referens.* Wayerlinkius genus illud poculi, quod Teutones Topf, & olim forſitan Kopf, Galli vero corrupta non nihil voce *coupe* vocant, antiqui moris, cranii nempe pro poculo adhibendi, veſtigium putat. Aventinus certe, ſi fide dignus, Germanos quondam ex humano cranio bibentes vidiffe ſe, teſtatur. Herodotus L. 4. Scythas cælorum hoſtium pelles, victoriæ ſuæ indices, circumtuliffe, eorumque Calvariis pro poculo uti ſolitos, memorat. Galli prælio deſuncti hoſtium demeſſa capita ex equorum cervicibus ſuſpendere, ac denique in domus ſuæ poſtibus ſuffigere ſolebant olim, ut ſtrabo L. 4. Geograph. Scribit. Belgas priſcos eodem fere ritu allatis hoſtium capitibus domus ſuæ limina ornaviſſe, Dio-dorus L. 5. cap. 9. refert. Severini in Hungaria caſtri propugnator in partæ victoriæ ſignum duo plauſtra Turcarum capitibus onuſta Budam, regni metropolim, miſit, ubi anno 1492. Proceres Uladiſlao Rege jubente congregati. Ita Bonfinius L. 2. decadis quintæ. Neque miror, tantam fuiſſe ſemper in amputandis, adferendisque hoſtium capitibus popu-lorum ſollicitudinem; Certiſſima enim hæc trucidati hoſtis documenta. Holofernis caput a Judith reſectum,

allatumque de ejus morte dubium omne Bethulien-
 bus exemit. Haud omnes, qui vulnerati procum-
 bunt in acie, illico mortuis sunt adnumerandi. Mul-
 ti, ut vitam servant, veluti exanimis commilitonum
 inter cadavera se abdunt astute. Mocobii post cru-
 entam cum Abiponibus velitationem illorum celebri-
 oribus primipilis, quos exspirasse viderant, capita am-
 putarunt ad augendum triumphum apud suos splendo-
 rem. Duobus e vulgo Abiponibus juvenculis, quos
 hastis terebratos undique dudum occubuisse putarunt,
 necdum exsaturata rabie violentas manus iniecerant,
 uni auricula, alteri duobus digitis crudeliter mutilatis.
 Sed hem! persanatis Vulneribus paucas post hebdo-
 madas ambo incolumes in S. Ferdinandi oppido com-
 paruere hac solum ratione infelices, quod nec huic
 nova auricula, nec alteri novi digiti succreverint.

Ychoalay, formidabile olim Hispanis nomen,
 Abiponum campestrium dux illustris postquam De-
 bayakaikin Abipones sylvestres inter facile principem
 sibi per annos septemdecim infestum in acie demum
 obruncasset, illius, & aliorum primi nominis commi-
 litonum capita publico in foro e furca, hunc in fi-
 nem parata, suspendit, quæ a foeminis quotidie sub
 vesperum non sine lugubri carmine ad tugurium
 quodpiam deportata, ne a Debayakaikini amicorum
 aliquo noctu cleperentur; Sed primo diluculo rursus
 furcæ infami affixa fuere. Dies aliquot id continua-
 tum, dum denique, nescitur, a quo, clanculum sub-
 lata sunt. Id probri genus vindex Ychoalay in præ-
 cipuum totius nationis ducem, sibi sanguine pro-
 pinquum, sed tot dimicationum, eladiumque au-
 thorem statuit, ut illius semper turbulento capiti
 jam palam illuderetur, cujus manus plurimarum cæ-
 dium, latrociniorumque instrumenta exsistere, id
 quod

quod clarius tibi fiet , dum de S. Hieronymi oppido mihi sermo fuerit.

Execraberis utique hanc in secandis hostium, deglubendisque capitibus atrocitatem Abiponum ; Sed tuus , opinor , miscet animus , rudesque Barbaros venia aliquantulum dignos judicabis , si tecum reputaveris , id eos & majorum suorum instituto , & plurimarum per orbem gentium exemplo agere , quæ sæviendi in hostes opportunitatem nactæ omnem humanitatis sensum videntur abjecisse , putantque sibi victoribus in victos omnia licere , ut adeo crudelitatem quamvis militaribus virtutibus ausint adnumerare. Præter ea , quæ paulo ante de Scythis , Belgis , Gallisque veteribus ex variis historicis recensui , alia , quæ ad hoc argumentum pertinent , memoranda veniunt. Scythæ , aliique Asiæ , ac Europæ ferociores populi , teste Herodoto L. 4. N. 64 , primi , quem ex hostibus jugularunt , sanguinem potant , reliquorum capita Regi adferunt suo. Ni enim hostium caput aliquod quis exhibuerit , omni ad captas bello prædas jure excidet. Pelles ex hostilibus capitibus detractas jam equo suo , velut trophæis , ornando appendunt , jam ex pluribus consutis sibi vestem , jam equi stragulum concinnant. Sunt , qui pellem cum unguibus ab hostis dextera avulsam pro sagittarum theca adhibent , quippe bestiarum corio crassiorē , candidioremque. Ipsius ego vidi pellem Tartari exploratoris belle concinnatam , quem in obsidione Vienneſi anno 1683. interceptum Germani milites exco-
rriarunt. Non pauci Scytharum pelles ab hostium corporibus abstractas , subactasque sibi , equisve tegendis impenderunt. Elias Skeed in Libro de reli-
gione veterum germanorum gallorum &c. hunc ca-
pita hostium giubendi ritum omnibus prope , quæ

soli orienti propiores habitant, nationibus solennem
 fuisse, affirmat. Quid si ad hoc probandum illa ver-
 ba in Cantico Moysis Deuteronomii libro, cap. 32.
 vers. 42. fors aliquid valeant: *Inebriabo sagittas meas
 sanguine, & gladius meus devorabit carnes, de cruore oc-
 cisorum, & de captivitate nudati inimicorum capitis.*
 Caput hostium pelle nudatum hoc loco intelligi, veri
 similis mihi videtur, quam caput galea nudatum,
 ut quidam arbitrantur memores consuetudinis, jux-
 ta quam cæsis hostibus, vel captis cassides detrahe-
 bantur, ut nudis capitibus victorem exercitum capti-
 vi sequerentur. Alias aliorum interpretationes nec
 ignoro, nec impugno. Innumerae sunt, quas alii per
 Americam Barbari in hostes a se vel interfectos, vel
 captos exercere solent, crudelitatis formæ. Hiroquei
 in Canada immanitate vincunt ceteros. Ex hosti-
 um necdum extinctorum capitibus sæpe pellem avel-
 lunt. Noster Josephus Lafitau inter illos Barbaros
 diu versatus in libro suo: *Moeurs des sauvages Ame-
 ricains &c.* linguis variis toties typo dato fatetur, vi-
 sam a se mulierem origine Gallam, gallo nuptam,
 pluriumque prolium matrem, quæ capite ab Hiro-
 queis excoriato dudum superstes, sospesque fuit, a
 Gallis propterea *la tete pelée* dicta. Plures alii hanc
 capitis excoriationem passi citra vitæ jacturam dicun-
 tur. Nonnulli Indorum Canadensium totum, quan-
 tum est, occisi hostis corpus excoriant, ejusque exu-
 vias, veluti victoriæ, ac fortitudinis testimonia cir-
 cumferunt, ostendantque. Interdum detractam ho-
 stili manui pellem in tabacæ thecæ convertunt, quæ
 in canada provincia *Sacs a petun* a gallis vocantur. Tan-
 tus quamvis mortuos laniatus maneat corporum, op-
 tabilius tamen, tolerabiliusque fuerit in acie occum-
 bere, quam ab Hiroqueis abripi in captivitatem;
 Hæc licet sæpe brevissima quavis alia morte videtur

acerbior. Ex captivis enim bellicosiores, quos reformat, infantes, vetulos, vetulasque, a quibus in itinere molestias sibi fore prævident, primo mox die, ac veluti in acie cremant. Alios, atque alios diebus posteris, ut ad accelerandum reditum sint expeditiores. Si insectantium hostium timore fugam præcipitare eos oporteat, morarum impatientes captivos singulos singulis arboribus alligant, vicinasque accendunt arbores, ut lento igne torreantur, intereantque, certe, si quando flamma languidior illis parceret, inedia certe extinguantur. Captivos reliquos, quos sibi utiles domi fore existimaverint, constrictis fune brachiis abducunt. Noctibus singulis, ne tenebris ad fugam abuterentur, singulos pedibus, manibusque (figuram literæ X exprimunt) expansis, funiculoque totidem sudibus adstrictis custodiunt; His addunt funem duplicem longiorem; Altero collum, pectus altero vinciunt, circumligantque. Hujus extremitatem herus Barbarus manu complectitur sua, ut, si captivum fugæ cupidum de vinculis se extricare suis conantem sentiat, expergiscatur. Acerbissima, & siquid aliud, Intolerabiles miseris noctes videbantur. Totum prope corpus nudi equidem ab infinito advolantium culicum, vesparumque examine dilaniabantur, cum pedes, manusque vincti, motus omnis impotes adversus hos tortores tueri se se nequitquam possent. Calamitoso itinere defuncti victorum in patria vel ad miserabilem servitutem, vel ad rogam damnantur. Hæc, pluraque id genus refert noster Lasitau fide utique dignissimus; Nam, præterquam quod ipse Hiroqueos inter versatus sit diu, fatetur, se cætera, quæ scripserit, omnia accepisse a Juliano Garnier Sacerdote nostro, qui annos sexaginta aliquot eidem nationi Christum, humanitatemque docendæ impendit, linguarum Barbarum scientissimus,

mul-

multa expertus, plurima passus, religionis amplificandæ studio, ac quotidianis in se ipsum rigoribus demum consumptus. Familiari hujus consuetudine, institutioneque dictus Lafitau diligenter utebatur.

Eadem prope feritate Australis Americæ Barbari in captivos animadvertunt suos. Brasilienses certe illos aliquamdiu faginosos non sine multis cerimoniis inspectante, & plaudente populo clava capiti impacta enecare solent. Dissecti corporis artus festivum universo contubernio epulum præbent, quo non stomachum duntaxat, sed & ardens in hostes suos vindictæ desiderium cupiunt exsatiare. Sunt equidem anthropophagorum ex genere, perpetuisque adversus finitimos bellis impliciti. Nefas sit hoc loco Mammaluccos silentio præterire, homines vel Europæos Brasiliensibus cum fœminis conjunctos, vel talibus e nuptiis in Brasilia prognatos. Illi Christianos se se jactabant equidem, sed venandis, capiendisque christianorum gregibus semper occupati præ quovis Barbaro sæviebant. Captivorum, quos scilicet lusitanis in Brasilia ad Sacchari, aliasque officinas perutiles ingenti cum fœnore venditaverant, negotiatio impia unicum illis negotium fuit. Ab hac hominum colluvie (ut fufius in libro prodromo explicui) aliquoties centena Quaraniorem millia partim crudeliter trucidata, partim in captivitatem abrepta fuere, qui incredibili nostrorum hominum labore per sylvas conquiriti, in oppidis, quæ condiderant, collocati, ibique sanctam religionem, mores, artesque congruas docti fuerant. Ferro, plumboque, & mille fraudibus armati hi prædones Quaranios ligneis duntaxat armis instructos oppressere. Uno sæpe die, eodemque ex oppido plures seu Neophytorum, seu catechum enorum centuriæ, ut pecorum greges, abigebantur, nul-

nullo ætatis, sexusve discrimine. Quotquot ad fugam aut procliviores, aut aptiores visi, loris, funibus, catenis vincti rapiebantur interdum, sole præcipitante in altas, quas adventantes eum in finem foderant, scrobes conjiciendi quotidie. Decrepiti, morbo imbecilles ne reditus celeritatem retardarent, ipso in itinere variis modis interempti. Proles lactentes, ne matribus porro oneri essent, partim manibus discerptæ, partim ensibus in centum frustra sectæ, partim solo allisæ vias passim omnes funestant. Pudet, pigetque plura dicere, quæ cogitari a lectore facilius, quam a verecundo calamo exprimi possint. Nefarios hos Indorum Paraquariensium venatores crudelitate, lascivia, lucri cupiditate æstuantes omnis historicus, qui partium studiosus non fuerit, teterri-
mis coloribus pinxit; Quodnam tamen horum sce-
rum apud illos principatum obtinuerit, arduum sit, sen-
tentiam ferre. Relege, si lubet, quæ de Mammalucis in li-
bro Historiæ prodromo adnotavi. Haud reticendum hoc
loco singulare crudelitatis genus in captivos, quod
Barbari Australes, agro Boni aeris finitimi excogita-
runt. Si quem hostium in campoprehenderint, ira
effervescente hæud illum enecant, sed pede utroque
mutilato istuc relinquunt, ut motus omnis ad viam
prosequendam impos lenta morte dirissimos inter do-
lores contabescat.

Ab atroci hac in captivos, vel mortuos hostes
sæviendi consuetudine, quam in Indis aliis averfamur,
longissime absunt, abhorrentque Abipones. Interfi-
ciunt, sed eos duntaxat, quos pro hostibus habent
suis, quos sibi vel perniciosos experti sunt, vel pe-
riculosos porro, sibi que infensos, opinantur. E
vulnere morientes neque torquent, neque excruciant.
Hispanorum, Indorumve contubernio expugnato

nunquam promiscue incolas trucidant omnes, quotquot possunt. *Ætati teneræ*, imbelli sexui parcutunt plerumque, nisi accepta injuria vehementissime irritati internecione dignos arbitrentur universos. Avulsas a cætorum capitibus pelles, facinorum suorum testes domum asportant, ne inglorii, ad suos redeant; Illis tamen ad se, vel equum tegendum, ut quidam solent, non abutuntur. Bello captos, equisque suis impositos & in itinere, & domi comitate, benevolentia, beneficentiaque incredibili plerumque profectui consueverunt, quod superius cap. 13. de Abiponum moribus, & consuetudinibus, uberius explanavi. Ex quo sane intelliges, Abiponum captivos sorte sua contentos vivere, sed sæpissime ad heri sui offensam, Hispanorum perniciem, suumque exitium turpissime abuti, ac ipsis denique Barbaris evadere deteriores. Optaveram persæpe, ut Patres familias, Præfecti militares, magistri tam faciles, tam beneficos se præberent suis famulis, militibus ac discipulis, quam sui studiosos, amantesque Abipones experiuntur captivi. Hurones, Hiroqueosque, etsi cæterum Barbarie insignes, bello a se captis nihil admodum molestiarum domi suæ facessere, nisi eorum sint ex numero, qui primis ab adventu diebus optimatum sententia ad rogam crudelem damnantur, Pater Lafitau testatur.

C A P U T XLIII.

De Abiponum armis, & aciei forma,
dum aliis cum Barbaris configunt.

Hostes dispares disparia sæpe arma, aciem disparem svadent; Alia, atque alia, tum quibus offendimus, tum quibus defendimur, belli instrumenta poscere videntur. Abipones sane, quoties sibi cum Hispanis configendum, in equo celeri, hastaque firma plus præsidii, plusque ad victoriam momenti inesse existimarunt semper. Hinc thoracibus, quos ex alcis pelle concinnatos pro lorica adhibent, abstinere solebant; Nam hi præterquam, quod contra pilas plumbeas securitatem præstant nullam, fugientium perinde, ac assilientium celeritatem pondere suo retardant. Arcus quoque, dum adversus Hispanos excurrunt, negligunt. Enimvero deliramenti genus foret, arcus sclopis, lignum plumbo, sagittas glandibus opponere; Hæ enim feruntur longius, quamvis sagittæ feriant certius, eoque periculosius, quo lignum, ossaque, e quibus componuntur, humanæ carni præ plumbo magis noxia, & infesta. Quod si tamen domi suæ ab externo, quisquis sit, hoste invadantur Abipones, arcubus utuntur suis feliciter; Horum enim, quam a pueris didicere, scientiam quotidiano per omnem ætatem belli, venatusque exercitio sic perficiunt, ut ictu certiori, quam sclopo Hispani, quidlibet attingant. Oculorum testimonio convictus toties, id audenter affirmo.

Sed

Sed fingamus, per Abiponum contubernia de adventuris propediem Barbaris spargi rumorem. Si vires suppetant, animique profligandis hostibus pares, ad cognoscenda eorum itinera fidi speculatores quaquaversus emittuntur. Reliquis interea curarum prima est, potionem ex melle, vel, si in promptu sint, ex siliquis græcis apparare, computationi publicæ mox servituram. Nunquam equidem aut in consulando perspicaciores, aut in dimicando acriores sibi videntur Abipones, quam quando fuerint insigniter temulenti; Namque tales, ut ipsi quidem autumant, pericula non videre, vel si videant, contemnere: Paucos multis se adversariis objicere: Vulnerum acerbicatem nil admodum sentire: Vitæ nescios mortem oppetere: Conloptos in pectore Mavortii furoris igniculos expergesieri, ajunt. Et vero certissimum id nobis videri posset, si, quod Famianus Strada noster, in sua de Bello Belgico historia, de Martino Schenckio laudatissimo apud Belgas & Duce, & milite scripsit, in memoriam revocamus. *Arma nunquam (ait L. 10. decadis secundæ, folio mihi 633.) accuratius tractabat, quam quum effuse potus, ac vino amens.* Idem prorsus, quod Schenckii, Abiponum esse institutum, fatum idem, sæpissime comperi. In S. Ferdinandi Colonia certis authoribus accepimus, hostile agmen ex Tobis, Mocobiisque compositum magnis itineribus adversus nos adventare, biduique minimum intervallo adfuturum. Attoniti hoc nuncio, non territi Abipones consultando, computationando, cantandoque ante victoriam triumpho assultum præstolabantur multorum paucissimi. Equis, ut ad manum semper essent, intra oppidi septa conclusis, vultu ad terrorem picto, poculum manu altera, altera sagittarum fascem complexi biduum consumpserant. Dominica Quinquagesimæ illuxit. Ter-

tia a meridie hora Barbarorum equitum turma in conspectum se dedit eminus. Abipones licet post tantam computationem neque mentis, neque gressus satis compotes arrepta hasta scæminarum ope in paratos affiliunt equos, per campum nullo ordine sparsi horribiles inter lituorum ululatus in obvios hostes cursu effulissimo invehuntur felicitate tanta, ut illi abjecto mox vastandæ coloniz proposito adjacentibus in sylvis securitatem quærerent suam. Verum ab instante undique, & obstante Abipone via exclusos alios alio fuga abripuit. Hi gressum citatissimis equis accelerare: Ille procurentium terga premere conatus. Non pugna, sed hinc fugientium, illinc fugantium cursitatio fuit. Pernicitate equorum certatum magis, quam telis, quæ quidem ultro, citroque mittebantur, sed quia icu parum destinato, citra multorum noxam. Victores nostri non nisi multa jam nocte ad coloniam rediere, quin sub auroram aliqui, incolumes præter unum, cui clava caput contusum, omnes, omnes sereni crapula, quod mireris, non dormiendo, sed currendo, pugnandoque exhalata. Quot hostium in tanta insectatione sauciati, quot cæsi fuerint, fateor, me ignorare. Ducentis plures a septuaginta temulentis in fugam actos fuisse, luculentæ victoriæ instar nobis erat. Sed jam cæteros, quos Abipones pugna præmittere solent, apparatus, videamus.

Procuratis, quæ ad computationem dimicationibus præviam pertineant, omnibus eo suas cumpri-
mis sollicitudines convertunt, ut equorum suorum agmina hostium oculis, manibusque subducantur. Melioribus, qui ad belli usus prompti, & veluti in conspectu sint, vicinas intra sepes reservatis reliquos iis in stationibus collocant, ad quas vel fluminum altioris



ripæ, vel sylvarum objectu, vel viarum ignoratione difficilior hostibus patet accessus. Latebras quoque, ubi vigente adhuc periculo uxores, liberosque, ac cæteram imbellem turbam abderent, circumspiciunt. Integras sæpe Indorum familias in fluviis, lacubusque palustres inter juncos anatum more demersas, soloque capite prominentes a se detectas Hispani mihi referebant. Ut primum de hostis propinquitate rumor apud Abipones percubuit, fucata illico facie telorum fascēs, lituumque militarem e cingulo suspensum circumferunt semper, quem concubia potissimum nocte instant identidem eo consilio, ut excussa timoris suspicione conflictus avidi, vigilantesque ab hostium emissariis, cognoscantur. De hostilium copiarum propinquatione redditi certiores aliis, atque aliis rationibus sibi consulunt. Si pro adventantium numero pauciores se se videant, calliditate infirmitatem suppleunt suam. Ne ad suscipiendam aperta fronte pugnam adigantur, variis artibus hostem a stativorum suorum prohibent accessu. Obviam facti jam hostem imparatum per insidias opprimunt; Jam multiplicato tubarum militarium tumultu numerosos se mentiuntur; Interdum cornicinibus, buccinatoribusque pluribus remota in statione a tergo relictis se antecessores solum, ac partem pone sequentis agiminis fingunt; Jam Hispanorum, si quas habent, vestibus induti comparent aliqui, Hispanosque milites propinquos sibi fore subsidio, persuadent. Ejusmodi dolis circumventi relictō præliandi consilio iter relegunt hostes non raro. Tantillæ artis est, Americanos natura meticulosos territare. Pugnam recusant, nisi de victoria certi.

At vero nullus sæpe strategemati locus est super. Interdum repentina hostium incursione compulsi, alias

lias victoriæ fiducia allecti statuunt denique certamen, pro quo committendo campum hosti adventanti obversum, contubernioque vicinum designatur, ut uxoribus, prolibusque suis forsitan periclitaturis præsto esse queant. Feciales quandoque ab hoste præmittuntur, qui belli causis expositis incolas ad pugnam laceffant. Sed, quod observatum a me sæpius, buccinarum, cornuumque boatum, horridam ad arma provocantium vociferationem pro responso auferre solent. Dignum profecto, si quodquam aliud, Europæorum oculis, cachinnisque spectaculum illa omnia, quæ pugnam seu præcedunt, seu comitantur. Viderent sub conflictus initium præstigiatores aliquot equo sublimes, gestu corporis ridiculo palmarum ramos in gyrum circumagentes inimicum agmen ferali carmine diris devovere; Præstigiatrices item vetulas jam humi reptantes, jam leviter subsilientes per forum corrugata fronte, torvis oculis, rauca voce, nescio, quid ominis, vel execrationis deblaterare. Viderent Abipones illitis vultui coloribus truculentos, vertice avium multicolores plumas, manibus arma ostentantes, thorace suo tectos alios, alios agilitatis gratia omnino nudos, gradu ad pompam composito, & quasi orbi terrarum minitantes in aciem coire Montes videntur parturire, quamvis murem prodire ridiculum mox videamus. Volunt isti heroes in acie constituti a Patre, coloniæ curatore, lustrari, numerarique, numerare seipsos cum nesciant. Illorum ordines percurrens: *Sumusne multi?* Interrogabar idem, quibus more meo: *Estis quam plurimi*, respondi, ne paucitate sua territi animos, spemque victoriæ abjiciant. Quamvis certissimum experientia, oppidatum fere a numerofo hoste fuisse invasa, cum paucissimi incolæ domi superessent, reliquis venationis gratia longe, lateque sparsis. Sed nempe sagaces



Barbari affiliunt, dum præfidiariis nudatam coloni-
am suis e speculatoribus intellexere. Aciem, si locus
id ferat, quadratam statuunt. In medio sagittarios,
utramque ad alam hastatos collocari, aliquando ob-
servaveram. Alias & hastis & arcubus instructi singu-
li promiscue aciem occupant. Mocobii, Tobæ,
Quaikurui, etsi equites, equis tantisper in conspectu
sepositis, pedites manus conferunt. Cazikius, aut
alter quisvis spectator, qui præsit omnibus, & pugnam
moderetur, equo insidens in fronte aciei consistit pri-
mum; Sed inchoata jam pugna tam equo, quam
statione illa relictis immixtus aliis configit. Abipo-
num duces fere pugnacissimi sunt, ac ante ceteros
strenui. Cum ducum exempla plus ponderis, quam
verba habeant apud militem, qui libentius ducem
suum acriter dimicantem sequitur, quam eminus ad-
hortantem.

Initio confertis, mox, dum petendus vel arcen-
dus hostis, ita laxis stant ordinibus, ut quisque spa-
tium quatuor, imo sex cubitorum quaquaverius
habeat. Neminem eorum, dum configunt, videas
erecto corpore, vel quietis pedibus consistere. Irre-
quieti semper curvo in terram corpore, fixis in con-
trarios oculis ictus vel declinandi, vel designandi
causa hac illac cursitant. Ore minante simul, simul
hostem provocando solenne illud suum: Hò hò hò
repetunt voce ab imo ad summum ascendente. Ma-
num dextram identidem terræ affricant, ne chorda
arcus non volentibus e lubricis sudore digitis effluat,
qui, sudore pulveribus soli absterfo, utique asperan-
tur. Neque Indi Europæorum morem, qui glan-
dium procellam eodem tempore in objectos hostes
temere effundunt, sibi putant imitandum. Singuli
singulos ad ictum solent destinare, ceu scopum; Hinc
alter

alter alterius oculos, motusque omnes sollicite circumspectare satagit, & dum a collineante aliquo peti se senserit, stationem dextrorsum, sinistrorsum saltans mutat priorem. In belli ducem, & bello illustriores multa multorum tela, quamvis raro impune, jaciuntur; Quippe ex istorum cæde in se plus gloriæ, in hostes plus terroris quisque prævidet redundaturum. Cum unus sæpe a pluribus ad ictum destinetur, etsi Argo sit oculatior, vento quovis agilior, securitatem nemo sibi audet polliceri. Ut adeo, si quis sospes acie excedat, fortunæ tribuendum sit sæpe, raro dexteritati, thoraci coriaceo rarissime; Nam hunc non hastis modo, sed & validioribus telis cedere, ipsi vidimus, queis nec lignum impervium, etsi lapide durius.

Sagittas ab hoste missas, si propriæ deficient, remittunt. Exhaustis tamen, uti accidit, pharetris, animisque ipso certamine magis jam effertis, postquam arcu eminus depugnarunt aliquamdiu, hasta cominus incessunt se se vulnera declinandi, inferendique sollicitudine pari. Neque timendum tamen, ne humani sanguinis alluvione turgescat campus. Magna est equidem in lacertosus illis Barbaris ad vibrandos ictus brachiorum vis, ac ferocia, sed ad hos eludendos major pedum velocitas. Tota sæpe dimicatio combinatione mutua, vociferationeque definitur, ut strepitus quidem multos exaudias, fluere tamen sanguinem videas rarius. Sauciantur interdum complures, paucissimi pro sauciorum numero occumbunt; Ni enim vel perfossum caput, transverberatumve cor ipsum fuerit, de vulneratorum vita conclamatum esse, nemo illorum somniat. Confractas costas, immania per artus reliquos vulnera nihil admodum habere seu admirationis, seu discriminis vulgo sibi persvadent, at-

que adeo sine doloris significatione, serenis oculis ea contuentur, & semivivi, reluctantesque ex acie alienis brachiis asportantur. Illud mihi compertum, hoc Barbarorum genus ni fuga iis intercludatur, raro ad experiunda ultima obstinare animos. Commilitonum pauculorum cæde territi, nulla ducis cura, quaque possunt, dilabuntur. Nil opus est receptui canere. Fugiant denique, vicenive, tum enimvero veluti pudore omnes exsoluti equorum, si qui præsto sint, ungulis vitam credunt suam, & amnis instar rupto aggere extra ripas effusi, ruunt. Urgente metu sæpe binos, aliquando ternos uno sedentes in equo, avolantesque conspicias. Velitationem pedestrem auspicati, ne fugæ defint instrumenta, sollicitè provident. Hunc sane in finem a tergo pugnantium, extra teli iactum, equi præparati, quibus adolescentes insident interea, & præliantium vicissitudines velut ex orchestra, impune speculantur, præliandique artem securi condiscunt.

Quod si vero hostes iniquiorem sibi belli aleam experti recipiant se se, contrariorum insectationem pertinaciorum in reditu quod timeant, vix habent. Victores enim gloriæ iacturam facere, magnopere cavent. Nolunt ancipiti dimicatione fortunæ vices, novumque discrimen experiri. Hastam forte, vestemve aliquam ab hostibus in acie sibi ereptam probro-ssimam nationis suæ labem interpretantur Abipones, acerbiusque ferunt, quam legionarii Europæi vexillorum, tympanorumque militarium iacturam. Hasta, binæque vestes in velitatione aliqua gregariis Abiponibus extortæ diuturni Debayakaykinum inter, & Ychoalayum belli origo, certe occasio fuere. E pacis, quam sanxerunt in S. Ferdinandi oppido, conditionibus princeps erat istarum recularum restitutio.

Hæc

Hæc cum aliquot mensibus nequidquam expectaretur, bellum recruduit. Victorias, secundosque præliorum eventus non suæ dexteritati tribuere solent Abipones, quin potius præstigiatorum suorum artibus in acceptis referre. Quamvis reliquas Paraquariæ nationes despiciatui habeant, seque illis omnibus militari audacia præferendos putent, Quaycurus tamen Barbaros sibi formidabiles esse nunquam inficiantur; Illorum hastis se fungorum instar in acie prosterni, ajunt, non quod isti armis melioribus, corporum firmitate, aut animorum magnitudine excellent, sed quia præstigiatoribus multo doctioribus comitati pugnam inire consueverunt. Istorum vel solo halitu afflatos, veluti fulmine ictos se humi procumbere, Alaykin Abiponum veteranus ductor, mihi affirmaverat. En miserandam Barbarorum credulitatem! Versipellis propemodum Cœlestem affingunt virtutem, qui præstigiis, fallaciis, dolisque putidis eos circumveniunt, nihilque norunt, nihil possunt præterea.

Sed jam Abipones pugna defunctos feliciter, ovantesque contemplemur. Si res ad votum fluxere, latis de victoria rumoribus, & plerumque exaggerata hostis clade, implent omnia. Qui præ cæteris strenue rem gesserant, omnium oculos, auresque in se convertunt. Qui vulnera ex acie retulerunt, concurrenti præstigiatorum medicorum turbæ exsurgendos se, curandosque præbent, spectatorum, qui circumstant, multitudine eorum constantiam, masculamque fortitudinem laudibus, & admiratione palam prosequente. Ad spectandas, si quas ab hoste attulerant, exuvias, manubiasque maximi fiunt undique concursus. Fœminas in hilaritatem impotenter effusas non tam gestire, quam insanire gaudio, cre-

das; Nullum facerent cantandi, saltandi, plaudendi-
que finem, nisi eas mox parandis ad publicam mari-
torum computationem rebus curas omnes intendere
oporteret. Hanc, ut de faciendis consultant, pugnae
praemittunt Abipones; Eandem, ut a se facta cele-
brent, pugnae confestim subjungunt. Dilapsis hosti-
bus quemadmodum horribiles e vultu colores, sic
praeteritas de conflictu ineundo sollicitudines ex animo
poculis abstergere quamprimum adlaborant. In hoc
compotantium catu inconditis clamoribus, cucurbi-
tis, tympanisque cantui consonantibus dum victo-
ria celebratur, postquam liberaliore mellei liquoris
haustu incaluere omnes, sua quisque facinora com-
memorare, alter alterius errores, timiditatem, fugam,
dictis perstringere solet. Quod cum Abiponum
ferat nullus, pugna defuncti pugnis primum, mox
bile magis magisque effervescente, haultis, sagittisque
inter se contendunt atrociter. Ni foeminarum con-
ciliatricularum savae industriae in armis eripiendis, in
abducendis domum maritis accederent, plures post
pugnam, quam in pugna trucidandos Abipones, mi-
hi extra dubium est. Qui citra noxam acie excesser-
unt toties, temulenti temulentorum manibus inte-
reunt non raro. Neque est, cur ob Barbarum hunc
morem Barbaris succenseamus, apud Europaeos mili-
tes minime rarum. Horum quot incolumes praeliis
interfuere, a socio subinde inter pocula concisi, mu-
tilative! Videram abhinc annis quadraginta Militares
Praefectos quinque consociatos in foro. Insignem
singuli cicatricem vultu circumferebant. Na! isti
cominus hostem videre, aiebam veterano ejusdem le-
gionis Praefecto, cum quo forte sermonem istuc miscui
familiarem. Amice! nemo istorum, is mihi reposuit,
ab hoste vulnus unquam abstulit. Cicatrices haec,
quas

quas suspicis, Bacchi sunt, non Martis monimenta.
Mihi fidem habeto. Dudum novi singulos.

Paucula, quæ ad hoc argumentum pertinere videbantur, Corollarii loco adjicio. Si in remotioribus ab oppido locis commissa est pugna, eques, ejus successum qui contubernalibus nunciet, ex acie præmittitur. Hunc eminus visum obviam effusa turba concussis identidem dextra labiis consalutat, stipatumque ad ejus ædes comitatur. Per forum silentii semper tenacissimus ex equo ad lectum præcipitat. Inde veluti ex cathedra circumfusæ multitudini prælii eventus voce gravi exponit. Si vel pauculi hostium obtruncati, sauciative fuerint, solenne his nunciis orationis exordium est: *Nalamichirini* internecone deleti sunt. Quod composito ad severitatem vultu arroganter cunctabundus pronunciat, & circumstantium plausu excipitur. Enumerat dein' aliquot in acie a se cæsos, & de plerisque, ut victoriæ augeat splendorem, affirmat: *Eknam Capitan* Ille fuit Capitaneus, quo nomine illi nobiliorem quemque intelligunt. Sit Indus, sit æthiops, dummodo Hispanorum more elegantius vestitus, Capitaneus, nobilisque ab illis dicitur; Nam ex vestitu quorumcunque metiuntur conditionem, dignitatemque. Quoties cæsi in acie hostis nomen profertur, totus his vocibus aer resonat: *Kem êkemas*? Ta Yeegam! quibus verbis admirationem explicant suam. Mox captivorum, equorum, plaustrorum, quæ rapuerant, exaggeratus plerumque numerus decantatur; De singulis enim: Ea esse innumerabilia *Cbik Leyékalipâ*, asserit, cum ultra triadem nesciant numerare verbis propriis, ut alibi explicui. Ad quamvis de prædis innumerabilibus mentionem in hanc: *Nâre* voculam erumpunt auditores, qua rem sibi inexpectatam, nunquam auditam decla-

rant. Enarratis, quæ pugnam arduam, victoriam luculentam facere videantur, minutatim cæteris, commilitones suos in acie vulneratos detegit denique. Ad singulorum nomina: vox *Tayreta* pauperculus cum gemitu repetitur a circumstantibus. Contubernalium, qui in acie occubuerunt, tragica enumeratio pro relationis epilogo reservatur, omnemque de victoria, de spoliis plausum in planctum convertit. Cum Abipones nefas putent vitâ functi nomen pronunciare, pugnae relator hunc fere in modum circumscriptione utitur: *Yoale' eknam oauerma Kamelèn Lauenek la' chitkaekà*. Vir feminae Hamelèn maritus jam non est. *Yoale eknam Pachiekè Letà la chitkaekà* vir Pachiekè pater jam non est. Sic cæteros, si plures obiere, enunciat. Facta vel unius suorum interfecti mentio omnem de quantacunque victoria jucunditatem, ut aqua ignem, exstinguit, ejusque vel recordationem reddit intolerabilem. Hostibus ad unum omnibus internecione deletis si Abiponum vel unus occumbat, victoriam, licet clarissimam, captivorum agmina, spoliis suppellectilem omnem diris devovebunt omnibus, quia vel unius suorum morte emptam. Hinc ille victoriæ prædicator nuncius, ut primum de contubernalium mortibus vel extimis labris mussitare cæperit, ab avidissimis diu auditoribus solus relinquatur aliis alio dilapsis. Mulieres universæ solutis, quos in funem colligere solent, crinibus, cucurbitis, tympanis arreptis longo ordine sibi succedentes forum omne percurrant, horrendoque cum ejulatu (ululatus diceretur rectius) in horas plures producto ab hostibus interemptos lamentantur, quod alibi de luctu, exequiis, funeralibusque Cerimoniis Capite 26. fusiùs exposuimus.

Abipones ab expeditione reduces non uno agmine, sed in manipulos divisi contubernium ingrediuntur suum, sine ostentatione, si victores: sine maioris significatione, si victi, vel gravissime etiam sauciati; Nisi Cazikium suum, expeditionis ducem in illa amisissent. Tum equidem attonsis non nihil capillis redeunt ad luctum testificandum, Cazikique demortui ossa carne prius nudata, uti & cæterorum, qui occubuerant, non sine funebri apparatu adferunt, quem cap. 27. curate descripsi. Bellatorum anxie expectatus reditus omnium ad se oculos, aures, ora, manusque rapere solet, his equorum agmina, captivos, prædas cæteras, victoriæ fructus aspeçantibus; Illis de cognatorum incolumitate percontantibus; Aliis sauciorum vulnera, idoneamque illis curandis medicinam considerantibus; Fœminis omnibus plantu occupatis. Captivos, equos, mulos, reliqua, quæ quisque rapuit, sibi retinet: ni, ut moris apud illos, amicis malit largiri plurima. Uno sæpe itinere prædiis pluribus, campis amplissimis omni ex parte exhaustis plura equorum millia adferunt. Hos, nescio, quibus legibus, ea tamen ratione inter se partuntur, nullus ut sit dissidiis locus. Diebus posteris equos, qui cuique in partitione obtigerant, avidissime periclitantur. Illos cæteris præferunt, quos velocissimos experiuntur, & alias fere, quæ equum ornant, pulchritudines parvi facere consueverunt. Videas quotidie adolescentum turbam cursu certare, imo & verbis contendere, unoquoque suum præ alieno laudante. Uti pomum recens, quod ipsi ex arbore decerpimus, sapidius putamus. Sic illi, etsi præstantiores domi habuerint, nuper adductos equos omnibus præstare, arbitrantur. Reportatæ de hoste victoriæ recordatio quantum illorum animos oblectat, tantum perturbat; Illos enim, quos clade affecerant

nuper, quamprimum ad vindicandas Cædes, rapinasque adfuturos, diu, noctuque timent. Hinc ad tranquillandam mentem, ad excogitandas propulsi hostis rationes illis maxime cordi est, publicam de more computationem illico adornare, certissimum illud, ut credunt, sagacitatis remedium, atque magnanimitatis instrumentum.

C A P U T XLIV.

De anniversaria Victoriarum memoria, & Computationis publicæ ritibus.

Haud satis est Abiponibus, dum ab hoste redeunt, cruentis adhuc manibus recentem victoriam celebrare, ejus memoriam publica quot annis lætitia renovare solent. Cantu, potu, insaniis, quanta quanta illa est, definitur. Postquam mel, potionis materiam, copiosum e sylvis congefsero singuli, anniversariæ huic cerimonie dies præfigitur, domus item, quæ convivarum par numero esset, amplior designatur. Ultimo, quod statum diem antecedit, triduo elegantiore convestitus pallio præconum aliquis omnia circumcursat tentoria; Ad singulorum ingressum festiva labiorum percussione ab incolis fœminis salutatur; Ejus hastam, quam tintinnabulo æneo insignitam gestat, mater familias quælibet honoris gratia e venientis manibus accipit, redditque dein abeunti. Ingressus domum præco humi disposito jam pulvino, ephip-

ephippiis, vel ferinæ pelli insidet. Conceptis mox verbis ad communem victoriarum concelebrationem, cantionemque patrem familias invitat. Digredientem solita labiorum percussione prosequuntur mulieres domesticæ. Eadem prorsus ratione contubernaliū cæterorum obit stativa, comitantium puorum turba semper stipatus. Præconis officio, quod Abipones Patritii detrectant, aspernanturque, proletario genere orti, ætate graves, & præstigiatorum nomine insigniti funguntur. Plebejū vocant omnem alienigenam, e majoribus Hispanis, aut nationis alterius Indis oriundum. Se se enim solos (Risum comprime) nobilissimos reputant Abipones, quosvis alios quasi obscuro, humilique loco natos superbissime, stultissimeque contemnunt. Hispana bello capta, sit nobili genere, ætate floreat, & forma, amasium Abiponem, minus maritum sibi speret, quia extera, & vel hoc nomine Abiponenſi impar nobilitati.

Domum interea futuro conventiculo destinatam tumultuario instruunt apparatu. Solum tigridum partim, partim taurorum pellibus, quæ insideant hospites, convestiuntur. Extemporalis moles ex arundinibus nullo artificio compositis assurgit, cui avulsæ ex hostium capitibus comatæ pelles affiguntur, ceu trophæa. Si quando sub dio extra tentorium victorias celebrare illis visum, in circulo, intra quem confident, solo infiguntur hastæ, e quibus trophæa illa pendent. Sole præcipitante invitati ad locum designatum confluunt, humique confidentes coriacea mulsi vasa in medio, suoque in conspectu habent, quamvis computationi non nisi sub Auroram principium detur. Noctem enim omnem decantandis victoriis impendunt. Diu, multumque cogi-

tanti mihi idonea satis vocabula, quibus peregrinum nobis Barbarorum concentum exprimerem, vix totum Latium suppeditavit. Viva voce, characteribusque musicis facilius id, meliusque præstarem.

Nunquam omnes, sed bini concinunt, magno semper vocis sursum, deorsum currentis discrimine, alio alium jam præcurrente, jam sequente, jam interruptumpente, interdum comitante. Nunc hic, nunc ille per breve intervallum conticescit. Alia, atque alia pro cantionis argumento modulorum varietas, soni in mæandros inflexio, atque liceat dicere, crispatis multiplex. Qui citatiore Gutturis motu cantum modo suspenderit, modo protaxerit, modo gemitibus vel risu interceperit, qui soni gravitate tauri boatum simul, simul capellæ tremulam vocem æmulatus fuerit aptius, is enimvero omne tulisse punctum, is magnus Apollo dicetur. Nemo fuerit Europæorum, qui, nescio, quem mærorem, horroremque a Barbaris his cantoribus sibi afflari diffiteatur. Adeo ferali carmine aures feriuntur, ipseque adeo animus percellitur, nocturna caligine horridarum vocum tristitiam incredibiliter augente. Cantorum quilibet cucurbitam oblongi colli ex frumenti turcici, aliisque seminibus injectis strepitantem manu circumagit motu ad musicos numeros accomodato. Interdum symphonicorum more sola cucurbita cantui præludit, alias cantoris sequitur vocem, rarius tantisper conquiescit. Id visum adnotare, ne infernalem hanc musicam suo carere artificio suspiceris. Admiratione profecto digna videtur tanta vocum discordium concordia, duobus concinentibus. Neminem illorum in cantando hæsitare unquam, vel obmutescere, advertas. Et vero non subito calore, atque ex tempore, quidquid in buccam venerit, effundunt;

dunt; Quin diu meditati ad canendum accedunt singuli. Memoriae mandant, quod e labiis depro-
 mendum publico in cœtu. Cantilenæ nulla sunt le-
 ge metrica adstrictæ equidem, rhythmicum tamen
 quid sonant aliquando. Versuum numeros haud suo
 quisque arbitrio, sed pro argumenti, quod decan-
 tandum, varietate moderantur. Non nisi expeditio-
 nes bellicæ, hostium cædes, manubiæ ex illis captæ,
 oppidorum expugnationes, plaustrorum, prædiorum-
 que direptiones, Hispanorum coloniæ incolis exhau-
 stæ, vel in cineres redactæ, ac aliæ id genus tragoediæ
 cantandi, lætandique materiem Barbaris præbere so-
 lent. Quæ cum loco, aut tempore, quo parta vi-
 ctoria, conjuncta sunt, non plebejo, sed exquisito
 stylo describunt. Veluti furore entheo perculsi jam
 indignabundos, jam trepidos, jam minaces, jam fe-
 stivos verbis idoneis, varia vocis modulatione haud
 inepte se fingunt; Jurares te modo Herculem furen-
 tem, modo Truculentum Plauti militem, modo An-
 chisen Pergamis suis illachrymantem audire. Quam-
 vis, ne hilaria funestent sua; vix aliquam de Abipo-
 num mortibus, vulneribusque inspergunt mentionem,
 totique sunt in hostium cladibus, funeribusque ex-
 aggerandis. Hæc dum epinicia tot horis decantantur,
 auditorum nemini nec hîscere, neque mutire, licebit
 unquam; Quin nocte ipsa somnum svadente, ne
 oscitare quidem videbis quempiam. Adeo heroum,
 facinorumque suorum laudibus capiuntur, ut somni
 immemores e cantorum ore pendeant omino.

Cum, Horatio teste, commune id cantoribus
 sit vitium, ut, nisi rogati, non cantent, & injussi
 nunquam desistant, de fine canui imponendo quod-
 vis cantorum par admonetur per fœminas, quæ a vi-
 ris secretæ circumstant, & dum bini cantores horæ

qua-

quadrantem circiter impleverant, labiorum repetita percussione, satis esse, significant, hasque voculas: *Kla Leya* jam sufficit, pronunciant. Admoniti morem gerunt illico, & magnificam rerum truculenter a se gestarum commemorationem hoc omnes claudunt epilogo: *Denique vales sumus nos, Gramachka akam*, ut oratores, dum finiunt: *Dixi*, & pœtæ: *Cecini* adjicere solent. Mox aliud par succedit prioribus, atque eadem ratione cantus ad auroram usque extrahitur. Tum enimvero mutata scena compotationi principium datur, fessaque ac sicca Guttura Americano illo nectare recreantur, quod sive ex melle sylvestri, sive ex siliquis græcis aquæ injectis, & horarum aliquot intervallo vivescentibus compositum voluptatem adfert bibentibus, ac moderate sumptum incredibiles corporibus præstat utilitates, ut superius capite septimo uberius explanavi. Potum ex siliquis græcis maxime ægris, tabescentibusque præ omni pharmaco, senio confectis pro lacte esse, multorum experientia constat. Nam collapsas vires insigniter instaurat, quod in ipsis quoque bestiis passim hoc fructu vivescentibus experimur. Fœminis tamen Abiponensibus alio præter aquam potu uti, nefas. Abstinentiæ hujus causam indagare, nunquam mihi in mentem venit. Solam consuetudinem pro lege esse, opinor, ut aliis in rebus. Divino tamen consilio ejusmodi morem apud Abipones stabilitum fuisse, conjicio, ut temulentos identidem maritos, dum mutuas in cædes ruunt, sobriæ cohibeant uxores, quæ dum pacificationis studio digladiantium circulis se se inferunt, dum maritorum hastas, telaque cætera jam abdunt, jam eripiunt, plurium vulnera impedituræ, frequenter, graviterque vulnerantur. Adhuc cælibes, quamvis adultiores, a publico compotantium coetu excluduntur quidem, clanculum tamen mellea pocula

cula delibare illis integrum, uti & fœminis quibusque mel purum haurire, & filiquis græcis vesci. Sapienter ab Abiponum majoribus cautum est, ne adolescentes computationibus publicis interessent; Noxas ex illorum vinolentia enascituras, exemplo suo docti prævidebant. Juvenes equidem ipso ætatis ardore ferventes, dum temeto quovis se se ingurgitant, ignes ignibus addunt, ut ovidius canit: *Et venus in vinis, ignis in igne fuit.*

Mel, ex quo potus confiat, in sylvis conquirere, virorum est. Totus labor potionis qualiscunque conficiundæ in fœminas recidit. Illarum est filiquas dum maturuere, ex arboribus sternere, equo domum deportare, in mortariis conterere, eis aquam, quam cantharis ex amne adferunt, affundere, pelles bubulas, quæ vasa suppleant, concinnare. Audi structuræ methodum. Amputatis pedum extremitatibus corium bovis quadratur. Quatuor ejus lateribus in duarum Spithamarum altitudinem elevatis, loroque colligatis, quidquid liquoris infuderis, fundo recipit, fideliter, quin Guttula effluat, complectitur. Corium eadem ratione dispositum, dum vasis agit vices, ab Hispanis *El noque*, ab Abiponibus *Aápè* vocatur; Dum ad transmittenda flumina cymbæ instar servit ab Hispanis *La pelora*, ab Abiponibus *Netak* dicitur. Quomodo corio insidentes ab alio natante tracti lacus, fluviosque trajiciamus, jam alias significatum.

Mel, vel filiquæ Græcæ aquis immersæ jam citius, jam tardius pro aeris calidioris, vel minus calidi temperie optabilem illum grææ acrimoniæ gradum attingunt, & sine rei alterius accessione quodammodo vinefcunt. Abipones, computationis avidiores, alii, aliiq; coriacea illa vasa accedunt identidem, olfaci-

untque, num potio mellea maturitatem habeat suam. *Layam yebam.* Jam jam vinefcit, recedentes exclamant finguli. Dum denique his fuccedat quifpiam, qui nalo iudice, fententiam pronunciet: *La yebam. Jam habet neceffariam aciditatem.* Quo vulgato deftinatum in locum confluunt univerfi. Coriacea illa vafa mulfo ebulliente plena fex, octove puellarum manibus apportantur fingula; Iftæ deposito onere, ne verbo quidem ad compotantes prolato ad fuas fe recipiunt ædes, digniffimæ profecto, quæ Europæis puellis modèftiæ, pudorisque ingenui magiftræ præficerentur. Primo vafe necdum confumpto aliud adfertur, huic tertium fuccedit, quartum tertio, ut adeo viri in exhaurienda, fæminæ in fubminiſtranda potione certare videantur. Nil mirabar, impigras in præſtando oblequio mulieres, ftrenuasque eſſe, dum, quanto quævis folertior, tanto apud populares fuos celebrior, tantoque de mariti gratia certior evadit. Repudiandas fe jure timent, certè frigidius amandas, omnem ni moverint lapidem, ut fitientibus femp viris fua nunquam defint pocula, nunquam difpliceant. Fatendum tamen, Abipones compotationum licet ftudioſiſſimos privatim, dum prandent, dum cenant, nullo præter aquam potu quotidie uti. Quid, quod & noverim omnium ex melle, & filiquis Græcis portionum femp abſtemios, verum tam paucos, uni ut omnes annulo queant inſculpi. Tales, cum eximia, rariſſimaque abſtinentia commendare debuerat, reliqui ut ignavos, degeneres, ftupidosque averfantur. Et vero profapia, militari gloria, authoritateque qui præcellunt maxime, eos maxime bibulos plerumque obſervavi. Adeo ebrioſitas excellentiæ apud iſtos modo ſignum, modo inſtrumentum, vel præmium eſſe videtur. Vix ullum videas compotanti-
 ti-

tium circulum, cui Abiponum optimates, pro heroibus vulgo habiti, non affideant, præsideantque, quamvis oborta, ut solet, temulentos inter contentione a quovis infimæ notæ plebejo pugnis sæpe contundantur, postridieque computationis plures, quam in iride numeres, colores circumferant vultu. Bellicosæ nationis primores perpotationibus immodicis plurimum indulgere, ut mihi certissimum, sic nemini mirandum, qui antiquitatis historias pervolverit. Ex illis equidem liquet, ubique gentium summos viros non raro vinolentia laborasse. Alexander Macedo, Holofernes, Antiochus magnus, (quanta nomina, sed quanti potatores!) Dionysius minor, Mithridates Ponti Rex, Cleomenes Spartanorum, Cambyfes Persarum, Prusias Bithyniæ, Mezentius Hetruriæ, Attila, Bela secundus Pannoniæ Reges, Demetrius Phalereus, Marcus Antonius, Maximinus junior &c. &c. natalium suorum, facinorumque splendorem vini intemperantissimo usu non obscurarunt modo, sed & propemodum exstinxerunt. Ebrietatis vitium Catoni minori Julius Cæsar objecerat libris duobus, quos Anticatones vocavit. Confirmavit idem Horatius L.

3 Carminum: Narratur, ait, & *prisci catonis sæpe mero caluisse virtus*. Tiberius Nero Cæsar in Castris Biberius Mero passim dicebatur, quod viis cæteris ebriositatem adjecerit. Monumento Darii, Histaspis filii inscriptum est: *Potui large vinum Bibere, idque egregie sustinere*: Sic Strabo L. 15. In omnium ætatum, provinciarumque annalibus maximos passim homines, belli, pacisque negotiis functos invenias, qui semper parum sibi bibisse videbantur, nisi nimium biberint, eumque in finem nati, ut biberent, non ut viverent, per jocum dicebantur. Equis stupeat istiusmodi heliunom imitatores inter Barbaros reperiri in calenissimis Americæ tractibus? Illis sane, quippe quibus

bus plus sitis, minus mentis esse solet, eo lubentius ignoscendum.

Interfectorum hostium, ut dixi, Calvariis interdum, alias cucurbita, sæpe cornu bubulo pro poculis utuntur. Europæorum morem convivarum saluti pocula libantium ignorant. Expeditionis bellicæ ideam proponat quispiam, & ad illam invitet assidentes, hi arreptis poculis: *Là jam* exclamant, ratumque se, quod proponitur, habere haustu strenuo significant. Id quoque memoratu dignum: Abipones quamvis alias, ut Americani cæteri, voracissimos vix aliquid cibi capere, quamdiu dies, noctesque potando consumunt. Ex quo palam fit, & siliquas græcas, & mel, e quibus illa potio conficitur, magnas ad alenda corpora vires, & non modicam cum cerevisia similitudinem habere, cujus usu crebriore Europæos pinguescere, experimur. Ego profecto nunquam a me impetrare potui, ut, quamvis centies invitatus, vel semel illud Abiponum nectar labiis ad moverem, vomitum mihi certum declinaturus; Sæpius equidem observaveram, Siliquas illas, & mellis favos jam dentibus cibi instar comminutos ab iis egeri rursus, & in scutella, futuræ potioni miscendos, reservari. Existimant enim, illa siliquarum rejectanea, quippe salivis permista, fermenti loco fore, quod reliquam massam celerius ad gratum saporem faciat accescere. Eadem ratione ducti Indi, Hispanique Paraguarientes triticum Turcicum (Quaraniis *Abari*, Abiponibus *Nemelk*, Hispanis *Mâyz*) potui destinatum Vetularum dentibus comminui, curant. Nolunt eam provinciam demandare sceminis junioribus, quas finitris humoribus scætere arguunt. Hic mos Americanis & antiquissimus, & universalis. Id qui noverit, poteritne stomacho, quamvis patientissimo, persuadere,

re, hanc potionem (Chicha dicitur a Paraquariis, Laagà ab Abiponibus) ut sine nausea admittat? Ipsa certe viscera mihi vomitu evertenda, metuerem. Hæc tamen spurcissima, quia vetularum saliva horrens potio plures in America procos habet, quam Helena olim Græcorum.

Computationis celebrandæ multas semper habent causas; Frequentiores sunt: Parta victoriâ, imminens pugna, iusta funebria, genetliaca de nato Caziquii filio lætitiâ, viduorum, viduarumve tonsura, nominis mutatio, Capitanei, qui recens inauguratur, renunciatio, hospitis insignioris adventus, nuptiæ, & quod frequentissime recurrit, bellicum de hostibus seu invadendis, seu evadendis consilium. Nam, quod alias dixeram, nunquam sibi plus sapere videntur, quam dum insigniter temulenti maxime desipiunt. Neque soli Abipones id sibi persuasum habent. Alii quoque populi eodem laborarunt errore. *De summa rerum inter pocula deliberant Persæ*, Herodotus L. I. ait. Perpotando ingenium exacui plures alii putarunt cum illo cretensi, cujus verba apud Gellium L. 15. cap. 2. *Vinum fomes est, atque incitabulum ingenii*. Confirmatur ovidii sententia: *Poetæ carmina, vino ingenium faciente, canunt* - - Hanc Ovidii opinionem exemplis illustravit Horatius Libro I. epist. 19. Ait enim: Nullum boni coloris versum, aut qui placuisset, e poetis aquæ potoribus unquam fluxisse:

Nulla placere diu, nec vivere carmina possunt,

Quæ scribuntur aquæ potoribus - - -

Ennium, latinæ pœseos parentem nunquam, nisi vino bene madidum, carmina scripsisse.

*Ennius ipse Pater unquam, nisi potus ad arma
Profluit scribenda - - -*

Homerum quoque, qui vinum tantopere commendavit, de vinolentia sibi suspectum esse:

Laudibus arguitur vini vinosus Homerus.

Quod si igitur potando ingenii acies obtinetur, quis inique ferat a Platone, sapientiæ magistro, moderatas computationes laudari, & ab Abiponibus tum maxime frequentari, dum de bello suscipiendo deliberare illis visum. Quamquam extra deliberationis tempora haud minus iis pocula sapiant. Adsit materia parandæ potionis, causa, voluntasque potandi deerit nunquam. Promulsidem, cum mel quærentibus passim præsto sit, quavis anni parte in promptu habent, quæ dulcedine ad alliciendos, robore ad opprimendos Indos plurimum quidem valet, pro illorum tamen numero cum tanta mellis copia raro suppetat, melleæ istiusmodi computationes fere perbreves sunt, & procellæ subitæ, vel turbinis instar durare diu haud possunt. A Decembri ad Aprilem usque, dum siliquis maturis nemora abundant, computationis tempestas grassatur potissimum: His mensibus nulla a potu vacatio, intermissio nulla. Non cessant nocturno certare mero, putere diurno, ut Horatius L. 1. epist. 19. canit. Dies nectuntur noctibus vix alio ad somnum, cibumve obiter capiendum intervallo, nisi dum ebrietate stupefacti humi concidunt, aut e somno expergesfacti esurire se tantillum animadvertunt. Plerique post soporem brevissimum mente sibi vix dum reddita ad combibonum coetus, gradu sæpe titubante regrediuntur. Per omne id tem-

tempus eos rarissime sui compotes invenias, vivere illis bibere est, & *quanto plus biberint, tanto magis eos suire* diceres, quod teste Plinio L. 14. cap. 22. scytharum legati de Parthis affirmavere. Diogenes certe sua instructus lampade minus hic, quam in confertissimo olim foro Corinthi hominem inveniret, vel Abipones ebrios Corybantes crederet, qui, ut memorant antiqui, postquam c Gallo Phrygiæ fluvio bibissent, furore perculsi sunt, & quoties cybeles honoribus sacra fecerant, in rabiem versi sua cultris brachia dilaniarunt. Ast quid Galli fluvii unda ad Americanum vinum? Quid Corybantum furiae ad Abiponum temulentorum deliramenta? Isti equidem (causas alibi dixi) crocodili acuminatis ossiculis, spinis acutissimis pectus, brachia certatim compungunt, ipsam non raro linguam transfigunt. Quid quod nonnulli terebrant - - Sed apage. Scribere pudet, quod verecundiam adferat lectori, &, quamvis certissimum mihi, aliis vix verisimile possit videri, & cum vitae periculo conjunctum. Profecto insaniae genus est, delicatissimos artus, sensuque acerrimo praeditos atrociter cruentari a Barbaris, ut se doloris sensu carere, ad sanguinis conspectum nil trepidare, vulnera pro deliciis habere alter alteri persvadeat. *Natis in usum latitiae scyphis pugnare Thracum est.* Horatius dixit, ex quo historici colligunt: Scythas, ac Thraces suis in compotationibus poculorum numero certasse. Apud Abipones ebrios quotidianum in cruciandis corporibus certamen. Familiaris de magnanimitatis praerogativa disceptatio. Haec vociferationum inconditarum, digladiationum, vulnerum, caediumque origo saepissime. Hac in velitatione terga vertisti timidus, forte alter alteri exprobrat. Hic probum sibi minime ferendum ratus: Quid? Quid ais? *Hegâ? Hegmeên gracâtegi?* replicat. A verbis ad

colaphos, ad hastas, ad sagittas, ni obstant alii, sensim venit. Sæpe orta duos inter contentio implicat, concitatque universos adeo ut arma arripiant singuli, jam hujus jam illius partes secuti in aciem prodeant duplici agmine, fraternæque acies, ceu hostiles, atrociter se se impetant, conficiantque. Haud infrequens computationum tempore id spectaculum, in plures aliquando horas magna configentium vociferatione, sanguinis effusione non minori productum. Adeo in tigrides convertit Americanos potus intemperantia, quavis circe crudelior.

Solenne erat spartanis, ut Plutarchus institit. Lacon. refert, servos inebriare suos, ebriosque, dum maxime ineptiebant, filiorum in conspectum adducere, ut visa eorum dementia vinum, ceu magicum liquorem, execrari discerent, quo scilicet homines in bestias transformantur. Quotidiana hæc Abipones computantes inter metamorphosis, sed alias, atque alias temulentorum cerebro imprimens figuras. Hi solutissime cachinnantur ipsa hilaritate hilariores: Illi mærore oppressi plorant: Isti facinorum suorum recordatione inflati, thrasone comico Terentii, & Plauti milite glorioso minaciores insolenter se jactant: Plerique alii furibundi extrema obviis minantur. Novi, qui trienni filiolo, quoties ebrius, semper necem intentabat, & cum pedibus insistere haud posset, humi stratus ad conjugem adstantem verba fecerat maxima, ut per omnem viciniam exaudiretur, vocis contentione. Erat, qui temulentus baptismum sibi semper expetierat a nobis: *Tak nakarigi yemara! Grabalgali!* Propera, lava meum caput, identidem exclamans, etsi sobrius de baptismo nil unquam cogitaret. Alius præter morem suum, ad exosculandas Patrum manus cum magna venerationis significatione

accurrit. Quidam nullius apud suos nominis, arcu, sagittisque instructus ad nostras adrepsit aedes, & Num magnus mihi capitaneus, vir scilicet factis grandibus insignis videretur, minitabundus ex me percontabatur. Ego torvam interrogantis frontem, sagittarumque fascem veritus magnificam enimvero panegyrim illi pro responsione obtrusi semper, quamvis homo meticulosissimus despiciatui passim haberetur. Fuit, qui, quoties temulentus, toties de uxore repudianda, aliaque priori substituenda agebat, quod pluribus commune. Senex quispiam in S. Ferdinandi oppido, & genere, & factis inglorius dum a combibonibus plebejus, *Lanaraiik* vocitabatur, clamoribus absurdis, armisque ulcisci convitium frustra contendit. Nam uxor, pugnae vetula, furenti marito invigilaverat semper, ne combibonum vel pugnis vel mucronibus succumberet. Hinc illum pedibus, ceu temone apprehensum per forum raptabat, domique depositum ad somnum, silentiumque nequidquam hortabatur; Is equidem sociorum contumelia animo identidem recurrente nullam cepit quietis partem, neque vicinos sivit quiescere rauca voce illud usque ejulans: *Tà yeegam! Aym Lanaraiik? Tà yeegam! La' ribè labè.* Papæ! Egone plebejus? Ego ignobilis? vindictam posco. His efferratus cogitationibus in pedes erigere sese dum parat, hastam arrepturus ab irata conjuge iterum, iterumque humi sternebatur. Plurimum saepe horarum is ludus cum incredibili pone habitantium fastidio fuit. Pauci indignationem comprimere, nemo risum tenere potuit. Idem sceminis plerisque omnibus negotium, dum maritis arma, armis temulentorum contubernalium maritos subducere non citra vulneris sui periculum adlaborant strenue. Actum erat dudum de universa Abiponum natione, si ut viri mariti, sic sceminae

etiam, ac adolescentes compotationibus interessent, qui ad tranquillandos temulentorum, dum in mutua ruunt vulnera, animos fœminis operam navare consueverunt.

Enimvero consuetudo illa, quæ apud Abiponenses viget mulieres, temeto quovis semper abstinendi, lex fuit Romanis mulieribus & antiquissima, & severissima. Audi Gellium L. 10. cap. 23. *Qui de victu, atque cultu populi Romani scripserunt, mulieres Romæ, atque in latio atatem abstemias, & invinias (vini expertes) egisse, hoc est, vino, quod temetum prisca lingua appellabatur, abstinuisse dicunt.* Abstinentiam hanc non fuisse arbitrariam, sed lege imperatam ex aliis, quæ author eodem loco scripserat, luculentum est. *Marcus Cato: Si quid perverse, terreque factum est a muliere, multatur; Si vinum bibit, si cum alieno viro probrî quid fecit, condemnatur. Ecce! quomodo vinosa mulier paria adulteræ fecisse judicatur.* Ob legis istius violationem acriter olim animadversum fuisse in quaspiam, scribunt. *Pompilius Faunus Fatuam Faunam virginis myrteis ad mortem usque cæcidit, quod contra morem, decusque Regium clam vini ollam ebibisset, & ebria facta esset.* Romulo adhuc superstiti mulier, quæ vinum attigerat, impune a marito interfecta est, iudicibus ejus cædem excusantibus. Neque adolescentibus promiscuum vini usum permittendum temere, veteres existimarunt. Plato sapientiæ magister equidem in suis pro Republica perfectissima legibus juvenes annum duodevicesimum nondum ingressos vino interdixit. Alio loco svaserat, ut juvenes coram senioribus vinum biberent, ne in temperantiam peccarent, utque, si in illam peccaverint, ab illis reprehenderentur. Platonis consilio morem gerunt Abipones juniores, utinam & adulti eorum sobrietatem imitarentur, ac Cretensium

Lacedæmoniorum, Carthaginiensiumque exemplum, qui milites suos vino interdixerunt omnino, ut Alexander ab Alexandris adnotavit. Pescennius Niger bellica virtute ad imperium evectus copiis, dum in castris versabantur, vinum adferri, vetuit, & legionibus in Ægypto vinum sibi poscentibus respondit: *Nihil opus esse vino, quibus Nilus præsto esset.* Soli aquæ ut assvescant Abipones, id enimvero optari, sperari vix poterat. Piscibus, ut aquæ valedicant, facilius persuadebis. Bellatores sunt Abipones, sed & potatores egregii. Syracusanorum ebrietatem nonaginta interdum diebus non fuisse interruptam, Aristoteles scripsit; Abipones a Decembri ad finem Aprilis usque, quibus scilicet mensibus & siliquarum Græcarum copia, & quotidianæ diu noctuque compotationes, temulentos esse, & vix per breve intervallum sui compotes, affirmo. Eosdem menses bellico strepitu turbulentissimos quoque sum expertus. Pauci abeunt dies, quibus temulenti novæ expeditionum militarium ideas non procudant, aut de hostium adventu rumores non circumferantur. Bibitur semper, semper trepidatur.

Quidquid flagitiorum, quæ in Americanos cadere possint, ex illorum animis evellas citius, quam nefariam hanc, & exitialem compotandi licentiam. Una ut conjugæ contenti vivant Abipones: Cædibus, rapinisque, in quibus consenuere, ut abstineant porro: Avitas superstitiones ut aspernentur: Agro colendo, struendisque sibi ædibus ut operam navent, semper alias laborem exosi, id sensim persuadebis denique. Publicarum compotationum morem abolere, id enimvero opus, si quodquam aliud, perarduum, is annorum plurium labor, hoc negotium, cui perficiendo nulla par seu eloquentia, seu industria



fria illorum, quibus curæ, ac cordi fuit Barbaras gentes ad Romana sacra traducere, divinisque legibus conformare. Hoc nos annis pluribus apud feros Abipones, idem alii socii apud nationes cæteras Americæ experti. Improbo tamen labori improbam cessisse perpotandi consuetudinem, ac plerosque divinæ legi victas dedisse manus, læti passim vidimus. Abiponum ad pelles potu melleo plenas confidentium conventicula quid nisi imago sunt festorum, quibus antiqui Bacchum coluere. Alia dicebantur Alcolia a græco nomine *αὐλὴς*, quod utrem significat; Utres enim vino turgentes his sacris adhibuerunt. Orgia dicebantur alia, a quibus nulla sceleris, furoris, turpitudinisque aberat nota, ut adeo vix senatus auctoritate abrogari possent impia hæc sacra. Qui primis seculis Christi religionem sunt amplexi, licet cæteras superstitiones, & simulacra dudum execrati a celebrandis Bacchanalibus ægèrrime demum avertébantur. Nostra utinam ætate nulla etiamnum Bacchanalium vestigia apud Christi sectatores, restarent!



CAPUT XLV.

De ritibus Abiponum, dum quis de re
militari bene meritus inauguratur, renun-
ciaturque Capitaneus.

Neque inter feras gentes sua virtuti defunt præmia. Homines se esse utut vix norint, honorificis gaudent titulis, quibus alter ab altero distinguatur, præ altero honoretur. Probissimam nobilitatem putant Abipones non illam, quæ sanguinis jure hæreditaria, & patrimonii instar, sed quæ meritis propriis comparata. Apud illos ut filiorum nemo patris sui nomine insignitur, ita nemo patris, avi, vel atavi factis egregiis nobilitatur. Nobilitas non generis, sed magnanimitatis, probitatisque in pretio iis est, ac honore. Hic Barbarorum sensus, quamvis Europæorum mori sæpe contrarius, sapientum disciplinæ, rationique consentit profecto. Nam, ut ille apud Ovidium metamorph. L. 13. vers. 140. ait: *Et genus, & proavos, & quæ non fecimus ipsi, vix ea nostra puto.* Qui enim (ut Seneca tragædus in Hercule furente vers. 339. affirmavit) *genus jactat suum, aliena laudat.* Rationem hujus reddit Seneca philosophus: *Nemo in nostram gloriam vixit; Nec quod ante nos fuit nostrum est. Animus facit nobilem, cui ex quacunque conditione supra fortunam licet surgere.* Hinc verissimum illud Juvenalis satyra 8: *Nobilitas sola est, atque unica virtus.* Idem prorsus sentiunt Abipones. Non
e pa-

e patritiis natos, sed animi nobilitate conspicuos maximopere reverentur. CaziQUIORUM, Capitaneorumque, ut ajunt, suorum filios, ac nepotes naturali quadam propensione, ceu stirpis patritiæ surculos, prosequuntur; Eosdem tamen, si stupidi, si meticulosi, si asperis moribus, si absurdo ingenio sint, nihili prorsus faciunt, contuberniis regendis, expeditionibus militaribus præficiunt nunquam. Alius de vulgo, quos strenuos, sagaces, intrepidos, modestos compererint, sibi rectores, ducesque deligere solent. Quicumque virtutis bellicæ documenta dederint, bellicis honoribus non sine cerimonia, quas mox referam, apparatu initiantur.

Abiponum, qui necdum militari gradu insignes, nomina in varias definunt literas. Recitabo aliqua. Novi, qui oahè, oahari, kiemkè, ychohakè, Hemakie, Rachik, Evofayelek, Neochiralari, Cañali, Laagalà, Caimefga, Tabañari, Melle, Ypiz, Ychoalay, Kebachichi, Hanà, Narè, Devork, Richivil, Rebachigi, &c, vocabantur. Postquam vero solenni ritu ob militaria merita in nobilium ordinem adscripti fuerint, relicto, quo adolescentes utebantur, nomine aliud obtinent, quod semper in syllabam *In* terminatur. Et horum audi paucula: Debayakaikin, Ychamenraikin, Alaykin, Malakin, Kebachin, Ychilimin, Ypirikin CaziQUII omnes. Alii Geernraikin, Hamihegemin, Nachiralarin, Laamamin, oaherkaikin, Nakalotenkodin, Neotenkin, Kepakainkin, Pazanoirin, Oapelkain, Kain, Kapalaikin, Kaamalarin, omnium universæ nationis senissimus, qui sacris undis a me ablutus dormiens subinde suaviter expiravit. Majorum instituto solenniter inaugurati *Höcheri* dicuntur, propriaque gaudent dialecto. Et si enim popularibus utantur verbis, ea tamen jam interjiciendo,

jam

jam adjungendo varias syllabas adeo transformant, obscurantque, ægre intelligi ut possint. Hanc loquendi methodum dudum explicui. Non desuere, qui vel prosapia, vel rebus præclare gestis illustriores modestiæ apud suos laudem captarent, nulloque unquam tempore adduci possent, ut recepto more Høcherorum numero adscribi se se paterentur, nomine, quod illis in pueritia obtigit, & linguæ plebejæ dialecto vulgari per omnem ætatem contenti. Hos inter primo utique loco commemorandi veniunt Ychoalay, & Kebachichi. Quanta hæc apud Abipones nomina! quanta Hispanorum in auribus fulmina! Rebáchigi ex iis, quæ adolescens belli patrauerat, ambobus major futurus arguebatur passim, ni a lethifero angue ictus vivendi simul, simul vincendi finem intempestive fecisset. Nunquam is ad militaris honoris gradum, toties meritum, aspiravit. Riús, quibus ad hunc alii promoventur, paucis completar.

Si cui cæterorum arbitrato talis decretus est honor, tolerantiam, communi omnibus experimento, prius periclitantur. Globulo nigro ejus linguæ imposito ipsum triduum domi confidere, silere, ac cibo omni, potuque abstinere jubetur. Aspera sane lex, svavissima tamen, si in memoriam revoces cruciatus, qui in flumine urinoco Indis quibusdam honorum militarium candidatis sunt subeundi. Craticulæ, cui subiecti ardentes carbones, imponuntur, & quo calor esset, fumusque intolerabilior, palmarum foliis non teguntur modo, sed propemodum opprimuntur miseri. Alios melle totum corpus perunctos, arborique alligatos apium, vesparum, fucorum, crabronumque morsibus exponunt. Plura id genus quæ Gumilla in tuo flumine Urinoco illustrato amplissime

refert, militaris patientiæ tentamenta taceo, & ad Abiponem suo in tugurio tacentem, esurientemque redeo. Ipso, qui solennem functionem præcedit, vespere mulieres universæ ad ejus tugurii limina congregantur. Vestibus ab humero ad umbilicum usque retractis, passis crinibus longo ordine consistunt, & tum inconditis vocibus, tum consonantium cucurbitarum crepitu, tum brachiorum, pedumque agitatione continua majores lamentantur illius, qui militari gradu postridie condecorandus. Neque antea lamentorum finis, quam tenebrarum. Albescente primum Cœlo candidatus noster gentis more eleganter vestitus, hastamque manu complexus in equum plumis, campanulis, phaleris oneratum potius, quam ornatum insilit, atque gradu concitatissimo septentriones versus procurrit, longo Abiponum agmine illum insequente. Mox eandem viam eadem celeritate remensus ad tentorium accedit, ubi præstigiatrix anus, cerimoniarum antistita, candidatum solenni ritu dein inauguratura. Illius ex equo descendentis hastam, unaque habenas officiose capeffit fœminarum nobilior quædam, reliquo matronarum circumstantium choro solita labiorum percussione iterum, iterumque applaudente candidatus vetulæ corio insidentis oratiunculam velut e Delphico tripode profecta oracula, venerabundus excipit. Mox conscensis denuo equis, eo quo prius, modo meridiem versus, tum ad orientem solem, denique ad occidentem excurritur, semperque post singula itinera ad idem tentorium descenditur, ubi itidem Phoebas illa Pythia facundiam exprimit suam. Quaternis excursionibus defuncti, equis dimissis, ad sacrum, si superis placeat, illud tentorium se se recipiunt omnes, solennem, qua inaugurari solent bene meriti milites, spectaturi cerimoniam. Hæc tribus potissimum definitur:

tur: Imprimis capillus candidati a vetula raditur ita, ut a fronte ad occiput usque calvitium quoddam, seu alba quædam semita tres digitos lata appareat, quam *Nalemra* vocant. Iphis quidem utriusque sexus infantulis (ut capite tertio de forma Abiponum exposui) aliquot in scincipite comas veluti religionis instinctu resecari curant; Verum adolescentes neglecta passim hac superstitione capillum alunt integrum, & provectiore solum ætate, dum inaugurantur, eo, quo dixi modo, attenduntur.

Terminato capillorum negotio panegyrim adornat vetula, candidati facta egregia, militare ingenium, armorum, equorumque scientiam, intrepidum in arduis animum, hostium occidionem, rapta ex iis spolia, majores bello claros, & quæ non alia recenset; Atque adeo multis nominibus dignum sibi videri, qui gentis suæ capitaneus, bellator nobilis renunciatur, eorumque, qui Höcheri sunt, juribus gaudeat, ac prærogativis. Novum illius nomen, quod in syllabam *In* desinat, palam promulgatur, & succussis manu labiis a circumfistentium scæminarum corona festive admurmuratur. Viris spectatōribus neutiquam volupe est, fccas in longum extrahi cerimonias. Potula præ verbis malunt. Hinc ad præparatas jam, melleoque potu turgentes pelles læti convolant, totique functioni nobilissimum corollarium adjiciunt computationem.

Illud singulare, mulierum quoque non paucas ad honoris, nobilitatisque gradum evehi, Höcherorum prærogativis gaudere, eorundemque dialecto uti. Istarum nomina in *En* syllabam, uti virorum in *In* terminantur v. g. Napalahen, Hamahen, Rekalenken &c. Sed quibus demum meritis hunc honoris




gradum plebejæ etiam fœminæ consequantur, ignoro; Responſionem abſurdam metuens nunquam auſus ſum interrogare. Veri tamen ſimillimum mihi ſemper viſum, ſuffragantibus parentum, maritorum, vel fratrum meritis ejusmodi prærogativam mulieribus concedi, non ætatis, Venuſtatiſve ratione. Audivi ſæpe juvenculas patritiorum lingua ſermocinantes; Matronas & rugis, & annis ſpectabiles vulgi ignobilis ore loquentes. Quamvis nullo plebejo liceat citra publicam authoritatem nomen in *In*, vel in *En* definiens ſibi arrogare, multi, multæque tamen Höcherorum dialectum affectant pro arbitrio jam ad oſtentionem, jam joci gratia. Ut ſæpe Europæum vulgus inſolens ſeu veſtitu, ſeu locutione nobiliſſimos quosque imitatur.

Nefas putant Abipones nomen ſuum palam pronunciare. Si quis illorum noctu portam pulſavit meam, interrogatus a me: quis es? *Miekakami*? Nil aliud reſpondit unquam vel decies repetita interrogatione, quam: *Ego ſum. Gramachka aym*. Advenæ ignoti rogati a me, quo nomine vocentur, adſtantem ſibi ſocium impacto cubito, ut ſui loco reſpondeat, admonent. Alter ſcilicet alterius nomen prodit, nemo ſuum. Nomen item nuper vita functi pronunciare, flagitii inſtar eſt. Quodſi nominandus tamen; *Ille, qui jam non eſt Eknam chirkaeka* ajunt, additis, cognofci ut poſſit, ſignis. Si quis inter pocula legis immemor demortui nomen proferat, cruentis ſæpe altercationibus dabit occaſionem. Et hæc proſecto, ut grammaticis ſolenne; lis eſt de nomine. Id quoque ridiculum, fœminas complures nomine carere. Catalogum incolarum oppidi conſcripturus virós contubernalium ſuorum ſcientiſſimos convocaveram. Iſti de fœminarum nominibus interrogati reſpondere ſæpius;

pius: *Hæc nomen non habet, vel illius nomen non est in usu jam. Chirkaeka lacalatoër. Chirlquihe localatoër. Chigâr eyga.*

Appendicis instar accedit; Indita sibi nomina ab Abiponibus perinde mutari, ut ab Europæis vestes. Causæ mutationis nominum esse solent vel facinus quoddam illustrius, vel obitus patris, filii, conjugis &c. ad luctum significandum propinqui omnes nomen vetus, cum novo commutant. Novi, qui progressu temporis sena, qui plura sibi nomina adsciverunt, sed priori semper relicto. Romani quoque jam a rebus præclare gestis aliis, aliisque nominibus insigniebantur. Inde Scipio Africanus, Germanicus, Numantinus, Asiaticus, cunctator &c. jam a corporis, animive habitu: Sic Crassus, Pulcher, superbus Pius &c. Sic apud Abipones: *Kaurin* lascivum. *Oaberkaikin* mendacem. *Ychoalay* rerum suarum tenacem. *Nee-traikin* potatorem significat. Filiis, filiabusque singula nomina a parentum nominibus penitus diversa obtingunt. Apud Quaranos jam Christianos filii patrum, filiæ plerumque matrum cognomen sibi sumunt. Idem mos apud Xarthios populos quondam viguisse asseritur in commentariis Taciti ad usum Delphini editis. In tertia historiæ parte, quæ jam sub prælo est, illatas ab Abiponibus, acceprasque clades, coloniarum, quas illis condidimus, progressum, ac vicissitudines, orta que ex illis Hispanorum emolumenta exponemus.






I N D E X.

- CAPUT I.** De Abiponum territorio, origine, & variis nominibus.
- II. De nativo Americanorum colore. De Patagonum proceritate neutiquam gigantea.
 - III. De forma Abiponum, corporisque conformatione.
 - IV. De avertis, communibusque formæ corruptelis.
 - V. De labiis, ac auribus Barbarorum perforatis.
 - VI. De Abiponum firmitate, ac vivacitate.
 - VII. Cur Abipones tam vegeti, & vivaces?
 - VIII. De Abiponum religione.
 - IX. De Abiponum Magis, re tamen ipsa præstigiatoribus, veteratoribusque.
 - X. Conjecturæ, cur Abipones malum dæmonem pro avo suo, Pleyadasque stellas pro illius imagine habeant?



CAPUT XI. De nationis Abiponicæ divisione, paucitate, ejusque causa præcipua.

- XII. De Abiponum magistratibus, Capitaneis, Caziquiis, deque regiminis forma.
- XIII. De victus, itinerum, aliisque œconomicis Abiponum rationibus.
- XIV. De vestium forma, materia, ac utensilium cæterorum fabrica.
- XV. De Abiponum moribus, consuetudinibusque.
- XVI. De Abiponum lingua.
- XVII. De aliis linguarum proprietatibus.
- XVIII. Variarum Americæ linguarum specimen.
- XIX. De Abiponum nuptiis.
- XX. De Abiponum conjugio.
- XXI. Memorabilia de fœminarum Abiponenfium partu.
- XXII. Ludi genethliaci ob natalem masculæ proles Caziquii.
- XXIII. De morbis, medicis, & medicinis Abiponum.
- XXIV. De morbo quodam Abiponibus peculiari.
- XXV. De variolis, morbillis, lueque pecorum.
- XXVI. De Abiponum medicis, ac medicamentis.



CAPUT XXVII. De ritibus, qui Abiponum mortem comitantur, qui consequuntur.

- XXVIII. De luctu, exequiis, funeralibusque cerimoniis.
- XXIX. De solenni ossium translatione,
- XXX. De Serpentibus insignioribus.
- XXXI. Plura de eodem argumento, & aliis infectis.
- XXXII. De remediis contra venenatos insectorum ictus,
- XXXIII. De aliis infectis noxiis, eorumque remediis.
- XXXIV. Ejusdem argumenti de infectis continuatio.
- XXXV. De militari Abiponum ingenio.
- XXXVI. De Abiponum armis.
- XXXVII. De speculatoribus, consiliisque bellicis Abiponum.
- XXXVIII. De profectioe in hostem, com-
meatu, & castris Abiponum.
- XXXIX. De assultu, & quæ hunc præce-
dunt, industriis.
- XL. Quibus modis formidabiles se reddant
Abipones, & quando jure formidandi
sint?
- XLI. Quinam Hispanorum militum nomine
veniant in Paraquaria?



CAPUT XLII. Quæ Cæforum fors apud Abipones
victores?

- XLIII. De Abiponum armis, & aciei forma,
dum aliis cum barbaris conflagunt.
- XLIV. De anniversaria Victoriarum memo-
ria & computationis publicæ ritibus.
- XLV. De ritibus Abiponum, dum quis de
re militari bene meritus inauguratur,
renunciaturque Capitaneus.



Menda sic corrige:


Pag.	Lin.	Pro	Lege.
16	6	Versicoloribus	— Versicoloribus
17	22	propiores	— propiores
29	20	crinium	— crinium
45	2	venalia	— venalia
67	15	Chyrurgo	— Chirurgo
81	17	Propinguare	— Propinquare
95	30	Alieni	— Alicui
108	29	Inveterat amatrum	— Inveterata matrum
109	2	Arbortuumque	— Abortuumque
119	21	Quarentibas	— Quarentibus
123	34	motibu	— motibus
124	7	villosi	— villosos
—	8	pronissni	— Pronissimos
148	22	lmerfant	— lmerferant
—	30	Bellos	— Bello
174	14	singul	— singuli
185	3	Quem	— Quen
191	22	El- rka	— Elerka
192	12	affecti	— affecti
—	24	Iayra	— Tayra
200	23	ille	— illi
210	14	liguam	— linguam
229	22	Arbitro	— Arbitrio
243	26	sauciat a vomitu	— sauciata vomitu
256	9	salubritatam	— salubritatem
263	1	veratus	— versatus
268	31	Numia	— Numina
284	6	Herhariaque	— Herbariaque
294	14	ui	— qui
316	9	serpentes	— serpens
317	4	jaculantur	— jaculatur
318	19	Meditaminum	— Medicaminum
323	11	lufitatis	— lusitanis
331	15	Insinuare	— Insinuare


<i>Pag.</i>	<i>Lin.</i>	<i>Pro</i>	<i>Legs.</i>
354	22	Eus	— Ejus
362	31	Entis	— Cutis
364	4	occasinculam	— occasinculam
376	6	Durite	— Duritie
405	30	sericeis	— sericis
410	1	consilique	— consiliisque
436	16	disc-imen	— discrimen
437	28	Ed	— Sed
444	8	Europæ	— Europææ
448	1	Pente	— Repente
478	13	Protaxerit	— Protraxerit
499	2	Localatoët	— Lacalatoët

Si quæ alia minoris momenti menda, uti u pro n,
t pro r, h pro b, vel vicissim collocata inveneris,
tute corriges, benevole lector, & Typothetæ
veniam dabis.



RPJCB





J784

D634h

V. 2.

